



16200 P

Gio. Battista Sozzo G. B.

4290

# INSTITUTIONES PATHOLOGICAE AUCTORE LEOP. MARCO ANT. CALDANIO

*Phil. & M. D. Medic. Theoreticae. & Anatomes olim  
in Acad. Bononiensi, nunc in Patavino Gymnasio  
P. P. Profess. Reg. Scient. Academ. Londinens.  
Berolinens. Gottingens. Medic. Parisin. Instit.  
Bononiens. Socio, Scient. Litter. & Artium  
Patav. Academico Stipend. &c.*

EDITIO PRIMA NEAPOLITANA

POST TERTIAM ITALICAM AUCTA ET EMENDATA.



NEAPOLI MDCCCLXXXVII.

---

*Excudebat JOSEPH MARIA PORCELLI Bibliopola,  
& Typographus Reg. Acad. Militaris.  
Policez auctoritate.*



# AUDITORIBUS SUIS

L. M. A. CALDANIUS.

**A**rduum Scribenti ac perdifficile semper fuit ea angustis limitibus coercere , quæ nullis fere terminis sunt definita . Hoc cum de aliis Scientiis atque Artibus dici merito potest , tum multo æquius de Physiologia ac Pathologia , quæ Naturam omnem , quam longe lateque patet , complectuntur ; quamvis non pauci inveniantur Medici , qui , sibi nimium confidentes , in utraque hac Medicinæ parte plurimum se pollere glorientur . Sed erat novissimis legibus obtemperandum , quibus sanctum est , ut rerum pertractandarum Synopsin quandam proponeremus , quam fidelibus oculis subjectam consulere diligenter in antecessum possitis : hinc enini in Vos gemina utilitas redundatura fuerit ; altera , ne , cum publice privatimque res ipsas enunciemus , quidquam novum atque insolens Vobis accidat ; altera , ne , cum publicum de his ipsis rebus subituri critis examen , Vobis praesidia

deesse possint, quibus adjuti et Vobis laudem comparare possitis, et Praeceptorum nomen tueri, et munificentissimi Principis sollicitudini ac providentiae respondere. Nec vero solum in scribendis his, sed neque in explicandis, ausim profiteri rerum amplitudinem excequare me unquam posse. Hec cum mecum ipse reputarem, diurna nocturnaque manu versare non destiti eorum Auctorum volumina, qui in Theoretica Medicinæ parte immortalitatem sibi apud Posteros peperere. Quæ vero in scriptis hisce a viris præstantissimis Boerhaavia, Hallero, Gaubio, aliisque excerpserim, quæ silentio prætermiserim, quæ addiderim, quæ mutaverim, judicium vestrum esto. Hac autem in re præstanda, palam dico, non Magistris sed Vobis scripsisse me; quod ipsum etiam scribendi genus, nudum, simplex, ac nullis salebris impedatum, vel me tacente, testatur: quippe qui, ut cum Martiali loquar,

. . . . Nostræ sercula cænæ.

Malim Convivis quam placuisse Coci;

# INDEX

## CAPITUM.

CAP. I.	DE Morborum Natura. pag. 1.
CAP. II.	De Morborum differentiis in genere. 25
CAP. III.	De differentiis morborum essentialibus sive de specie. 48
CAP. IV.	De morbis simplicissimis ad simplicissima solida pertinentibus. 58
CAP. V.	De Morbis organicis. 70
CAP. VI.	De Humorum morbis, et primum de cohaesione aucta vel inminuita. 79
CAP. VII.	De Morbis ex humorum copia. 91
CAP. VIII.	De Morbis humorum proprio loco aberrantium. 102
CAP. IX.	De Morbis ex rubro Sanguine aut sero in vasa minorum generum traducto. 111
CAP. X.	De Morbis ex vitiis motus in humoribus. 127
CAP. XI.	De Morbis ex prava humorum qualitate in genere. 136
CAP. XII.	De Morbis ex prava humorum qualitate in specie. 150
CAP. XIII.	De Morborum causis generatim. 176
	CAP.

CAP. XIV.	<i>De Morborum causis speciatim ;</i> <i>et primo de Aere, tamquam mor-</i> <i>borum causa.</i>	194
CAP. XV.	<i>De Alimentis tamquam morborum</i> <i>causa.</i>	225
CAP. XVI.	<i>De Motu et quiete, tamquam mor-</i> <i>borum causa.</i>	236
CAP. XVII.	<i>De Vigilia, et somno, tamquam</i> <i>morborum causa.</i>	242
CAP. XVIII.	<i>De Animi Pathematibus, tamquam</i> <i>morborum causa.</i>	248
CAP. XIX.	<i>De Excretis et Retentis, tamquam</i> <i>morborum causa.</i>	260
CAP. XX.	<i>De Symptomatologia generatim.</i>	275
CAP. XXI.	<i>De Symptomatibus speciatim, et</i> <i>primuni de Dolore.</i>	285
CAP. XXII.	<i>De Anxietate.</i>	291
CAP. XXIII.	<i>De Symptomatibus pertinentibus ad</i> <i>organum Tactus.</i>	299
CAP. XXIV.	<i>De Symptomatibus pertinentibus ad</i> <i>organum Visus.</i>	308
CAP. XXV.	<i>De Symptomatibus pertinentibus ad</i> <i>organum Auditus.</i>	322
CAP. XXVI.	<i>De Symptomatibus pertinentibus ad</i> <i>Organum Olfactus.</i>	332
CAP. XXVII.	<i>De Symptomatibus pertinentibus ad</i> <i>organum Gustus.</i>	340
CAP. XXVIII.	<i>De Symptomatibus pertinentibus ad</i> <i>internos sensus.</i>	345
CAP. XXIX.	<i>De Symptomatibus pertinentibus ad</i> <i>functiones animales.</i>	352
	CAP.	

- CAP. XXX.** *De Symptomatibus pertinentibus ad functiones vitales, et primum ad Respirationem.* 366
- CAP. XXXI.** *De Symptomatibus pertinentibus ad actionem Cordis, et Arteriarum.* 372
- CAP. XXXII.** *De Symptomatibus pertinentibus ad functiones naturales, et prius quidem ad primas digestio[n]is vias.* 372
- CAP. XXXIII.** *De Symptomatibus pertinentibus ad secundas digestio[n]is vias.* 383
- CAP. XXXIV.** *De Symptomatibus pertinentibus ad vias urinæ.* 397
- CAP. XXXV.** *De Symptomatibus pertinentibus ad lesionem sensibilium qualitatum.* 411
- 416

## ERRATA EMENDATIONES

## IN TEXTU

Pag. lin.

23	14	uitra	ultra
38	6	evolationi	evolutioni
39	ult.	distinguatur	distinguantur
47	F	<i>artificium</i>	<i>artificum</i>
50	22	cum utraque	cum utræque
65	1	coherens	cohærens
118	10	quid	quod
120	3	aberrare	aberrare ; si
155	5	præcipe	præcipue
206	5	ex errore ioci	ex errore loci
225	14	<i>Num excessum</i>	<i>Num excessus</i>
230	19	menti obsersari	menti obversari
164	15	qu æporro	quæ porro
278	1	Syptoma	Symptoma
335	8	intetiores	interiores
379	16	311.	411.

## IN ADNOTATIONIBUS

46	7	Cum viveam	Cum videam
ibid.	13	mognopere	magnopere
123	2	affluxum	affluxum



# PATHOLOGIAE P A R S P R I O R.

## C A P U T I.

### DE MORBORUM NATURA.

*Quid Pathologia, et quæ ac quot ejus partes.*

Uod Græci PATHOLOGIAM vocant,  
Latinis sermo de præternaturali-  
bus, ut ajunt, humani corporis  
affectionibus dici consuevit. Af-  
fectiones istiusmodi apud Medicos  
*morborum* nomine veniunt; in  
quibus eorum natura, differentiæ, causæ, et  
symptomata concomitantia peculiarem conside-  
rationem expostulant. Necessaria hæc conside-  
ratio fecit ut Pathologia in partes quatuor tri-  
Caldani Pathol. A bue-

bueretur: in quarum prima de morborum natura , in altera de eorum differentiis , in ter tia de eorum causis , in quarta de symptomatibus ( de omnibus autem et singulis generatim ) dicendum esset .

*Quid pro rei alicujus natura intelligendum sit.*

2. Cum autem *Naturae* nomen frequenter a Philosophis ac Medicis usurpetur , idque apud priores plura significet , idcirco quid cum nos *naturam* diciimus intelligendum sit non inopportunum erit indicare . Est igitur apud nos *natura* id quod Veteres *quidditatem* dicebant: hoc autem vocabulo attributa designabant aut proprietates illas , quæ faciunt , ut res ea sit quæ reapse se se præbet , non vero alia . Quod sane idem est ac si diceres , *naturam* rei alicujus illud esse , quod rem ipsam constituit ; et quo propterea posito ponitur ipsa res , deficiente res illa non ponitur ; id quod rei ipsius *essentiam* significare videtur .

*Quæ natura valetudinis et morborum generatim .*

3. Quotiescumque igitur Pathologi morborum *naturam* sibi contemplandam ac describendam proponunt , non aliud sibi volunt quam attributa morborum in genere investigare atque aperire ; quibus porro attributis deficientibus jam non adesset morbus . Ut vero ægritudo quæcumque est affectio valetudini contraria , et *natura* valetudinis ea est ut corpus vivens fun ctio-

ctiones omnes libere , alacriter , et constanter exerceat ; ita *natura* morbi hujusmodi erit , ut viventis corporis functiones modo plures modo pauciores vel impedit , vel peculiari ratione perturbet .

*Quæ definitio cum valetudinis , tum morbi .*

4. Ex hac eadem *natura* cum valetudinis tum morborum utriusque hujus affectionis definitio orta est . Nempe valetudo est *ille status corporis humani* (1) qui *huic facultatem impertit aptam ad functiones omnes perfecte exercendas* : quemadmodum morbus definitur *status ille ejusdem corporis , qui facultatem tollit exercende actionis cuiuscunque , aut non sinit functiones peragi facile et absque incommodo* . Cum autem hæc sit generalis cum valetudinis tum morbi definitio , in Tyronum gratiam monere prius oportet quid sit *facultas* , quid *functio* seu *actio* , demum quot in humano corpos facultatum genera insint .

*Quid sit facultas et quid functio .*

5. *Facultas* idem est ac potentia ad aliquid moliendum : *functio* est ipsa facultas in actum adducta . Perperam igitur a nonnullis facultat-

A 2

tes

(1) Cum *humanum* dicimus , jam vivens omnes intelligunt : hominis quippe cadaver non idem est cum humano corpore .

tes cum functionibus seu actionibus confunduntur.

*Quot sint facultatum genera.*

6. Tria facultatum genera a Medicis in humano corpore constituuntur. Dici autem solent facultates istiusmodi *vitales*, *naturales*, *animales*: unaquæque rursus in alias dividi possit; et fortasse genera illa non sunt adeo inter se distincta, ut unius natura alterius naturam quadantenus non participet. Sed quæstionem hanc missam facimus; satius enim videtur, ad perspicuitatem, a recepta communi-  
ter divisione non recedere.

*Vitales facultates quæ sint, et quibus visceribus insideant. Quæ vitæ definitio secundum nonnullos. Quæ definitio magis propria.*

7. *Vitales* facultates eæ sunt, sine quibus vita stare non potest: ob hanc tantummodo rationem *vitales* appellantur. Pertinent eæ ad cor atque pulmones: quæ sane viscera dum propriis quodammodo defunguntur muneribus habetur quidem vita, verum non semper valetudinis *integritas*: neque enim vita animantium est *facultatum actionumque omnium conservatio* ut a nonnullis traditur; siquidem vita superest cum læsione aliarum etiam facultatum, de quibus paullo post. Ea definitio convenit potius valetudini, quæ vitam includit, quæque propterea vita *functionum vitalium conservatio* dici

dici potest. Ob id factum est ut vitales facultates merito dicerentur principes, cum iis vigentibus vita consistat, debilitatis autem vel conquiescentibus vita ipsa infirmetur et deficiat.

*Num facultates vitales sine aliарum adminiculo esse queant.*

8. Dum autem animalia vivunt, et facultatum principum exercitium facultates ceteras ad actionem impellit, ipsa etiam vita et vitalis facultas nonnullis indiget adminiculis, quibus foveatur ac perstet. Nam cordis et pulmonum actio per instrumenta exercetur, quæ, velut cetera omnia cum animata tum inanimata, usu debilitantur, deteruntur, ad agendum inepta fiunt.

*Quid præcipue ad earum exercitium requiratur.*

*Naturales facultates quæ sint, et a quibus visceribus exerceantur.*

9. Porro eorum, quæ deteruntur ac pereunt, reparatio a solis alimentis petenda est; quorum præparatione, alibili succo detritis locis apposito, exhaustisque pene canalibus novo repletis fluido, illud restituitur, quod vitæ actione singulis temporis momentis deperditur. Eam corporis molem, ad quam omnes et singuli plus minus perducimur, debemus iis quibus nutrimur. Humani corporis partes crescunt,

aliæ renovantur , coalescunt aliæ , si a causa aliqua separatæ fuerint ab invicem. Totum hoc a nutritione præcipue pendet , et facultas illa propter quam alimenta sic mutantur ut in materiam nutritionis facessere incipient , ea est quæ *naturalis* appellatur : cuius sane exercitium ad tubum pertinet alimentorum , nec non ad magnam abdominalium viscerum partem , quæ humoribus in propria substantia elaboratis ad digestionem ciborum , eorumque separationem in chylum et materiam excrementitiam suam operam conferunt .

*Num functiones naturales sine vitalibus  
esse possint .*

10. Sed quoniam alimentorum præparatio in primis et secundis digestionis viis absoluta non sufficeret , nisi quod præparatum fuit per universum corpus distribueretur , detritisve locis apponeretur , satis , ut arbitror , manifestum est , naturales facultates , quæ ad vitales conservandas plurimum faciunt , ipsas vitales ponere tamquam præexistentes ; quarum exercitio ac viribus et humores alimenta macerantes separantur suis locis , et conservatur calor , et movetur id quod debet atterere , et præparatur id quod proxime nutrire debet , præparatum autem opportunis locis admovetur , ut animale corpus vivat atque consistat .

*An vitales et naturales facultates exerceantur  
cum molestia.*

11. Facultatum cum vitalium tum naturalium exercitium mutationem ponit in instrumentis, quæ a natura fuerunt ad illud exercitium comparata: et nihilominus mutatio hæc non est hujusmodi, ut in eam animus advertat, aut ab ea commoveatur. Nemo, prospera utens valetudine, ex cordis, arteriarum, et pulmonum alternis motibus, a stomachi atque intestinorum naturali actione quicquam patitur; et quamvis ad alternum pectoris motum, nempe ad respirationem perficiendam, aliquis incommodi sensus nos compellat, quemadmodum in Physiologia demonstravimus; attamen, longum exercitium, et perexigua incommodi vis id præstant, ut nulla, ex respiratione secundum naturam, molestia nobis procreari videatur.

*Animales facultates quæ sint.*

12. Verum non eadem est ratio in omnibus facultatum generibus. Animales facultates, quas nunc exponendas aggredimur, hujusmodi sunt, ut ad eas exercendas vel mens compellat, vel in quarum exercitio mentis ipsius status mutetur; inde functiones, quæ hinc proficiscuntur, vocantur *animales*; quod mens atque animus, communiori consensu, sint unum atque idem. Huc pertinent propterea functiones omnes

nes a voluntate pendentes , nec non etiam illæ , quæ sensuum cum internorum , tum externorum ministerio peraguntur .

*Quid ad functiones pertineat animales .*

13. Motus igitur voluntarius , vel totius corporis , vel peculiaris cuiusque partis , ad functiones animales pertinet . Volo aut corpus , aut partem aliquam movere , aut a motu conquiescere ? Possum alterutrum perficere quotiescumque libuerit , quod ( ubi integre valeam ) facultas ad motum , aut ad quietem , in me est . Moveor reipsa , aut ex motu ad quietem revertor ? Atque en facultas in actum adducta , adeoque exercitium ad quod mens impellit ; quæ in eo voluntatis actu statum mutat . Inter noctis silentia aut somno indulgeo , aut meditationibus philosophicis : strepitus excitatur inopinanter ; excutior a somno vel a meditacione : et en mutationem in mente , quæ alio me distrahit , et quasi traducit . Ergo si functiones illæ dicuntur animales , ad quas non solum mens impellit , sed etiam in quarum exercitio mentis status mutatur , erit auditus functio animalis , et propterea etiam visus , et sensuum quorumcumque externorum exercitium .

*Num interni sensus ad easdem functiones referri queant .*

14. Cum autem ab externis sensibus ortum ducere videantur sensus interni , hi etiam inter

ter animales functiones erunt recensendi. Nam quis est qui in aliquid cogitans, illud sibi præsens non statuat in quod cogitat, aut quod saltem rationem aliquam habeat cum iis, quæ aliâs per externos sensus mentem commovereunt? Quis est qui in memoriam revocet ea quæ vidit, vel audivit, vel aliis externis sensibus excepit, absque efficta præsentia aliqua eorum, quæ ntitur in memoriam revocare? Quis demum tam fervida pollet atque admirabili imaginandi vi, ut ea sibi animo repræsentet, quæ nullam habent similitudinem aut convenientiam cum iis, quæ per externos sensus olim mentem affecerunt? Si absque his præsidiis hæc nemo præstare potest, neque pariter ideas comparare, et alia ex aliis deducere, seu ratiocinari, erunt propterea internorum sensuum functiones inter animales recensendæ.

*Quale esse debeat functionum exercitium in valitudine. Quid in morbis præter naturam se habeat.*

15. Si igitur functionum harum omnium, de quibus haec tenus, exercitium liberum, expeditum, constans, sine dolore ac molestia, valitudinem, quemadmodum diximus, constituit; morbus autem earum alias plus minus impedit aut perturbat; consequens est, ut vel fluidum vel solidum quod humanum corpus constituit, vel utrumque, præter naturam se habeat; pro-

ptereaque ab hoc vitio, tamquam a causa, solidorum vel fluidorum functio a naturali statu recedat sensibiliter; atque hinc functionis illius vitium per phœnomena in sensus incur- rentia se se prodat, ut ex his Medicus de morbi præsentia, indole ejus peculiari, et auxiliis ad ipsum dispellendum comparatis judicare queat. Vitia siquidem phœnomenis sensibilibus destituta, si quæ sunt, Medicorum operam non exposcunt.

*Quid functio lœsa apud nonnullos.*

16. Hæ sensibiles functionum lœsiones apud præstantissimos quosdam Pathologos unum atque idem sunt cum ipso morbo; inorbus quippe ab ipsis definitur *functio lœsa*, quæ sane definitio morbo generatim considerato apprime quidem convenit: Sed quoniam hæc vel illa ægritudo ex plurium simul functionum lœsione coalescit, hinc in Tyronum gratiam admoneamus, eam definitionem locum minime habere, cum de morbis in specie sermo est. Exemplo sit *Apoplexia*, in qua non tam internorum et externorum quandoque sensuum exercitium est impeditum, verum etiam, una cum defectu motus plurimorum muscularum voluntatis imperio famulantum, stertens aliquando et difficilis respiratio conjungitur: id quod satis indicat plurium simul functionum lœsiones *Apoplexiæ* constituere.

*Quot*

*Quot modis functiones lœdi possint.*

17. Læsio autem functionum, quæ præsentiam morbi in genere significat, vel in excessu posita est, vel in defectu, vel ad quamcunque aliam pertinet mutationem sensibilem, quæ secundum naturam non sit. Excessus exempla habemus in motibus convulsivis, ut adjunt, muscularum; in fame canina; in vomitu, diarrhœa, lienteria, febris, et morbis aliis; in quibus violenta nimis est actio viscerum, quæ sub affectionibus istiusmodi laborant. Læsiones ex defectu patent in muscularum paralysi; in vitiis plurimis sensuum cum internorum tum externorum; in amissa facultate digerendi alimenta, et sic porro in aliis affectionibus. Tandem de mutationibus aliis præter naturam certi sumus in depravatione quarundam functionum. Ita fit aliquando ut videamus vel audiamus, quod alii, integra frumentis valetudine, sub iisdem circumstantiis neque vident, neque audiunt; aut illud appetamus quod in nutrimentum converti non potest.

*Ad quot classes læsiones referri queant. Exempla quæ id confirmant.*

18. Ceterum omnes sive læsiones sive mutationes præter naturam, quæ in morbis occurront, ad duas classes commode referri possunt; quarum altera sit earum læsionum seu mutationum, quæ ortum ducunt ab impedimentoali-

aliquo in functionis exercitio ; altera vero eorum , quæ debentur defectui conditionis alicujus , quæ ad functionis illius exercitium requiritur . Ita , ut exemplis utamur ad perspicuitatem , si quis paralysi laboret in musculo elevatore palpebræ superioris alterutrius oculi , videndi facultate destituitur oculus ille , quamvis in tunicis , vasis , humoribus , et nervis , bulbus sit optime constitutus . Contra vero , oculi cornea , vel ipsa lens crystallina , vel humor sive aqueus , sive vitreus , obscurantur ; opacitas nascitur , et perit videndi potestas . En in primo casu cæcitatem ex impedimento in exercitio functionis ; oculus enim sanissimus palpebra tectus non videt ; dum in altero casu cæcitas oritur ex defectu conditionis ad visum requisitæ : dehent enim et cornea , et lens crystallina , et humores pellucere , ut lucis radii ad retinam traducantur , eamque percellant . Idem censendum de syncope ex tristinuncio , aut ex odore olfactum violentius commovente ; et de syncope propter gravem sanguinis jacturam . In primo casu , quia nihil est mutatum in fabrica viscerum circulationi famulantium , aut in sanguine vasis contento , nascitur syncope ex impedimento in cordis motu propter spasticam nervosi systematis affectionem ; in altero autem casu syncope fit a sanguinis inopia , seu defectu conditionis ad cordis motum requisitæ .

*Num morbi omnes ad has læsionum classes  
reduci possint.*

19. Ad duas hasce læsionum classes morbi omnes pertinere videntur, sive ii in solidis sedem habeant, sive in fluidis, sive in utrisque. Nam ubi sanguis et humores non fuerint optime constituti, læduntur certe aut impediuntur aut alia ratione perturbantur facultates, ad quarum exercitium vel sanguis ipse, vel peculiares humores concurrunt a sanguine secreti. Hoc demonstrat viriū debilitas, et perturbatio aut impedimentum secretionum atque excretionum quarumdam in febribus, aliisque morbis a vitio fluidorum primum obortis: neque enim functiones a solidis tantum partibus in peculiaria organa seu instrumenta coagmentatis exercentur, verum etiam a fluidis. Præter quam quod cum instrumenta liquoribus aut perfluxa sint, aut imbuta, certa quadam ratione temperatis; nemo inficias ibit quin mutata liquorum eorum indole, sive in principiorum proportione, sive in horum qualitate, sive in motu, instrumenta aut inepta, aut certe minus apta fiant, quæ propriis imuneribus ad naturæ leges defungantur. Diximus autem sive in motu, quod in nulla viventis ac sani corporis parte fluidum quiescens peculiarem functionem absolvat: quinimmo, si penitus quiescat, morbum faciat, æque ac si motu agitetur paullo violentiori.

*An medicus debeat de statu mentis ægrorum  
quicquam cogitare.*

20. Quamvis autem maxima motuum pars animæ psæsentiam requirat, et licet functio-nes interdum lædantur ex animi affectibus, quorum efficacia animalis æconomia aut tota in turbas conjicitur, aut languet propemodum re-soluta, non ideo tamen Medicus est in ægro-rum curatione de animæ statu quicquam cogi-tare. Tum quod nullum est Medicorum im-perium in id quod corporeum non est, et sub-stantiam non tantum differentem sed primo di-versam a corpore constituit; tum quod cogi-tatio hæc parum conferre videtur ad morbum cognoscendum, nihil vero prorsus ad eum cu-randum. Et revera, quis unquam Medicus ad hæc usque tempora in curando delirio vel fe-brili, vel melancholico, vel maniaco; in sen-su restituendo vel per syncopem ablato, vel per apoplexiam; in vi digerente instauranda propter tristem animi affectum debilitata; quis, inquam, Medicus in curandis his morbis, in quibus aut mens sibi non constat, aut qui a mentis affectionibus ortum duxerunt, qui tunc sit animæ status vel obiter cogitavit? Hoc ut, ego quidem censeo, ne ipsi Stahliani præsti-terunt; qui in febribus, inflammationibus, aliisque morbis affinibus, cor, animæ potestate, in celeriores ac validiores motus impelli con-tendebant: quorum sententiam viri non pauci  
præ-

præclarissimi (1) ita etiam nuper refutarunt , ut nefas prorsus videri possit Stahlianorum argumentis in præsens commoveri .

*Quæ proponi possit objectio . Objectio solvitur .*

21. Et tamen , objicere posset aliquis , medicinæ subjectum , ut appellant , esse animatum corpus ægrotans , non mortuum : dum enim sermo est de tuenda valetudine , aut de amissa restituenda , quæ duo Medici officium constituunt , palam est , alterutrum ex his , immo utrumque , in animato tantum corpore locum habere . Quæ cum ita sint , quî fieri potest , ut Medicus vel animæ scientiam negligat , vel de animato principio nihil cogitet , cum in propriæ artis administratione versatur ? Ideo autem hæc negligere debet ; quia vel sublatis impedimentis , vel restitutis conditionibus in instrumentis , quæ animæ imperio parent , quæ corpus constituunt , movent , ac dirigunt ; ipsa quoque mens , si forte ejus constitutio vi morbi aliquid passa fuerit , ad consuetas revertitur operationes . Neque tamen ex eo quod in aliquibus morbis mens sibi non constat , aut in aliis impar est ad proprias operationes , ideo mentem physice inutari existimandum est , veluti

(1) Vid. Cl. Burserii *Inst. Med. Pract.* In Chym. ment. de *Inflamm.*

Iuti mutantur corpora ipsa: aliud enim est quod ea instrumenti vitio commoveatur, aliud quod vi aliqua aut aliquo morbo proxime la-befactari atterive possit.

*Ratio eorum, quæ postremo loco proposita sunt.  
Quid medicina systematica.*

22. Hæc leviter indicare consultum duximus de iis mentis affectionibus, quæ a morbis profiscuntur, aut quibus mentis affectiones occasionem præbent; propterea quod hodiernis temporibus Stahlianorum secta, quæ omnia cum in valetudine tum in morbis ad mentem referrebat, iterum Regnum ponere videtur. Liberum unicuique esto per illud Regnum cum Recentioribus quibusdam exspatiari: quod ad nos attinet ex ejus finibus longe recedimus, non secus ac ab iis, quos tanquam limites Secta mechanica sibi circumscripsit. Insunt quippe in viventi corpore functiones et motus, quos, absente animato principio sentiente atque impellente, instrumenta per se nequeunt absolvere: et, contra, motus exercentur non nulli, etiam in cadavere, adeoque sine principio animati præsentia, quos propterea huic principio tribueret absurdum foret. Hinc negotium omne in vita, in valetudine, in morbo, aut animato duntaxat principio, aut mechanicas tantum viribus, acceptum referre nefas est. Oh hanc rationem ab his extremis cavere omni modo nitemur: neque enim in altera ex his hy-

hypothesibus eos decet conquiescere ; qui secundum notas corporum proprietates et leges ; quantum quidem sine abusu fieri potest , functiones omnes explicare nituntur , et Medicinam tradunt Systematicam ; videlicet experimentis atque observationibus tamquam fundamentis innixam . Systema quippe illud est , quod utroque hoc præsidii genere fulcitur : reliqua , hypotheses dicuntur aut suppositiones , in quibus Auctorum ingenium potius quam rerum veritas elucet . Exemplo sit motus muscularis . Celeberrimi viri , qui primas tenuerunt in Literaria Republica , ex vesiculis fibras componi ; spiritus acidæ naturæ esse ; globulos sanguineos aera bullula in centro occupari , quæ cum spiritibus influentibus effervescentiam iniret , hæc inquam omnia assumpserunt tamquam demonstrata ; dum interim motus muscularis phænomena , musculorum fabrica , et sanguinis indoles , commenta hæc , atque alia in hunc finem proposita , prorsus deleverunt .

*Quid medici officium , et quid ad illud requiratur .*

23. Neglecta igitur a Medico , in ægris etiam delirantibus , quacunque mentis consideratione , in id totus incumbat , quod læsas functiones in naturalem statum restituere potest . Ad hoc autem præstandum maxime eum decet humani corporis fabricam , quantum quidem fieri potest , penitus cognoscere ; ut quæ sint

Caldani Pathol.

B

fun-

functiones, quæ conditiones ad earum exercitium sint necessariæ, quæ functionum ipsarum instrumenta, quæ demum in sanis phænomena edant, omnino perspiciat. Ut enim hæc omnia differunt inter se, cum non unius generis sint functiones, non iisdem instrumentis singulæ exerceantur, neque easdem conditiones requirant, non eosdem effectus producant; quantum, et quomodo aberrent, et morbum constituant, absque Anatomes et Physiologiæ studio, non poterit unquam percipere.

*Quæ alia necessaria sint.*

24. Præterea sunt etiam morborum quorumcunque causæ cognoscendæ (de quibus suo loco,) quæ vel manifestæ, vel, quod sæpe fit, latentes sunt. Si autem, ubi patent, accurata atque prudenti ratiocinatione opus est, ut intelligamus num ex cùm effectis convenient; multo accuratior certe requiritur ubi, cum latent, ab effectuum consideratione ad earum cognitionem adscendere nitimur. Quid si dicam, (quod neminem fugit) eorum omnium quæ in mōrbo sensibus patent, causas esse interiores, ac propterea solo ratiocinio dignoscendas? In phrenitide, ut exemplo utar, delirium, febris acuta, furor, jaæstatio, faciei rubor, oculi truces, ac similia, conspicua sane sunt; atque hæc omnia perturbationem indicant in cerebri functionibus: at ipsius cerebri constitutio, indeoles sanguinis per vasa de-

cur-

## PATHOLOGICÆ.

currentis, ratio propter quam in caput velocius impetit, mutatio nempe in cerebro et humoribus, quibus alluitur, sensibus est inaccessa; ac post accuratum etiam ratiocinum, conjecturis tantummodo locus relinquitur.

*Functionum lœsia, quibus inditiis se se præbeat.*

*Quot species phænomenorum.*

25. Cum vero dicimus accurate investigandum esse num effectus suis causis respondeant, jam palam fit effectus istos hujusmodi esse debere ut in oculos incurrant. Incurrunt autem per phænomena morbum comitantia, quæ *symptomata* etiam appellantur, aut *signa*, pro diverso considerationis modo, quemadmodum suo loco patebit. Atque hæc porro phænomena si præcipua, nempe ejus sint indolis ut morbi præsentiam maxime indicent, et magnam partem constituant, sunt totidem functionum læsiones; sin minus præcipua, ab iisdem læsionibus primario procedunt aut secundario: primario quidem, si cum morbo ipso necessariò conjungantur; secundario autem, si, cum ab iisdem causis nata sint, morbus tamen sine iis phænomenis esse possit; aut si, cum ab aliis agentibus profecta fuerint, morbum exasperant, et ideo gravius affligunt quia corpus ægrotat. Ita in acutâ febre, nimia pulsus frequentia est phænomenon præcipuum quod læsam indicat functionem cordis: calor nimius, inde natus, est necessarius frequentiæ illius ef-

fectus, adeoque phænomenon cum ea læsione necessario coniunctum: capitis dolor, aut ingens sitis, aut aliud simile symptomata, ab ea frēquentia et calore proficiscuntur quidem, sed tamen non semper febri adjunguntur; cuius exacerbatio propter animi affectum, aut aeris accessum, aut rimedii alicujus usum intempestivum, phænomena gignit secundaria; quatenus (ut de siti diximus et capitis dolore) acutam febrem non semper comitantur.

*Unde phænomenorum diversitas et copia.*

26. Quam varia sit horum phænomenorum īdoles ex hacenus dictis facile est intelligere, et vix satis dici potest. Nam, posita etiam in pluribus Individuis earum causarum natura ac vi, cum hæ causæ alias atque alias interdum partes afficiant; diversa sit hominum constitutio; conditiones in corporibus variis sæpe inter se differant; ita fit, ut morbos aliquos atque alios producant, et proinde phænomena toto cœlo dissimilia. Hinc valde præstat nosse hujus vel illius Individui peculiarem constitutionem, ut, inter hanc et causas supervenientes, atque ad morbum excitandum aptissimas, tum et inter phænomena morbosa, instituta comparatione, rectum de morbi natura iudicium ferri possit.

*Quæ presidia ad diversitatis causas cognoscendas  
sint maxime accommodata.*

27. An facile sit judicium istiusmodi vide-  
rint ii , qui , dum accuratiores theorias negligunt , in ea sunt sententia , ut ars medica solis fere observationibus inniti debeat . Inepte quidem ( libere enim loquor ) agunt ii Medici , qui dum ægrös visitant , per theoriæ Regnum curiosius et inaniter evagantur : utilitas quippe , quam theoriis assequimur , in eo sita est , ut cognita functionum natura in statu sano ; instrumentorum fabrica ; eorum usu , atque cum aliis connexione ; morbi sede ; impedimentorum indole , vel conditionum defectu ( n. 18. ) ; perspecta causa , eaque comparata cum phænomenis quæ in orbem antecésserunt et comitantur ; ipsius morbi natura melius innotescat ; quo proinde opportuna auxilia in usum traducantur , et qualis futurus sit evèntus prænunciétur . Sapienter porro in hanc rem Boerhaavius . Ut curem surdum , inquit ille , non debo mentem ejus docere quid auditus sit ; sed ita disponere organum , ut DEUS dispositum esse voluit , ut ex définito statu corporis definita idea sequatur . Hæc autem dispositio requisita eo tandem collineat ; ut conditiones restituantur in auditus organo quæ ad sonum excipient dum , ejusque impressionem menti traducendam , sunt necessariæ . At quicumque noverit quam composita sit auris fabrica , quot præterea

rea modis vitiari possit , quot conditiones ad auditum requirantur, quam multiplices sint partes , in quibus æque multiplices surditatis causæ propriam sedem habere possunt ; is porro intelliget, utrum Medicum deceat accuratioris **Anatomæ et Physiologiæ** studium post habere.

*Num hæc præsidia sufficiant.*

28. Neque tamen existimet aliquis sola hæc præsidia , quæ nempe ex Anatomico et Physiologico fonte deproluntur , ad rectam sufficere artis administrationem , quemadmodum nonnulli contendunt . Hisce quippe adjumentis Praxeos Medicæ studium , et frequentem atque accuratam observationem eorum quæ in ægris occurruunt adjungere necesse est . Descriptio enim quamvis exquisitissima phænomenorum , quibus morbi stipantur , non parum differt a phænomenis ipsis in sensus incurrentibus . Omnia simul , ægrotantis inspectione , quasi oculos ponuntur , quod non facile sola ac simplici descriptione obtineri potest ; et certa quædam momenta , ut ita dicam , in quibus aut aliquid moliri aut ab omni opere abstinere præstat , doctus pernoscit Clinicus , quæ a Practicis plerisque , seu potius Empiricis , tum et ab iis qui in Theoricis plurimum versati Praxeos exercitio parum aut nihil dederunt operam , per imperitiam penitus negligerentur . Ex quibus colligere pronum est cum Theoreticis disciplinis etiam Practicas esse conjungen-das,

das, ut, cognita mōrbī sede ac natura, apta remedia opportunis temporib⁹ in usum traduci queant. Theoricas autem disciplinas cūm dico, non eās intelligo, quæ luxurianti Philosorum ingenio, hypothesibus omni momento de novo cūdendis comparato, superstructæ sunt; verum eās quæ cognitis dumtaxat sanioris Physicæ legibus, atque anatomicis observationibus innixæ, æconomia animalis cūm sanæ, tum ægrotantis phænomena explicant laudabiliter, et sensibilem partium structuram, certamque inter ipsas connexionem nobis exhibent; non vero hypotheticam, qualem fortassis in minims investigandis contemplandisque vitra plurimum augentia, et pericula quædam præconceppta jam pridem opinione suscepta, videntur obtrudere. Ceterum ubi alterutrum inter hæc præcipua artis fundamenta in Medicis occurret, non vero utrumque, Theoricis citius quam Practicis in recta morborum curatione primas deberi, cum ratione tum exemplis Celeber. Alambertus (1) demonstravit. In qua tamen sententia non ita facile acquiescerem, tum ob ea quæ modo proposuimus, tum ob id maxime quod ægrotans corpus, in plurimis, a sanitatis legibus recedat. Quid prodesse igitur

(1) *Mélanges de Letterature &c.* Tom. V. pag.  
69. 70.

tur potest instrumenta et leges nosse quibus sanum corpus regitur, si legibus aliis quasi dicam obtemperat cum ægrotat? Tantum videlicet, quantum Clinicus veræ anatomes et Physiologiæ ignarus; qui videt quidem, minime autem observat, cum iis sit destitutus præsidii, quæ ad observationem accuratam instituendam, atque ad certa corollaria ab ipsis observationibus deducenda, sunt maxime necessaria. *Inutilis ergo (ut cum Ill. Gortero (1) loquar) est omnis cognitio physiologica, inutilis est omnis empirica medicamentorum traditio, nisi utraque jungatur. Nam cognitio morbi sine auxilio, atque auxilium sine cognitione, ægro laboranti sunt inutilia.*

# PATHOLOGIAE

## PARS ALTERA.

### C A P U T    II.

*De morborum differentiis in genere.*

29. Post morborum naturam eorum differentias indicandas aggredimur, et quidem generatim: enimvero differentias alias; quæ peculiares dici queunt, absolute hoc Capite, singillatim persequemur. Quod antequam facimus, monitos volumus Adolescentes, illud nobis nequaquam constituisse, ut de omnibus et singulis disseramus. Non quod eas omnes, quas Pathologi quidam Clarissimi pertractarunt, tamquam inanes aut falsas reiiciamus; sed tum quod brevitati studemus quam maxime, tum etiam quod earum differentiarum plures adeo per se pateant, ut peculiari quadam enumera-  
tione minime indigere videantur. Quis enim cum Sennerto ex sola accidentium considera-  
tione tercentas et amplius morborum differen-  
tias minute persequi velit? Multiplex hæc differ-  
tiarum copia Tyrone obruit potius, quam  
doceat. Si cuilibet autem tot differentiæ arri-  
deant, vim illis non inferam ut ab iis abhor-  
reat. Suum quisque noscat ingenium, dicebat

Tul.

Tullius, atque ad id quod facere potest de-  
trudatur.

*Quæ morborum differentiæ dicantur accidentales;  
quæ vero essentiales.*

30. Interim morborum differentiæ distingui primum solent in *accidentales*, atque *essentiales*. *Accidentales* eæ sunt quæ a particularibus morborum circumstantiis desumuntur, nempe aut varia causarum sede; aut origine diversa; aut ætate; aut sexu; aut anni tempestate; aut morborum duratione; aut propriis horum sive temporibus, sive periodis, magnitudine, compositione, indole peculiari, ac similibus. Hæc enim omnia proprios habent characteres, quibus differunt inter se. Differentiæ autem *es-  
sentiales* pertinent propriæ ad vitia cum solidorum tum fluidorum, quæ cum non ejusdem sint indolis, neque easdem omnia et singula functiones exerceant, diversis pròpterea modis laedi possunt, et hinc morbos non parum inter se differentes efficere, cumque hæ differentiæ à morbi natura, seu intrinseca ejus ratione protluant, ipsorum quasi morborum es- sentiam videntur constituere. De accidentalibus primum dicemus, utpote facilioribus ad intelligendum, et magis etiam generalibus.

*Qui morbi Idiopathici dicantur, et Sympathici.  
Horum morborum exempla.*

31. Primo itaque distinguuntur morbi in *I-  
dio-*

*diopathicos et Sympathicos.* *Idiopathicus* ille dicitur qui sedem habet et causam in ea ipsa parte, quæ affecta est. *Sympathicus* autem vocatur ille, qui non in parte affecta, in qua nempe morbus se se prodit, sed alio in loco et sedem primariam habet et causam. Ita, ut exemplo utamur, *Apoplexia*, quæ fit a cœbro coïpresso, et sensum cum internorum tum externorum exercitum tollit, et libertatem, ut videtur, plurimorum motuum voluntariorum, est morbus *Idiopathicus*. Pariter *Epilepsia* nata à causa intra caput, quæ nervorum principium irritet, vocatur *Epilepsia Idiopathica*: contra, *Epilepsia*, quæ comitatur aliquando morbosam uteri aut hypochondriorum affectionem; vel delirium a dolentibus hæmorrhoidibus; aliæque ægritudines similes, quæ causam habent ac sèdem extra partem affectam, dicuntur morbi *Sympathici*.

*Qui Deuteropathici, et Protopathici. Horum morborum exempla.*

32. Altera morborum differentia, quæ, cum superiori aliquam habere videtur affinitatem, ea est, ob quam distinguuntur morbi in *Deuteropathicos*, seu secundarios, et *Protopathicos*, sive primarios. *Deuteropathicus*, ille est, qui priori morbo, nempe *Protopathico*, supervenit: adeoque intelligitur et quid sit *Protopathicus*, est enim idem ac morbus primum existens; et simul intelligitur dictiōnēm hanc, nempe *Pro-*

*topathicus*, locum non habere ubi morbus *Deuteropathicus*, seu secundarius non superveniat. Ita, exempli causa, si uteri inflammationi delirium accedat, uteri inflammatio dicitur morbus *Protopathicus*; delirium autem, *Deuteropathicus* appellatur (1). Manifestum igitur est, hanc morborum differentiam plerumque non convenire cum ea, quae morbos distinguit in *Idiopathicos* et *Sympathicosis*; cum saepissime hi postremi, si cum *Idiopathicis* jungantur, prioribus superatis evanescant. Plerumque diximus; nam si accidat ut morbi causa exigitudinem in parte excitet in qua sedet, et simul etiam paullo post partem aliam remotam afficiat; unde morbus *Idiopathicus* cum *Sympathico* conjungatur: aut si fiat ut devicto morbo *Idiopathicus* *Sympathicus* non tollatur; hic non amplius *Sympathicus* dicetur, verum secundarius, seu *Deuteropathicus*: atque ita perspicuum est differentias paullo ante indicatas omni prorsus congruentia non esse destitutas.

Qui

---

(1) Non sum nescius delirium in his aliisque similibus circumstantiis superveniens a nonnullis tanquam symptomata considerari: verum quia non raro peculiarem curationem exposcit, & quandoque (præseruit in uteri inflammatione) devicto priori morbo, aliqua superest mentis aberratio; idcirco delirium superveniens secundarius morbus potius quam symptoma rectius appellati posse videtur.

*Qui morbi hæreditarii. Qui connati. Qui morbi acquisiti.*

33. Tertio loco distinguuntur morbi in *hæreditarios*, *connatos*, et *acquisitos*. *Hæreditarii* ii sunt, qui a parentibus in filios propagantur. Hujusmodi sunt interdum Epilepsia, Podagræ, Arthriticæ, Rachiticæ, Venereæ, Scorbuticæ, aliæque similes morbosæ affectiones. *Connati* ii appellantur, qui nobis in materno utero adhuc conclusis aliquando superveniunt, sive ob perversam uteri vel structuram vel positionem, sive ob nutritionis vitium qualemunque, sive deum ob peculiarem quamdam vel animi vel corporis materni ægritudinem. Deum *acquisiti* morbi quinam sint vel ipsum nomen declarat: ad horum enim classem pertinent deformitates, et morbosæ quædam affectiones in partu primum nascentes, vel ex ejus difficultate, vel obstetricum imperitia, dein nutricum atque custodum: tum et ægritudines omnes, quæ a variis causis profectæ, homines ab ortu usque ad interitum affligere possunt.

*Num connati morbi idem sint cum hæreditariis.*

34. An vero *connati* morbi unum atque idem sunt cum *hæreditariis*? Non desunt Auctores qui id contendant. Nos autem cum plerisque hos inter se discriminandos esse censemus; quod *hæreditarii* ponant ipsos parentes

iisdem morbis obnoxios esse, aut fuisse: *connati* autem seu *congeniti* non item: potest enim gravida mater peculiari morbo torqueri, proles autem, quam gerit, ob hanc causam non ad eandem ægritudinem disponi, sed ad morbos omnino diversos. Huc spectant tot valetudinarii, qui propter morbos quosdam matris affectus quo tempore ejus utero excipiebantur, vitam ducunt plus minus languidam, et minimis de causis ægreduntur.

*Qui alii morbi ad connatos pertinere possunt.*

35. Ad *connatos* morbos pertinere etiam possunt nævi, maculæ, deformitates quædam, quas ignarum vulgus ex matris imaginatione fœtui communicari posse arbitratur: aliud quippe est absona hæc nævorum ab causa istiusmodi nascientium opinio; aliud vero quod valida mentis ægritudo in prægnante matre animalem ejus œconomiam perturbans, ipsum proinde fœtum sic afficiat, ut is ad peculiares quasdam ægrotationes subeundas aptus fiat. Vivit enim ac nutritur fœtus humoribus matris, et in hujus utero continetur; ac propterea humorum vitia, tum et solidorum ad uterum pertinentium, aut partium quæ cum utero cohærent, ipsumque vel præter naturam comprimunt, vel alia ratione afficiunt, non difficulter ipsi fœtui communicantur. Ab his causis, non secus ac a perversa uteri vel structura vel positu; a perturbata, aut impedita, aut præcipiti partium qua

quarundam evolutione , ac proinde nutritionis vitio; a vasorum numero , distributione , amplitudine , quæ a naturali statu recedat, citius quam a matris imaginatione , nævos ac deformitates quasdam oriri rationi videtur magis consentaneum .

*Num ætas morborum differentiam constitutæ.*

36. Differunt quarto loco morbi inter seratione ætatis. Notum quippe est infantes ac pueros certis quibusdam morbis obnoxios esse, aliis vero cum adolescent, consistunt, consenescunt. Præter morbos quibus interduin corripiuntur ex respiratione primum inchoata : aeris exterioris appulso ; mutato sanguinis circuitu per hepar præcipue; absurdâ compressione fasciarum (quamvis infantes non sint fortasse adeo liberi servandi, ut nullo prorsus repagulo coercentur); præter morbos ex lactatione et verminibus, quibus frequenter vexantur ; præter variolas et morbillos, qui sane morbi infantibus ac pueris sunt magis familiares , alios recensuit Hippocrates lib. III. Aphorismorum, N. XXIV. XXV. XXVI. Eodem libro morbos commemoravit proprios pubertatis, ætatis maturæ , et senectutis : qui porro morbi N. XXVII. XXIX. XXX. XXXI. ejusdem libri indicantur .

*Num idem de sexu dicendum.*

37. Verum præter mala hæc omnia ab Hippocrate memoratata , alia etiam sunt virorum  
pro-

propria , alia mulierum , propter partium generationi inservientium diversitatem : quinimmo mulieres aliis morbis affliguntur , menstruis vel primum ingruentibus , vel fluentibus , vel suppressis , vel per etatem deficientibus ; aliis in partu ; aliis statim a partu ex lochiis , ex affluxu lactis ad mammas , aut cum lac ipsum , sive statim , sive progrediente tempore , a mammis repellitur : quorum porro morborum muliebrium plurimos Hippocrates persecutus est Aphorismorum libro quinto ,

*Qui morbi acuti , et chronicī . An acutorum natura in sola temporis brevitate sit .*

38. Sic varium temporis intervallum , quod morbi percurrunt priusquam ad finem perducantur , differentiam aliam constituit . Nam distinguuntur morbi in *acutissimos* ; in *peracutos* ; in *acutos simpliciter* sive *exquisite* , ut dicunt ; in *acutos non exquisite* ; in *acutos ex decidentia* , et demum in *chronicos* . *Acutissimi* quartam diem non excedunt ; *peracuti* , septimam ; *acuti exquisite* , decimam quartam ; *acuti non exquisite* , vigesimam aut vigesimam primam : demum *acuti ex decidentia* , quadragesimam . Qui hoc temporis intervallum trascendunt , generatim vocantur *chronici* . Neque tamen quis existimet solam temporis brevitatem , acutorum essentiam , ut sic dicam , constituere : brevitati enim adjungi debet symptomatum vehementia , et proinde periculum : secus ; morbus , si proprie-

loquamur, non acutus, sed brevis potius dum taxat dicendus est.

*Num morborum tempora differentiam faciant, et quot ea sint. Quid principium. Quid augmentum. Quid status seu vigor, et declinatio.*

39. Sexto loco differunt morbi in temporibus uniuscujusque morbi propriis; quæ sane tempora a Medicis dicuntur quatuor esse, et quæ, etiamsi locum habeant cum in acutis tum in chronicis, communius tamen et frequentius in iis considerantur potius quam in istis. Vocantur autem quatuor hæc tempora, *principium, augmentum, status seu vigor, et declinatio*. *Principium* illud est, in quo morbus modum illum servat, quem primo accepit, sine ullo incremento. Ubi morbus vires intendit, hæc virium intensio constituit tempus illud, quod *incrementum* dicitur. Cum morbis adeo increvit, ut crescere amplius non possit, neque tamen declinet, sed acceptam vehementiam conservet, tunc dicunt Medici morbum esse in *status seu vigore*. Demum ubi morbum sensim viribus decrescit, tunc status hic dicitur *declinatio*.

*Quibus signis hæc tempora indicentur.*

40. Verum quatuor hæc morborum tempora non solum iis indicantur modis, quos paullo ante commemoravimus, sed simul etiam signis Caldani Pathol.

Cru-

eruditatis et coctionis , quæ in excretis apparet : siquidem principio excreta omnia cruda sunt ; nempe plus minus , in qualitate præcipue , recedunt a statu naturali : dum augescit morbus aliqua apparent coctionis signa ; videlicet excreta accedere incipiunt ad statum secundum naturam : dum viget , apparent luculentius : deinde cum declinat , concoctio morbosa materiæ est absoluta ; eaque aut partim aut penitus eliminata est .

*Quot modis hæc tempora a Medicis considerentur.*

41. Duplici autem modo hæc tempora a Medicis considerantur ; generatim videlicet atque speciatim . Generatim quidem , cum tempora hæc ad integrum morbi decursuni referuntur : speciatim vero cum referuntur ad singulas morbi exacerbationes . Ita febris intermittens vernalis rite tractata septem plerumque circuitibus sponte absolvitur . Hi septem circuitus , simul sumpti , non modo quatuor morbi tempora comprehendunt superius memorata ; sed hæc tempora comprehenduntur etiam a singulis circuitibus , seu exacerbationibus , seu paroxysmis ; qui sane paroxysmi et incipiunt , et increscent , et vigent , et declinant .

*Num in morbis differentiam afferant anni tempora.*

42. Aliam morborum differentiam constituunt anni tempora , quo factum est , ut morbi non nulli

nulli vernalis dicantur; alii aestivi; autumnales alii; alii demum hyemales. Sectio tertia Aphorismorum Hippocratis, a N. I. præcipue autem ab aphor. XX. usque ad XXIV. qui ætatum morbos incipit commemorare, hanc differentiam describit luculentissime. Ad rationem hujus differentiæ investigandam plurimum facient ea quæ suo loco dicemus, cum de aeris mutationibus harumque effectis sermo erit.

*Qui morbi remittentes et intermittentes. Qui continui. Qui continentes.*

43. Octavo loco ea venit consideranda morborum differentia, qua morbi ipsi a Medicis (præsertim ubi de febribus edisserunt) dividuntur in *remittentes*, *intermittentes*, *continuos*, et *continentes*. Cum vero quid sint *remittentes* atque *intermittentes* ex ipso nomine perspicuuntur, dicemus tantummodo qui *continentes* sint, qui etiam *continui*. Dicuntur autem *continui* morbi illi, qui toto eorum cursu corpus quidem affligunt, verum ea ratione, ut aliquibus horis increcent et vigeant, aliis vero aliquantulum remittant. Videntur propterea unum ferre atque idem cum *remittentibus*: et forte discrimen, ubi litem de nomine afferre non debet, in eo tantum situm est, quod in *remittentibus* proprie dictis remissionis atque exacerbationis tempora frequenter infestent toto morbi curriculo; et quod certus quidam insit ordo in horum temporum recursionibus. Certe

febres, quas remittentes vocant, aut quotidianæ, aut tertianæ, aut quartanæ typum servant (1); quæ exacerbationum frequentia, qui-que earum ordo in *continuis* locum non habet. *Continentes* vero morbi appellantur ii, qui eodem prorsus virium gradu ab initio usque ad finem decurrunt. Solent nihilominus *continentes* morbi pro *continuis* promiscue usurpari; atque hoc quidem præcipue cum de febribus sermo est: id quod Cl. etiam Heisterus admonuit in *Medicinae Compendio*. Fortassis autem ex eo confusio hæc orta est, quod rari admodum sint morbi, et præsertim febriles, qui certis quibusdam horis, aut temporibus, quamvis incertis, non recrudescant, et aliquantis per remittant; ex quo proinde fit, ut ea differentia, quæ morbos distinguit in *continuos* et *continentes*, magis subtiliter quam vere excogitata videatur.

*Qui periodici, et num idem sint cum intermittentibus.*

44. Non idem autem censendum est de morbis *intermittentibus* et *periodicis*. Sunt quippe *intermittentes* etiam *periodici*, non vero *periodici* omnes ad *intermittentes* referri debent: si quidem *periodici* dicuntur illi, qui determinato quo-

(1) Sauvag. Nosolog. Clas. II. Synopsis. Ordo II.

quodam tempore revertuntur. Sive autem tempus hoc aut mensis , aut hebdomadæ , aut diei unius vel alterius , aut demum horæ alicujus spatio comprehendatur ; idem prorsus est : videlicet *periodorum* nomine communiter insigniuntur .

*Qui recidivi .*

45. At cum non raro , inter alias ægritudines , intermittentes maxime febres jam fugatæ revertantur , et recursus istiusmodi illud constituat quod *recidivam* Medici appellant ; propterea factum est ut Pathologi quidam differentiis accidentalibus eas etiam annumerarent , quas morborum dicunt *recidivantium*. Hoc igitur nomine ii donantur , qui jam dispulsi vehementius plerumque redeunt ; sive quod eorum causa non penitus devicta fuerit , sive quod pars quæ morbi vim prius pertulit pristinum robur non hactenus recuperaverit . Intermittentes febres , quemadmodum diximus , non secus ac affectiones arthriticæ , rheumaticæ , apoplecticæ , paralyticæ , physicæ , scorbuticæ , venerealæ , ictericæ ; hæmorrhagicæ , cephalalgiæ , aliæque ægritudines in hunc censum referri possunt .

*Qui anniversarii .*

46. Revertuntur etiam morbi alii , sed ratione paullo diversa : nempe certis anni temporibus eadem ægritudo , quæ primum invasit ,

iterum aggreditur iterumque. Cominune hoc esse solet affectionibus catarrhalibus ; arthriticis , asthmaticis ; inflammationibus nonnullis , aliisque ægrotationibus. Inter quatuor anni tempora vernum et autumnale horum morborum evolutioni plurimum conferunt. Igitur anni tempus , huic morborum reversioni veluti constitutum , fecit ut Pathologi hos morbos cum *recidivantibus* , ut ajunt , non consunderent , sed *anniversarios* appellarent .

*Qui morbi magni , et parvi .*

47. Morbi præterea vel *magni* sunt , vel *parvi* ; inde alia enascitur morborum differentia . *Magni* ii censentur qui a graviori causa proficiuntur , ideo graviora producunt symptomata , in quibus etiam intensio , numerus , extensio , ac duratio considerantur ; magni autem ob id præcipue appellantur , quia non raro actiones nobiliores vel magnopere lœdunt , vel multum perturbant sive gradus incremento , si- ve copia , sive partium affectarum multiplicitate , sive demum pertinacia . Ex his facile est percipere quinam morbi dicantur *parvi* . Ceterum præstantissimi quidam Pathologi in morbis , quos *magnos* vocant , modo periculum subesse scribunt , modo non . Recte porro , si magnitudinem ad symptomata seorsim referant , quæ intensa esse possunt , et tamen functiones præcipuas aut parum aut nihil lœdere ; velut in *Ephemera* molestissimus capitis dolor aut sitis

sitis intensissima: minus vero recte; si quid ego video, ubi symptomata ejus sint indolis, qua metum incutiant.

*Qui morbi compositi et simplices.*

48. Sed quoniam fit ut morbi plures aliquando insimul copulentur; hinc orta est morborum differentia in *compositos* et *simplices*. *Compositus* itaque dicitur morbus ille, qui morbum aliud adjunctum habet, et proinde symptomatibus stipatur cum alterutrius morbi propriis, tum aliis, quæ ex utriusque ingenio componuntur. *Simplex* vero est ille, qui ab unica proxima causa procedit, uni tantum loco insidente, ac propterea symptomata habet ipsius tantum morbi naturæ convenientia. An igitur *simplices* rectius dicuntur ii, quorum unica est proxima morbi causa, ut nonnullis placuit; *compositi* autem illi qui ex plurium istiusmodi causarum connubio exsuscitantur? Et cur non? Qui enim morbus ab altero superaddito exasperatur, cum a propria tum a supervenientis morbi causa proxima evidenter exsurgit; adeoque symptomatibus praeditus est, quæ utriusque morbi naturæ respondent.

*Qui morbi benigni.*

49. Cum autem morborum naturam dicimus, ea differentia non est silentio prætereunda, quam affert peculiaris ipsorum morborum indoles, quæque facit ut morbi distinguatur in

*benignos et malignos*, ut Nostri loqui amant. *Benigni* dicuntur morbi illi, qui humani corporis functiones non valde lœdunt aut perturbant; qui a manifesta et debili causa proficiuntur; qui ordinem servant in propriis temporibus, in coctione materiæ morbosæ ejusque evacuatione; quique præterea cum non magnis urgeant symptomatibus, neque metum afferant, curationem recipiunt ( ubi tamen minime negligantur, et ubi rite tractentur ( sive ab arte, sive a natura comparatam.

*Qui maligni.*

50. *Maligni* contra, quos appellant, ii communiter dici solent, qui benignitatem simulant, seu, ut alii dicunt, insidiose mites, insuetis sœviunt symptomatibus, gravissimis et repente ingruentibus: alii *malignos* eos vocant, qui absque causa manifesta œconomiam animalem magnopere turbant: alii *malignitatem* in eo sitam esse contendunt, quod pariter sine manifesta causa summam virium debilitatem adjunctam habeant: demum alii *malignum* morbum eum vocant, qui vehementibus et periculosissimis affligit symptomatibus, et cuius causam vincere ea ratione, ut coctio superveniat, et proinde critica evacuatio, difficile admodum est. Est autem æque difficile dijudicare quæ inter has definitiones aptior censenda sit. Fortasse difficultas in eo sita est, quod idea *Malignitatis*, si proprie loqui velinius,

mor-

morbis nequaquam conveniat. Ut ut se res habeat, in eo consentit maxima Clinicorum pars, ut *maligni* dicantur morbi illi, qui a causa foventur pessimæ indolis, apta nata ad solidorum robur maxime infirmandum; quique a symptomatibus gravissimis inopinanter supervenientibus vi intenduntur; et symptomatibus quidem insolitis, id est cum natura morbi, ut videtur, neutram convenientibus; quasi nempe *malignum* id appellare velint, quod proprium ingenium non patefacit, cum ob id quod symptomata invicem comparata non respondeant, nempe dissentiant inter se; tum ob id quod causa proxima alia sit ab ea, quam phænomena insimulant cum ipso morbo conjuncta.

*Qui morbi pestilentes. Num hæc pestilentum morborum descriptio sit accurata.*

51. Morborum distinctionem in *benignos* et *malignos* ea excipit differentia, quæ morbos discriminat in *pestilentes* et *contagiosos*. *Pestilentes* dicuntur ii, saltem communius, qui a peculiari miasmate excitati, adeoque a causa penitus ignota, in plures grassantur simul eodem tempore, cum omnis generis gravissimum symptomatum congerie, præsentissimoque vitæ periculo. Diximus *pestilentes* ita *communius* describi, quia nimirum ii, propter miram symptomatum diversitatem, nequeunt apte definiri: modo enim inter symptomata numerantur

tur bubones, vel carbones, quos Græci dicunt *Anthraces*, vel exanthematicæ quædam eruptiones variis corporis locis, præsertim vero in collo, aut facie, sub axillis, in inguinibus; modo sudores colliquantes, ut dicunt; modo sanguinis effusiones ex cutis poris; modo demum gangrænæ partium quarundam peculiariū.

*Num inter morbos pestilentes et pestem discrimen intercedat.*

52. Sunt etiam qui differentiam faciunt inter pestem proprie dictam, et morbos pestilentes: quod néimpe ea multo plures simul invadat; plures interficiat; gravioribus symptomatis adoriatür; demum ex causa unica pendeat; contra quam pestilentes morbi, quorum causa partim a principio sparsim prius grasseant; sine contagii suspicione; partim vero a peculiari quodam vitio, sive in aere sive in alimentis insito, suppeditatur.

*Qui contagiosi.*

53. Ad *contagiosos* quod pertinet, hoc nomine ii describuntur morbi, qui per contactum communicantur: ex quo patet, *pestilentes*, qui et ipsi per contactum sive proximum sive aliquando etiam remotum communicari solent, simul etiam esse *contagiosos*, non autem *contagiosos* simpliciter dictos esse *pestilentes*. Ita scabies, lues venerea, tabes, variole, febres non-

nōnullæ acutæ communicantur sæpe per contactum ; aut certe prædispositi , ex contactu , promptius iisdem morbis afficiuntur , aut iis gravius infestantur ; et tamen hujusnodi morbos nemo dixerit pestilentes .

*Qui morti Endemici .*

54. Ut vero pestilentes sunt etiam epidemicī , ita altera est morborum differentia indicanda : nempe morbi alii *endemici* sunt , alii *epidemicī* , alii demum *sporadici* . *Endemicos* appellamus eos , qui sive Regionum , sive Civitatum , sive locorum quorundam peculiarium proprii sunt : ita *Bronchocele* , vulgo *il gozzo* , morbus est alpinis gentibus familiaris , aliquibus præcipue Terræ locis , quemadmodum *Scorbutus* iis qui oras incolunt maritiinas . Neminem porro latet , febres indolis intermittentis , at plerumque anomalæ , eorum fere proprias esse qui in paludosis locis vitam ducunt .

*Qui Epidemici .*

55. *Epidemicos* morbos illos dicimus , qui plerumque a vitiis in aere nascentibus ipsiusve aeris inquinamentis profecti , plures ecclē tempore corripiunt ; propterea nimirum quia ea aeris vitia , tum et causæ aliæ , sive externe sive internæ conditionum quarumdam origini occasionem præbent ; unde postea causâ quadam generali superveniente , quæ conditio- nes illas jam corpori inhærentes quasi dicam  
ex .

exsuscitet atque acuat , peculiaris quædam ægritudo in plurimos grassatur. Verum hi morbi non sunt proprii unius potius loci quam alterius ; quiique , secundum peculiarem dispositionem individuorum quæ aggrediuntur , varia inferunt symptomata plus minusve periculosa ; quo fit ut non raro sub specie aliorum morborum in diversis ægrotantibus se se præbeant.

*Qui Sporadici .*

56. Demum morbi illi , qui neque coïntunniter , neque in speciali quadam Regione grassantur , adeoque non plures uno eodemque tempore sed hos aut illos separatim invadunt , ii sunt quos Medici vocant *Sporadicos*. Ita podagra ejusque species diversæ , pleuritides , calculosæ affectiones , denique ægritudines illæ omnes , quæ maxime a prava vitæ et victus ratione ortum ducunt , sunt morbi *sporadici* , qui ubique locorum homines , neque tamen simul plurimos , interdum infestant .

*Qui morbi legitimi . Qui Spurii .*

57. Est et alia morborum differentia , quæ morbos distinguit in *legitimos* et *spurios* . *Legitimi* ; quos alii vocant etiam *exquisitos* , ii censemur , qui propriam naturam retinent ; adeoque et suis peculiaribus symptomatibus iisque ordinariis se se produnt , et constituto quodam tempore finem habent . Alii *genuinos* , alii *regulares* appellant . *Spurii contra* sunt ii , qui

qui neque propriam servant naturam , neque ordinaria symptomata habent adjuncta , neque, ut plurimiuin , certum habent et constitutum tempus , quo ad finem perducantur . Hos alii dicunt *corruptos* , alii vero *anomalos* .

*Qui morbi mortales , sanabiles , insanabiles ,*  
*Qui morbi salubres .*

58. Dissimilis pariter morborum finis atque eventus morbos distinguit in *salubres* , *mortales* , *sanabiles* , *insanabiles* . Ipsa nomina rem penitus declarant ; et ea præcipue quæ pertinent ad tres species postremo loco memoratas : nemo enim , ut arbitror , confundet *insanabiles* cum *mortalibus* . Etenim qui morbi *mortales* sunt , *insanabiles* etiam dici merentur ; non tam morbi omnes *insanabiles* sunt *mortales* . Cæcitas , ut unico tantum exemplo utar , aliquando sanari non potest ; verum plures cæci vitam ducunt . Quod attinet ad morbos *salubres* , qui alias nempe morbidas affectiones dispellunt , febres periodicæ vernales non raro propriæ salubritatis exempla præbent ; fugant enim longas et contumaces febres autumnales . Non raro etiam febris leviores apoplexias , et paralyses , et convulsiones tollit , aut mitiores reddit ; ea ferme ratione , qua nonnulli morbi cutem affligentes quasdam chronicas vincunt ægrotationes , quæ nulla remediorum vi curari potuerant .

*Qui*

*Qui retrogradi.*

39. Cum autem cutis affectiones commemo-  
ramus, quemadmodum ex aliquando ab exte-  
rioribus partibus irrumpunt in interiores, et  
quidem ut plurimum cum ægrotantium pericu-  
lo, hinc nata est ea morborum differentia,  
quæ fecit ut apud nonnullos morbi quidam di-  
cerentur *retrogradi*, aut *retrocedentes*. Ad quam  
porro classem, præter cutis ægritudines cum  
febre aut sine febre, ulcera referuntur, bu-  
bones, et alterius generis tumores (1).

*Num*

(1) Neminem latere puto quantum Clinici, & qui-  
dem jure meritoque, ulcerum præfectim antiquorum soli-  
dationem reformident, nec non etiam tumorum quorun-  
dam repercussionem, ut appellant, maxime ubi hi tu-  
mores criticam indolem præferant. Quærerem autem li-  
benter cur non æque reformident scabiei repulsionem ?  
cum videam plerisque in locis, immo in urbibus princi-  
pibus, linimenta sulfurata & mercurialia ad scabiem de-  
pellendam publice venditari. An hoc ideo sit, quod exi-  
stiment cutaneum hunc morbum, ejusque species a vermi-  
culis, seu insectis minimis tantummodo excitari, atque  
hic a contagio dumtaxat originem ducere? Si hoc, vereor  
mognopere ne id ponant tamquam certum ac demonstra-  
tum, quod adhuc in quæstione est. Non infector, quin  
insecta quædam scabiem quandoque exfuscent, aut cum  
ea conjugantur: sed cum sèpius scabies criticas observa-  
verim; viderim aliquando eas repercussas in pectus impe-  
tere, & phytum facere; intestina promptissime cancrena  
afficere & ægrum jugulare; & ubi haec mala cito non  
afferant, ægritudines alias febribus, easque maxime peri-  
culosas progressu temporis evolvere, quarum aliquæ scabie  
revertente mitescunt atque sanantur; cum haec, inquam,  
ita

*Num artificum morbi differentiam constituant.*

60. Non desunt tandem qui considerato ingenio morborum quibus torquentur Artifices, hos ipsos morbos differentiam specialem facere opinati sint. Certe materia, quæ ab aliquibus tractatur, eorum vitæ genus, aer sub quo vivunt, alimenta quibus vescuntur, hæc, inquam, omnia aptissima sunt quæ differentes morbos exsuscitent. Nam ubi vita maxime exercitata est, inflammations præ aliis acutis affectionibus facilius ingruunt: qui inter metallorum effluvia vitam ducunt, pectoris morbis obnoxii sunt, iliacos dolores, colicos, paralyses patiuntur. Tusses ac phytyses sunt iis communes, qui lino, cannabis, lanisque depectendis ac purgandis operam navant. Pruriginosis affectibus, ulcerosis, scorbuto peculiari, infelix præ ceteris Remigum turba divexatur, et sic porro morbis aliis specialibus alii Artifices afficiuntur. Non est igitur negandum ab his causis ægrotationes progigni non parum diversas; hæ autem, cum naturâ seu intrinseca ratione ab aliis differant, videntur potius essentiales, quam accidentales differentias constituere.

CA-

---

Ita se habeant, excusatum me velim, si, cum scabiei infestationem plurimum laudo ad chronicos quosdam morbos vincendos, ejus repercussionem, utpote ratissime tentandam, vehementer improbo.

## C A P U T III.

DE DIFFERENTIIS MORBORUM ESSENTIALIBUS  
SIVE IN SPECIE.

*An potiores morborum differentiae accidentales  
fuerint enumeratae.*

61. Hactenus eas morborum differentias in-  
dicavimus, quæ cum a peculiaribus  
quibusdam accidentibus desumantur, idcirco  
*accidentales* appellari solent. In harum enumera-  
tione videbimur fortasse aliquibus nonnullas  
potiores omisisse; et quidem eas præcipue,  
quæ ab extraneis quibusdam conditionibus sunt  
repetendæ; quæ porro conditiones adesse pos-  
sunt aut abesse, manente eadem morbi natu-  
ra, atque ipso prioris morbi nomine. Verum,  
aut plurimum fallimur, aut certe differentiae  
istiusmodi ad eam classem referri possunt, quæ  
morbos distinguit in *primarios* et *secundarios*;  
aut ad eam procul dubio, quæ morbos discri-  
minat in *magnos* et *parvos*. Ut hoc manifestum  
fiat, liceat exemplo aliquo rem illustrare.

*Probatur exemplo, conditores quasdam superven-  
ientes facere morbos magnos aut parvos.*

62. Proprium est inflammati ventriculi, præ-  
ter acutam febrem quam habet adjunctam,  
intumescere ea ratione, ut regio Epigastrica  
cum

sum dolore tumida fiat: intimum molesti ardoris sensum ad cordis, ut dicunt, scrobiculum patiatur æger; tum et sub costis spuriis, præcipue sinistrorum; et dolor sane ad dorsum usque pretendatur. Quæcumque alia intumescentia, etiam dolorem excitans, ubi et absque febre acuta sit, et sine ardoris sensu, quamvis eundem locum occupet idemque viscus; non erit ventriculi inflammatio. Fit autem interdum, ut ventriculi inflammationem comitetur difficultis respiratio; aut difficultas in deglutiendo, vel in ructuum explosione, aut hæc omnia simul cum ejus visceris inflammatione conjungantur. En itaque in his phænomenis seu symptomatibus extraneas eas conditiones, quæ adesse possunt aut abesse, manente eadem morbi indole. In allato exemplo acuta febris, intumescentia, dolor, et caloris molesti sensus in locis paullo ante indicatis, constituunt morbum *primarium* (N. 32.): Symptoma autem difficultis respirationis, deglutitionis, ac ructuum explosionis, si Medicopem exquirant, ad morbum pertinent *secundarium*, et ægritudinem exasperant. Commode igitur differentiæ istiusmodi ad eam referri possunt, quæ morbos (N. 47.) discriminat in *magnos* et *parvos*: et si fiat ut affectus *secondarius magnus* et ipse sit, ubi alter eorum minus vehemens fuerit, alter in ratione ad alterum *parvus* poterit appellari.

*Differentiae morborum essentiales quæ sint.*

63. Dimissis itaque morborum differentiis *accidentalibus*, iis videlicet, quas alii dicunt *secundarias*, protinus ad *essentiales* sermonem convertimus, quæ definiri posse videntur ex, propter quas morbus naturâ sua seu intrinseca ratione ab altero discriminatur; et quæ proprie ad vitia pertinent cum solidorum tum fluidorum, et quasi morborum essentiam, ut ajunt, videntur constituere.

*Ad quot classes revocari possint.*

64. Ad duas autem classes, tanquam ad summa capita, hæ differentiae revocari possunt: quarum altera morbos *simplicissimos*, ut appellant, comprehendat, altera autem *organicos*. Ideo vero distinctio istiusmodi locum obtinuit apud Pathologos, quod animalis corporis partes ab Anatomicis in *simplicissimas* atque *organicas* fuerint dispertitæ. Hoc igitur vel illo nomine morbi appellantur, pro ut in *simplicissimis* aut *organicis* partibus sedem habent.

*Qua methodo de his differentiis agemus.*

65. Longum nimis esse arbitramur morbos utriusque speciei ex mente Auctorum recensere; quod hi fortasse morbi citius hypothetici quam veri dici mereantur, quemadmodum in sequentibus sumus demonstraturi. Quod igitur ad nos attinet, postquam brevissime in-

me-

memoria revocaverimus, ad clarioris doctrinæ gratiam, quæ partes dicantur *simplicissimæ*, quæ vero *organicæ*: quæ differentiæ in *simplissimis* morbis attendendæ occurrant; pauca primum subjungemus de morbis *simplissimis* ad solida pertinentibus, nec non etiam de morbis *organicis*, ne a Recentioribus penitus recedere videamur; secundo de morbis auctæ vel imminutæ cohæsionis in humoribus; tertio de morbis ex humorum copia; quarto de morbis fluidorum proprio loco aberrantium; quinto de motu eorum cum aucto tum imminuto; sexto deinceps de prava ipsorum humorum qualitate.

*Quæ sint partes simplicissimæ. Quo alio nomine insignitæ fuerint. Quæ sint organicæ.*

66. *Simplicissimæ* igitur partes sunt illæ, et quæ sibi ipsis similes sunt, et similes etiam toti quod componunt; quæque propterea solidis partibus omnibus sunt communes. Ita videntur in Physiologia fibram minimam, quæ lineam refert seu potius gracilem cylindrum, et laminulas quasdam, quarum latitudo ad longitudinem majorem habet rationem, esse *simplissima* animalis corporis elementa. Hæ partes *simplissimæ* dicuntur etim *similares*, quia, ut in allato exemplo, carneæ fibrillæ, et laminulæ cellularis membranæ non solum similes sunt sibi ipsis in omni, ut ita dicam, pun-

cto ; verum etiam fibris aliis muscularibus , aliisque cellulosis laminulis , tum et muscularis atque cellulosis membranis , quæ ex filis ac laminulis componuntur . Ex harum *simplicissimorum* partium conjunctione , accendentibus præsertim vasis , pars *organica* exsurgit ; nempe instrumentum quod figuram et magnitudinem habet determinatam ; certain quamdam cum aliis connexionem et proportionem ; quod demum nonnullis prædictum est proprietatibus , quibus ad certa quedam munia obeunda fit aptissimum .

*Quot differentiæ in morbis simplicissimis attendendæ sint secundum nonnullos .*

67. Quod pertinet ad differentias , quæ in *simplicissimis* morbis attendi debent ex mente Pathologorum ; ex tres censentur præcipue . Prima spectat ad sedem morbi , qui vel fluidas vel solidas potest partes occupare , easque *simplicissimas* : altera ad vitium alicujus earum qualitatum , quibus et solida et fluida prædicta sunt ; cum utraque qualitates seu dotes habeant non solum generales sive communes , verum etiam proprias : tertia deinceps differentia ad vitium pertinet proportionis inter solidum et fluidum , inter solidum et solidum , et denique inter fluidum et fluidum .

*Num solidum simplicissimum lœdi queat sine  
fluidi vitio: et vicissim.*

68. At vero quod morbi modo partes solidas obsideant *simplicissimas*, modo fluidas ejusdem naturæ, seu quod vitia in his *simplicissimis* partibus primum nascentia morbum propriæ constituant, id quidem, nisi plurimum fallimur, hypothesim potius sapit quam veritatem. Nam primum quærerem libenter, ubi fibra aut laminula *simplicissima* in animali corpore occurrat ita a reliquis sejuncta, ut cum aliis sive fibris, sive laminulis, sive vasculis, *organicam* partem non componat, quo propterea ipsa per se, organo illæso, perverti possit? Quærerem an ullum detur in eodem corpore solidum, quod fluidum aliquod non habeat intermixtum, et quod certis non renovetur temporibus? Quærerem deum si absque functionum sensibilium lœsione, adeoque sine vitio organorum (quæ sola ad functiones exercendas sunt comparata) morbus esse queat? Quæ porro omnia cum locum non obtineant in humano corpore, quî fieri poterit ut vel solidum *simplicissimum* sensibili functioni edendæ imparatum vitio aliquo labore, sicque morbum faciat; vel labes sive in solido sive in fluido primum nata, si non protinus, saltem paullo post alteri non communicetur, quo propterea nisi solidum aut fluidum in genere, alterutrum saltem in specie vitium contrahat? Noxa so-

lius solidi, neque tamen *simplicissimi*, fortasse in morbis quibusdam chirurgicis tantummodo locum habet; raro admodum aut fere nunquam in iis, quorum curatio spectat ad Medicos. Non ideo tamen inficiamur aut solidum aut fluidum hujus speciei prius perverti non posse: id solum contendimus, morbum phænomenis sensibilibus neutiquam se prodere usque dum vitium *simplissimis* tantum partibus insideat.

*Num communis solidorum qualitas perverti possit sine vitio fluidorum.*

69. Alteram modo differentiam ad examen revocemus, nimirum investigantes num aliqua solidorum qualitas, eaque sive communis sive propria, vitium contrahere possit superstite integritate fluidorum; aut eadem fieri queant in quadam fluidorum qualitate absque solidorum noxa. Principio statuimus, pro qualitate seu dote solidorum communi sumi posse cohæsionem illam, qua cuiilibet corpori solida ipsa resistunt. Fac igitur ut cohæsio hæc imminuantur; et protinus videbis fluida, quæ a solidis impelluntur, lentius moveri, atque hinc congestiones suboriri, quarum efficacitate fluidorum indoles pervertitur.

*Num qualitas communis fluidorum vitium contrahat illæsis solidis.*

70. Eadem prorsus est ratio de fluidis relate ad solida. Ponamus enim communem flu-

de-

dorum qualitatem esse cohaesionem particulatum componentium adeo minimam , ut aliae super alias nullo negotio excurrant et ab invicem separari possint ; quinam erint effectus naturalis hujus cohaesioneis mutatae , si ea vide- licet ex causa aliqua incrementum susceperit ? Nimirum , ubi fluidorum particulæ nimis inter se cohærent , fluida ipsa in solida vehementius impingent ; quo ea et nimis distenta , et cito detrita , in propriarum functionum exercitio a naturali statu recedent .

*Num idem dicendum i. de qualitatibus propriis solidorum .*

71. Quod de communib[us] cum solidorum tum fluidorum qualitatibus asserimus , ad qualitates seu dotes propriae traduci potest : Sensitivitas , irritabilitas , secretio , excretio , fluidorum attenuatio , propulsio , ac similia , sunt qualitates solidorum proprie[tes] , quarum nempe aliæ peculiaribus solidis convenient , sed non omnibus . At quis ignorat sensum auctum in dolore facere fluidorum congestiones ; imminutum aut deletum partium nutritionem prohibere , et gangrenam quandoque afferre ; nimiam vim irritabilem , adeoque motus augmentum , fluida promovere velocius , et s[ecundu]s sepe validius atterere ; secretiones excretionesve vel auctas , vel imminutas , vel deficientes , humores depravare ; fluida non propulsa stagnando corrupti , non attenuata crassescere et retardari ;

validius attrita ex phlogisti evolutione vehementer incalescere?

2. *de qualitatibus fluidorum propriis.*

72. Si vero propriæ fluidorum animalium qualitates ad indolem pertinent aquam, mucosam, concrescibilem, oleosam fluidorum ipsorum, satis manifestum est aquam exsuperantem laxare solida; minorem quam natura ferat obstructionibus occasionem præbere; acrem ipsa solida irritare, augmentum partis mucosæ aut concrescibilis canales et meatus reddere impervios; alterutrius humoris dissolutionem, seu attenuationem nimiam, solida infirmare, quæ præterea non apte nutriuntur; demum olei incrementum vel exaltationem, ut dicunt, propter admixtam partem inflammabilem solida ipsa lacessere, ac distendere præter modum. Ex quibus omnibus et singulis liquido patet, neque solidum *simplicissimum*, neque *simplicissimum* fluidum, sive in communibus sive in propriis eorum qualitatibus ita perverti posse, et phænomena morbosa in sensus incurrentia procreare, quin unius labes alterius etiam labem inferat.

*Num vitium proportionis constituat morbum simplicissimum.*

73. Demum quod vitium proportionis inter solidum et fluidum, inter solidum et solidum, atque inter fluidum et fluidum, ad morbos per-

pertineat partium *simplicissimarum*; adeoque ad morbos *simplicissimos*, hoc quidem a veritate maxime alienum videtur. Nam hoc ipsum *proportionis* nomen excludit, ut ita dicam, casum morbi *simplicissimi*, et morbi *compositi* ideam exhibit. Et revera, aut ego fallor magnopere, aut cum *proportionem* dicimus, rationem intelligimus peculiarem inter solidum et fluidum, vel inter speciem unam et alteram sive solidi sive fluidi: quæ omnia sine compositionis idea concipi omnino nequaquam possunt.

*An prorsus inutilis sit morborum simplicissimorum tractatio.*

74. Etsi vero satis superque demonstratum putem quod ab initio proposui, morbos vide<sup>re</sup> licet istiusmodi potius hypotheticos censendos esse quam veros; cum tamen lucem aliquam affundant pathologicæ morborum, propterea quod in his aut solidum magis peccat aut fluidum sive cohaesionis vitio, sive qualitate aliqua speciali, sive demum proportione, aliove modo; et possint vitia istiusmodi, quæ citius morborum causæ dicenda forent quam morbi particulares, in partibus *simplicissimis* primum subnasci etiamsi tunc temporis phænomenis sensibilibus nequaquam se præbeant; cum hæc, inquam, ita se habeant, non inutilis omnino videtur eorum pertractatio: quam ob rem de morbis *simplicissimis* pauca præmittemus.

## C A P U T IV.

DE MOREBIS SIMPLICISSIMIS AD SIMPLICISSIMA  
SOLIDA PERTINENTIBUS.

*Quot vitiis simplicissimæ partes sint obnoxiae.*

75. PARTES CORPORIS SIMPLICISSIMÆ ( n. 66. ) VITIIS QUIBUSDAM sunt obnoxiae , quæ porro vitia , si Recentiorum sententiam sequamur , ad quinque Classes ; cœl totidem Capita , referri possunt . Vel enim fibræ et laminulæ nimio labore præditæ sunt aliquando , vel nimia debilitate ; vel possunt esse laxæ nimis , vel nimis rigidæ ; vel demum a mutuis contactibus separari et dissolvi . Vocant , postremam hanc affectionem , *solutam unitatem* . Nos laxitatem tantum considerabimus , et cohesionem nimiam , quod debilitas cum laxitate plurimum convenire videatur , dummodo tamen cum cohesionis decremento facilis distensio conjungatur , augmentum vero cohesionis ideam rigiditatis exhibeat . Chirurgorum officium est de soluta unitate disserere , ne , si Pathologico ordine hanc etiam fibræ affectionem describere velimus , in definitionibus duntaxat tradendis ; et paucis differentiis indicandis tempus conterrere videamur .

*Num facile sit cohæsionis vitium cognoscere. ;  
Quo modo quadantenus cognosci queant.*

76. Difficile nimis est definire quinam cohærentiæ gradus in fibris bonæ valetudini convenient, quo proinde fiat, ut recessus ab his gradibus, sive in defectu sive in augmento, morbum constituat. Ut enim singula fere individua peculiari partium températurā; quæ a singulari elementorum cohæsione et proportione procedit prædicta sunt; ita illud, quod unius valetudinem facit atque conservat, alterum morbum inferre potest. Una tamen spes est ad id, aliqua saltem ratione, assequendum: nempe cognitio habitus corporis, vitæ generis, ætatis, ac sexus uniuscujusque individui.

*Utilitas modi probatur exemplis.*

77. Ita vir carnosus, adultus, præsertim qui in labore vitam dicit, tum etiam senex, fibris nimis cohærentibus instructus esse debet. Pinguis, macilentus, otiosus, iners, pueri, et feminæ, fibrarum laxitate, si generatim loquamus, fere omnes laborant. Si causa alterius accedit, quæ in fibris constitutionem inducat naturali et sanæ prorsus contrariam, alteruter in morbos incurret, qui a laxitate fibrarum exoriuntur, et contra macilenti, feminæ, pueri inertes, aucta naturali, cohæsione, quæ laxitate peccabat, melius se habebunt, et robustiores fient, si tamen cohæsionis augmen-

tum intra certos limites non definiendos consistat; secus morbos patientur ex fibris nimis cohærentibus provenientes.

*Quæ cautiones adhibendæ.*

78. In his autem cavendum ne morbosum dissimus id, quod secundum naturam est. Insunt enim in humano corpore partes, quæ natura sua validius cohærent cum in propriis elementis, tum etiam cum proximis ac similibus; aliæ vero quæ cohærent minus; quinimum ætas ipsa aliam atque aliam partium cohæsionem facit. Carneæ fibræ, ut exemplis res illustretur, in singulis individuis magis cohærent, in propriis elementis, quam laxæ cellulosæ membranæ: carneis fibris magis etiam cohærent tendineæ; mox cartilagines; demum ossa, quorum elementa sunt reliquarum partium omnium validius cohærentia. Præterea, inter cellulosas membranas densiores et laxiores, quot insunt diversæ cohæsionis gradus intermedii! Quæ mollitudo et partium laxitas in embryone, si comparetur cum firma ea cohæsione, quæ earundem partium propria est cum homo consenescit! Ossium epiphyses per ætatem vanescunt, firmiter coalescentes cum apophysibus; et apophyses ipsæ crescente ætate solidescunt, non secus ac ossa, quorum elementa in senibus validissime junguntur inter se. Usque dum autem major hæc vel minor cohæsio partium secundum naturam se habet, nulla effungi potest idea morbi

bi simplicissimi , qui iis partibus inhæreat ; morbus enim tunc solum aderit , cum præter naturæ ordinem id fiat laxum , quod validius cohærere debet , aut contra : si tamen vitium alterutrum ita simplicissimis partibus insideat , ut organi , quod ex his comparitur , functionem lœdat quomodo cunque .

*Quæ fibra dicatur laxa .*

79. His præmissis duo illa vitia scrutemur , quæ in fibris considerare polliciti sumus ( n. 75. ). Laxam itaque dicimus fibram illam , quæ lente proprios edit motus ( si ad motus naturæ sua fuerit comparata ) facile autem cedit agentibus , quæ paullo violentius eam vel distendunt , vel alia ratione impellunt : quibus porro agentibus fibra ipsa magis magisque laxatur , et vel disrupitur , vel nimis extenta proprio dissolutioni maxime accedit . Hisce characteribus addi potest difficultas restitutionis postquam distenta fuit , aut compressa .

*Quæ causa proxima laxitatis . Quæ vis elastica in fibris laxis . Num fibra laxa sit etiam debilis .*

80. Causa proxima laxitatis fibrarum simpliciorum est 1. aut major distantia inter elementa terrea fibras componentia , et materiam quamcunque his elementis interspersam , ita ut , sub dato volumine , minor etiam sit quantitas eorum elementorum , quæ ad fibrarum constitutionem concurrunt : 2. aut minor affi-

nitas partium intermixtarum se se mutuo contingunt. Hinc laxitas ponit imminutam densitatem naturalem; id enim, ut notum est, densius dicitur, quod sub dato volumine plus habet materiae. Hinc etiam fit, ut laxæ fibræ sint parum elasticæ, adeoque compressæ aut distentæ non facile resiliant: videntur enim corpora majori vel minori vi elasticæ pollere, quo particulæ elementares, seu componentes, plus minus cohærent inter se: quo igitur terrea solidorum elementa aut magis inter se distant, aut materiam habent interspersa minus affinem, minor est vis cohæsionis, quæ, ut videtur, ea est quæ restitutionem molitur. Demum hinc etiam patet, laxam fibram, simul esse debilem; cum debilis fibra et ipsa facile cedat agentibus, quæ ipsam extendunt, tarde autem in proprios motus adducatur: et, si prompte etiam adduceretur, cum robur a majori elementorum cohæsione procedat, debilitas autem a minori, hinc motus, ut in laxa fibræ, essent infirmi; cum terrea elementa fibræ debilius, paullo magis inter se dissita, aut particulis minus affinibus intermixta, in contactus ruant debiliores. An igitur dicemus viam cohæsionis in fibra esse in ratione inversa aquæ intermixtæ? Aquam exundantem ad laxandum aptissimam esse non inficiamus: verum ex hac tenus dictis manifestum est heterogenea quoque interspersa, terreis maxime elementis minus affinia laxitatem afferre posse;

id

id quod præ ceteris laxitates illæ quas rachiticæ, scorbuticæ, aliæve ægritudines comparent videntur confirmare.

*Quæ sint cause disponentes ad laxitatem.*

81. Quæ autem causæ ad hoc vitium plurimum conducunt, sunt ipsa fibrarum laxitas hæreditaria post ætatis mutationes, etiam superstes; evacuationes quæcunque nimis; abusus alimentorum tenacium, tenui et eorum quæ humectantia dicuntur, aquosa, calida, præser-tim si accedit vita otiosa atque iners; depravata digestio aut nutritio; solum humidum, et similia, quibus aut non reparatur id quod amissum fuit, aut aquæ ratio in sanguine re ipsa augetur, aut hæc eatenus crescit, quatenus id retinetur, quod per cutis poros præcipue excerni deberet. In his enim circumstan-tiis aut aqueus humor retentus, inter fibras fibrasque atque inter earum particulas conge-ritur, quo soliditas tanto magis minuitur quanto minor est ex interjecto humore elementorum contactus, et proinde cohæsio, aut ex depravata digestione, nutritione, peculiari ali-mentorum indole, aliquid terreis elementis, et conjungenti additur materiæ, quod minorem cum his habet affinitatem, et propterea cohæ-sionem relaxat. Hisce causis (ut de iis si-leam, quæ fibram ipsam distendunt nimis) addi etiam debet externus calor, et quicquid aliud atmospheræ pressionem potest imminue-

re: tunc enim vero corpus ejusque fibræ, aut protinus laxatæ vel additamento vel nimia rarescentia phlogisti earum elementa disgregant, aut minus compressæ, minus etiam in propriis elementis cohærent, adeoque laxantur.

*Qui sint effectus laxitatis.*

82. Effectus laxitatis in fibris differunt inter se secundum diversitatem partium, in quibus vitiosa laxitas ipsidet, atque etiam functionum, quæ partium earum sunt propriæ. Ita laxitas in fibris muscularibus facit cum motus, tum laboris, atque exercitii impotentiam, et quæ ex his consequuntur, in nervis, facere videtur inuminutam sensitivitatem, inertiam sensuum internorum et externorum, nec non etiam motuum muscularium, et eorum præcipue qui voluntatis imperio parent: in membranis, affert facilem distensionem, unde morbosæ partium magnitudines, procidentia, atque *Herniæ*, de quibus Chirurgi sunt consulendi: in vasis, promovet aneurysmata, varices, disruptiones, atque dilatationes alias, de quibus in Capite de *morbis Organicis*. Præterea laxitas in vasis non hæc solum facit, verum etiam crudorum et viscidorum humorum congestiones, ac proinde tumores, putredines, impedimenta secretionum atque excretionum. Quod si demum ossibus laxitas insideat, ea emollit, flexilitatemque nimiam illis impertit, qua corpus nequeunt commode sustinere.

*Quæ*

*Quæ fibra dicatur nimis coherens :*

83. Nunc alteram fibræ affectionem perser-  
quamur ; nempe nimiam cohæsionem . Nimis  
autem cohærentem vocamus fibram illam, quæ  
densior est , compacta nimis , hinc parum fle-  
xibilis , aut distensioni obtemperans ; quo proin-  
de tum potentiis paullo validius resistat , quæ  
ipsam secundum naturam impellunt , tuin etiam  
potentiis aliis , a quibus in paullo fortiores  
motus adduceretur . Hisce characteribus addi-  
potest prompta restitutio postquam compressa  
fuit , aut distenta .

*Quæ causa proxima cohæsionis nimirum . Num fi-  
bra cohærens densa sit atque elastica .*

84. Causa proxima nimirum fibrarum cohæsio-  
nis vel in majori terreorum elementorum vi-  
cinitate , vel in majori affinitate partium in-  
terspersarum merito ponitur . Credibile est enim  
aut superficiebus paullo majoribus elementa  
sibi mutuo respondere , aut aliquid maxime  
affine elementis ipsis admixtum esse . Utrovis  
modo fortior est cohæsio , et proinde etiam  
robur ac resistantia , quæ cohæsioni debetur .  
Hinc aucta fibræ cohæsio ponit nimirum densi-  
tatem ; adeoque majorem massam sub dato vo-  
lumine : hinc major vis elastica ; ibi enim  
promptior est restitutio ubi majus est robur ,  
adeoque major cohæsio : hinc deinceps manife-  
stum est quidem fiat , ut fibra hac ratione consti-

tuta potentijs omnibus valide obsistat, quæ aut in ipsa motus necessariis exsuscitant, aut ipsam, distrahendo, nituntur producere.

*Quæ sint causæ disponentes ad nimiam cohesionem.*

85. Jam si causas investigemus, quibus hoc vitium debetur, præter nimiam cohesionem hereditariam, huc debent revocari agentia omnia, iis prorsus contraria quæ paullo ante (n. 81.) indicavimus: videlicet alimenta siccata, glutinosa, terrestria; potus parcus, frigidus, roborans; vita exercitata; vis valida caussarum et instrumentorum digestioni et circulationi famulantium; soli siccitas atque frigiditas, et similia, quæ aut emulgent ex fibra id, quod terrea elementa paullum inter se dissitare servare potest; aut aliquid addunt fibrarum elementis valde affine, et proinde ad cohesionem fovendam maxime idoneam.

*Qui sunt effectus nimiae cohesionis.*

86. Effectus autem fibræ nimis coherentis et ipsi diversi sunt pro diversitate functionum ac partium, quæ in fibris componentibus hujusmodi vitio laborant; et quidem opponuntur magnam partem iis quos supra (n. 82.) commemoravimus. Igitur fibra muscularis nimium cohaerens facilem motum impedit, unde pariter impotentia aliqua ad motum, et proinde mala motus imminentia, de quibus alibi. Si in fibra,

fibra, ut ajunt, nervea vitium sedeat, quamdam efficit insensibilitatem, sensuum internorum aberrationem, ac proinde tardum ingenium, promptam oblivionem, nullam fere imaginationis vim, et aliquando etiam *Maniam*: si in membranis et vasis, producit difficultatem secretionum atque excretionum, et humorum motum retardat: si in osseis fibris, facilem ossium fracturam, et difficilem conglutinationem. Demum si laxitas fibrarum multum confert ad promptum et magnum corporis aut partium incrementum, unde postea morbi fiunt ex aucta magnitudine; contra, nimia fibrarum cohesio incrementi celeritatem, et magnitudinem magnopere retardat, et imminuit; unde aliquando morbi nascuntur imminutæ magnitudinis.

*Num vitia indicata simplicissimas tantum partes afficere queant.*

87. Quicunque in ea quæ hactenus attulimus animum paullisper advertit, nonne statim intelligit, vitia hactenus recensita soli fibræ simplicissimæ, seu, ut dicunt, *similari*, evenire non posse, quin organicæ partes iisdem affectionibus laborent? Certe cum maxima sit simplicissimæ fibræ tenuitas, neque ullibi in animali corpore fibra occurrat ab aliis ita separata, ut organum aliquod non constituat, rationi maxime consonum videtur arbitrari, affectionem quamcunque in simplicissima fibra pri-

mum nascetur, signis peculiaribus in sensu  
incurrentibus destitutus, quorum ope affectio  
ipsa cognosci queat; et, cum peculiaribus si-  
gnis indicatur, jam partem aliquam organicam  
affectam esse; cuius proinde functio aut impe-  
diita, aut quovis modo perturbata, morbum  
facit peculiarem; quem certe nemo cohesionem  
nimiam vocabit, vel laxitatem vel siccitatem,  
distensionem, siccitatem, contractionem, vel  
aliam, si quae est, fibrarum a sano statu aber-  
rantium constitutionem; et si probe intelligat,  
alterutram ex his affectionibus aut nato morbo  
occasione dedit, aut causam esse ipsius pro-  
ximam, aut progressae ægritudinis effectum.

*Num at vitia indicata referri etiam possint  
alia, quæ a Pathologis comme-  
morantur.*

88. An vero ad laxitatem ac nimiam cohæ-  
sionem alia etiam fibrarum vitia referri pos-  
sunt, quæ a Pathologis commemorantur? Ten-  
sio procul dubio, durities, soliditas, rigiditas,  
videntur gradus sensim aucti nimiae cohæsio-  
nis, quemadmodum varii laxitatis gradus, mea-  
quidem sententia, fibram aut flexilem, aut  
debilem, aut teneram reddunt. Nam gracili-  
tas, quam differre putant nonnulli a debilita-  
te in eo, quod graciles fibrae sint justo exi-  
liores, adeoque facile ruinpantur, mihi nun-  
quam probabitur: neque enim demonstrari un-  
quam poterit, aut certe demonstratum nondum  
fuit,

fuit, num plures crassitiei gradus admittat fibra simplicissima, quæ, omnium consensu, conatus plurimos accuratorum Observatorum irritos semper fecit; nuperrimos siquidem, etsi maxime laudandos, nondum vidi confirmatos. Idem dicendum est de eo, quod appellant *fissile* et *fragile* in partibus duris; enim vero si hæc fiunt, quemadmodum docent, ob inopiam, vel siccitatem majorem glutinis terrea elementa revincientis, hoc referri posse videtur vel ad laxitatem, propter imminutam cohæsionem, natam ex inopia glutinis intermedii, aut particularum affinium; vel potius ad cohæsionem nimiam, quæ pariter, aut ex mollis glutinis siccitate, seu minori aquæ ratione ut alii contendunt; aut copia majori affinium particulatum, solvi citius patiatur, quam cedere viribus agentium exteriorum paullo validius in eas partes impetentium.

## C A P U T V.

## DE MORBIS ORGANICIS.

*Qui morbi dicantur organici, et quot eorum classes. Dubia circa pathologicam horum morborum tractationem.*

89. **M**Orbi, qui organicas partes, seu corporis instrumenta, afficiunt, ii sunt, qui organici appellantur, alias *instrumentarii*. Hos Pathologi in quatuor Classes dispertiri solent: quarum I. morbos figuræ lœsæ comprehendit: II. partium excessum, aut defectum: III. magnitudinem auctam vel imminutam: IV. mutationem situs, et connexionis. Verum aut in magno versamur errore, aut classes istiusmodi ad vitia pertinent, quæ interdum morbi non sunt; vel, si morbos constituunt, curationem non admittunt, vel demum si admittunt, Chirurgica præsidia frequentius expostulant quam Medica, ut proinde eorum tractatio Pathologis neutiquam convenire videatur. Hoc in morbis primum lœsæ figuræ confirmari potest; in quorum censum vitia asperitatis superficierum, rectitudinis aut curvitatibus in partibus, cavitatis demum auctæ vel imminutæ annumerari solent.

Du-

*Dubia confirmantur 1. in affectionibus ex superficie asperitate.*

90. Quoties igitur asperitas præter naturam in partibus superficiem corporis exterius limitantibus subnascitur, ea aut debetur tuberculis, aliisque similibus sive excrescentiis sive affectionibus, quæ Chirurgorum opem exposcunt; aut exanthematibus protuberantibus, quæ aliquando sunt morborum symptomata potius quam morbi peculiares; aut demum ea asperitas morbos quosdam constituit cutaneos, qui ad *Scabiem*, tamquam ad genus, revocari possunt, et a fluidorum vitio originem ducunt. Si vero asperitas erumpat in superficie interiori, ea neque sensibus percipitur, neque opportunitis ac certis signis se se præbet. Exempla habemus in osseis tumoribus, aut alterius naturæ, quæ in superficie intima ossium crani, aut cerebri meningibus, sedem habent: ut asperitates illas non comminorem, quæ in aliis interioribus partibus interdum natæ, in cadaverum dissectionibus non infrequenter occurunt.

*2. In vitiosa partium rectitudine, aut curvitate.*

91. Ubi curvum sit, quod rectum esse debet, aut contra, morbus est male conformatio[n]is, qui non semper functiones turbat, adeoque tunc improprie morbus dicitur: si

turbat , raro curationem admittit ; si vero admittit , Chirurgicam operam magis requirit quam Medicam . Exempla sunt in distortis artibus ; in spina dorsi præter rationem inflexa , nempe in Rachite vel mitiori vel graviori ; cuius curatio ad Medicos quidem pertinet quo ad præsidia interiora : at quoniam ejus indoles , causæ , remedia hujusmodi sunt ut non parum ad Chirurgos spectent , idcirco ab his omnibus Pathologica methodo , nempe superficie tenuis , recensendis abstinemus . Quod si vitium rectitudinis aut curvitatis internis receptaculis , aut vasis etiam majoribus insideat , quis est qui vitia hæc in vita indicare queat , et signa afferre quibus cognoscantur , si forte functiones quasdam aut perturbarent , aut impedirent ?

3. *In vitiis cavitatum . Quot sint species cavitatis austæ .*

92. Receptacula etiam et vasa , quæ in corpore occurrunt , dilatari possunt præter natu ram aut constringi ; et interdum quoque vi causarum quarundam solidescere , seu propriam cavitatem amittere . Quintuplex est austæ cavitatis species : videlicet 1. pertinet ad *anastomosis* : 2. ad *diapedesis* : 3. ad *diresin* : 4. ad *aneurisma* : 5. ad *varices* . Est autem *Anastomosis* vitiosa dilatatio quæ in ostiolis vasorum occurrit , sive qua parte fluidum recipiunt , sive qua emittunt . *Diapedesis* ita describitur , ut sit

se.

secessio filorum , quibus vasorum et receptaculorum tunicæ intertexuntur , unde contentus humor rimis inde nascentibus exsudat . Diæresis idem sonat quod disruptio vasorum aut cavernarum quæ peculiares humores excipiunt . Demum *Aneurysma* est dilatatio arteriarum in saccum peculiarem , quemadmodum *Varices* non aliud sunt quam morbosæ venarum dilatationes . Sunt hæc autem magnitudinis vitia , quæ tamen ad vasa tantum pertinent et receptacula . At vitia istiusmodi ubi a nimia sanguinis copia ortum non duxerint , aut ab ea foveantur , et ubi eorum nonnulla a peculiari sanguinis discrasia profecta non fuerint , nonne , si vasis insideant exterioribus , Chirurgicam præcipue opem exposcunt , si vero interioribus curationem ut plurimum non recipiunt ?

*Quot species cavitatis imminutæ .*

93. Imminutæ vero cavitatis vitium ad obstructionem , tamquam ad genus , referri potest , quod quatuor species comprehendit ; 1. scilicet simplicem viarum angustiam a tumore inter tunicas cavitatem componentes oborto ; hanc vocant Pathologi *Stenochoriam* : 2. cavitatem sensim arctatam , deinceps deletam a causa aliqua ipsi cavitati circumposita , eamque sensim per gradus comprimente ; dicunt *Thlipsis* . 3: conglutinationem ipsius cavitatis , natam sive a viscido humore quoconque congesto intra ipsam cavitatem , cumque hujus par-

rietibus conglutinato, sive ab externa compres-  
sione; *Sympsis* appellant: 4. demum cava-  
tis abolitionem ex parietibus se se mutuo con-  
tingentibus, vel propter subitam evacuationem,  
vel propter spastum fibrarum carnearum, quæ  
cavatatem ipsam circumambiunt; cui vitio no-  
men fecere *Synizesis*. Verum hæc imminutæ  
cavatatis vitia, ubi aut externas partes non  
obsideant, aut ad summum gradum non per-  
venierint; vix cognoscuntur. Quî fieri igitur  
poterit, ut apte curari queant a Medicis, præ-  
sertim cum eorum plura, ubi innotuerunt, ser-  
mne insanabilia sint? Nam ubi deobstruentibus  
remediis etiam validioribus pertinaciter relu-  
ctarunt; tantum præsidia quædam Chirurgica,  
neque etiam semper, locum aliquem, sed tam-  
quam extrema, habere consueverunt.

93. \* Quod si de causis quæramus, quæ or-  
ganicos morbos, hactenus prætervolando indi-  
catos, exsuscitant, ex partim ex morborum  
nomine, quasi dicam, innotescunt, partim ve-  
ro huc revocari possunt: nempe vitia asperi-  
tatis superficierum vel a copia fluidi partes hac  
vel illa in sede copiosius alluentis procedunt;  
vel a viscidiore ejus natura, vel rara textura  
solidorum, quæ interspersum concrescibile li-  
quidum superficierum meatibus aut interstitiis  
erumpere sinunt; vel demum a loci errore,  
cum fluidum, in exemplo, quod ad partes qua-  
sdam peculiares nutriendas comparatum fuit,  
in aliena loca traducitur, in iisque consistit.

Ex-

Zædem fere causæ curvitatis ac rectitudinis vicia gignere possunt ; quibus addenda est inæqualis nutritii succi distributio , et, vel spastica partium quarundam contractio , vel aliarum quædam quasi dicam resolutio : si enim inæqualis nutritio partes alias in augmentum nimium impellit , aut alias non evolvit ut par est , quo fit ut curvitatis vel rectitudinis vicia suboriantur ; spasmus , ipse quoque , organa , quæ incurva naturaliter essent , in rectitudinem adducet quandocunque organum ipsum quaquaversus aggrediatur , vel inflectet illud quod rectum esse debéret , si organi ipsius partem duntaxat occupaverit ; quod sane postremum à partis etiam cujusdam resolutione procedet ; quatenus naturalis contractio seu tonus in partibus sanis , et cum resolutâ connexis , tunc temporis prævalebit . A quibus porro causis eæ non parum differunt quæ cavitates diducunt , aut contrahunt : siquidem vasorum ac receptaculorum vitiosæ dilatationes a fluidorum vel decurrentium vel contentorum sive copia absoluta aut relativa , sive motu valido , sive rarescentia , sive morbosa tenuitate , acri nempe natura , sive deum solidorum laxitate profiscuntur ; quemadmodum humorum congestiones et stases , spasticæ affectiones , et evacuationes nimiæ , vicia contractionis , quemadmodum vidimus , seu angustiam canarium atque receptaculorum non infrequenter constituunt .

Hxc

Hæc de prima classe morborum organicorum ; nunc reliquas ad idem examen revocemus.

4. *In vitiis excessus aut defectus; magnitudinis auctæ vel immunitæ.*

94. Partium excessus aut defectus, magnitudo aucta vel immunita (n. 89.) morbos proprie dictos generatim non constituunt, sed plerumque deformitates, quarum plurimæ valeditudinem non labefactant. Quæ functiones impediunt, aut perturbant, tolli tantum possunt aliquando a Chirurgiæ Magistris, vix aut ne vix quidem a Medicis. Nemo potest oculi unius, aut alterius partis defectum restituere. Chirurgicorum officium est partes quasdam Naturæ errore superadditas interdum rescindere : et sextus digitus in extremitatibus, aut tertius testis, aut tres vel quatuor renes, aut lien geminus, et similia, functiones non laedunt. Instrumenta et membra vitiose intumescentia idoneis repagulis, seu adminiculis, mature comprimere tentant Chirurgi, ne intumescant præter modum; at sœpe incassum tentant. Tumores et carnes præter naturam succrescentes pariter a Chirurgis absconduntur, aut igne absumentur vel causticis; et moles partium immunita sive ex humorum vicio, sive ex labore nervorum, aliarumque partium solidarum, particulares morborum classes constituunt, de quibus consuli debent Practicorum opera.

5. Denique in vitiis situs et connexionis.

95. Tandem vitia situs et connexionis aut sunt hæreditaria, aut monstrosa; quemadmodum sunt aliquando rēnes intra pelvīm, intestinorum flexiones vitiosæ, testium collocatio in inguinib⁹, glans penis supra pubis ossa protuberans, urethra ad penis latus aperta, labra leporina, palpebræ fissæ, lingua bifida, digiti connati, et similia, quorum plurima curari non possunt: aut demum vitia situs et connexionis nascuntur a vi aliqua externa; et hujusmodi sunt vulnera, fracturæ, luxationes, herniæ sive ramices, procidentiæ; et affines aliæ affectiones, quæ ut omnes norunt, inter morbos Chirurgicos recensentur.

Quæ causa vitiorum istiusmodi.

95. \* Ad vitiorum istiusmodi causas quod attinet, ex, ut intelligunt omnes, varix esse possunt: nam partium defectus, aut non absolutum earum incrementum, exterioribus interdum agentibus, interdum vero interioribus tribuendum est, quorum efficacitatem aut pars quædam perit, aut ejus evolutio suffocatur, vel incepta interruptur. Excessum vero, aut viribus masculi seminis deberi mollissima germinis membra in partes dirimentis, aut primordiis in ipsa origine deformibus, aut mutuæ plurium germinum concretioni, quorum alterum dumtaxat explicetur, reliqua fere pe-

reant

reant si particulam unam aut alteram excipias; excessum, inquam, his causis tribuendum esse conjectantur Philosophi: qui impeditam evolutionem ad agentia interiora, qua compunctionis parum aut nimis resistentia, ad inaequalem succi nutritii distributionem, atque ad similia, quæ naturalem partium situm et connexionem pervertunt, acceptam referre consueverunt.

*Quid ex dictis conficiendum sit.*

96. Quæ proposita sunt hactenus satis ostendere videntur id, quod ab initio (n. 89.) proposuimus; videlicet, minus fortasse Pathologiae scriptoribus convenire, de his morbis *organicis*, quorum maxima pars chirurgicam possit administrationem, peculiari atque paullo prolixiori sermone disserere. Et si quis opponat, Chirurgicæ artis cognitionem Medicis maxime necessariam esse, adeoque non recte a Pathologo eorum morborum tractationem negligi, liceat nobis id unum respondere; scilicet; Chirurgiæ cognitionem in Medicina accurate facienda a nobis tanti fieri, ut vix Medicam artem, qua decet peritia, eum exercere posse putemus, qui Chirurgicis administrationibus non fuerit innutritus. Verum ars adeo necessaria, et humano generi perutilis, quæ post Anatomen alterum fuit Medicinæ fundimentum, non definitionibus comparatur, aut dif-

differentiis, quæ, prætervolando, solent a Pathologis indicari.

## C A P U T VI.

## DE HUMORUM MORBIS, ET PRIMUM DE COHESIONE AUCTA VEL IMMUNITA.

*Quid fluidum sit, et unde fluiditas varia.*

97. **D**emonstrat Physiologia, humores, qui in animali corpore insunt, varias classes constituere, et præterea varios in ipsis humoribus esse fluiditatis gradus, quemadmodum in solidis varii occurruunt gradus soliditatis. Ut vero fluidum ab immortali Nevytono definitur id, cuius partes facile cedunt viribus quibuscumque, et nullo negotio in motum agentur; propteræa fluiditas major vel minor in fluido homogeneo, ut appellant, a minori vel majori particularum cohæsione profici sci videtur, in heterogeneo autem, quod scilicet ex diversis humoribus insimul permixtis exsurgit, varii fluiditatis gradus cum a minori aut majori particularum affinitate, tum a singulari fluidorum componentium proportione ortum ducunt; ubi enim, inter hæc, fluidiora exsuperant, major fluiditas dominatur; secus, ubi ea redundant quæ minori pollent fluiditate. Humor igitur animalium princeps, nempe sanguis, certis quibusdam fluiditatis gradibus prædicti,

ditus esse debet , ut , in solido rite constituto , valetudo integra sit : eademque est ratio fluidorum peculiarium , ex quibus sanguis componitur .

*Quot modis fluiditas mutetur .*

98. Potest autem humorum fluiditas ita mutari , ut minor sit vel major quam par est . Ea ponit in ipsis humoribus auctam cohæsionem elementorum ; hæc vero ponit ipsam cohæsionem imminutam . Auctam cohæsionem vocant nonnulli *spissitudinem* , *lentorem* , *tenacitatem* : imminutam vero , *tenuitatem* dicunt ; aut *dissolutionem* , ubi cohæsio maxime imminuta fuerit .

*Quot sint classes fluidorum animalium , et quot eorum principia magis obvia .*

99. Ut vero clarus , quo ad fieri potest , virtus innotescat auctæ vel imminutæ cohæsionis , oportet in mentem revocare , fluida animalia ( uti vidimus in Physiologia ) ita esse comparata , ut eorum nonnulla maxime aquæ sint , alia inflammabilia , alia mucosa , alia demum ex peculiaribus causis , sive internis , sive externis , cogintur ; videlicet in coagulum abeant . Tota hoc sanguis ipse recens emissus , et vitro exceptus , confirmat luculentissime ; cum partim secedat in fumum seu vaporem aqueum ; partim concrescat in placentam , quam communiter *crassamentum* dicunt : partim de-

denique in serum, in quo et aquæ plurimum inest, et partis, ut loquuntur, coagulabilis; minimum autem muci. Crassamentum, seu placenta sanguinis, panno excepta, et aqua sæpius abluta, ruborem dimitit intra aquam, superstite intra pannum parte quadam albida ac tenaci, quasi filis intertexta, quæ ab aqua solvi non potest; æmulatur partem seri concrescibilem, et Nuperis quibusdam Cl. dicitur *basis crassamenti*. Pars rubella, quæ huic crassamento seu fibrosæ parti juncta erat, et oleo constat, et terrâ ferrugineâ, tum denique sale. Vocatur pars sanguinis inflammabilis; in qua idem igneum inest principium subtilissimum, quod Chemici *phlogiston* dicunt. Si ergo in sero plurima aqua reperitur, maxima pars concrescibilis, et aliquid mucosum, præter alia principia minus obvia; in crassamento autem et pars in coagulum prona seri æmula, et oleum adest; non immerito diximus, animalium corporum fluida partim aquæ esse, partim concrescibilia, partim mucosa, et partim oleosa, seu inflammabilia; atque hæc peculiari proportione simul mixta sanguinem constitueret.

*Quot modis imminuatur fluiditas, seu cohæsio augeatur.*

100. Cum igitur hujus humoris fluiditas imminui possit vel augeri, idcirco modos prius indicabimus, quibus ea fluiditas imminuitur.

*Caldani Pathol.*

F.

Tri-

Tribus autem modis decrescit fluiditas hæc , sive , quod idem est , cohæsio augetur : nempe 1. excessu crassamenti : 2. minori aquæ ratione : 3. deum muci redundantia . Facile est porro intelligere copiâ crassamenti , utpote magis cohærentis ( n. 99. ) fluiditatem minorem reddi ; atque hoc idem fieri aquæ ratione decrescente , quod aqua sit ceteris mixtis sanguinem componentibus fluidior , iisque , tanquam vehiculum eorum particulis interpositum , fluiditatem majorem impertiat : hinc in ejus inopia cohæsio augebitur . Quod vero pertinet ad muci redundantiam , satis manifestum est quia fiat ut ea fluiditatem minuat , ac proinde cohæsionem majorem efficiat , quamvis non proprie tenacitatem : Viscidus quippe mucus est ; cumque viscidum sine sensibili aliqua cohæsione esse nequeat , propterea in muci copia major procul dubio cohæsio fit quam animalium humorum natura ferat . Pituitam tunc temporis reliquis componentibus excellere non male dicebant Veteres .

*Quot molis augeatur fluiditas , seu cohæsio imminuatur .*

101. Opposita sanguinis constitutio est fluiditatis incrementum , seu cohæsionis imminutio , quæ debetur 1. aquæ ubertati : 2. inopie crassamenti : 3. minori denique mucosæ partis rationi . Et primum quidem aqua cohæsionem debilitat , quia crassamenti globulis intermixta mu-

inutuam eorum concretionem prohibet. Cum vero inter humores sanguinem componentes crassamentum et mucum particulis magis cohærentibus constare paullo ante demonstraverimus, nemo non videt in alterutrius humoris penuria sanguinem esse minus cohærentem, ac propterea fluidiorem. Ex his (n. 100. 101.) conficitur, sanguinis fluiditatem esse in ratione directa aquæ et inversa crassamenti ac muci; proptereaque cohæsionem sanguinis ipsius, directam muci et maxime crassamenti, inversam vero aquæ rationem sequi.

*Quæ cause minuant aquæ copiam.*

102. Nunc ad examen revocare præstat, seu potius indicare, causas, quæ, aquæ rationem minuentes, nimiam humorum cohæsionem fovent, atque illi occasionem præbent. Sunt autem causæ istiusmodi potus inopia; aquearum excretionum augmentum; abstinentia ab aliamentis quæ humida dicuntur; vehemens corporis exercitium, et auctus calor corporis tum ex hac causa, tum ex aliis; ea deum fluidorum degeneratio, qua fit, ut id quod aqueum est, et crassamenti (n. 99.) fluiditatem conservat, tamquam vehiculum, intra peculiaria quedam loca decumbat; quemadmodum in variis *Hy. tropis* speciebus communiter evenire solet. Hæc sane omnia aquæ copiam in sanguine imminuunt, vel quod magna ejus pars per communia emunctoria eliminatur, vel quod id

non redditur quod amissum fuit , et fluiditatem facit atque tuetur . Augmentum cohæsionis ab his causis profectum minorem ponit aquæ rationem .

*Quæ augeant crassamentum .*

103. Causæ vero quæ augent humorum cohæsionem , ex aucta crassamenti quantitate , sunt alimentorum terrestrium et adstringentium abusus , tum et eorum quæ dura dicuntur et **sicca** : farinosa etiam non fermentata huc pertinent , tum pinguia omnia , glutinosa , coagulantia , sive alimenta fuerint , sive medicamenta , sive venena . Si enim ex terra ferruginea , oleo , et sale , rubra sanguinis pars componitur , quæ crassamenti basi , seu fibrosæ attenuaci albidae materiæ ( n. 99. ) arcte adhæret ; causæ hactenus enarratæ , quæ alterum ex his principiis , aut plura simul , sanguini magna copia suppeditant , partem ipsius sanguinis maxime cohærentem , nempe crassamentum , plurimum augent ; quotiescumque tamen rohur maneat et integritas functionum naturalium , et vitalium . Majus autem erit cohæsionis augmentum , si , cum his omnibus , intermixtæ aquæ copia reipsa imminuatur . Ceterum cum dicimus medicamenta aut venena crassamenti copiam interdum augere , admonere præstat tenacitatem etiam ab his agentibus interdum asserri , propter affinitatem quam habent cum omni

ni eo , quod in sanguine primum est ad concreendum .

*Quæ mucum accumulent.*

104. Farinosa non fermentata , glutinosa ; ac similia , augent etiam seri mucum ; et proinde cohaesionem a priori ( n. 103. ) diversam : quibus porro causis addere necesse est debilitatem virium digerentium , et vitalium functionum languorem , sive naturalem , sive deside vita , aut morbo aliquo comparatum ; tum demum imminutam mucosarum excretionum copiam . Nam farinosa , et quæ glutine pollent , plurimum in se habent , quod fila trahit , ac mucosum dicitur ; et digestio infirma ta viscidum non dissolvit , quemadmodum neque languor functionum vitalium : mucus vero retentus auget quantitatem in sero , ac proinde in universa humorum massa ; quæ deinceps in pituitosam colluviem degenerat .

*Quæ causæ cohaesionem minuant.*

105. Auctæ humorum cohaesionei opponitur cohaesio imminuta , quam etiam tenuitatem vel dissolutionem appellari diximus ( n. 98. ) . Hujus tenuitatis causæ repetendæ sunt a potionum aquearum et præcipue calantium abusu ; a victu humectante , vegetabili , diurno ; a solo umido , aut a cubiculo , ratione situs , humidis et calidis vaporibus circumfuso ; a vita sedentaria atque inerti ; a naturali vel ac-

quisita solidorum maxime vitalium debilitate ; imbecillitate virium digerentium ; et similibus. Per hæc enim aut aquæ copia reipsa augetur in humoribus ; aut fovetur laxitas , atque inde tenuitas ab adjuncto calore ; aut impeditur vel imminuitur perspiratio , unde aquæ intra corpus retinentur ; aut non rite attenuantur alimenta , et chylus ac fluida inde præparanda ; ex quo fit , ut crudum et aqueum per vasa decurrat , quod fere solum , utpote fluidius , inter languorem virium digerentium ex alimentis elicetur. Id etiam præstant nimiæ evacuaciones , quæ corporis vires , functionesque omnes magnopere infirmant , et nativum , quasi dicam , calorem extinguunt . Ceterum hæc humorum tenuitas , seu imminuta cohæsio , oritur aliquando a quodam acri , quod humoribus admiscetur : quo factum est , ut nuperi Pathologi Cl. duplarem in humoribus tenuitatem subnasci docuerint : alteram nempe *simplicem* , de qua hactenus a nobis dictum est , alteram vero *compositam*. Sed de hac suo loco ; nempe cum de prava humorum qualitate sermonem instituemus .

### *Effectus auctæ cohesionis in genere .*

106. Jam vero effectus auctæ cohesionis in sanguine dupli modo spectari possunt ; nempe generatim et speciatim . Generatim sunt præcipue difficilis ipsius sanguinis excursio per proprios canales ; inde stases , obstructiones , tu-

tumores varii pro diversitate stagnantis fluidi, et partis in qua stagnat; hinc impedimentum secretionum atque excretionum; et sexcenta alia mala, quæ ex his consequuntur. Nam facile intelligimus in minori aquæ ratione, quæ crassiorum particularum vehiculum est, fluiditatem imminui, quæ, ut secretionum et excretionum libertati est maxime contraria, ita stasi, obstructioni, morbisque inde nascituris occasionem præbet.

*Effectus auctæ cohæsionis in specie.*

107. Quod si speciatim hi effectus considerentur, scilicet ratione habita ad cohæsionem auctam ex redundantia vel crassamenti vel muci, tunc erunt inter se dissimiles pro ut ab altero ex his componentibus cohæsio profecta est. Nempe cum aucta cohæsio propter crassamenti copiam fibrosæ partis (n. 99.) prædominium ponat, ea propterea vasa prius distendit nimis quam par est: quæ enim cohæsio ab hac causa oritur, ea cum globulorum soliditate conjungitur, ac propterea nasci possunt via alibi (n. 92.) commemorata: deinde cohæsio hæc id efficit, ut ceteri humores cum crassamento intermixti et circuineuntes, in ipsius crassamenti globulos impingentes, propellantur validius et atterantur. Quod si rubra pars crassamento ipsi inhærens ceteris principiis exuberet, tunc mala plenitudinis (de quibus Cap. seq.); hinc dispositio ad inflammationes,

et acutos alios morbos , qui ab humorum rā  
rescentia atque ignei principii excessu profici-  
sci possunt , in promptu sunt . Contra , cohæ-  
sio nimia propter muci exsuperantiam , præter  
mala auctæ cohesionis ( n. 106. ) in genere ,  
obstructiones facit naturæ muci respondentes ;  
adeoque tumores qui difficulter in suppuratio-  
nem abeunt , aut universalem frigiditatem et  
*Leucophlegmatiam* ; album videlicet ac tumidum  
totius corporis pallorem .

*Effectus cohesionis imminutæ.*

108. Tenuitatis , seu imminutæ humorum  
cohesionis effectus censemur esse , circulatio-  
nis languor ; caloris decrementum ; solidorum  
debilitas ; functionum inertia ; cutis totius pal-  
lor ; aquosa ac frigida colluvies , et hinc varie  
*Hydropis* species . Cum enim minor sit aquea-  
rum particularum densitas , et blandior natu-  
ra , in ratione ad rubras , cor non satis irrita-  
tum debilius contrahitur ; hinc fluida non pro-  
pellit valide contra solida ; hæc particulis mi-  
nus densis , et minori motu præditis , non fa-  
cile cedunt ; non fit attenuatio , neque proin-  
de conservatur calor , etiam ex inopia crassa-  
menti ; laxantur deinceps solida ab aqua inun-  
dante ; languet propterea solidorum et fluido-  
rum motus ; retardantur fluida in minimis va-  
sis ; atque in his aqua congeritur , tum et in  
cellulis membranarum : unde quotiescumque Na-  
tura superfluam aquam per commune quoddam  
emun-

emunctorium non eliminet , pallores nascuntur ,  
cachexiæ , tumores , hydropses .

*Num alia particularum sanguinis vitia  
huc referri queant .*

109. Hæc de cohæsione aucta vel imminuta . Huc etiam revocari possunt , nisi plurimum fallimur , morbi nimiæ soliditatis , rigiditatis , elasticitatis , molis auctæ vel imminutæ , demum mutatæ figuræ in humorum particulis , qui porro morbi a Celeberr. Pathologis commemorantur . Si enim in particulis seu globulis elementaribus hæc evenire posse contendunt , nos , bona eorum venia , hos morbos hypotheticos dicere non dubitamus ; propterea quod elementorum magnitudo , soliditas , figura quæ sit , nemo haec tenus certa fide indicavit . Quod si massulas ex globulis compactas iis mutationibus obnoxias esse velint , satis manifestum est , soliditatem , rigiditatem , elasticitatem , et molis magnitudinem , ad cohæsionis augmentum merito pertinere : neutra enim ex his affectionibus sine aucta cohæsione esse potest : quemadmodum imminuta soliditas , densitas , elasticitas , moles , ideam exhibent debilioris cohæsionis . Has vero massulas , globulos istiusmodi figuram mutare posse ( ita tamen ut nisi sphæroideam , quemadmodum appellant , ellipticam saltem retineant ) æquum sane est arbitrari ; neque desunt observationes ad id confirmandum : an autem aliam

figu-

figuram acquirant , ac propterea acre , quod in humoribus quandoque se prodit , ab aculeis , ut ita dicam , ejusmodi particularum ortum ducat , in Capite *de prava humorum qualitate* diligenter examinabimus .

*Unde opinio de aliis particularum vitiis.*

110. Verum liberum esto cuilibet has etiam particularum affectiones discriminare inter se , ac proinde eas non referre ad cohæsionis augmentum , vel decrementum . Quod ad me attinet , si conjecturæ locus esse queat , fere dicere postremas hasce fluidorum affectiones in Pathologiam a nonnullis inventas fuisse , quod in ea essent sententia , singulos rubros globulos sex serosis constare ; unumquemque serum sex lymphaticis ; hos rursus ex aliis sex minoribus , et sic porro . Hac enim hypothesi in antecessum posita , tamquam fundamento , non difficile est sibi in animum inducere , id in globulis majoribus effici posse , quod in minoribus componentibus evenire arbitrantur ; ac proinde ex vario globulorum cohærentium numero , aut ex priorum secessione , tum et ex varia cohæsionis vi , molèm et soliditatem vel augeri vel imminui , figuram mutari , aliaque imaginationis libidine fieri , quasi sub eorum oculis hæc omnia et singula evenirent . Quid vero de hac hypothesi sentiendum sit in Physiologia a nobis propositum fuit , aliaque Cap. IX. harum Institutionum subjungemus .

CA:

## C A P U T VII.

## DE MORBIS EX HUMORUM COPIA.

*Quot modis humores copia peccare queant.*

111. Post vitia cohaesioneis auctæ vel immunitæ in humoribus, ea veniunt indicanda, quæ spectant ad eorum copiam. Neque enim ad liberum atque expeditum functionum exercitium sufficit, ut corpus peculiaribus quibusdam liquidis, hanc vel illam indolem præ se ferentibus, perfluatur; verum id etiam requiritur, ut certa sit fluidorum proportio ad solida, in quantitate præsertim, qua deficiente, valetudo labefactatur. Humorum autem quantitas dupli modo peccare potest: nempe potest esse major aut minor, quam natura postulat. Prius vitium generali nomine dicitur *Plethora*, posterius autem vocatur *Inanitio*.

*Difficultas in cognoscenda nimia humorum copia: et ratio difficultatis.*

112. Difficile admodum, immo fortasse impossibile est, humorum massam definire, qua posita, *Plethora* ipsa ponatur. Difficultatem facit tum naturale discrimen, quod occurrit in temperamentorum, ætatum, et sexus diversitate; tum observatio, quæ docet, nimiam, aut mi-

minorem quam par est , fluidorum quantitatem , quæ morbis occasionem præbere potest , certis quibusdam limitibus non ita circumscribi , citra aut ultra quos valetudo non constat . Si temperamenta , quæ dicuntur *sanguineæ* , cum aliis temperamentis comparentur ; juvenes cum senibus , mulières cum viris , manifesta erit ratio difficultatis , de qua nunc sermo est : nam a prioribus , nempe sanguineis temperamentis , juvenibus , ac mulieribus , sæpe feruntur insignes quædam sanguinis evacuationes , sive naturales , sive artificiales , vel absque ullo , vel absque magno valetudinis detrimento : dum contra , si retineatur id quod debet excerni , aut sanguinis copia plus minus augeatur , statim morbi occurront a nimia plenitudine , tamquam a primaria causa profecti . Contraria evenire solent in temperamentis non sanguineis , tum et in senibus , et in viris ( ratione habita ad juvenes et mulieres ) qui ab evacuationibus paullo ante indicatis persæpe lœduntur ; et repletionis vitia non raro ferunt sine incommodo .

*Quid proprie sit Plethora , et quot sint ejus species .*

113. Quicquid autem sit , fluidum , et præcipue sanguis rite constitutus , cum eâ copiæ abundat , quæ functiones turbare potest , illud humorum vitium constituit , quod appellatur Græcis *Plethora* . Hujus tres censentur species : prior

prior dicitur *Plethora vera*; altera *apparens*; tertia *relativa*. Vera rursus distingui solet in *Plethoram ad vasa*, et *Plethoram ad vires*.

*Quid sit Plethora ad vasa, et ad vires.*

114. *Plethora ad vasa* ea dicitur sanguinis quantitas, et boni cujusque humoris, quæ id præstat, ut vasa plurimum distenta, et jam proxime disrumpenda, nequeant ea ratione se restituere, qua præterfluentia liquida attenuare atque impellere possint. *Plethora* autem *ad vires* definitur Veteribus, et Galeno præcipue, ea boni humoris copia, quæ vitalium functionum viribus nequit promoveri.

*Utrum Plethora ad vasa, et ad vires, duas Plethora species constituant.*

115. Quæri autem potest, utrum *Plethora ad vasa* adeo differat a *Plethora ad vires*, ut propterea duæ species *Plethora veræ* constituedæ sint. Nos certe, nisi toto cælo erramus, ea ratione has differentias interpretandas esse censemus, ut *Plethora ad vires* considerari debat tamquam ipsa *Plethora ad vasa*, ad summum gradum perducta. Ut enim sanguinis circulatio non parum promovetur a vi vasorum se se restituentium, hinc, debilitatis ipsorum vasorum viribus a nimia sanguinis copia, consequens est, ut in corde etiam nascatur impotentia ad movendum fluidum, quod prius, juvante vasorum actione, non parum promo-  
ve-

vebatur. Verum per nos liceat unicuique, inter unam alteramque *Plethoram*, sensibilem ponere differentiam; atque ob id præsertim, quod *Plethoram ad vires* sensum suffocationis, debilitatis insignis, ac ponderis afferre doceant plerique in toto corpore; et ponderis quidem majoris vel minoris, pro ratione copiæ contenti et promovendi liquidi: *Plethoram* autem *ad vasa* sensum molestæ distensionis et formicationis quo membra stupore quodam affici videantur; vertiginem ex capitis inclinatione; segnitiem ad motum; sudorem minima de causa erumpentem; somnum profundum, aliaque hujus census symptomata movere tradant.

*Quid Plethora apparens.*

116. Quid sit *Plethora apparens* ipsum nomen satis declarat. Cum enim dicimus *apparens*, jam palam est humorum quantitatem, seu massam, neutquam redundare: volumen duntaxat auctum est; quo eadem humorum quantitas determinato et naturali spatio nequit fere amplius contineri: immo reapse non contineretur, nisi distenta vasa liquido cedent impellenti. Est, uno verbo, *Plethora apparens*, simplex humorum rarescentia.

*Quid Plethora relativa.*

117. Tandem *Plethora relativa* neque est absolute humorum copia naturæ modum excedens, neque incrementum voluminis, sive ipsorum hu-

humorum rarescentia; sed tantummodo spatium, quo humores comprehenduntur, est imminutum. Hinc hujusmodi *Plethora* species Illustribus quibusdam Recentioribus dicitur *Plethora ad Spatium*.

*Quæ causæ Plethorae veræ.*

118. Quod ad causas pertinet *Plethorae veræ*, ex censentur vis valida causarum, quæ digestionem faciunt; quarum ope magna chyli copia ex alimentis elicetur, et in rubra vasa traducitur: valida pariter astio cordis et arteriarum, quibus receptus chylus in sanguinem mutari possit: laxitas venarum et minorum vasorum, qua distendi facile patientur, atque ita magnam humorum copiam continere: natura alimentorum apta ad chylum magna copia suppeditandum: somni diurniores, et nimia corporis quies, quibus et parum deteritur, et parum excernitur, quia languet solidorum ac fluidorum motus: evacuationum quadruplicem naturalium imminutio, tum earum, nec non artificialium etiam, suppressio: demum incrementi corporis cessatio absque respondentem crassitie succedente; quibus fit, ut plus intra corpus retineatur, quam decet ad integritatem vitæ, ac valetudinis.

*Quæ causæ Plethorae apparentis.*

119. Causæ autem *Plethorae apparentis* ex sunt, sive internæ sive externæ, quæ humorum

rum rarescentiam inferunt . Calor igitur vel atmosphæræ , vel alias quicunque , suas in corpus vires exercens ; et propterea balnea calida ; hypocasta ; vehemens corporis exercitium , præsertim sub Sole ; frequens aromatum usus ; tum et rerum earum omnium , quæ sulfureis , oleosis , uno verbo igneis ac volatilibus principiis constant , titulo sive alimenti sive medicamenti sive veneni , vel per os assumpti , vel per contagium , ut dicitur , communicati ; suppressæ evacuationes sanguineæ ; repulsa demum , aut imminuta et prohibita perspiratio ; hæc , inquam , omnia , aliaque hujus generis , *Plethoram apparentem* inferre possunt . Nam et sanguinis oleum calore rarescit , et igneum principium imagis evolvitur , et calor externus minuit atmosphæræ pressionem , unde aer fixus , fluidis contentus , incipit elasticam vim , qua præditus est , sensibiliter exercere , et propterea intumescens fluidum vasa distendit . Ex vehementi corporis exercitio fit maximus attritus , quo pariter oleum rarescit , et igneum principium liberius explicatur . Quæ sulfureis , oleosis , igneis ac volatilibus particulis constant , augent copiam phlogisti , et olei hujus in rarescentiam proni . Suppressæ evacuationes sanguineæ eadem prorsus ratione agunt ; unde non solum *Plethoram veram* , sed etiam *apparentem* fovent , quatenus in ea suppressione plus rubræ sanguinis portionis , in qua oleum sedet ac phlogiston , intra vasa congeritur . Demum per-

perspiratio repulsa , acri retento quod solida irritat , quemadmodum acutas febres vel acutos morbos febriles s̄ēpē excitat , ita humorum rarescentiam , nempe *Plethora* apparentem gignit ; non secus ac faciunt ea omnia , quæ febres movent absque præexistente vera *Plethora* . Quod si imminuatur vel prohibeatur ipsa perspiratio , tunc plethora ob id nascitur quod intra corpus ea subsistunt , quæ deberent eliminari .

*Quæ causæ Plethorae relativæ.*

120. *Plethora* denique *relativa* causas habet in subito terrore ; in frigore sive externo sive febrili ; in vasorum rigiditate ; in eorum conglutinatione , qua plura minora vasa propriam cavitatem amittunt ; tum demum in membrorum majorum mutilatione . Terror namque ac frigus vasa , præsertim arteriosa , spasmo afficer videntur ; quæ proinde constricta spatium angustant , manente eadem fluidi quantitate . Atque hæc quidem spatii angustia in vasorum conglutinatione , rigiditate , membrorum mutilatione , præsens est . Cum vero eadem chyli copia ab ingestis alimentis elicatur , ubi vires digestionis integræ sint , ac propterea eadem sanguinis quantitas ab integritate vitalium functionum ex chylo ipso præparetur ; sane intellectur quî fiat , ut in his circumstantiis *Plethora* nascatur . Verum inter has *Plethorae relativæ* causas , quæ censentur potiores , illud præstat

Caldani Pathol.

G

ani-

animadvertere ; quod terror videlicet ac frigus , uti brevi temporis intervallo sponte ut plurimum vanescunt , ita non semper eos effectus producunt , quos protinus indicabimus ; dum , contra , vasorum conglutinatio , ipsorum rigiditas , membrorum mutilatio , ut vitia sunt hujusmodi , quibus frustra medicina adhiberetur ; ita potius *Plethora* veram quam relativam in iis peculiaribus Individuis constituunt , eaque propterea ad morbos disponunt .

*An Plethora in genere sit morbus . Qui  
sint Plethora effectus ,*

121. Diximus *Plethora* veram ad morbos disponere , non secus ac apparentem et relativam , propterea quod sanguinis et cuiusque humoris abundantia , si Auctores audimus , morbum propriè dictum non constituit ; etsi nuperi quidam Cl. ( quibus innixi fundamentis haud satis scio ) non tam vasorum plenitudinem , quam eorum depletionem , morbum appellare non dubitaverint . Verum , me quidem judice , hæ omnes *Plethora* species haberi debent solimmodo tanquam causæ aptissimæ ad morbos frequenter producendos . Quæcumque enim *Plethora* differentia , nempe sive illa quæ ponit excessum relativum , ipsorum humorum attenuationem et circulum infirmat , ac retardat . Ex hac retardatione fiunt stases , et proinde humorum degenerationes ; quæ saxe ad inflammationem disponunt ; secretiones aut pertur-  
ban-

bantur, aut impediuntur; comprimuntur nervi prope majora vasa recurrentes, unde nascuntur stupiditates, ac paralyses peculiares; debilitantur interdum alicubi vasa nimis distenta, et, in saccos singulares dilatata, faciunt aneurysmata, aut varices, pro ut dilata<sup>t</sup>io est in arteriis, vel in venis; demum vel sanguis contentis vasis per inorganicas rimas exsudat, aut per dilatata vasorum extrema effluit, aut denique erumpit ex vasis disruptis (n. 92.) et in cavitatem aliquam peculiarem effunditur, cum maximo valetudinis detimento, ac vita periculo.

*Num hi effectus omnibus Plethora spe-  
ciebus sint communes.*

122. Funesti hi effectus; tum et alii, qui ex dictis facile intelliguntur, videntur quidem *Plethora veræ* magis convenire, quam *apparenti* et *relativæ*; cum in his postremis nonnullæ earum causarum, quæ utramque promovent ac fovent, illius naturæ sint, que nadi modum (n. 120.) vidimus, ut sponte, vel minimo negotio, conquiescant: at nihilominus satis in aper-  
to est, ibi periculum esse gravius, et magis promptum, ubi *Plethora veræ* vel humorum rarescentia adjungatur, videlicet *Plethora ap-  
parens*; vel angustia spatii nempe *Plethora re-  
lativæ*. Quis enim effectus promptiores et ma-  
joribus viribus præditos non expectabit, ubi

causarum copia et vires incrementum suscep-  
perint?

*Nunq; Plethora et Inanitio plurium mor-  
borum causæ esse queant.*

123. Quæ hactenus de *Plethora* attulimus hu-  
jusmodi videntur, ut luculenter ostendant, non  
longe fortassis a veritate aberrare eos, qui  
(minime neglectis vitiis qualitatis in humori-  
bus, quorum tamen plura ab ipsis forte *Ple-  
thora* speciebus, et humorum inopia, aut pro-  
xime pendent aut remote) in ea essent sen-  
tentia; inter maximam videlicet causarum par-  
tem, quæ ad morbos producendos sunt aptissimæ,  
principem sibi locum eas vindicare,  
quæ humorum excessum inferunt, aut inopiam;  
adeoque ex alterutro horum fluidorum vitio  
maximam pariter morborum partem proficiisci.  
Et fortasse Medicinæ Parens idem sensit, cum  
libro primo de Diæta monuit, *non posse homi-  
nem qui alimentis utitur integræ frui valetudine,*  
*ubi corpus non exerceat in ratione alimenti: est*  
*quippe exercitium ad id comparatum, ut illud*  
*absumat, quod superfluit.* Quam ob rem, ad-  
dit libro tertio, pariter de Diæta, sollicite in-  
vestigandum esse, utrum alimentum labori pre-  
stet; utrum labor alimento; utrum denique et la-  
bor et alimentum mutua sibi proportione respon-  
deant: ex horum enim inequalitate nascuntur mor-  
bi, ut ex eorum æquilibritate valetudo dependet.  
Cum autem *Plethora* vera comparetur alimentis

præ-

præcipue ac deside vita ; cum ad *apparentem* *Plethora* ii sint magis dispositi , qui melioribus utuntur cibis , chylum maxime oleosum præhentibus ; cum morbis omnibus febrilibus *Plethora* aut *vera* , aut *apparens* , adjungatur ; cum denique morbi alii plures a retentis iis quæ deberent excerni , aut ab excretione eorum quæ retineri deberent originem ducant ; satis constare videtur , *vitia* quæcunque pertinentia ad humorum copiam , quoquaque modo a naturali statu recedentem , recte inter causas plurimorum morborum numerari posse .

*Quam ob causam inanitionis vitia  
prætermittantur .*

124. Post enarrata *vitia* , quæ a sanguinis et boni cujusque humoris redundantia proficiuntur , de *inanitione* seu *imminuta* horum quantitate dicendum esset . Verum hæc *inanitio* aut subito fit , aut sensim sensinique . Cum subita est , ea nascitur ab *hæmorrhagia* ; cum fit sensim , ea aut ab *inedia* oritur , aut a morbi longitudine . De *hæmorrhagia* disserere ad *Clinicos* spectat , aut etiam ad *Chirurgos* ubi ex vulnere aliquo ea ortum duxerit . *Inedia* adjunctam habet præviam humorum qualitatem ; neque pariter optimæ notæ sunt humorès , quorum copia ex longo morbo imminuta fuit . Ob has igitur rationes peculiari sermone *inanitionem* minime persequemur ; præsertim quia

de prava humorum indole singulari Capite no-  
bis agendum est.

## C A P U T VIII.

### DE MORBIS HUMORUM PROPRIO LOCO ABERRANTIIUM.

*Quid sit loci aberratio.*

¶25. **A**D valetudinis integratatem tuendam illud etiam pertinet, ne scilicet humores propriis locis aberrent. Tunc autem aberrare dicuntur, cum ii proprium mutant locum: adeoque vel per canales non suos excurrent; vel intra sinus, receptacula, et cavitates quasdam effunduntur, intra quas secundum naturam effundi non solent. Ex hac igitur loci mutatione in humoribus morbi oriuntur ii, qui nonnullis dicuntur ex errore loci, et qui diversi inter se sunt cum pro humoris aberrantibus ingenio, tum pro diversitate loci, ad quem is praeter naturam traducitur. De his paullisper disseremus; quantum videlicet ferre possunt simplicissima Pathologiae generalis elementa.

*Quomodo aberret sanguis, et que mala afferat sub cute effusus.*

¶26. Initium ducemus a sanguine; qui propriis vasis elabens, vel in vicinas cellulas con- ges

geritur, vel intra cavitates corporis aut communes aut particulares, vel demum extra corpus aliquando erumpit; quo tempore, ut notum est, hæmorrhagiam constituit. Ubi intra cellulas se recipiat, suggillationes facit, quas Græci vocant *Echymoses*, quod idem est ac si dices sanguinem sub cute effusum ex vasorum vel distensione nimia, vel ruptura; et ruptura quidem nata a compressione, contusione, aut vulnere. Si pauca admodum copia in extimam cutis superficiem, aut inter hanc et cuticulam effundatur, atque hic illic stigmata plus minus rubra excitet, ea stigmata communii quodam vocabulo, (quatenus similibus aliis competit maculis alterius coloris) dici solent *Exanthemata*; quæ tamen absque effusione, si quid video, simplici nempe congestione in minorum vasorum ad cutim pertinentium extremitatibus, suboriri possunt. Si ex disrupta arteria quadam externa, magna copia sanguis proruipat, et cutim elevet in tumorem, tunc tumor hic dicitur *Aneurysma spurium*. Sanguis intra haec loca congestus, si neque multus sit, neque prompte nimis concrevit, quo proinde inhalantibus venulis sorberi possit, vix molestiam afferre solet: verum copiosus et in grummos coactus, praeterquam quod partes comprimit quibus continetur, unde plura mala eveniunt, nisi scalpello incisa cute educatur, aliaque fiant quæ a Chirurgiæ peritis fieri solent, longa mora, calore,

et fortasse aliquâ alia causa non satis nota , in partes secedit , degenerat ex blanda ejus indole , putrescit , partes irritat , atque hinc dolores , convulsiones , febres , inflammationes , abscessus , gangrænæ , et similes æque graves ægritudines præsto sunt .

*Qui ejus effectus cum in cavitate delabitur.*

127. Eadem prorsus accidentunt <sup>si</sup> intra communes ac principes corporis cavitates profundatur : nam intra Caput , facit *Apoplexiā* et morbos apoplexiæ affines : intra Thoracem , facile putrescit , maxime si aer ex lœso pulmone erumpat ; et movet *Empyema* ; intra Abdomen , putridum gignit *Hydropem* ac *Tympanitin* , præter alia mala quæ ex putrido humore , contenta his cavitatibus viscera inferciente , oriri consueverunt . Quod si sanguis effluat ex bronchiis , seu ex viis pulmonum , facit *Hemopysin* , videlicet sanguinis sputum : si ex ventriculo aut intestinis , vel vomitus exsuscitat , vel dejectiones sanguineas : si ex renibus aut vesica urinaria , *mictum cruentum* ; si ex vasis membranarum testes in nostro genere comprehendentium , *Hematocele* , et sic porro .

*Qui effectus lymphæ aberrantis.*

128. Sed etiam serum aut lympha propriis emittitur vasis ; et si angusto spatio sub membranis alicubi coerceatur , has elevat in pustulas , seu bullas . Si cutim occupet , et cellu-

Iosam subcutaneam, *Leucophlegmatiam* efficit seu tumidum totius corporis pallorem: tum eas *Hydropis* species, quæ dicuntur *Anasarca*, aut *Hypasarca*, videlicet aquam inter cutim, aut inter carnes. Si intra maiores cavitates delabatur, et quidem parca quantitate, *Apoplexiam* serasam, et soporosas ejusdem indolis affectiones gignit: si copia aliqua sensibili *Hydropem* verum creat, qui in Capite dicitur *Hydrocephalon*, in Thorace *Hydrothorax*, in Abdomine *Aescitis*: si intra particulares cavitates, facit *Hydropses peculiares* qui nomen suum a loco intra quem aqua congesta est: quæ si in artibus, præcipue in inferioribus, ita stagnet, ut ii intumescant, ea intumescentia vocatur *Oedema*: si deum in Scroto, herniam aquosam promovet, quæ *Hydrocele* græco nomine appellatur.

### *Qui pinguedinis effectus.*

¶ 29. Congesta pinguedo, intra proprias celulas, et densata magis quam par est, in tumores assurgit peculiari solliculo non ejusdem in singulis crassitiei inclusos, qui generatim dicuntur *Steatomata*; quasi dices sebum, aut certe pinguem humorem, præter naturam, nempe nimia copia, accumulatum: et qui porro tumores in nonnullas tribuuntur species, ab externo eorum habitu desumptas, a majori aut minori densitate, ac vario congestæ materiæ colore, tum a natura fluidi alterius aliquan-

quando intermixti , et fortassis ab īdole vitii revincientem atque intētextam cellulosa m̄ occupantis . Hi autem tumores fiunt etiam a pinguedine resorpta , et in partem aliquam , aut peculiare viscus , effusa : ubi hos tumores absorpta pinguedo non producit , ea si , vel nimio corporis motu , vel febris vi prius soluta , citissima sanguini reddatur , aut febrem inten- dit , aut ipsam acutam febrem excitat ; propterea quod blandā naturā depositā , propter vim hujusmodi causarum , īdolem irritantem adi- piscitur :

*Qui effectus aeris.*

130. Ipse etiam aer sua habet in corpore loca , in quibus secundum naturam plus minus continetur . Sunt autem hæc loca et pulmo et alimentorum tubus . Si fiat igitur , ut ex vulnere , aut ictu , aut tulcere , aut ruptura , sive pulmonis sive tubi alimentorum , aer ex his locis erumpat in cavitates ; quibus hæ partes continentur , cito corruptus omnia pessundat , et in abdomine *Tympanitū* facit , nempē *Hy- drope m̄ siccum* , qui tamen morbus rarissime aeri debetur intra abdominis cavitatem concluso . Quod si ab his cavitatibus sibi viam faciat in proximas cellulosas , eas distendit in tumores aereos , quos Græci dicunt *Emphysemata* ; quæque aliquando universum corpus occupant cum intus tum exterius , propter cellulosas inter se communicantes .

*Qui bilis effectus.*

131. *Hydropem siceum* movet etiam bilis ex propriis receptaculis in abdominis cavum prolapsa: est enim bilis humor, qui facile putre- scit: et sub putredine aer elasticus aut certe *gasticum* fluidum vi elastica præditum evolvi- tur; præterea, putrescendo, partes violenter irritat, et proinde spasmos movet, convulsio- nes, tormina, inflammationes, abscessus, ul- cera, et mala his affinia. Cumque absolutæ atque optimè ciborum coctioni pluriū faciat ipsa bilis, quemadmodum manifestum est; hinc effusa, præter mala hactenùs enarrata profuptam etiam affert corporis maciem; de- pravatam digestionem; intestinorum inertiam; et proinde alvum tardam, ac tumentem; et abdominalium viscerum obstructiones. Mitto dicere de altero errore loci in bile ipsa; de eo videlicet, qui constituit *Icterum*; tunc na- scentem, ut omnes norunt, cum bilis ex propriis hepatis vasis per venæ cavæ hepaticæ ra- dices in universam humorum massam commi- grat.

*Qui effectus chyli.*

132. Maciem paullo ante indicatam, tam- quam effectum aliquando ipsius bilis proprio loco aberrantis, infert etiam chylus suis va- sculis, receptaculis, ductibus emissus: humo- rem enim hunc id corpori suppeditare, quod par-

partes omni momento deperditas instauret ; adeoque maciem consequi quotiescumque propriis cavitatibus aberret , hoc quidem est adeo notum , ut nihil fortasse notius esse possit . Sed neque in sola corporis emaciatione poni posse videntur effectus erroris in chylo : nam ut si leam de descensu hujus humoris per loca , ad quæ secundum naturam pervenire non solet , nempe per crassa intestina ( quo tempore cum fæcibus eliminatus affectionem constituit Cœliacam alibi describendam ) non ab re est conjectari , chylum in aliena loca effusum , nempe sive in abdomen , sive in pectus , sive in cellulosas chyliferis canalibus proximas , iisque accumbentes , spontanea ejus degeneratione vicinas partes stimulis perfodere , et morbos excitare , qui a partium irritatione pendere solent .

### *Qui urinæ effectus :*

133. Urina separata , et inhalantibus vasis recepta , ipsa quoque morbos ex errore loci progignit . Solet autem in ventriculum impetrare , in cerebrum , atque in alias corporis partes ; nam vomitus movet urinosos ; sudores pariter urinam maxime redolentes ; apoplexiam ex sero urinoso intra cerebri cavitates effuso ; et proinde etiam convulsiones dirissimas , qui sane morbi non semper urinæ suppressionem comitantur , propterea quod ut plurimum acre lotium retentum inflamat citissime , atque persun-

sundat organa urinaria ; præcipue autem vesicam maxime sensilem , et partes cum ipsa vesica cohærentes .

*Qui effectus humorum marbidorum .*

134. Sed loci error in ipsis etiam noxiis seu morbidis humoribus videtur attendendus : nam et ii , sive alicubi stagnantes , sive cum universa humorum massa circulum obeuntes , locum saepe mutant , modo cum detimento , modo autem cum ægrotantium levamine . Ita pus ab exterioribus corporis partibus intra venas resorptum , et in fluentum sanguinis importatum , quandoque in partes principes deponit , velut aliquando deponuntur humores morbidi , qui acutam febrem , aut morbum aliquem acutum febrilem excitarunt , atque foverunt ; quem sane pravorum humorum in eas partes *decubitum* , ut dicunt , mors excipit . Tristia habemus exempla in vulneribus capitis , quæ funestum hepatis abscessum interdum inferunt : de morbidis autem humoribus in morbo aliquo febrili ad partes principes traductis cum lethali eventu , exempla sunt adeo obvia , ut supervacaneum sit in his recensendis immorari . Contra , ex pectoris cavitate , ex renibus , ex utero , aliisque interioribus partibus , visum est aliquando receptum pus aut per urinas dejici , aut per sputum , aut demum interiores partes prorumpere ; a quibus chirurgicæ artis administriculo educi potuit , et qui-

quidem eo eventu , ut valetudo in integrum fuerit restituta ,

*Qui humoris nutriti*ū* effectus .*

135. In humore nutritio errorem etiam contingere posse conjectati sunt Pathologi quidam præstantissimi . Ratio conjecturæ ea fuisse videtur , quod , cum scilicet credibile valde sit nutritum humorem , diversæ naturæ partibus apponendum , ejusdem non esse mixitionis atque indolis ; hinc fieri possit , ut quod uni parti nutriendæ comparatum est , in alterius nutritionem impendatur . Ad hunc igitur errorrem revocarunt callum cutis , hujusque degenerationes in excrescentias cornua referentes , aut crustas monstrose intumescentes ; ossium mollitudines ; mutationes carnium in cellulosas et tendines ( si carnes reipsa in tendines unquam mutantur ) et partium quarundam mollium in cartilagineam , osseam , lapideam naturam .

*Qui demum effectus humoris cujuscunque .*

136. Tandem , ut omissa brevi sermone complectamur , humor quicunque , sive utilis sive excrementitius , potest a causa aliqua , vel interna vel externa , ex propriis locis in aliena transfundi ; atque inde alios aliosque morbos procreare , tum pro natura humoris aberrantis , tum pro indole et actione partium , ad quas traducitur . Ab his tamen morbis indicandis

dis supersedemus, propterea quod, cognito ex Physiologicis humorum peculiarium usu atque indele, tum fabrica et actione partium humani corporis, nemo non videt quæ vitia ex singulare hujus vel illius humoris aberratione enscantur.

## C A P U T . IX.

DE MORBIS EX RUBRO SANGUINE AUT SERO IN  
VASA MINORUM GENERUM TRADUCTO.

¶ 37. **M**orbis ex errore loci in genere hactenus persequuti sumus. Mirabitur fortasse quispiam, quod inter ea humorum vitia celebre illud a nobis fuerit omissum; quod inflammationem afferre dicunt, et quod summus Boerhaavius tantum exornavit, toties in propriis scriptis memorat, tot viri præstantissimi adoptarunt, et de cuius præsentia in inflammationibus etiam nunc adeo parum dubitant, ut potius inter paucissimas veritates medicas principem sibi locum vindicare arbitrentur. Rationes afferemus, quæ nos eo adduxerunt, ut in hac parte ab iis dissentiremus; eas publico examini subjicimus: liberum unicuique erit aut in iis acquiescere, aut eas rejicere. Harum rationum partem ex Illustriss. Viris Albino et Hallero decerpsumus; partem alteram nos ipsi adjecimus, ut, si per nos fieri posset, Illustrum amicorum placitis momentum adderemus.

*Summa Boerhaavianæ sententiae.*

138. Monuerat itaque Cel. Boerhaavius (qui tamen in ea erat hypothesi, ut crederet globulum rubrum sex serosis constare, serosum sex lymphaticis, et sic porro) monuerat, inquam, ultimam arteriolam rubram sumi posse tamquam aortam arteriolæ flavæ inde productæ; flavam arteriolam esse aortam continuæ lymphaticæ, et sic deinceps. Quotiescumque igitur ex sanguinis excurrentis aut impetu aut rarescentia, vel ex vasculorum debilitate, dilatatur ostium arteriæ flavæ aut lymphaticæ, in eam sanguis subbit, in hanc vero serum: cumque, crescente horum vasculorum angustia, nequæat intrusus liquor ipsorum vasculorum fines superare, hic stagnabit, obstruet vascula illa; adeoque in primo casu nascetur inflammatio rubra ex errore loci; in secundo autem inflammatio flava, similiter ex errore loci. Obstructis hisce vasculis, cor auget suarum contractionum frequentiam ac vim: propterea impedit violentius in vasa obstructa, quæ, ut obstructa, magis resistunt; ita crescit attritus, et proinde calor, febris, rubor, et quicquid aliud inflammationem comitari solet; quæ porro omnia, et singula, in rubra inflammatione graviora sunt, quam in flava. Fere similia docuerat Erasistratus cum dixit, inflammationem tunc fieri cum sanguis ea vasa ingreditur, per quæ secundum naturam movetur spiritus.

Dux

*Dubitatio I. in Sententiam Boerhaavii.*

139. Rationes autem, ob quas in hoc negotio a Boerhaavio aliisque viris præstantissimis libens dissentio, hæ sunt. Positis (ut simus liberales) diversis vasorum descrescentium seriebus, non iis tamen omnibus, quas non nulli per imaginationis libidinem in Physiologiam invexerunt; certum tamen est exploratumque plurimis cum observationibus tum experimentis, nullum fere in animali corpore locum esse, rubris etiam vasculis apparenter destitutum, qui aliquando, vel absque vasorum ruptura, sanguinem rubrum non admiserit aut admittere nequeat, sine subsequente inflammatione; vel in cadavere crassioribus injectionibus repleri non potuerit. Ex his confecerunt viri quidam præclarissimi, ea ipsa vascula, etiam in vita ac valetudine, rubros globulos recipere; qui cum per vasa solitarii excurrentes sint pallidiusculi, præ eorum tenuitate, idcirco rubrum colorem per ea minora vasa non sinunt translucere; quo proinde pro minorum generum vasculis plurima usurpantur, quæ re ipsa rubra sunt. Ita injectiones per viscera ac ductus excretorios traducuntur, qui in vita ac valetudine rubros globulos repellebant: demum ita fit, ut oculi album, quod dicitur, album videatur in integrum, seu quaquaversum, quamvis admota lente, innumeris rubris vasculis pingatur. Eadem est ratio (quemadmodum in

*Caldani Pathol.*

H

præ-

prælectionibus semper docui ) tendinum , ligamentorum , cartilaginem , ossium , pinguedinem membranæ ; quæ porro partes in statu secundum naturam albescere videntur plus minus ; at lœsæ quomodocumque non prius reparantur , et ad cicatricem perducuntur , quam rubræ fiant quaquaversum . Est igitur valde probabile , ut error loci id communiter dicatur in his circumstantiis , nempe in quibusdam inflammationibus , quod revera error non est , sed tantum major globulorum congestio intra vasa , quæ sanguinem ruhrum admittunt , non facile in statu secundum naturam oculis perspiciendum propter globulorum atque vasorum exilitatem , et quæ porro vasa nunc distenta , atque hinc majus spatum occupantia magisque repleta , faciunt , ut partes , ob vasorum distentorum vicinitatem , quaquaversum rubore videantur .

### Dubitatio 2.

140. Posito autem errore loci , nempe quod sanguis ruber aut serum flavescens traducatur in vasa minora alterius generis , deberent hæc vascula alieno liquore , rubro scilicet aut flavo , repleta in oculos incurrere ; adeoque vel retiâ , vel arbusculas , vel cincinnos , vel aliam quamcunque peculiarem vasculorum distributionem exhibere . Et hoc quidein iis maxime in locis , in quibus vascula non sunt confertissima , neque eo usque diducta , ut propriis parietibus se se mutuo contingentia , spatiu-

quod-

quodcumque deleant ipsis vasculis interjectum. Neque obstat, quod in repletionibus etiam felicissimis, quæ arte fiunt, semper multum superpetit quod non impletur; nam repleta vascula aliquam fere semper imaginem refèrunt inflexionum earum, quæ repletæ partis propriæ sunt. Contra, aut digitus, aut brachium, aut pars alia corporis quæcumque inflammata, rubet undique (vel saltem ut plurimum in exquisita, ut ajunt, inflammatione) neque eam præ se fert vasculorum distributionem, quæ ad partem spectat tunc inflamatam. Undique rubent variolarum bullulæ, et pustulæ quæcumque, aut tubercula, quæ aliquando cutim aliquibus locis inflammant.

### Dubitatio 3.

141. Præterea est valde rationi consonum arbitrari, obstructionem, quæ inflammationem facit ex errore loci juxta Boerhaavianam sententiam, majoribus viribus non pollere in ratione ad vincula. At vinculum arteriis, sive majoribus sive minoribus, de industria injectum, sanguinem non retardat, et demoratur supra vinculum, quemadmodum experimentis præfinito institutis ostenderunt Albinus Lib. II. Adnot. Acad. Cap. X. et Hallerus Element. Physiolog. Tom. I. Lib. II. Sect. I. §. XXXI. Sub his enim periculis sanguis in vinculum impetens, cum nequeat ulterius propelli, sibi viam facit aut per ramos proximos latiores ab

ipso truncō ligato productos , atque inter vinculum et cor positos , qui , non tam cum venis , quam s̄epissime cum ramis inferioribus ligati truncī communicant , aut per ostia arteriarum earum , quæ cum ligatā communem habent originem . Hanc ob caussam fit , ut sanguis in vasa , quo ad sensum non rubra , supra vinculum a ligato truncō prodeuntia , intrudi non possit . (1) Quotiescunq; igitur error etiam aliquis consequeretur , a vi causarū earum , quas ( n. 138. ) ex Boerhaavio proposuimus , stases minime fierent ; neque obstrutio , vix incipiens , incrementum susciperet .

Non

(1) Viæ istiusmodi , quæ a sanguine leguntur , quotiescunq; arteriæ alicui vel ramosæ , vel ramis sensibilibus destitutæ , vinculum injicitur , rationem etiam reddunt propter quam intra arteriam aliquam , in viventi animali jam pridem ligatam , sanguis aut nullus , aut parca admodum copia , reperitur . Nequit igitur ab his experimentis sanguinis arteriam aliquam replentis quantitas determinari . Si quæ spes est finem hunc assequendi , hæc procul dubio in eo artificio ponenda esset , quo arteriæ non ramosæ tractus aliquis , plena in diastole , duplice vinculo eodem prorsus temporis momento interciperetur . Artificium sane laboris atque difficultatis plenum ; atque una simul hujusmodi , quod propter vim viventi animali illatam & propter irritamenta quibus tunc divexusatur , aquabilem sanguinis motum , & naturalem vasorum plenitudinem perturbaret : maxime cum viri quidam experientissimi , inter animalium tormenta , sanguinem viderint ex aorta abdominali in truncum supra diaphragma possum quandoque revertere .

Non enim facile est intelligere quî fieri possit, ut obstructus locus a cordis actione validius urgeretur: ( n. 138. ) nam cordis impetus insumi videtur in proximos ramos superiores, qui fortius pulsant, aut pulsare incipiunt, si prius naturaliter non pulsabant: id quod ( mirum sane! ) ipse docuit Boerhaavius in Medicis Institutionibus §. 141. cum dixit: *quæcumque arteriarum detecta, filique circumductu constricta fuerit, tumet illa et vibrat inter vinculum et cor . . . simul vicinæ arteriæ liberæ vehementius pulsantur.* Tanto autem minus cordis vis atque impetus auctus in obstructum locum validius agere videtur, quod non semel observatum fuerit, paullo majorem sanguinis copiam in rubræ arteriæ minimæ cavum intrusam, vi se se contrahentis arteriæ in truncum reverti, adeoque per eam viam retroagi, quam paullo ante legerat. Hoc evincunt inflammations per resolutionem, ut dicunt, evanescentes. At vero, posset ne unquam sanguis ex ramusculis in trunco recurrere, si in eos ramusculos cor validius impeteret?

*Tertia dubitatio exemplis confirmatur.*

142. Comprimuntur a Chirurgis arteriarum trunci in membrorum amputationibus, estque ea compressio adeo valida, ut per compressa loca, et infra ea, sanguis nequeat excurrere; neque tamen partes supra vinculum positæ inflammatione unquam vexantur, nisi inflamma-

tio et suppuratio (quæ amputationem sequitur, et partes occupat fætas infra vinculum positas) superioribus etiam partibus communicetur : id omnes norunt. Cur ergo dices obstructionem in vasis minorum generum in inflammationem abire ? Forte ne vinculum adeo validum minora vasæ non comprimet , quæ propterea intruso neque tamen expulso fluido obstruantur ; et sanguinem , aut serum , non urgebit in loca aliena ? Huc adde , quod sæpe rubor incipit in partæ aliqua absque febre , quæ deesse non possit , quoties obstructus locus a cordis contractione validius urgetur : immo si , liberaliter agentes , hunc majorem impetum admittimus , non ideo validus erit attritus in parte , adeo in Boerhaaviana hypothesi necessarius ; verum fieret hic attritus supra locum obstructum in liberis non obstructis arteriis ; quo proinde , nisi dolor , at certe calor , intumescentia , pulsatio , non in loco inflammatu se se præberet ; aut procul dubio ibi major non esset , quemadmodum re ipsa est .

#### *Dubitatio 4.*

143. Denique ut Boerhaavii hypothesis de inflammatione ex errore loci innixa est alteri hypothesi notissimæ ( n. 138. ) de rubro sanguinis globulo secedente in sex serosos ; de seroso autem in sex lymphaticos etc. liceat nobis exquirere a Boerhaavii sectatoribus , quâ siat ut ruber globulus , in serosum vasculum tra-

traductus, non solvatur in suos componentes globulos serosos; aut cur serum, in vas lymphaticum impulsum, in lymphaticos componentes globulos non secedat? Non difficilis est, secundum Boerhaavium, secessio haec; cum doceat in Praelectionibus ad Institutiones Medicas §. 226. sola quiete ruborem in globulo perire, et statim globulos apparere flavos, quorum sex uni rubro omnino aequales sunt: mox colorem flavum evanescere, et sphaerulas se se praebere, quarum sex flavo globulo, triginta sex vero, rubro aequales sunt. Quæ si ita se habent, ut ipse se vidisse testatur, cum sanguis aut serum in aliena vasa compulsum quiescat, quantum globuli a crescente vasorum angustia nequeunt ultro propelli, neque in maiores trunca recursare propter vim cordis impellentem, ea secessio necessario consequeretur, quæ inflammationem omnem anteverteret. Nam sanguis ruber, serosis vasculis contentus, in serum mutatus, propriis tunc vasis veheretur; quemadmodum serum, secessione mutatum in lympham, in vasa tunc lymphatica libere moveri posset.

#### *Conjecturæ de inflammatis sède.*

144. Post ea quæ hactenus attulimus ( à n. 129. ad 143. ) contra hypothesim inflammationis ex errore loci, quæque num aliquid roboris habeant nec ne alienum iudicium fuerit, posset aliquis a nobis sciscitari quid sentiamus.

de inflammationum causa et sede . Quod ad sedem pertinet non videbimus fortasse longe a vero aberrare ; plurimorum sententiam secuti dixerimus , communiores inflammationum sedem in cellulosis esse; adeoque ob loci quidem errorem , sed errorem longe diversum ab eo , de quo hactenus dubitavimus. Ceterum et ipsis minimis vasis rubris etiam interdum inflammatio insidere videtur ; dum scilicet intra haec vasa , sive ex peculiari stimulo sive ex ipsis debilitate , majori copia quam par est congeruntur globuli rubri : haec enim congestio minima vascula distendens , ruborem exhibet , qui prius erat inconspicuus , et impedit quominus maiores globulorum massulae inde natæ vel pellantur ulterius , vel in majora vasa regrediantur . Usque dum vero intra vasa minorâ haec rubræ massulae aggestæ continentur , spes est ut Naturæ et remediorum viribus attenuatae , seu in globulos naturales solutæ , iterum in circulum moveantur ; ubi autem hoc cito non fiat , mora , calore , seu potius igne cui sunt intermixtæ , qui que in iis explicatur , eam in dolorem adipiscuntur , qua solidum stimulis perfodere , atque hinc majorem in partes afflum promovere , augere calorem , uno verbo inflammationem exsuscitare aptæ fiunt ; deinceps in abscessum , gangrenam , aut scirrum partes inflammatas adducere . Quinimmo tanta aliquando vis est ignei principii congestis illis globulis interjecti , ut vascula erodat vel di-

strahendo disrumpat; unde vitiosus sanguis congestus, in proximas tunc cellulas effusus; tumorem *phlegmonodem*, ut dicunt, constituit, qui fere nunquam in abscessum transit; enim vero subito partes exsiccat, adeoque gangrena nascitur aut sphacelus, pro ut inflammatio partes obsidet loco minus aut magis profundo positas. Hæc de sede.

*Conjectura de inflammationis causa.*

145. Quæ autem esse potest inflammationis causa? Nempe ipsa rubri sanguinis congestio vel intra cellulas vel intra rubra vasa minora; verum non sanguinis secundum naturam constituti, sed illius indolis sive prius in corpore natæ, sive posterius a solidoruim quorundam irritamento profectæ, qua majorem ignis copiam in proprio sinu foveat, aut certe ignem magis actuosum, a cuius præsentia, ac vi, phlogistica illa seu inflammatoria diathesis est repetenda a Boerhaavio saepius commemorata; quamvis, nostrâ quidem sententia, cum hac diathesi non quidem densitas, ut summo viro placuit, sed potius tenuitas conjungi videatur. Et sane hanc tenuitatem rubor fugax in inflammatis partibus evincit, quæ pressione lenissima, immo levissimæ plumæ supervectæ contactu, protinus albescunt, rubore citissime revertente: et confirmant puncturæ, aut vulnera simplicem cuticulam inflamatæ cutis lædentia, a quibus tenuissimus sanguis non facile

cile cohibendus exstillat. Quæ duo, idest rubor fugax, et sanguis facile fluens, cum densitate fluidi intra arteriolarum angustias coerciti esse non possunt. Quod si huic sententiae pondus non adderent Illustrium Anglorum observationes de inflammati sanguinis, postquam emissus fuit, tardiori concretione, qua fit ut sèpius pars ejus alba concrescibilis a rùbra expediri queat, et crustam placentæ superinducere, quæ ubi crassior ibi pars rubra minus cohæret; eam certe tenuitatem igneum principium majori copia sanguini illi intermixtum, aut magis evolutum, satis superque significaret. Si enim principium illud sanguinis rarescentiam infert, adeoque ejus fluiditatem conservat; in ejus prædominio rarescentiam augeri, et hinc minorem vim cohærendi seu tenuitatem suboriri necesse est. (1) Et cur non etiam

(1) Nollem quis obijceret, sanguinem ex aperto vel tumore phlegmonode, vel abscessu, cum pure stillantein, piceum propemodum esse, et difficulter fluentem: tum etiam sanguinis tenuitatem in inflammatione minime convenire cum pulsu duro, et cum præsidiis ad inflammationes vincendas comparatis; repetitis videlicet sanguinis missionibus, diluentibus etiam subacidis, vesicantibus &c. Nam cum eo sanguine ac pure plura solidorum ramenta; ignei principii viribus detrita commixta sunt: & pulsus frequenter durum ab arteriarum irritamento, & nimia sanguinis rarescentia, hinc arteriarum distensione valida, proficiisci posse nemo ignorat; quemadmodum ignorare nequit, sanguinis missiones ignei principii partem subducere,

etiam crustæ illæ albescentes inflammatis cada-  
verum visceribus insidentes eam comprobant  
sanguinis indolem, de qua sermo est, cum li-  
quor, a quo ex ortu ducunt, ab ipsis locis  
inflammatis uberior exsudet? (1) Cur non de-  
nique phlogistici sanguinis tenuitatem faciles  
indicant inflammationum quarundam metastas-  
es, quæ momento sedem interdum mutant?

145. \* Ignéum autem principium, atque  
hinc irritamentum, vel stimulum alium quem-  
cumque ad inflammationem producendam re-  
quiri diximus, propterea, quod irritamento de-  
ficiente, nulla sit inflammatio. Et revera sæ-  
pe

cere; & una simul ( quod etiam vesicantia maxime præ-  
flant ) humorum affluxum ab inflammatis partibus aver-  
tere: denique diluentia subacida ideo temperandæ inflam-  
mationi accomodata esse, quod ignei prædominantis prin-  
cipii vires, tum propter frigidam eorum indolem, tum  
propter notain cum eo principio affinitatem, plurimum  
retundant. Quod si id etiam addant nonnulli heri vidè-  
licet aliquando, ut sanguinis placenta sub crusta illa pleu-  
ritica, quemadmodum dicunt, consistens magis cohereat,  
quam in naturali statu: cur non potius lymphaticæ san-  
guinis parti, quæ ob causam aliquam a cœro separari  
omnino non potuit majorem illam cohæsionem tribue-  
mus?

(1) Sanguinem in inflammationibus tenuitate pecca-  
re novâ mihi non videtur opinio. Nam, inter alios,  
Prosper Martianus in Com. ad aphor. Hip. aphor. 19.  
Sectionis VII. ubi legitur ab ossis denudatione erysi-  
pelas, inflammationem ideo subsequi docet, quia hu-  
moris tenuioris adest præminium.

pe rubent præter naturam partes ex violento corporis exercitio , ex frictione , balneo , humorum rarescentia ; diu rubet , immo livet cutis ex admotis cucurbitulis siccis , aliisque similibus causis , neque inde inflammatio est ; etsi sanguis in ea loca sit congestus , eorumque vasa insolenter repleat : effunditur interdum sanguis intra cellulosas , et fiunt suggillationes , quæ non semper in inflammationem abeunt ; quamvis nonnullæ difficulter admodum , aut lentissime , resolvantur . Non igitur sola sanguinis congestio sufficere videtur ad hoc , ut inflammatio fiat proprie dicta ; sed peculiaris etiam requiritur sanguinis indoles , acris profecto seu ignea ( si ad calorem , dolorem , aliaque inflammationum phænomena animum advertamus ) et aliquando fere dicerem prorsus caustica , ut partes promptissime in gangrænam et sphacelum impellat , et simul vitalibus functionibus sit maxime detrimentosa . Detrimentum hoc demonstrant experimenta a nobis instituta ( lett. 2. de la sens. et irrit. Tom. 3. pag. 369. edit. Lausan. ) quibus constitit , caustica , et vapores venenatos vim fibrarum insitam , nempe irritabilitatem , celeriter destruere : id significat subita partium insensitivitas , quæ dolorem excipit ; virium omnium dejectio ; corporis perfrigeratio , et similia , quæ imminentem mortem indicant : denique irritantis principii necessitatem pro inflammatione excitanda confirmat stimulus in oculis , in cute , aliis-

aliisque locis , qui irritamentorum istiusmodi efficacitatem inflammantur .

*Conjecturæ de ea inflammatione , quæ dicitur flava .*

146. Post hæc supervacaneum videtur illud querere , num scilicet inflammatio , quæ dicitur *flava* , locum reipsa habeat inter morbos : nempe num seri pars crassior in propriis vasculis , fortasse hypotheticis , aut serum ipsum in lymphaticis vasis *arteriosis* , ut ajunt , (nempe si quæ sunt ) retardari queat ; sicque ipsa hæc vascula obstrui possint ea ratione , qua proinde flavam moveant inflammationem . Postremum hoc (nempe quod serum in lymphatica vasa traducatur , atque in iis hæreat ) post ea quæ hactenus diximus , hypotheticum potius videtur , quam veritati consonum : primum , si locum habeat , eam fortassis inflammationem constituit , quam Chirurgi præcipue *spuriam* , seu serosam , vocant . Ceterum flavus color , qui aliquando in inflammatis externis partibus in sensus incurrit , aut a minori globulorum rubrorum copia intra minima rubra vasa congestorum repeti posse videtur , aut a mutata in sanguine indole partis concrescibilis ; quæ , dum in morbis inflammatoriis coacta se se præbet in educti sanguinis superficie , flavum colorem induit ob maiorem fortasse phlogisti copiam ; quemadmodum et crustæ polyposæ , quas dicunt , seu morbosæ flavescentes membranæ , quæ

quæ in cadaveribus occurrunt, inflammatis internis partibus non infrequenter superinductæ, satis luculenter videntur confirmare,

147. Ex iis quæ hactenus proposuimus, illud præceteris colligere prouum est; videlicet duo maxime requiri ad inflammationem excitandam: nempe sanguinis congestionem vel intra vasa rubra minora, vel intra cellas viscerum ac partium quas phlogosis invadit; et igneum principium in hoc ipso sanguine vel copia auctum, vel magis actuosum: quibus positis facile possumus phænomenorum eorum rationem (1) reddere, quæ inflammationem ipsam comitantur, ejusque præsentiam significant. Interim hæc, quæ longiorem sermonem exposcerent, et peculiaris operis materiam suppeditare possent, vix indicavimus, ne a proposito instituto recederemus. Si rationes, quas contra inflammationem ex *errore loci* simpliciter spectatam protulimus, et conjecturæ de inflammationum sede et causa hactenus propositæ aliquibus non arrideant, iisque propterea non moveantur, quo receptam illam inflammationis causam hypotheticam censeant, utpote quæ hypothesi (n. 138.) evidentissime superstructa est, ubi nos in maximo errore nequaquam versemur, fateri oportet, Medicos

---

(1) Vid. laud. Burser. loc. cit.

eos in inflammationum Theoria adhuc fortasse cœcutire.

## C A P U T X.

DE MORBIS EX VITIIS IN HU-  
MORIBUS.

*Quot sint species motus in hu-  
moribus?*

¶48. **H**Uinores, qui intra determinatos canales moventur, duplii motus specie agi ex Physiologia notum est: nam et de loco ad locum traducuntur, et miscentur atque agitantur insimul; ac reciproce propelluntur per innumeratas prorsus directiones. Prior motus species dicitur motus progressionis: species altera vocatur motus rotationis, vorticosis, seu intestinū. A quibus causis secunda hæc motus species proficiscatur a nobis jam dictum fuit in Capite Physiologico *de vi et actione arteriarum etc.* Præstat tantummodo hic loci admonere, omnem fere in sanguine intestini motus ideam vanescere, nisi concipiamus sanguinem ipsum progressionis motu moveri; nempe impelli a corde in arterias conicas, atque ita fluere ab ipso corde in extremas usque corporis partes. Quæ si ita sunt, tunc vorticosum seu intestinū motum a Naturæ lege aber-

aberrare intelligemus, quotiescumque motus progressionis aliqua ratione perturbetur.

*Quot modis humorum motus perturbati possit.*

149. Motus itaque progressionis, seu circulationis, de quo in praesens loquimur, ita variari potest, ut vel major sit, vel minor, quam valetudinis constantiae, et proinde libero et facili functionum omnium exercitio generatim conveniat. In eo humores moventur velocius, in hoc autem lentius quam ferat Naturae ordo; at quoniam humores omnes separantur a sanguine, in quo etiam aliqua ratione insunt, ita non absurdum videtur asserere, vitia motus, in universa sanguinis massa, convenire etiam humoribus, qui ab ipso sanguine variis locis secernuntur; seu absurdum non est existimare, ex perturbato sanguinis motu humores etiam reliquos plus minus mutari.

*Num reliqui humores mutationes subeant ex perturbato sanguinis motu.*

150. Quod autem perturbato sanguinis motu humores reliqui plus minus mutentur, hoc quidem omnibus innotescit. Si enim ad secretionum diversitatem, quemadmodum vidimus in Physiologia, motus quidam sanguinis, ab angulis, flexionibus, diametro, distantia locorum determinatus, plurimum facit; quatenus sensim sensimque sanguis in partes secedere in-

incipit, unde particulæ affines, mutuo congre-  
dientes, prius ad secretionem præparantur,  
deinceps hac ipsa affinitate juvante secretionem  
ipsam perficiunt, procul dubio aucto motu,  
vel imminuto, mutabitur ipsa secretio, et pro-  
inde humor a sanguine separatus. Res patet  
in febribus, præcipue acutis, in motu corpo-  
ris valido, in labore, in motus animalis iner-  
tia, in morbis ex laxitate solidorum, aliisque  
affectionibus, in quibus sanguinis motus vel  
auctus est, vel imminutus. Nam urinæ modo  
crudæ separantur et inodore: modo rubræ,  
cœruleæ, fœtidæ, ac turbidæ cum sedimentis;  
modo aqueus humor, loco muci, ex naribus  
destillat, et parcus; modo viscidus mucus lin-  
guæ, fauibus, et proximis atque cohærenti-  
bus partibus superinducitur; modo cutis est  
arida, modo sudore perfusa, et quidem vel  
aqueo, inodoro, et insulso: vel viscido, gra-  
veolente, flavo, cœruleo, rubro: bilis præ-  
terea in motus augmento acrior fieri solet ac  
tenuis; in motu imminuto viscida, iners, ac  
vapida: uno verbo, morbus non est, in quo,  
aucto vel imminuto naturali sanguinis motu,  
humores a sanguine secreti a naturali statu  
plus minus non recedant.

*Quæ causæ motus aucti in humoribus.*

151. Nunc igitur potiores causas indicemus  
quæ motum in humoribus augent, ut effectus,  
ac proinde vitia in humano corpore nascentia,

*Caldani Pathol.*

I

co-

cognoscī queant. Et primum quidem, cum nequeat humorū velocitas in animali viventi corpore incrementum suscipere, nisi cor frequentius, et fortius contrahatur; propterea causa proxima auctiū motus erit frequentior et fortior cordis contractio, quæ aliquando debetur majori irritabilitati, sive naturali, sive acquisitæ; remotæ autem atque occasioñales causæ erunt quicquid valet cor in frequentiores et validiores motus adducere. Huc igitur pertinent valida corporis exercitia, labores, cursus, id omne videlicet, quod aūt respirationis aut motus voluntarii cujuscunque organa validius exercens, consueto temporis intervallo majorem sanguinis copiam ad cor determinat. Deinde idem præstant irritamenta quæcunque per sanguinis vias ad cor traducta; quemadmodum sunt acria omnia, sive intus assumpta sive clam intra corpus investita, titulo contagii, pestis, veneni; sive demum ex peculiari aliquo corporis loco resorpta per venas; demum variæ animi affectiones inter causas, quæ cor sollicitant ad frequentiorem ac fortiorem contractionem, debent recenseri.

*Quid ostendat has causas sanguinis motum accelerare;*

152. Et revera si ea inest muscularis omnibus vis, qua ab acri irritati aut contrahuntur si quiescebant, aut contrahuntur fortius si prius motu aliquo agebantur, profecto cor, cui vis maxime insidet, debet vel ex majori sun-  
gui-

guinis aut copia , aut densitate , vel ex irritanti materie admixta , et fortius ( ceteris partibus ) et frequentius micare . Hinc intelligitur , ut alio in loco monui ( Rifless. Fisiolog. §. 91. pag. 136. ) quî fiat , ut vulnera quæcunque , etiam maxime dolentia , non statim febris (1) excipiat ; verum tunc solum cum congesti sanguinis èt alterius humoris degeneratio , actione præsertim , ut videtur , aeris exteriores comparata , in acrem indolem facessit ; quo pravus humor per venas ad cor traductus hoc viscus præter naturæ modum irritat . An vero animi affectiones quædam ideo cor movent fortius et frequentius , quod majorem sanguinis copiam ad cor determinent ? Sed quo mechanico artificio determinant ? An quia fortasse sub plurimis animi affectionibus vel nixum edimus , vel pectus agitamus frequentius , vel spiritum cohibemus , sicque et respirationem perturbamus , et musculos in actionem deducimus , quo , compressis venis , sanguis velocius irruit in cor ? Supervacaneum videtur admovere has esse primas mentis cogitationes , qui-

---

(1) De febre hic loci sermonem habemus , quæ cum caloris augmento , & perturbato ac plerumque velociori sanguinis motu conjungitur . Neque enim dubium esse potest , quin *partiales* febres , quas *topicas* etiam appellant , hisce in circumstantiis quandoque excitentur , quod etiam inflammationibus nonnullis usuvenire praxis confirmat ; quæ porro inflammations sine febre *generali* , ut ita loquar , interdum contingunt .

bus verosimiliter vel nihil vel parum tribuendum est ; quamquam in opusculo modo citato , §. 154. pag. 266. 267. not. (\*\*) has ipsas cogitationes paullo fusius exposuerimus (1).

*Qui sint effectus aucti motus humorum .*

153. Effectus ab aucta velocitate pendentes censentur primum valida solidorum distensio , qua solida ipsa irritata , vi elastica , atque insita , fortius restituuntur . Crescit hinc attritus , et proinde phlogiston evolvitur , rarescunt humores , calor augetur ; attritus cohæsionem primum foveat ac densitatem particularum , quatenus fluidiora dissipat ; sales et olea , subducto aqueo liquido et evoluto phlogisto , fiunt acriora ; adeoque nascitur pronitas ad inflam-

ma-

(1) Dicent fortasse aliqui , sentiens principium , affectionem animi efficacitate , vel in turbas conjici , vel per me dicam suffocati ; ut proinde nunc in violentam actionem solida adducat & fluida , nunc vero vim horum naturalem plus minus infringat . Verum , quid est principium istiusmodi ? Est ne aliquid ab anima distinctum ? Et , quodcumque illud sit , quæso , quomodo phænomena illa dignit , de quibus est sermo ? Hæc , ni plurimum fallor , hujusmodi sunt , quæ humani ingenii viribus assequi nequaquam possumus . Quamvis enim potentiae in viventi corpore non deesse videantur , quibus in mechanicas leges minus recte aptari queant ; attamen phænomenorum explicationes , quæ ad has potentias revocantur eatumque agendi modum , nemo feliores censembit , utpote quæ hypothesibus nunquam confirmandis sunt superstructæ .

mationem et putridam humorum indolem, qui prius blandi erant, et omni irritandi facultate destituti. Quod si adeo aucta fuerit velocitas, ut solida continentia nimis distenta sint, præter vitia (n. 92.) indicata; et mala inde promanantia, ea etiam locum habere possunt, quæ Cap. VIII. commemoravimus.

*Quæ sint causæ motus imminuti in humoribus. Quæ vitia solidorum id præstent.*

154. Post enumerationem causarum et effectuum ab aucta humorum velocitate prodeuntium, de causis et effectis potioribus velocitatis imminutæ nonnulla sunt proponenda. Quod ad causas pertinet (præter immateriales, nempe eos animi affectus (n. 152. not. a) qui vires infringunt) aliæ a solidis pendent, aliæ autem a fluidorum vicio. Ad primam classem referri debet laxitas solidorum, quibus fluida continentur, et languida cordis et arteriarum vis insita: duo enim hæc plurimum possunt, tamquam causa proxima, ad humorum motum imminuendum: nam laxitas ponit minorem vim elasticam, et languor vis insitæ ponit debilitatem contractionis. In primo casu distenta solida a fluidis in ea impotentibus, prompta et æqua vi non resiliunt, quo fluida ipsa non promoventur, ut par est: in secundo autem casu, languide pariter propelluntur humores, quia naturalibus stimulis ipsa solida

non commoventur, neque propterea carent in opportunas contractiones. Hinc causae hujus laxitatis et languoris sunt primum vita otiosa atque iners: enimvero si ex corporis exercitio agentes musculi circulationi promovendæ non parum favent, ipsius corporis inertia circulationem retardabit. Verum a corporis inertia imminuitur etiam perspiratio, adeoque aqueum intra corpus manebit ad solida præter naturæ modum laxanda efficacissimum. Ita etiam laxitas viscerum digerentium, et præcipue ventriculi et intestinalium, tum et languor vis insitæ, in his visceribus, causa est inertiae motus in humoribus: ubi enim non bene digeruntur alimenta, optimus chylus ex ipsis alimentis non elicetur, cruda in sanguinem congeruntur, aquosa, viscida, quæ neque satis attenuari ipsa possunt, neque solida impetu distendere apta sunt, neque, ut decet, irritare, quo proinde motus elanguet.

*Quæ vero fluidorum.*

155. Quæ de solidorum vitiis, quorum viribus motus humorum languescit, hactenus a nobis proposita sunt, satis ostendunt fluidorum etiam cum singularium, ut ita dicam, tum universalium depravationes quasdam peculiares humorum motum retardare posse, quatenus ex solidorum vires infirmitant. Atque hinc intelligitur, cur vitia humorum digerentium, et præcipue bilis inertia, ac natura, ut ita dicam,

vapida, alimenta non satis mutando, cruda congregent et aquosa, quæ cum solidum laxent id tandem præstant; ut humorum motus imminuatur. In censi igitur causarum fluidorum motum remorantium et *Plethora*, et abusus alimentorum quorundam haberi debent; præcipue ubi hæc aquosa sint; farinosa; acida; austera. Nam *Plethora* solidum extenuans et cordis ac vasorum viribus nimis resistens motum humorum suffocat; alimēta autem aquosa fibras relaxant; farinosa et glutinosa viscidum congerunt; acida et austera solidum ipsum violenter arctant; eisque motum pene omnem adimunt: præterquam quod in ipsis humoribus depravationes seu acrimonias excitant peculiares, de quibus sequenti Capite sermo erit. Interim facile intelligimus tanto magis ex usu horum alimentorum languere fluidorum motum, si desidiosum etiam atque iners vitæ genus accedat.

*Qui sint imminuti motus effectus.*

156. Si potiores imminutæ velocitatis causas quas modo indicavimus, paullisper contemnemur, effectus; qui inde oriri possunt, quasi in oculos incurruunt. Quis enim ignorat ex languente humorum motu calorem immuni, attritum necessarium inter moleculas reciproce, et inter solidum ac fluidum, magnopere infringi, quo proinde opportuna ac naturalis humorum densitas prohibetur, aqueum et

viscidum morbosum congregari , quod solidum infirmat ; vim insitam debilitat , elementa quasi disagregat particularum , alias inter se validius cohaerentia ; stases in promptu esse ; impedimenta coctionum , secretionum , excretionumque , atque propterea viscerum ac partium functiones aut prohiberi , aut plurimum perturbari ? Quæ porro omnia et singula quot morborum causæ esse possint nemo non videt , qui partium fabricam atque usum ex Physiologia et Anatome accurate cognoscat .

## C A P U T XI.

## DE MORBIS EX PRAVA HUMORUM QUALITATE IN GENERE .

*Quibus argumentis humorum acrimonias impugnant nonnulli .*

\*57. **A**ntequam de prava humorum qualitate , seu de eorum , ut alii loquuntur , acrimonia sermonem habeamus , præstat monere , nonnullos fuisse inter Nuperos Scriptores , qui morbos hypotheticos eos appellaverunt , quos Pathologi et Clinici ab humorum acrimonia pendere autumant . Negant enim posse unquam humores acredinein cujusque generis concipere ; et cum Boerhaavio pugnant contra Boerhaavium : quippe qui cum de humorum acrimoniis disseruerit in Pathologia , et

et in Aphorismis de cognoscendis et curandis morbis, easque assumpserit tamquam demonstratas; nihilominus in chemicis Prælectionibus, quæ non hypothesibus sed experimentis innituntur, apertissime fatetur animalium humores in vita nunquam posse aut acidos fieri, aut alcalicos, aut putridos, aut rancidos. Addunt, ipsius Boerhaavii auctoritate, caloris gradus fere 150. thermometri Fahrenheitiani requiri, ut sanguis, in partes dissolutus quibus componitur, corruimpatur: tunc autem solummodo alcali volatile educi, dum calor gradus 266. ejusdem thermometri excedit. Sed calor hujusmodi neque in febre occurrit vehementissima; et sales urinosi volatiles, qui naturâ sua in sanguine insunt, et materiam ex parte suppeditant perspirationis, urinæ, ac sudoris, cum muriatico alimentorum sale copulati, in salem facessunt ammoniacalem, blandum propterea, et omnem irritandi vi destitutum. Sola igitur, si ipsos audimus, acrimonia muriatica jure admitti potest aliquando; eaque potius morborum quorundam effectus quam causa habenda est: si quidem ad eam obtinendam requiritur, ut muriaticus sal, reliquis principiis sanguinem componentibus naturâ sua coercitus, fræna disruptat. Id autem non tam marini salis abusui debetur, quam sanguini præcipue, aut humoribus alicubi stagnantibus: degeneratio enim, quæ ex stagnatione consequitur, muriaticum salem, ut ita dicam, evolvit. Denique, ne omni-

omnino humorum acrimonias rejicere videantur, ea erga Boerhaavium ejusque sedatores utuntur liberalitate, ut aliquando intra alimentorum tubum duntaxat eas acrimonias suboriri fateantur.

*Unle rationes desumpserint; et quid  
eæ probent.*

158. Arduum sane est Illustrium Virorum opiniones evertere; nihilominus libere dicam quod sentio; et ex ipso etiam Boerhaavio ea in medium afferam, quæ litem omnem videntur dirimere. Et primo quidem ii, qui contra acrimonias Boerhaavii auctoritate disserunt, ea quæ proferunt, nisi plurimum fallor, videntur desumpsisse ex ejusdem Chemicæ elementis, processu 129. et fortasse etiam ex processu 94. ubi hæc leguntur. Nullum ergo alcali fixum aut volatile in homine sano naturale est. Nequè certum acidum illum fixum aut volatile in humoribus naturalibus sanisque adest. Loquitur ergo de homine sano, et de humoribus sanis, ac naturalibus; non vero de homine ægrotante, aut de humoribus præter naturalam constitutis. Quæ igitur interest chemica inter atque alia Boerhaavii opera; aut inconstantia, aut contradic̄tio? Non ego ex praxi exempla excerpsero, quæ humorum acrimoniām videntur confirmare; et quæ plurima sane sunt. Ad chemicos ipsius Boerhaavii processus confugiam, ut rem ostendam.

*Quid*

*Quid Boerhaavius in hanc rem protulerit.*

159. Itaque processu 6. num. pariter 6. sic rem exponit. *Sapo igitur nativus humoribus planarum et animalium inest, si sanescant: verum si oleum scorsum vel sal, morbus utriusque fit.* Et processu 12. circa finem, monet; *moderatum salium alcalicorum usum prodesse podagræ illi, quæ Acido nimio ortum debet, nocere autem podagricis acriter biliosis, quorumque humores jam sponte in Alcali putridum vergunt.* Inde liquet (processu 90.) *corpora debilia chylum et lac album facere, rubrum inde in sanguinem difficilius conficere: quare Acido abundant, Acidum eructant, olen, sudant, totoque corpore pallidi sunt.* Quibus recte consideratis plurima mala corpori humano evenientia vere intelliguntur Medicis. Tandem, ne nimius sim, processu 98. ait: *Cheimiam .... Medicos docere ingenium illorum salium qui in corpore sano sunt acerrimi, Alcalescentes maxime, sed non tamen Alcalici... Norunt inde Medici ceteros sales, qui in aliis humoribus continentur, longe minus ergo acres Alcalicosve esse.*

*Quomodo ejus mentem liceat interpretari.*

160. Hæc omnia, si quid ego video, satis ostendunt minime Boerhaavium cum Boerhaavio pugnare: certe enim neque acidum neque alcali verum in sanis humoribus inesse docet manifestissime; at si nul declarat per morbos ita

mutari blandam humorum indolem , ut , nisi penitus acidi , aut alcalici , aut putridi fiant , vergant saltem ad alterutram indolem ; quo proinde plurimis in locis suorum operum eos acescentes vocat , vel alcalescentes , vel putrescentes , et sic porro . Nos igitur de acrimonias tractaturi , ut omnem de nomine litem antevertamus , ita rem intelligi volumus , ut cum dicimus acrimoniam *acidam* , *alcalicam* , *putridam etc.* de pronitate ad hanc vel illam peculiarem humorum degenerationem , sive potius de incepta evolutione alterius ex his qualitatibus , sermo sit : quamvis non desint absolutae alterutrius acritatis exempla in humano viventi corpore ; et certum sit non solum ingentis caloris ope , sed vel aliorum agentium efficacitate , et maxime principiorum affinium intermixtione , sales humoribus nostris interspersos evolvi posse , et , quemadmodum dicunt , exaltari .

*Quid sit acrimonia , et quot ejus genera .*

161. Acrimoniae itaque nomine id venit apud Pathologos quod facultatem habet pungendi , erodendi , discindendi , aut alio quovis modo irritandi solida , quibus humores continentur , aut quæ his alluuntur ; ac propterea sensum auget in iis , quæ nervis disseminantur , tum simul motum in iis , quæ ad peculiares motus edendos sunt comparata ; dummodo acrimonia causticæ non fuerit indolis , quæ irritabilem vim

vim in carnibus destruit, et vires plurimum infirmat. Qui in Pathologia principatum obtinuerunt, acrimoniam ad duas classes, tamquam ad duo genera, retulerunt; quarum alteram dixerunt Mechanicam, Chemicam vero alteram.

*Quid acrimonia mechanica; et unde nomen desumpserit.*

162. Mechanica acrimonia ea est, quæ solidâ irritat vel figurâ angulosa et acuta, vel duritie majori quam natura ferat, vel demum motu nimis vehementi. Desumptum fuit acrimoniæ hujus nomen, et ad animalium humores traductum, a consideratione effectuum, qui a nonnullis rebus extrinsecus in humanum corpus impetentibus proficiscuntur. Certe enim quod angulosum est et acutum, corpori paullo violentius applicatum, lœdit; quemadmodum et id omne, quod durum nimis, aut motu violento actum, ipsum corpus urget præter naturæ modum. Nemo igitur non videt figuram angulosam in humoribus ( si in his locum habet ) aptam esse ad partes stimulo perforendas, erodendas, discindendas. Quod pertinet ad duritiem ac motum, solidas partes ab hisce fluidorum corporum qualitatibus irritari posse ii omnes intelligunt, qui considerant, ab his ipsis liquorum dotibus solida paullo violentius urgeri necessario, ac distraui.

*Quid*

*Quid acrimonia chemica secundum nonnullos:*

163. Quæ autem sit chemica acrimonia, seu quæ peculiaris particularum constituentium figura in humoribus, qui solidas partes diversimode irritando, immo sæpe exedendo, acres propterea appellantur, difficile admodum est definire: Nihilominus si effectuum similitudo causarum similitudinem indicare potest, quoniam chemicæ acrimoniæ effectus cum effectibus acrimoniæ mechanicæ magnopere convenient, idcirco nonnulli confecerunt, etiam in acrimonia chemica humorum particulas vel triangulares esse, vel cubicas, vel alterius figuræ pro diversitate prædominantis acri; vel ea duritie, aut motu illo præditas, qui distensione nimia, aut rudi impulsione vel impetu, solida lacesserè, ac proinde extimulare plus minus potest cum majori vel minori valetudinis detimento.

*Quid conjectandum ubi hæc opinio non admittatur,*

*Quid propositam conjecturam confirmet.*

164. Quod si quis in ejusmodi qualitatibus acrimoniæ naturam minime sitam esse contendat, eam in peculiari aliqua non satis perspecta aut qualitate, aut principiorum mixtione constituat necesse est: id quod secundum nonnullos rationi magis consonum videtur. Nam, ut uno vel altero utamur exemplo, sal ille, qui vulgo dicitur *della Rocella*, et quem Galli

vo-

vocant *Sel de Saignette*, figuram gerit in particulis suis vix aut ne vix quidem angulosam; refert enim prisma per axim dissectum, plurimiis superficiebus planis in convexa parte constructum; et tamen alvum moyet eadem effigia, qua sales purgantes omnibus notissimi. Idem dici posset de iis purgantibus omnibus, quæ a resinis depromuntur, et præsertim ab earum extractis; quæ porro extracta nihil aliud sunt, quam solutio partis oleosæ, aut resinosa, a spiritu vini comparata, et mox præcipitata, ut loquuntur Chemici, communis aquæ affusione. Cum enim vini spiritus cum oleosis ac resinosis plurimam habeat affinitatem, majorem autem cum aqua, idcirco oleosas ille primum partes in proprio, ut sic dicam, sinu recipit, deinde receptas aquæ communis affusione dimitit, unde præcipitatio.

### *Quid ab allatis exemplis conjiciendum.*

165. Quæ si ita sunt, liceret ne conjectari eas humorum degenerationes, quas dicunt *acrimonias*, in humoribus suboriri, quatenus agencia, quæcumque ea fuerint, quæ humores vi- tiare possunt, propter eorum affinitatem cum altero ex principiis fluida componentibus, humores ipsos ita decomponant, ut eorum crasis naturalis, in qua blanda liquorum nostrorum natura sita erat, pervertatur? Præterea, quid vetat quominus existimenuis decompositionem istiusmodi, ac proinde *acrimoniam*, a liquorum tra-

stagnatione , aut nimio eorum motu progigni ; vel reipsa per vias alimentorum , cutis , respirationis , extraneum aliquod in sanguinem invahi , quod inter particulas fluidorum se insinuans figurâ sua ad solidas partes fodicandas ac discindendas aptissimum , phænomena exsuscit , quæ sub acri humorum natura se se præbent ? Id alii viderint . Si quis autem contendat in resinis , præter oleum , salem inesse acidum , et proinde extracta paullo ante memorata alvum movere propter admixtum salem ; hinc propter figuram peculiarem : is porro videretur ignorare , eum salem ad oleum in plurimis resinis minimam habere rationem , et oleosæ parti ita esse arcte conjunctum , ut nunquam possit acidi vires exercere : quo propterea satius sit vim omnem oleo tribuere ; ubi quis nolit purgantem facultatem aut in peculiari principiorum componentium ratione , aut eorum cum succis animalibus mixtione residere . Sed de his paullo fusius alibi disseremus .

*Unde acrimoniæ origo præcipua .*

166. Quicquid autem sit , certe præcipua acrimoniæ origo in alimentis esse videtur ; quæ tamen , ubi Naturæ providentia voluptuosum et audax hominum genus non illusisset , ejusmodi essent , ut detrimentum afferre non possent , Nam quæ alimenta in mundi exordio hominibus Natura comparavit , blandam porro ha-

habent plerumque indolem. Legumina, cerealia, fructus, aliaque vegetabilia, prima fuerunt hominum alimenta solida: inter fluida autem aquam dedit, quæ solus fuit primævis mortalibus potus. Ingluvies addidit animalium carnes, et pisces; atque sensim in dies increscens sales adjecit, olea etiam acriora, aromata, spiritus fermentatos aut fermentescentes, aliaque gulæ irritamenta, citius ut gustus sensum intensius titillaret, quam ut molestum sensum famis obtunderet. En itaque in assumptis alimentis materiam aptam, quæ humores nostros jam in acredinem pronos in degenerationem addueat; cum satis notum sit in carnisbus, piscibus, ac plurimis vegetabilibus acriorebus principia inesse alcalici ingenii; in salibus facultatem irritantem, quemadmodum in oleo et aromatibus, quæ phlogisto plus minus exuberant. Hæc sanguiri addita, quod oleo scatet, faciunt, ut humores a naturali statu recedant, atque ita blandam eam indolem amittant, quæ ad optimum valetudinis statum requiritur.

*Quæ causæ acrimoniæ in genere.*

167. Neque tamen velim quis existimet acrimoniæ fontes in aliamentis tantummodo quærendos esse. Enim vero, præter cibos, medicamenta etiam nonnulla, venera, aer, corporum quorundam contactus, inedia, vehemens corporis exercitium, calor ingens, animi effe-

Etus præsertim tristes, humorum retardatio in aliqua corporis parte, causæ sunt ad acrimoniam in humoribus exsuscitandam aptissimæ; quemadmodum perturbatio quæcunque sive secretionum, sive excretionum quarundam peculiarium. Omnia hæc hujusmodi sunt quæ in liquoribus nostris degenerationes excitare queant; nempe blandam eorum crasim plus minus pervertere: quamobrem non absurdum videretur conjectari, tot esse acrimoniae species, quot morbi a fluidorum vitio profecti, figurâ molecularum fluida ipsa componentium neutquam mutatâ. Cur non enim heterogenea quædam sanguini addita, aut in hoc fluido ob agentium quorundam efficacitatem evoluta naturalem mixtionem perturbare poterunt propter affinitatem quamdam; cuius vi principia alia atque alia moleculas ipsas constituentia, vel magis cohærent, vel relaxentur, vel mutuis solvantur vinculis vel magis actuosa fiant, vel inertia et ad agendum inepta; uno verbo organicam, eamque activam particularum compositionem plus minus immutare? Neque urgeat aliquis hæc tandem non aliud esse quam hypotheses, præsertim cum nos lateat quæ sit hujusmodi affinitatum causa: sufficit enim ad rem nostram has ipsas affinitates, ejusque leges et effectus, in dubium revocari non posse. Potest ne vero mutatio figuræ in fluidis acrem indolem præferentibus non dicam oculis percipi, sed ali-

aliquo saltem laudabili argumento per conjecturas proponi? Hoc aliorum judicium esto.

*Qui modus agendi causarum istiusmodi.*

168. Et primum quidem, quod attinet ad medicamenta, ad venena, ad miasmata ut loquuntur ( quæ per communem alimentorum viam, aut per cutis poros in sanguinis massam inferri solent ) ad aerem, ad contactum corporum quorundam, effectus quos in corpore producunt sunt nimis manifesti, ut de acri nonnullorum natura dubitari queat; posita fortasse ( n. 164. ) in peculiari quadam qualitate non satis perspecta, quæ vitæ viribus aut nullo modo, aut admodum difficulter subigit possit. Inedia vero cum nihil aliud sit quam abstinentia a cibis præter consuetudinem, hinc non constituit morbum per se; at ob id tantum quod non renovati humores, qui vitæ viribus per tot emunctoria eliminantur, indolem habentes animalem, adeoque alcalescentem, ad acrimoniam hujus speciei fiunt magis proni; idque præsertim ex aquo vehiculo subducto, quo crassamentum et phlogiston aut copiâ reliquis principiis præstat, aut acuitur, seu majoribus viribus pollet. Similia fiunt a vehementi corporis exercitio, tum et a calore: enimvero duo hæc fluidiores primum aqueasque partes dissipant, sales accidunt et oleum sanguinis; nempe duorum horum principiorum efficacitatem augent; demum igneum principium

pium magis actuosum reddunt , partim attem-  
nuatione , si de corporis exercitio nimio lo-  
quamur , partim ejusdem principii additamen-  
to , si de exsuperante calore sermo sit . Quo-  
modo tristes animi affectus solidum infirment ,  
unde postea singulares humorum degeneratio-  
nes consequuntur , difficile est dictu . Id solum  
observatio confirmat , morbos ab hac causa na-  
tos saepe tam variis , inconstantibus , atque he-  
terogeneis , ut ita loquar , symptomatibus sti-  
pari , ut veneno quasi aliquo humores infectos  
esse , cum Practicis quibusdam Claris. prope-  
modum conjiceres . Stagnantes humores , ubi  
tamen sint frigidæ , ut dicunt , naturæ , in pra-  
vam indolem aliquando degenerare alibi ( n.  
126. ) diximus . Denique perturbatio quarun-  
dam secretionum excretionumque peculiarium  
acre in humoribus evolvit : nam sive hæc per-  
turbatio in nimia evacuatione sita est ; et pro-  
ducit effectus similes iis , quos affert inedia ;  
et quicquid aliud , fluidiora dissipans , crassa-  
mentum et phlogiston proportione auget , aut  
hoc postremum evolvit : sive spectat ea per-  
turbatio ad retentionem eorum , quæ eliminari  
deberent ; et pravum retentorum ingenium vel  
universam humorum massam inficit , vel in  
partem aliquam impedit , modo cum majori ,  
modo cum minori vitæ discrimine . Nota sunt  
omnibus , quæ a retento perspirabili , aut su-  
dore , aut lotio consequuntur , tum et a bile  
sive non secreta , sive non excreta : de quibus  
porro

porro vitiis singillatim imposterum nobis erit paullisper disserendum.

*Quid natura præstiterit ut acrimonia non facile nascatur.*

169. Et tamen sagax ipsius Naturæ providentia, ut damna anteverteret, quæ a similibus principiis per alimentorum tubum in sanguinem infectis proficiisci possunt, tum et ab aliis quæ aliunde ad sanguinem traducuntur ( quemadmodum inferius patebit, cum nempe de hujus vel illius acrimoniæ causis sermo erit ) ut ea, inquam, damna anteverteret, et sensu et motu animale corpus regi voluit, et vias quasdam communes comparavit. Ita aut ab acribus irritatæ partes contrahuntur, aut commune sensorium, nimio stimulo percitum, facit, ut animalis natura concitata in violentos motus erumpat, quibus vel sursum vel deorsum illud dejiciatur quod acre est; vel ingenti humorum affusione obtundatur; vel si quid ejusdem indolis seu in sanguinis massam infectum seu in ipsa evolutum fuerit, iisdem naturæ motibus atteratur, mutetur, ac demum per loca quædam communia disjiciatur.

*Qui sint effectus acrimoniæ in genere.*

170. Quod si ad hoc præstandum naturæ vires non sufficient, tunc humorum degeneratio effectus parit, qui innotescunt satis superque, si consideremus moveri liquida intra cor-

pus non exiguo calore fotum, et sensu motu que prædictum. Augetur itaque prava indoles, jam nata a calore; et irritata solida cum sentientia tum irritabilia in motus carentur enormes, unde convulsiones et spasmi fiunt, vel universales vel particulares; inde obstructio-nes, humorum effusiones, inflammations, abscessus, ulcera, gangrenæ; tum et alia his asthnia: ac proinde insignes perturbationes cum in secretis humoribus, tum in excretis, ac demum in ipsa nutritione: nimirum quia nu-trientes humores blandam atque gelatinosam naturam requirunt, quæ ab acribus liquidis ne-quit suppeditari. Et quis porro ignorat quot et quæ mala ex perturbata, aut prava, aut impedita nutritione exoriri communiter so-leant?

## C A P U T XII.

### DE MORBIS EX PRAVA HUMORUM QUALITATE IN SPECIE.

*Quot acrimonie species a Pathologis numerari soleant.*

171. **E**ffectus hactenus enarrati ii sunt, quos edit humorum animalium acre-do generatim considerata. At quoniam acrimo-nia ab Illustribus in arte Viris in classes di-stribuitur; nempe in acescentem, austera-  
al-

alcalescentem, putrescente in salinam cum mu-  
riaticam tum ammoniacalem, nec non etiam  
in alias species; de his nonnulla afferemus,  
causas indicantes, effectusque earum descri-  
bentes; quo et prioribus occurtere, easque re-  
frænare Medicus possit; posteriorum autem at-  
tenta inspectione, causarum indolem ac natu-  
ram penitus assequatur.

*Quid acidum dicatur, quid alcalicum, et  
quid neutrum.*

172. Præstat autem in antecessum monere,  
acidum illud vocari, quod linguæ admotum  
ipsam percellit cum sensu quodam illius simili-  
fi, qui percipitur in aceto, in succo limo-  
num, et similibus; nempe plus minus sensum  
commovente, pro ratione acidi fortioris, aut  
debilioris: quod alcalicis admixtum, si non  
effervescentiam semper excitat, in neutrum ta-  
men salem facessit: quod demum syrupum vio-  
larum, tincturam Coronæ solis, et cœruleos  
vegetabilium succos rubro inficit colore. Con-  
tra, alcalicum id appellatur, quod linguam fer-  
rit cum sensu caloris modo debilioris, modo  
intensioris: quod cum acidis plerumque (1) ef-

K 4 fer-

(1) Aer fixus, quem alii *fæcitium* appellant, plus  
minus omnibus inhæret corporibus, cuius tamen aeris va-  
riæ sunt species. Inter corpora hoc aere turgentia alcali-  
ci sales numerantur, a quibus variis modis separari po-  
test;

fervescit : et cum iis copulatum , neutrum sālem exhibet : quod denique syrupum violarum viridi colore tingit . Neutri vero sales ii dicuntur , in quibus neque dotes aciditatis se se præbent , neque dotes alcalescentiæ ; ex nempe quas in præsens indicavimus , et quæ sunt dotes principes .

*Quæ sit quorundam opinio de horum salium natura . In hanc opinionem animadversio .*

173. Hæc sunt phœnomena præcipua , quibus acidi , alcalici , et neutri sales se se præbent in conspectum . Ceterum meum non est inquirere , num sales omnes ideo sint sales , quia aciditate aliqua pollent ; quo propterea etiam sales neutri acidum foveant a peculiari terra retusum , seu , ut dicunt , *dulcificatum* : et similiter alcalici dicantur sales , quod fiant a pauco acido , fusionis ope in plurima absorbenti terra concentrato ; qua parro mixtione consequatur , ut sales alcalici sint facile solubiles et sapidi , nempe sales re ipsa sint . Quam sane sententiam idem særissime agendi modulus

test : separatur autem maxime acidorum admixtione . Quæ igitur nascitur effervescentia a connubio acidorum cum alcalicis nihil aliud est quam fixi aeris expulso ; qua perfecta neuter sal obtinetur . Hæc debemus Cl. Priestleyo , ut constat ex Sermone Academico Illustriss. Pringle , qui inscribitur *Discourse on fixed air &c. London 1774.*

dus (1) alcali fixi vegetabilium, et acidorum, videtur confirmare. Id unum circa hanc Recentiorum quorundam opinionem animadvertam, videlicet, ut nascatur alcali non ita acidi fusione opus esse, quasi nempe absque ignis artificialis vi, et præcipue absque plantarum combustionē, alcalicus sal, isque fixus, generari omnino non possit. Major sane hujus salis copia combustionē obtinetur; verum non desunt alcalica quedam naturalia, quorum exempla nonnulla liceat in medium afferre.

*Quæ hanc animadversionem confirmant.*

174. Et primum quidem *alcali minerale*, seu marinum, quatenus basis est salis communis, absque ignis opera in ipso occurrit marino sale, et in *Soda* seu cinere plantæ illius marinæ, quæ communiter *Kali* appellatur: a qua porro planta marinus sal elicitor non tam ustione, quam decoctione, ac succo expresso, deinde percolatione atque evaporatione. Similiter *alcali fixum* vegetabilium proprium, ab ipsis vegetabilibus etiam sine horum ustione obtinetur: nam nitrum verum (nempe salem eujus basis est sal alcali vegetabilium) inventit Cl. Baumé (2) in ea planta, quæ vocatur

Ce-

(1) Vid. Claris. Fourcroy Leçons élément. d' Hist. natur. & de Chimic. Leçon XIII.

(2) Vid. Dictionnaire de Chymie ad vocem Alkali.

*Corona Solis*: et Marggrafius præstantissimus vidit alcali fixum tartari, seu alcali fixum regni vegetabilis, inesse naturæ opera in plantis ac lignis (1). Quid si tertia ac postrema alcali species, nempe *alcali volatile* insit secundum naturam in animalibus, quemadmodum revera inest in plantis illis quæ *cruciferæ* appellantur? Id ipse Marggrafius in citato opere demonstrare pollicitus est; et multa sunt, quæ id suadent, quæque institutum nostrum nos non sinit recensere. His prænotatis ad causas posteriores acescentis acrimonie indicandas proferamus.

*Quæ sint causæ acrimonie acescentis,*

175. Debetur autem acrimonia acescens aut debilitati viscerum et causarum digerentium, aut usui acidorum, vel acescentium, frequenti nimis, sive eorum abusui. Alimenta hujus indolis, dum copiose ingeruntur, non satis mutantur <sup>a</sup>bile, aliisque succis digerentibus; quemadmodum neque satis mutantur, etiam secluso abusu, ubi digerentes vires fuerint infirmæ. Ex his igitur alimentis chylus paratur, seu emulgetur, ad acescentiam maxime pronus; qui in sanguinem traductus cum aqua et oleo plurimam habens affinitatem, sanguinis crassatum quod oleo scatet non parum debilitat, tuin ex

---

(1) *Act. Reg. Soc. Berolin. ad ann. 1764.*

ex aquæ intermixtione, tum etiam quia phlogisti vires retundit. Quam ob rem intelligitur, quā fiat ut chylus istiusmodi, nempe multum acescens, nequeat facile vitalium functionum exercitio, præcipe ob phlogisti penuriam, et arctum ipsius phlogisti cum acido vinculum, in rubras moleculas compingi. Tanto autem magis hoc eveniet si animale corpus inopia laboret boni sanguinis: debet enim optima hujus constitutio, et sufficiens quantitas considerari tamquam fermentum quoddam, ea immutans in propriam naturam, quæ illi admiscentur; nempe affusos humores in sanguinem generatim consideratum, Quapropter recte porro fecerunt ii, qui boni sanguinis penuriam, et vitalium functionum languorem, quibus præcipue optima debetur *hæmatosis*, inter causas acrimoniæ acescentis, aliarumque humorum degenerationum recensuerunt. Ubi enim vires sanguinem atterentes elangueant, qui fieri potest ut phlogiston seu igneum elementum evolvatur, et rubrum in sanguine colorem exsuscitet?

*Qui sint acescentis acrimoniæ effectus.*

176. Ex his perspicue cognoscimus a longo acidorum aut acescentium abusu effectus oriri partim ad alimentorum tubum pertinentes, partim vero ad humores, qui in circulum mouentur. Nam præter spasmos, et motus illius tubi inordinatos, qui secretiones digerentium

hy-

humorum plurimum turbant, horumque vim  
infringunt, nascitur tandem ex spasmo debili-  
tas solidorum digerentium; affusa bilis nimiæ  
acescentiæ retundendæ non sufficit: unde et  
digestio magnopere infirmatur et cruda super-  
sunt intra tubum intestinorum; quæ duo ob-  
structionibus, aliisque morbidis affectibus oc-  
casionem præbent. Contra fæs laetorum radic-  
ibus parum chyli sorbetur, proptereaque im-  
minuitur nutritio, et totius corporis vires ener-  
vantur. Interim qui chylus laetæ intrat, glan-  
dulas obstruit mesenterii per quas trajicitur,  
quatenus crudis et crassioribus turget particu-  
lis, et nimia pollet acescentia, quæ solida cri-  
spat: in sanguinis massam traductus non facile  
in rubrum sanguinem vertitur, cum propter  
indolem suam, tum propter boni sanguinis pe-  
nuriam, et vitalium functionum infirmitatem,  
quæ ex nutritione partim prava, partim im-  
minuta suboritur: hinc totum corpus friget (1)  
ac pallore perfunditur; solida strigosa fiunt;  
macescunt in dies; prohibentur secretiones  
aliæ; aliæ depravantur; et tota turbatur ani-  
malis œconomia, ubi primum ejus functiones  
elanguentes acescenti acrimoniarœ occasionem non  
dederint.

Quæ

(1) An vero acida ob id etiam refrigerant, quod  
non exiguum puri æris copiam in proprio sinu sovent?  
Conjectura hæc proœcio absurdæ non videtur.

*Quæ vero cause et effectus acrimonie  
austeræ.*

177. Eosdem effectus, sed magis violentos; exhibit acrimonia illa, quam austera dicunt, et quæ iisdem causis ( n. 174. ) sed præcipue austoris alimentis debetur; nempe acerbis fructibus, atque iis omnibus, quibus natura inest frigida cum principio stiptico, seu adstringente; quod ab ipsa lingua in cibis distinguitur, cum ii sensum in ea moveant tamquam vinculi constringentis. Hæc non bene subacta a viribus digestionis, coagulo inducta ( ut loquar cum Cl. Svietenio in commentar. ad aphor. 60. ) humorum augent tenacitatem: adeoque inter effectus acrimonie austeræ ii etiam jure possunt ex parte numerari, qui ab aucta humorum cohæsione ( n. 106. ) proficiuntur.

*Quæ sint causæ acrimonie alcalescentis.*

178. Acrimonia humorum alcalescens originem ducit 1. ex abusu aromatum et plantarum acrum, quæ alcalico sale saturæ sunt: 2. ex medicamentis ac venenis saponacei ingenii, et quæ lixivo sale abundant: 3. ex spontanea humorum degeneratione in acrimoniam hujus speciei, natam quidem vel propter inediam, vel motum corporis validum, vel calorem nimium, vel corporis ipsius intertiam: 4. ex alimentis ab animali regno quotidie desumptis:

5. demum ex boni sanguinis redundantia .  
Enimvero medicamenta ac venena saponacea  
humoribus nostris permixta et nativo horum  
sali , alcali volatile ex iis evolvunt ob sum-  
mam affinitatem salis lixivi cum aciditate sali  
nativo humorum inhærente : ex hac enim af-  
finitate consequitur ut sal alcalicus nullis nunc  
vinculis coercitus suam præsentiam ac volatile  
ingenium significet. Notum præterea culibet atque  
compertum est humores nostros naturā sua in  
indolem vergere alcalescentem. Ipse chylus in  
iac mutatus caseosam partem exhibet, quæ al-  
calescentem naturam præsesert : unde patet  
quid censendum sit de reliquis humoribus , qui  
a chylo proxime non separantur. Ita manife-  
stum est quod major erit dispositio ad alcali-  
cam humorum indolem , ubi phlogiston abun-  
det , aut sit maxime evolutum ; ubi humores  
propter inediam non renoveantur; ubi per mo-  
tum et calorem nimium aqueas blandioresque  
partes dimittant , et præter modum incalscant ;  
ubi alcalescentibus vescamur cibis; ubi demum  
in torpore nimio corporis vitam agamus ; qui  
torpor scorbuticas affectiones dirissimas cum  
fætore intolerabili interdum movet . Lentus  
quippe motus , non secus ac nimius , spontaneas  
excitat in humoribus degenerationes : in  
motu nimio , ob aquam calorem , et augmen-  
tum aquearum excretionum : in lento motu ,  
ob id quod opportuna particularum admixtio-

non

non sovetur, non mutatur assumptorum ingenium, non elaboratur chylus et sanguis, excretiones pluriū imminuntur; unde aqueum congeritur, salinum, acre, quod solida irritat atque erodit, et naturalem fluidorum cohæsionem relaxat. Copia autem boni sanguinis, cum ponat ignei elementi, et humoris sponte alcalescentis exsuperantiam, propterea hæc ipsa copia seu *Plethora* non immerito inter causas acrimoniæ alcalescentis enumeratur.

*Quinam sint hujus acrimoniæ effectus.*

179. Præcipiuus vero hujus acrimoniæ effetus censemur humorum dissolutio, seu cohæsio imminuta; verum non simplex sed composita, adeoque nata sive a niīa copia phlogisti elementa sejungentis ( semper enim cum alcali volatili phlogiston adjunctum est ) sive ab intermixto acri dissolvente, quod mutuam destruat affinitatem inter fluidorum particulas: quam ob rem perspicuum est quī fiat, ut in hoc humorum vitio auctæ sint excretiones præter naturæ modum; et quare ab eodem acri lacessita solida cum sentientia tum irritabilia, immo interdum erosa, dolores moveant, stomachi præcipue atque intestinorum, cum ardoris sensu; convulsiones; spasmos; hæmorrhagias; aliorumque humorum effusiones: demum quare acrimonia hæc sitim excitet, putridum in ore saporis sensum, appetitum dejiciat; alvum aliquando moveat potenter, et sudor-

rem,

rem, cum virium debilitate. Atque hinc patet etiam quare excreta omnia se teant cum sensu ardoris quoties eliminantur; nutritio prohibetur, et cito corpus contabescat; et demum quam ob causam acutissimis febris, ac dirissimis inflammationibus occasionem praebat acrimonia hæc, aliisque affectionibus æque funestis.

*Num acrimonia alcalescens a putrescente differat.*

180. Quum tamen effectus hujus acrimoniæ cum illis qui putrescentis proprii sunt plurimum convenient, quemadmodum inferius patet, propterea disputari solet num inter utramque hanc acrimoniæ speciem discrimen intercedat. Certe Boerhaavius dum agit de morbis ex alcalino spontaneo ( aphorism. de cognoscend. et curand. morb. a §. 76. ad 92.) has duas acrimoniæ species non videtur distinguere. Verum illustris ejus successor Gaubius ( Pathol. n. 312. ) acrimoniam putrescentem, seu putredinem, ut ipse vocat, minime cum acrimonia alcalescente confundendam esse docet, etsi huic sit affinis. Est enim, inquit ille, *compositum acrimoniæ genus, quo affecti humores simul et salem habent volatilem aicalinum, et oleum huic permixtum acre, fætidum. Utriusque materiæ corruptio* ( nempe, si quid ego video, corruptio salis et olei recte constituti, quod in nostris inest humoribus ) *demum putredinem*

con-

constituit, et maxime quidem posterior, quam simplex alcali volatile etiam antevertere potest. Ideo autem olei acris ac foetidi corruptio ( quæ debetur acidi evolutioni in oleis vegetabilem indolem præ se ferentibus, evolutioni autem alcali volatilis in oleis animalibus proprie dictis ) alcalico volatili sale antevertitur, quia quemadmodum ex admixtione acidi et alcali neuter sal præparatur, ita alcali volatile oleis omnibus permixtum saponis speciem componit (1). Est ne igitur putrescens acrimonia gradus major vel minor alcalescentis? Hoc definitant Chemici. Id unum ego quasi per transennam admonebo, videlicet etiam Celeberr. Pringlium (2) demonstravisse alcalicos et volati-

(1) Olei animalis corruptio evolvit alcali volatile, corruptio olei vegetabilis evolvit acidum; unde rancida habetur humorum indoles, quæ est omnia degeneratum pessima. Sed duplex olei species animalium corporibus inest: altera vegetabilis, altera animalis. Vegetabilem naturam habent pinguedo, medulla ossium, pars latis oleosa: hæc enim omnia acidum continent, quod in corruptione maxime explicatur. Offa, quæ medullæ proprie dicta orbata sint; nervi ac tendines omni profus pinguedine circomposita destituti; tum. cornua, destillationi commissa, nihil acidi præbent, & in corruptione alcali volatile exhibent, quod in ipsis inerat.

(2) Esperienze sulle sostanze septiche & antiseptiche. Opus a Clariss. Serao ex Anglica in Italican linguam translatum illustratumque, atque Neapoli editum una cum ipsius Pringli libro, qui inscribitur: Osservazioni sopra le malattie di armata.

tile sales ipsam animalium corporum putredinem plurimum retardare.

*Quæ causæ acrimonie putrescentis.*

¶ 81. Quod si de hujus acrimonie causis sermo sit, eæ nimirum valde cum iis convenient quæ alcalescenti occasionem præbent; adeoque indoles humorum qui natura sua ad putredinem sunt magis proni; carnium abusus, et earum præcipue, quæ ex animalibus carnivoris desumuntur; harum carnium omnium singularis præparatio ad putre ingenium promptius disponens; potus aquarum putrescentium; natura soli putridis exhalationibus circumfusi; inspirandus aer non renovatus, causæ censemur hujus acrimonie, quatenus augent in sanguine naturalem pronitatem ad putrescendum. Idem præstant vernies in primis viis hærentes, qui, mortui, facile in corruptionem abeunt; viventes, putridas fæces deponunt. Putridi humores ex aliqua corporis parte in sanguineam massam importati dubium non est quin acrimoniam hanc facile inferant. Eo autem magis sub his circumstantiis acrimonia excitatur de qua sermo est, si accedint motus et calor nimius; medicamenta cum irritantia tum calefacentia; venena, et miserrima quædam, quæ vel remote vel proxime phlogisti vires accidunt, aut vitalia organa debilitant, quo fluida lentius propulsa in putridam degenerationem adducuntur, aut demum peculiari ingenio putredinem suscitant.

cant. Hęc enim omnia nemo non videt causas esse aptissimas, quę in animali corpore aut natura sua, aut ex vitio aliquo, ad putrescendum disposito, ipsam putrescentem acrimoniam aut excitent, aut excitataim augeant.

*Qui vero effectus.*

182. Putrescentis hujus acrimoniæ effectus plurimum similes sunt iis, qui ad alcalescentem (n. 177.) spectant: immo videntur prorsus iidem, et gradu duntaxat differre, utpote qui in putrescente acrimonia (præsertim *oleosa putrefacta*, ut verbis utar Boerhaavii, Prælect. ad Instit. med. §. 915.) et promptius ingruunt, et vehementiores esse solent, quam in alcalescente. Hinc febres et inflammationes inde excitatæ sunt ardentes magis; quod sales evoluti, olea corrupta, atque hinc igneum elementum magnopere exaltatum, ut dicunt, fortius irritent cor et arterias, et in rarescentiam abeant insignem; hinc ob eandem rationem urinæ maximo suffunduntur rubore, urentes sunt ac putride, fœtidissime, spumam facile agentes et conservantes: hinc exanthemata, pustulæ, vesiculæ alicubi eruūpunt, et fiunt hic illic peculiares sugillationes; quod acre corruptum atque congestum, minima vasa exedat, quę proinde contentum humorem in vicina loca effundunt: hinc pariter ex calore nimio sępe arescit cutis, aliquando au-

tem colliquante sudore perfunditur , si humores in dissolutionem quasi putridam abierint : hinc demum functionum omnium perturbatio intelligitur , quo mirandum non sit varias , tum capitis , tum pectoris , tum abdominalis , læsiones , cum præsentि vitæ periculo , putreſcentis acrimonie effectus esse . Hæc autem omnia debentur maxime igneo principio , seu phlogisto evoluto , quod in partibus putrescentibus animalium ita ab aliis principiis liberatur , quibus erat quodammodo coercitum , ut ejus pars jungatur cum alcali volatile , acri , caustico , urentem sensum moyente , quod in putrefactione se se præbet : dum interim pars alia in auras abit . Ita fit ut sola terra ex putrefactis partibus tandem supersit ; et fortasse phlogisti pars illa , quæ in auras avolat , cum aliis mixtis componitur . An electricam constituit materiam , aut ætherem ?

*An acrimoniæ hæc tenus indicatæ sint  
hypotheticæ ?*

183. Hactenus de iis humorum acrimoniis ; quas , ut in Capitis XI. exordio monuimus , nonnulli censem hypotheticas ; quamvis et venena , et miasmata quædam , et contagia intra corpus invecta , et ipsa vesicantia exterioribus corporis partibus admota ( quæ certe omnia et singula etiam in universa humorum massa vires exercent suas ) omnem penitus du-

dubitatem de medio tollere videantur. Et revera quis est qui prædominante ac ascensione non videat in pallore virginum ex suppressis menstruis, quæ suppressio non infrequenter ortum habet a nimio usu fructuum, et eorum præcipue, qui acerbi dicuntur: in appetitu rerum quarundam absurdarum, et alcalicæ indolis: in sudore, urina, et excretis aliis acidum aliquando spirantibus? Quid quod idem confirmant tumores ii, qui *scrophulae* appellantur, sæpe ab incongruo usu acidorum fructuum profectæ; tum et scabies, quæ interdum ab eodem fonte promanat? Dicemus ne morbos istiusmodi causam habere in primis tantum viis, quemadmodum illi arbitrantur, qui has humorum animalium degenerationes non admittunt? Et quod pertinet, ad acrimoniæ alcalescentem ac putrescentem, si ex febre ardentissima, et ex violento nimis corporis motu, a quibus paucarum horarum spatio et urinæ et alvi fæces, aliæque excretiones fœtidissimæ fiunt, et interiora viscera corrupta inveniuntur: si mictus cruentus cum ardore sequitur aliquando cantharidum applicationem ad externas corporis partes: si hydropicorum aquæ eorumque humores manifesta pollent acredine, quæ sæpe solidas partes exedit atque corrumpit; si hæc, inquam, omnia in Clinicorum oculos quotidie incurruunt, dubium non videtur quin omnia hæc et singula universam humo-

rum massam maximam partem afficiant (1), ac proinde non in solo alimentorum tubo suas vires exerceant.

*Quid ab adductis exemplis conjiciendum.*

184. Etsi vero hæc atque alia plura, quæ in morborum historiis apud auctores Medicos legi possunt, eas humorum degenerationes confirmare videntur, de quibus hactenus sermonem habuimus, quo proinde non valde tutum sit asserere neque acida, neque alcalica, neque putrida in animali vivente corpore locum habere posse: nihilo tamen secius ad rem nostram sufficiat illud ponere, quod in dubium nequit revocari; videlicet humores (eos etiam qui motu aliquo aguntur) a diversis ac plurimis causis affectos, disponi plus minus ad hanc vel illam degenerationem, etsi absolutam aciditatem, aut alcalescentiam, aut putredinem acquirere omnino non possint. Nunc de ceteris acrimonie speciebus, quas in humanis fluidis frequentius occurrere docent Medici; et ii. etiam, qui priores non admittunt.

*Quæ sit acrimonia muriatica, ejusque causa.*

185. Altera itaque species acrimonie animalium

(1) In hanc rem legere præstat Cl. Pringlji opus, paullo ante citatum.

lium humores interdum afficit ; vocatur a Pathologis acrimonia muriatica . Sal marinus in aqua dissolutus salsum liquorem exhibit, quem communis nomine *muriam* vocant . Quoties igitur hujus salis prædominium in humoribus nostris se se præbet , tunc humores ipsos muriatrica acrimonia peccare dicunt Medici . Non alia autem assignari solet hujus acrimoniæ causa , quam salis marini , et rerum hoc sale conditum abusus , præcipue si potus simul sit parior , quo proinde ingestus sal nequeat satis dissolvi , et per communia emunctoria dispelli . Istiusmodi acrimoniâ Nautæ præsertim laborant ; tum et Virgines illæ , quæ ex depravato appetitu marinum salem in alimentum assumunt magna copia , et avidissime : id quod pariter apud Nautas necessario usuvenit , qui carnibus utuntur salitis , qui in aere vivunt ejusdem salis particulis referto , qui demum frequenter optimâ aquâ , et sufficienti ejus quantitate destituuntur .

*Quæ confirmant ex prædominio salis eam acrimoniam oriri .*

186. Hujus salis prædominio acrimoniam hanc deberi plura sunt quæ confirmant : Nos pauca proponemus , ne id de nihilo dixisse videamus . Certum est in planta illa , quæ *Crona solis* appellatur , tum et in plantis aliis , nitrum aut sal marinum , ut alias ( n. 173 . ) diximus , naturaliter inesse : inest autem eo

majori copia , quo solum , cui plantæ illæ infixæ hærent , majori pollet aut nitri aut marini salis quantitate . Quemadmodum vero nitrum ac ceteri sales , ex infusionibus et decoctionibus plantarum post evaporationem loco frigido repositis eliciuntur , ita ex infusis et decoctis partibus animalium iidem sales similiter suppeditantur , tunc maxime cum animalia illa viventia peculiares eas plantas alimenti loco habuerunt . Demonstratum igitur videtur ab esu earum plantarum sales illos ( qui etiam in excretis se se præhent ) intra humores animalium invectos vitæ viribus subiectos non fuisse ; ac proinde satis constat abusum , inter cetera , rerum earum quæ salibus abundant , posse in humoribus degenerationes mouere diverso salium ingenio convenientes .

*Num hæ acrimoniæ a salium aut humorum figura pendeant .*

¶ 87. Neque tamen existimandum est inde mutari humorum particulas , ut angulosæ fiant ( n. 163. ) et acutæ : nam degeneratio inde nata peculiaribus inter ingestorum et humorum particulas affinitatibus , ( n. 165. ) ac proinde mixtionibus , probabiliter debetur . Et si quis contendat , phænomena , quæ ex acrimoniis hoc Capite propositis consequuntur , a salibus multo probabilius ( eorum videlicet figurâ ) oriri , quæ interstitiis particularum fluida componentium interponuntur ; is cogitur demonstrare salium

lium interspersorum figuram non mutari, quam tamen pro diverso crystallizationis, ut dicunt, modo mutari certissimum est (1).

*Qui effectus acrimonie muriatice.*

188. Acrimonia hæc pessimum scorbutum muriaticum afferre solet, et facit membrorum rigiditatem, quasi musculi ( veluti carnes marino sale conditæ ) siccentur et obdurescant :

id.

(1) Sales in animali corpore a viæ viribus mutari non posse, plurimis experimentis demonstravit inter ceteros Cel. Marggraf loc. cit. ( n. 174. not. b. ). Sal marinus, sal Sylvii diætus, qui corponitur ex alcali vegetabili & acido marino, inest secundum naturam in bu-glossa, fœniculo, aliisque plantis; atque ab humoribus animalium, quemadmodum aliis quicunque sal, semper elici potest. Sal Sylvii, non secus ac sal marinus, figura habet cubicam; hæc figura nitro, per artem, impertitur; & nihilominus hi sales omnes sunt indolis inter se diversissimæ: ipsum alcali minerale, quod causticum est, in crystallos cubicas persæpe concrescit. Si ergo eadem accurate figura diversos gignit effectus, phænomena, quæ vel a medicamentis, vel a cibis, vel ab aliis agentibus, sive per os assumptis, sive per aliam viam intra corpus invectis proficiuntur, non poterunt a peculiari aut salium aut particularium humorum figura pendere.

Quod pertinet ad mutationem figuræ in salibus a diverso crystallizationis modo profectam, exempla obvia sunt in alcali volatile; quod dum sublimatur, ut dicunt Chemici, acus refert oblongas; dum vero in fluido dissolvitur ad saturationem, in crystallos abit, quæ aliquando

idque probabiliter ex eo , quod marinus sal aquam trahat avidissime, atque cum ea in proprium , ut sic dicam, sinum recepta , solidum corpus constitutat . Hanc autem membrorum rigiditatem præcedere solent pruritus , et dolores intolerabiles ; qui etiamsi stimulum sentientibus partibus illatum significant , nihilominus violentam contractionem ex muscularibus partibus non extorquent ; cum quod forte ab eodem principio saline irritantur musculi membra contrahentes , æque ac illi qui membra ipsa distendunt ; tum quod incepta partium siccitas , atque rigiditas , vim insitam musculis adimit , eosque proinde reddit ad contractionem ineptos . Præterea doloribus ab irritatione natis succedunt partium exulcerationes , atque rosiones : præcipue gingivarum ac dentium : vel enim , secundum nonnullos , salina spicula in

do lata & magnas lamellas referunt , aliquando vero pyramides tartaro vitriolato similes . Easdem acus præbet sublimatum corrosivum in aqua solutum ; nam aeri expostum , in acus assurgentem , & ad vasis parietes accretas , facessit ; qui porro crystallizationis modus plurimis aliis salibus naturæ inter se diversissimæ communis est . Quibus recte consideratis , crystallizatio , quæ muratis circumstantiis mutatur , attentis phænomenis , fere naturæ lusus dici potest ; quo proinde diversæ salium figuræ ad salium ipsorum naturam cognoscendam nihil omnino conferre videntur .

in fluidis natantia, solidis intermixta, veluti totidem cunei continuum solvunt; vel, quod probabilius est, salina muria dissolvit gluten partibus interpositum easque conjungens, ob affinitatem, quam habet marinus sal non tam cum eo quod aqueum est, quam cum iis, quæ una cum aqua terram continent; quemadmodum continent solida quæcunque animalium. Hæc ipsa affinitas, quæ gluten inter et salem marinum intercedit, causa esse videtur, ob quam in acrimonia muriatica serum sanguinis dissolvatur, seu tenue admodum fiat; et propterea, anissa gelatinosa indole, impar quoque ad nutriendum. Eadem est ratio sitis ingentis, et siccitatis, quæ hanc speciem acrimoniæ comitatur.

*Quid acrimonia ammoniacalis. Quomodo sal nativus in humoribus nascatur, et quid sit.*

189. Demum acrimonia ammoniacalis venit consideranda, quæ a præstantissimis Pathologis affinis esse creditur acrimoniæ muriaticæ, eosdemque effectus producere. Dicitur ammoniacalis quia in aliquibus humoribus salina basis eadem est, quæ salis ammoniaci vulgaris, qui componitur ex acido marino et alcali volatili. Sed alcali istiusmodi in animali corpore inest, et regni animalis est proprium. Alimentis vescimur maximam partem vegetabilibus, in quibus

bus, præter acida leniora et propria; inesse etiam acidum nitri, et vitrioli, et salis mari- ni, ex Marggrafii periculis notum est. Quæcumque igitur horum acidorum compositio cum alcali volatili, tamquam cum basi, salem præbet, quem dicimus ammoniacalem; cumque hæc compositio seu mixtio in nonnullis laxa sit, idcirco sales istiusmodi, qui *nativi* etiam appellantur, in sua, ut sic dicam, principia resolvuntur facile, seu, ut loquuntur Chemici, deponuntur; tuncque evoluto alcali volatili nascitur acrimonia acalescens: quod si nativus sal, nempe ammoniacalis hactenus descriptus, reipsa superfluat, tunc habetur acrimonia ammoniacalis. Me non latet, inter sales nativos merito etiam numerari salem peculiarem, qui in urina præsertim paullo majori copia inest, compositum ex alcali volatili et acida proprio *phosphorico*, cuius origo non adhuc satis perspecta est; quiique obtinetur, cum urina, sive recens sive putrida, lentæ evaporationi exponitur ad certum quemdam gradum evectæ. Non inferior equidem, hunc etiam salem *nativum* esse: verum hic dicitur aut *sal nativus urinæ*, aut *sal phosphoricus* simpliciter; adeoque non hujus salis excessum aut hunc solummodo, sed excessum eorum, quos superius indicavi, acrimoniām ammoniacalem constituere arbitror.

*Quæ causæ sint acrimonie ammoniacalis; tum et effectus.*

190. Exsuperantia igitur salis nativi in humoribus nostris illa est, quæ constituit acrimoniam ammoniacalem. Tunc autem in his ipsis humoribus salis ejusmodi excessus habetur, cum quacunque de causa retinetur diutius intra corpus id, quod, secundum naturam atque consuetudinem, in integra valetudine excretum, nimiam illius salis congestionem prohiberet: aut cum ad alcalescentiæ prædominium comprimentum acidis salibus abutimur; vel abutimur alcalicis ubi humores acrimonia peccent acescente; quemadmodum illustris Gaubius in sua Pathologia n. 316, recte admodum monet. Effectus quod spectat hujus acrimoniæ, eos recensere supervacaneum est, quatenus cum iis, quos edit acrimonia muriatica, (n. 188.) apprime conveniunt; cum hoc tantum discrimine, quod in muriatica sint vehementiores. Verum de acrimoniis humorum non plura: alix ex dictis intelliguntur, aut ad peculiaria spectant liquida, quorum vitia alibi persequemur. Interea hoc admonere consultum ducimus; videlicet; cum de causis atque effectibus harum degenerationum in humoribus disseruimus, non illud nobis prius in animum induisse, ut causas atque effectus omnes singillatim indigitaremus. Ea siquidem spe alli-

cimur nos alloqui Juvenes rerum Physiologiarum peritos; quos proinde non lateat aliarum causarum similitudo et affinitas; et qui porro effectus ex hac vel illa causa in hanc vel illam partem agente debeant exoriri. Ita morborum differentiis cum accidentalibus, tum essentialibus, finem imposuimus. Nunc ad tertiam Pathologiæ partem properamus, quæ circa morborum causas versatur.

# PATHOLOGIAE

## PARS TERTIA.

### C A P U T XIII.

#### DE MORBORUM CAUSIS GENERATIM.

*Num morbus sit quid physicum, quod a causa aliqua pendeat.*

191. **M**orbis est aliquid physicum, seu reale, ut dicunt, quamvis sub specie corporis sensibilis in oculos non incurrat. Sed quoniam eorum phænomenorum, quæ sensibus apparent, neque tamen sunt corporea, causam ob quam sunt atque apparent, etiamsi foret abscondita, adesse intelligimus; ita etiam morbos, quatenus ii existunt, a peculiaribus quibusdam causis proficisci certum est. Nihilominus id propter quod ea, quæ in sensu nostros incurront, existunt, et quod a nobis causa dicitur eorum, quæ nos aliqua ratione percellunt, ponit et ipsum causam aliam ob quam existat, et ex qua oriuntur ea, a quibus percellimur. Hac ratione, iterum iterumque ascendendo, ad causas primas perducemur, quas quidem fatemur non posse non existere, cuius autem naturæ sint penitus ignoramus.

*Quid*

*Quid pro causa sumatur, et num inde error contingat. Exempla effectum, qui pro causis habentur.*

192. Ex his, quæ hactenus brevissime prosuimus, clarum perspectumque fit, nos plerumque effectus dicere causas, et humani ingenii vires ita esse quibusdam terminis circumscriptas, ut ultra id, quod sub sensu cadit, profieri nequeat. Cum autem dicimus nos effectus appellare causas, nemo existimet Philosophos idcirco in perpetua rerum ignoratione versari: sufficit quippe ad vitæ humanae usus, ut hujus vel illius effectus causam cognoscant, etiamsi hujusmodi causa ab alia causa ortum habeat: omnis enim causarum et effectuum inde pendentium series, nihil est aliud quam causarum et effectuum se se mutuo excipientium quedam veluti catena, quæ continua non esset, quoties anulus anulum non sustineret. Globulus, in exemplo, qui proximum appensum sustentat, est quidem causa connexionis cum secundo globulo, verum est simul effectus in ratione ad aliam causam; nempe ad potentiam illam, qua prior globulus sustinetur. Ita electricitatis phænomena sunt effectus electricitatis ipsius; sed ipsa electricitas est phænomenon pendens a causa aliqua nondum satis explorata. Est igitur manifestum, a nobis non raro id vocari causa, quod est effectus alterius causæ: immo, ut in allato globulorum

exem-

exemplo evidens est, s<sup>e</sup>pe fit, ut cum ponimus effectum, simul etiam tacite ejusdem causam ponamus; nimirum quia duo hæc inter se nexa et jugata sunt. Et revera, qu<sup>i</sup> possum concipere globum suspensum sine causa quæ ipsum suspendit? At, inquies, hoc pro arbitrio fieri potest. Ita sane: verum non ex natura rei; sed quod, vi mentis abstrahentis, aut causam aut effectum seorsim contemplamur; aut alterum ab altero sic discriminari solemus, ut causam concipiamus tamquam priorem, effectum autem tamquam posterius succedente<sup>m</sup>. Rem totam ad morborum exempla traducamus.

*Quibus morborum exemplis probetur causæ conceptum esse priorem.*

193. Inflammatio est morbus, cuius sedes est vel in cellulis, vel in minimis rubris arteriolis; scilicet quod vel in his vel in illis sanguis peculiariter constitutus (n. 145.) congeratur. Si eam spectemus pendente<sup>m</sup> a sua causa, puta a peculiari sanguinis diathesi, tunc est effectus; si vero in dolorem, in febrem, et in aliis effectus, quos edit, animum advertamus, tunc inflammatio erit causa. Cum Medicus inquirit in causam hanc, eamque cognoscit, simul intelligit quid sit inflammatio, quæ inquisitæ causæ effectus est: ut vero causam ab effectu distinguat, hunc vel illam seorsim considerat, vel causam concipit tamquam prius

existentem , effectum autem existentem posterius . Ponamus , ut causa inflammationis sit phlogistici sanguinis congestio , vel in cellulis , vel in minimis rubris arteriolis ; et simul ponimus inflammationem , nempe effectum illius peculiaris congestionis : vel ponamus inflammationem ; et simul ponimus in rubris arteriolis , vel in cellulis , phlogistici sanguinis congestionem , videlicet causam inflammationis . Igitur in utroque casu ponimus simul causam et effectum , neque nobis datum erit hæc ab invicem separare , nisi ratione paullo ante allata ; nempe vel alterum seorsim considerando , vel ita rem concipiendo , ut causa prius existat , effectus autem posterius .

*Quæ ratio eorum , quæ hactenus in hoc Capite proposita sunt .*

194. Necessarium duxi pauca hæc præmittere tractationi de morborum causis , utpote quarum investigatio maximi usus est in medicina rite facienda . Fortasse enim sæpe fit , ut Medici nonnulli morborum quorundam causas ; quæ ceteroquin vinci possent , ob id præcipue expugnare nequeant , quod illud , unde symptomatum omnium repetendam esse causam recte judicant , sit effectus causæ alterius non satis exploratæ : quam porro causam , probe perspectam , si opportuno tempore , et aptis præsidiis sibi subigendam assumerent , effectum etiam tollerent , quem morbi causam præcipuam

puam esse falso putarunt. Nunc propius ad causas morborum generatim indicandas accedo; in quarum porro tractatione non multum inter se scriptores Medici convenire videntur, cum alii paucas, alii plurimas causarum differentias tradiderint. Nos eas, quæ communius in libris Medicorum occurrunt, strictim perscrutemus.

*Quæ dicantur morbi causæ, generatim consideratæ.*

195. Et primum quidem morborum causæ generatim sumptæ dicuntur illæ, quæ morbum producunt, sive quod naturalem mutent solidorum aut fluidorum constitutionem (quæ postea mutatio sæpe est unum atque idem cum morbo ipso) sive quod conditionem aliquam tollant, quæ ad liberum hujus vel illius functionis exercitium requiritur. Fac ex causa aliqua solidum adeo laxum fieri, ut humores percurrentes neque attenuet, neque promoveat, ut par est; et proinde frigidus humor sive intra vasa sive intra cellulas congeratur; jam habebis ideam *Leucophlegmatiæ*, aut *Hydropsis illius*, qui dicitur *Anasarca*; et propterea mutata solidorum fluidorumque constitutio idem cum his morbis omnino erit. Ad motum voluntarium necessaria est nervorum integritas a musculo usque ad cerebrum: si quid nervorum originem comprimit, aut destruat, perit motus omnis voluntarius, vel in parte ali-

aliqua tollitur, ubi indicatæ læsiones ad nervum pertineant intra determinatam aliquam eamque muscularē partem distributum; adeoque causa comprimens, vel destruens, tollit conditionem ad voluntarium motum requisitam.

*Prior divisio in causas externas et internas.*

196. Causæ istiusmodi dividuntur primo in *externas*, atque *internas*. *Externæ*, proprie loquendo, sunt eæ, quæ corpori applicatæ morbum faciunt: *internæ* autem appellantur illæ, quæ sensibus non apparent, et jam pridem in corpore insunt, antequam morbum producant. Illæ, nempe *externæ*, in solidis primum partibus vires suas plerumque exerere solent; mox fluidas afficiunt: hæ vero, videlicet *internæ*, primum humores, deinde partes solidas pervertere consueverunt. Nihilominus, ad *externas* quod attinet, non desunt Medici præstantissimi, qui hoc nomine eas causas omnes appellant, quæ manifestæ sunt, sive eæ extra nos positæ sint, sive intra.

*Quid communiter inter causas externas recenseatur.*

197. Fecit hæc Auctorum quorundam opinio, ut inter *externas* causas res illæ soleant communiter numerari, quæ cum nos partim circumstent, partim nobis insint ex necessitate,

te ; si corpus præter naturam non afficiant , dicuntur *naturales* ; si vero vires intendant , et corpus lædant , *nonnaturales* appellantur . Hæ autem censemur esse : 1. aer . 2. cibas et potus . 3. motus et quies . 4. somnus et vigilia . 5. excreta et retenta . 6. animi pathemata . Inter has causas , somnum et vigiliam , atque animi pathemata , quatenus non sunt res externæ , inter *externas* causas recenseri non posse nonnulli contendunt ; dum alii , quia manifestæ sunt , eas in *externarum* numero colloquere non dubitant . Has ipsas causas manifestas , tum et alias , quæ corpori applicatæ sensibus patent , adeoque nullius indigent ratiocinii ut percipiantur , has , inquam , causas manifestas alii dixerunt evidentes .

2. *causarum distinctio in antecedentes , et conjunctas .*

198. Internæ causæ primum dividuntur a nonnullis in *antecedentes* , et *conjunctas* . *Conjunctæ* rursus dispertiri solent in *conjunctas simplificiter* , et *continentes* : et ambas porro eas vocant , quibus seorsim positis ponitur morbus : cum hoc tamen discrimine , ut *continentes* sublata tollatur quidem morbus ; qui non tollitur si *conjuncta simpliciter* auferatur . *Antecedentes* autem ( quæ possunt esse etiam *externæ* ; unde patet hanc causarum divisionem minus aptam esse ) dicuntur illæ , quæ præuent *conjunctis* , hasque movent ad morbum *gignendum* . Ita

diathesis sanguinis phlogistica est causa *antecedens* inflammationis: congestio hujus sanguinis (n. 145.) in loco aliquo est causa *conjuncta* inflammationis ipsius. Fortasse autem priores idem sunt cum *remotis*, posteriores autem id quod *continentes*, vel *proxime*, de quibus paulo post.

3. *in necessarias et non necessarias.*

199. Altera causarum distinctio, quæ ad aliam (n. 196.) divisionem referri potest, *necessarias* comprehendit et *non necessarias*. *Non necessariae* sunt illæ, quæ fortuito in nos impetunt, et morbum creant; quemadmodum sunt vulnera, contusiones, animalium quorundam ictus, et similia: *necessariae* autem, quæ vitari aut dispelli semper non possunt, quamvis semper morbum non inferant; veluti sunt peculiares et repentinæ quædam aeris mutaciones, animi pathemata, vigiliæ nimicæ, aliaque hujus census. Ex hac porro divisione perspicuum est, referri priores causas ad externas et manifestas; (n. 196.) posteriores autem ad sex res nonnaturales (n. 197.). Sumus quippe omnes et singuli ea ratione constituti, ut aere, cibo, pótū, somno et vigilia, motu et quiete plus minus indigeamus; omnibus nescesse sit aliqua expellere, aliqua retinere; et demum, ubi omni penitus sensu non destituamur, omnes et singuli animi ægritudinibus identidem simus obnoxii.

4. *in prædisponentes, et occasioales.*

200. Quarto loco dividuntur morborum cau-sæ in *prædisponentes*, et *occasioales*. *Prædispo-nentes* dicuntur Græcis *proegumenæ*; *occasioales* vero *procatareæ*. *Prædisponentes* vocantur cau-sæ illæ, quæ corpori ita inhærent, ut ipsum aptum reddant ad morbum suspiciendum. Cau-sæ igitur istiusmodi semper internæ sunt; sed non vicissim omnes causæ internæ sunt *prædi-sponentes*: nam causa morborum *proxima*, quæ morbum constituit, et ipsa interna est. *Occa-sionales* autem causæ sunt eæ, quæ, corpori prius disposito supervenientes, morbum faciunt, et modo internæ sunt, modo externæ. Neutra igitur sola et per se ægrotationem facit, sed utriusque causæ consensu requiritur. Diceres alterutram causam, partem causæ totius integræ; quarum unaquæque etiam si agat ( secus improprie diceretur causa ) et *prædisponens* qui-dem agat præcipue, attamen non èa vi ac ratione lædit corpus, ut re ipsa ægrotare videa-tur. Hæc causarum divisio in *prædisponentes*, et *occasioales*, quantum adæquata sit ex eo patet, quod non ii omnes, qui ab iisdem ex-ternis causis afficiuntur, in morbos incurvant; tum etiam ex eo manifestum est, quod ii, qui non admodum firma fruuntur valetudine, et sunt ita dispositi, ut minima de causa ægrotent, accurato vivendi genere morbos antever-

tant, et tantum recte valeant, quantum fert  
debilis eorum constitutio.

5. *in remotas, et proximas.*

201. Quæ deinceps causarum divisio Medicis  
frequentius usurpatur, ea profecto est, quæ  
morborum causas discriminat *in remotas*, et  
*proximas*. Sunt nonnulli qui *remotas* cum præ-  
disponentibus et occasionalibus unum atque  
idem esse contendunt: propterea quod, uti hæ  
causæ, quemadmodum paullo ante diximus,  
nequeunt per se morbum facere, ita non mi-  
nus *remotæ* id præstant, ut ii tantum, qui  
sunt prædispositi, in morbos incident varios  
pro varietate causæ prædisponentis. Contra alii  
*remotas* dicunt prædisponentes, si eæ corpori  
inhæreant; *occasionales* vero appellant si ex-  
trinsecus accedant. At si proprie loqui veli-  
mus, *remotæ* causæ eæ dici debent, quæ, si-  
ve externæ sive internæ, singulæ seorsim ad  
morbū producendum concurrunt; conjunctæ  
morbū faciunt: uno verbo eæ, inter quas et  
morbū, causas alias intercedere necesse est.  
Sive *internæ*, dixi, sive *externæ*, quod pletho-  
ricus, ut exemplo utar, morbo inflammatorio,  
ut dicunt, corripi possit, sive ira excande-  
scat, sive motu corporis violento agitetur, et  
frigori præsertim se ipsum repente exponat.  
Causa autem *proxima* appellatur illa, quæ to-  
tum morbum ita constituit, ut et morbus et  
causa inter se differre non videantur; nempe

enjus præsentia morbus ponitur, absentiæ non ponitur. A nonnullis vocatur *continens* vel *conjuncta*, quasi nempe id omne comprehendat, quod morbum facit, aut sine ipsa morbus non consistat.

*Num causa proxima ex aliis coalescat.*

202. Proxima causa habetur communiter tamquam summa, seu productum, ut ajunt, causarum omnium remotarum, quæ ad morbum gignendum proprias vires exercuerunt. Ita in inflammatione causa proxima (aliis *continens* aut *conjuncta*) est congestio sanguinis peculiariter constituti in loco aliquo: sed congestio hæc ponit eam peculiarem sanguinis constitutionem seu diathesim; tum causam, quæ hanc diathesim intulit; tum demum causam aliam remotam, quæ huic sanguinis constitutioni, tamquam causæ prædisponenti, superveniens, tandem congestionem fecit; adeoque ipsam inflammationem. Ex quibus apparet, non solum causas remotas simul junctas proximam causam constituere, et causas quascunque alias superius indicatas, præter quam proximas, ad remotas revocari posse, verum id etiam pallam fit, quod paullo ante (n. 200.) monuimus; nimirum causam morbi proximam sæpe idem fere esse cum morbo ipso.

*Quid*

*Quid inter tot causas sit proprie causa.  
Unde morborum diversitas et  
similitudo.*

203. Hactenus de communī divisione causarū ; inter quas , omnibus rite pensitatis , ea solummodo causæ nomen mereri videtur , quæ proxima appellatur , quatenus ea præsente vel absente , aut adest morbus , aut abest . Diversam esse causæ proximæ naturam in morbis aliis atque aliis notum utique est atque perspectum : ubi vero eadem est causa istiusmodi , morbi sunt inter se similes etiamsi aut non easdem occupent partes , aut non iisdem symptomatibus vel ingruant , vel invalescant . Hoc inflammationis exemplo satis superque evincitur , cuius proxima vel efficiens causa quæcumque in corporis parte vim suam exserat , semper inflammationem facit . Quod vero posita eadem causa efficiente non aliis sit morbus , etiamsi non iisdem invadat symptomatibus , in Epidemicis constitutionibus confirmatur : quamvis enim eadem sit causæ morbiū facientis natura , quæ in plurimos dominatur ; nihilominus phænomena seu symptomata haud raro inter se differunt , non solum pro diversitate temperamentorum , et causarum prædipponentium , sed etiam pro ut eadem causa aut in unam , aut in alteram partem , vires exercet suas . Quod sane a Clinicis peritissimis magnopere attenditur , qui proinde carent ne

ne varia symptomatum indoles ita eos in errorem rapiat; ut morbi causam ab ea differre autument, quæ tunc grassantem constitutionem epidemicam facit ac foveat.

*Quare causa proxima raro simplex dicatur.*

204. Causa morborum proxima raro simplex est. Hoc vero non ideo tantum evenit quod ea ex plurium causarum conjunctione exsurgat, verum etiam quia ejus natura, ut ita dicam, hujusmodi persæpe est, ut variis conditionibus suam debeat originem, quemadmodum in valetudine ex conditionum quarundam concursu functionum exercitium emanat. Plures, in exemplo, conditiones, in sano corpore requiruntur, ut alimentorum coctio accurate procedat; et similiter plures simul conditiones morbosæ possunt coctionem diversimode perturbare. Fac enim ut coctio istiusmodi depravetur, tum propter perversam alimentorum indolem, tum propter vapidam succorum digerentium naturam, atque duo hæc proximam morbi alicujus causam constituant. Jam vides primum caussam hanc simplicem non esse: at cum una simul intelligas optimam succorum gastricorum secretionem, copiam sufficientem, qualitatem demum, non paucis debet conditionibus aut sanguini inhærentibus, aut vasis et organis aliis succum illum elaborantibus, aut ipsius ventriculi et proximarum partium cum motui ad naturæ leges. absoluto, tum

tum sane harum partium constitutioni; palam profecto est, vitium in pluribus, aut paucioribus, ex his concausis ad rectam gastrici suc- ci elaborationem requisitis, id efficere posse, ut depravata digestio, quam morbi alicujus cau- sam proximam constituimus, a variis morbidis conditionibus procedat, adeoque causa hæc ipsa nequeat ob hanc etiam rationem, simplex ap- pellari.

*Quantum conferat cognitio compositionis et ingenii cause proxime.*

205. Ubi harum conditionum, quæ ad cau- sae proximæ constitutionem concurrunt, natu- ra paullo attentius perpendatur, ac proinde convenientia conditionum cum phænomenis seu symptomatibus morborum, non difficile est percipere unde in morbis nonnullis tarditas aut promptitudo nascatur, in eo quod spectat ad eorum evolutionem, vel ad tempus quod percurrunt, vel ad incrementum, vel ad sta- tum, vel ad declinationem; ad paroxysmos deinde, ad remissiones, ad periodos. Demum facile est intelligere quî fiat, ut morbi nonnulli imperfecte solvantur, alii perfecte, alii redeant: morbus enim quicunque convenien- tiam habet cum vi atque indole causæ illius, unde processit; quemadmodum habent sympto- mata, quæ sunt non tam individuorum robori et peculiari temperamento, quam conditioni- bus, ex quibus causa proxima ortum duxit,

accommodata. In his enucleandis præstat paulisper iminorari.

*Utilitas demonstratur.*

206. Evolvitur igitur morbus aut cito aut tarde, pro ut conditiones illæ aut subito in corpore nascentur aut sensim sensimque. Brevis est ægrotatio si morbosæ conditiones causam proximam constituentes nullius quasi sint momenti, et protinus vanescant ubi morbus fuerit mitis: brevis quoque si eæ viribus intendantur, aut prioribus aliæ superveniant, in morbis acutis et funestis. His fere contraria morbum longum constituunt. Eadem propemodum est causa incrementi, status, ac declinationis, quorum temporum ratio ex dictis intelligitur. Ad paroxysmos quod pertinet, ad remissiones, et periodos, ( si licet in re adeo difficiili aliquid conjectari ) conditiones omnes simul præsentes paroxysmum facere videntur. Hujus vi; qua vel morbidæ materiæ portio aliqua eliminatur, vel naturalis constitutio laborantibus solidis restituitur; hujus, inquam, vi, decrescente conditionum numero aut pernicie, morbus remittit. Et quia morbosæ conditiones hujusmodi esse possunt, ut sub certis tantum corporis circumstantiis, vel sub præsentia causarum ex ordine et statuto tempore forinsecus supervenientium, vires suas exserere queant, vel demum in corpore ipso iterum nasci iterumque absque causa saltem

ma-

manifesta ; hinc aliqua periodorum ratio videtur elucere , etsi harum causa quæ sit indicare , opus difficultatis plenum esse fateamur . An huic conjecturæ pondus addit consideratio famis , somni , vigiliarum , accessionum in hec tica febre certis horis revertentium , tum excretionum quaerandam , quæ certum temporis intervallum exposcent , ut absolvantur ? An denique hanc ipsam conjecturam tumores ii confirmant , quos *metastaticos* vocant chirurgiæ magistri ; qui nempe vel a pure fiunt paullatim ex loco aliquo in sanguinem resorpto , veluti quandoque in Phthisi evenire videimus ; vel a morbida quadam materia sensim sensim que in pus mutata , quod cum ea copia aut qualitate eminet , qua intra vasa ferri nequeat , repente in partem aliquam irrumpit , et momento temporis abscessum progenerat ? Id alii viderint . Solutionem vero morbi perfectam vel imperfectam quis non videt a sublatis vel omnino vel ex parte conditionibus illis , de quibus est sermo , reciproce proficisci ?

*Qui modus aptior ad cognoscendam cause proximæ naturam .*

207. Quæ hactenus de morborum causis proposuimus satis ostendunt , quantum ad Medicinam rite administrandam cognitio conferat causæ illius , quæ proxi me morbum facit . Qua vero methodo in causæ hujus investigatione a Clinicis procedendum est ? Eâ nempe , quæ cau-

causam proximam in partes resolvit, videlicet in causas alias, ex quibus proxima originem duxit: si recte nimirum perpendant quantum singulæ causæ ad morbum inferendum seorsum possint, et quantum deinceps valeant cum simul copulantur. Quod porro examen cum absque accurato ratiocinio fieri nequeat, ut causæ ab effectis discriminari possint, et horum convenientia cum ipsa causarum natura penitus innotescat, doctorum judicium fuerit num absque diligentioribus Theoriæ studiis id sequi possimus; ac proinde an sola observatio, etiam accuratissima, ad opus sufficiat.

*In resolutione causæ proxime unde incipientum, et ad quot Classes causæ omnes referri possint:*

298. Hoc, de quo loquimur, causarum omnium examen ad causam proximam percipientiam institutum, debet, ut res optime procedat, a prædisponentibus causis exordiri, deinde ab occasionalibus vel remotis, sive internæ fuerint, sive externæ: et quæ porro causæ omnes, ad perspicuitatem, in classes duas tribui possunt, more illustrium quorundam Authorum, quarum altera semina comprehendet cuiusvis morbi; altera autem id, quod, extrinsecus applicatum, nocumentum affert.

*Semina morborum quæ dicantur, et quando  
morbos faciant. Exempla quibus ne-  
cessitas alterius cause con-  
firmatur.*

209. Cum semina diciimus morborum quo-  
rumcunque, prædisponentes veluti causas in-  
telligimus, adeoque internas, nempe vitia quæ-  
dam corporibus inhærentia, quæ interdum diu-  
latent, deinceps evolvuntur, quoties cau-  
sa alia superveniat, quæ cum his vitiis, ceu-  
prædisponentibus causis, convenientiam ha-  
beat; nempe, ut dicunt, analogiam. Secus,  
ubi convenientia desit, aut causæ illæ aliquan-  
do se se inutuo destruunt, aut morbus non  
evolvitur. Ita cibus pinguis, ut aliquo utamur:  
exemplo, aut quidquid aliud motum intestino-  
rum sollicitare potest, alvum nimis fluentem,  
videlicet diarrhœam, facit in plethorico, cui  
alvus prius sicca erat, plethora imminuitur aut:  
vanescit. En quod causa remota superveniens,  
tollit plethoram, videlicet causam prædispo-  
nentem ad morbum acutum, aut quemcunque  
alium graviorem: contra, idem cibus, pinguis  
videlicet aut tenax, in debilitate naturali vi-  
scerum digerentium, morbum intulisset, diffi-  
culter, aut certe non brevi tempore, curan-  
dum. Simili ratione non facile ægrotat pletho-  
ricus, cujus animum tristis quidam affectus re-  
pente addriatur; puta mæror, aut tristitia;  
dum contra morbo aliquo protinus corripere-  
tur,

cur, si aut ira excandesceret, aut, ex improviso, inani quadam et effusa animi exultatione commoveretur. Subitus etiam terror, quamvis aliquando Epilepsiam pariat, eos tamen certissime facit Epilepticos, qui ex hæreditate ad Epilepsiam sunt dispositi. Præterea anni tempora, quemadmodum Ver et Autumnus, podagricas affectiones movent in prædispositis; nempe iis qui podagrī humoris semina intus abscondunt, in aliis autem non movent; ut alia plura exempla ommittam de vulneribus, etiam cutaneis, plerunque lethalibus in homine, qui Hydrope laboret aut Cacochymia, nullius fere momenti in sanis; et de peste in robustos præsertim crudeliter grassante, in valedinarios autem, tum et alios chronicis laborantes, non item. Quæ porro omnia satis superque evincunt, convenientiam requiri inter causas prædisponentes, aliasque interdum supervenientes, ut morbus nascatur.

*Quæ sint externe applicata.*

210. Hæc de morborum seminibus generali: Quod spectat ad id quod, extra applicatum, nocumentum affert, non solum hoc venena comprehendit cuti admota quocunque modo, tum vulnera, contusiones, ustiones, animalium venenatorum ictus, vapores, fôtus, balnea, linimenta, vestes, et similia; verum id etiam omne, quod rerum nonnaturalium titulo (n. 197.) apud Medicos venire solet.

Hæc omnia, quæ, ut diximus, in sex classes tribuuntur nunc primum præstat perpendere, ut perspicuum fiat quantum et quomodo ad morbos conferant producendos.

## C A P U T X I V.

DE MORBORUM CAUSIS SPECIATIM ET  
PRIMUM DE AERE.

*Quæ et quot res dicantur nonnaturales. Ad  
quārum causarum classem pertineant.*

¶. **C**UM de rebus nonnaturalibus; nempe 1. de aere. 2. de cibo et potu. 3. de motu et quiete. 4. de somno et vigilia. 5. de excretis et retentis. 6. deum de animi pathematiibüs nunc primum sermonem instituo, cōsultum duō hic iterum admonere, me omnia hæc non tam inter remotas, quam inter externas morborum causas recensere; quamvis probe intelligam, somnum, vigilias, et animi pathemata, proprie loquendo, quatenus nos minime circumstant, ad causas morborum externas nequaquam pertinere. Sed frequentior usus apud Pathologię magistros obtinuit, ut res nonnaturales dictas causas appellaverint morborum externas et remotas, quæ proinde morbos excitant solummodo in prædispositis. Hanc igitur appellationem ac divisionem nos etiam retinebimus, ne, secus ac illi rem

rem petractantes, Adolescentum mentes perturbato ordine confundamus.

*In harum examine qui ordo servabitur.*

212. Primum autem ab aere initium sumemus, quem præcipuam cum valetudinis tum morborum causam vocavit Hippocrates ( lib. I. de Flatibus ); vulgus autem jure merito que censem frequentissimam; et effectus priori loco considerabimus aeris nimis calidi; deinde de iis agemus, qui sunt aeris nimis frigidi; humidi; sicci; gravis, levis, ut dicunt; vaporibus vel exhalationibus turgentis; vel nimis agitati; ac proinde ventorum effecta explicabimus. Potiora tantum indicare in animo est, quæ si conferantur cum iis quæ de aere docent cum Physici tuin Physiologi, non multum erit allaborandum, ut percipiamus quinam sint effectus ex hac vel illa peculiari aeris qualitate pendentes, et quâ fiat, ut, posita hac vel illa qualitate, effectus obtineantur diversis illis qualitatibus respondentes.

*Qui agendi modus aeris calidioris.*

213. Calidioris itaque aeris proprietas est viventium animalium solida relaxare, atque hinc vasorum in summa cute hiantium extremitates diducere, aut certe ita disponere, ut percurrentibus fluidis minus resistant; quæ proinde fluida facile iis vasorum extremitatibus effluunt, modo fumi specie, modo autem spe-

cie sudoris. Phænomena hæc in humanis præsertim corporibus fere omnibus igne calefactis luculenter apparent: quippe vapor humidus ex iis assurgit, quo paullo diutius perdurante adeo laxantur corpora ipsa, ut eorum partes componentes a mutuis contactibus separari prope modum videantur. Quod porro cutis levitas confirmat atque humiditas, asperitati ac siccitati succedens, non tam cum aer circumfusus incalescit, quam cum corpus validiori motu exercitum calore magis sensibili quaquaversus perfunditur. Laxatur igitur solidum, si tenuioribus liquidis percurrentibus viam pandit faciliorem; et hæc quidem laxitas in toto etiam corpore se se præbet, quod certo certius, ob imminutam cohesionem solidorum, minus habet roboris; magis autem desidiâ ac inertiam torpescit. Neque tamen aeris calor in solidâ duntaxat suas exercet vires: nam ex eo rarescunt fluidâ, fit plethora apparens, intumescent nimis vasa, quæ ob hanc etiam causam laxantur: et quidem eo magis, si solida ipsa naturali debilitate laborent, aut vasa nimiâ humorum copia turgescant.

*Effectus seu morbi inde nascentes.*

¶ 14. Sed tenues et aquei humores fluiditate in requisitam conservant in tota massa, et blandam hujus indolem. Quotiescumque igitur in vi aeris plus æquo calentis distillantur, superstites humores et minus facile fluunt, et vires

vires rubræ partis inflammabilis acuuntur. Fit propterea ut prius difficilius moveantur per vasa, et facile in minimis canalibus iter suum remorentur, dein ignei elementi prædominio agitati solida irritent; unde perturbatur circulatio, secretio, nutritio. Ex quibus omnibus evidens est aere in nimio calore affectum, in corporibus prædispositis, posse et acutas febres putridas excitare, inflammationes, et convulsiones: ex languente autem solidorum robore et fluidorum dispendio infirmari digestionis vires, et propterea appetitum dejici; alimenta non rite concoqui; Choleras, Diarrœhas atque Dysenterias moveri: ex fluidorum rarefientia nasci aliquando hæmorrhagias, vasorum disruptiones, atque dilatationes (n. 92.): ex minori exterioris aeris elastica facultate pulmones minus expandi, ac proinde respirationem ita perturbari, ut in iis, qui integra fruuntur valetudine, sensus suffocationis instare videatur, dum in prædispositis ipsum *Asthma*, seu anhelatio, ejusque species variæ in promptu sunt.

*Qui agendi modus aeris frigidioris.*

215. Contraria prorsus ratione agit aer frigidior in corpus nostrum. Quæcunque enim causa sit, ex qua efficitur ut sensum frigoris experiamur; nempe sive aura frigorifera, ut dicunt nonnulli, meatus corporis pervadens; sive quod pars aliqua phlogisti, seu principiū

illius quod naturalem calorem in nobis facit et conservat, per eosdem meatus seu porulos viam sibi faciat extra corpus, ut nitatur ad æquilibrium se componere; id apud omnes in confessu est ex frigore cum solida tum fluida densiora fieri. Augetur itaque solidorum robur, at simul eorum volumen imminuitur; arctantur oscula vasorum exhalantium, ac proinde minor est perspiratio. Hinc cutis arida est, asperiuscula, et minus rubra quam esse soleat: constrictis quippe vasculis repellitur sanguis a circumferentia ad centrum. Quod autem fluida vi frigoris densiora fiant, satis ostenditur cum ex naturalibus eorumdem fluidorum congelationibus, tum ex iis quæ arte parantur. Non ideo tamen existimandum est fluida in animali ac viventi corpore ad tantam densitatem perducī, quantam in liquoribus operi frigoris fieri videmus; quamvis novum minime sit aliquando in vasis omnibus sanguinem polyposum fuisse iis, qui cum ex frigore nimo interierint, statim dissecti fuerunt. Aeris porro frigiditas, ubi modum non excedat, salubris est. Ub hanc rationem, de his aeris qualitatibus disserens, eum semper gradum intelligi volo, qui ultra mediocritatis limites, difficulter pro varia Individuorum sensilitate determinandos, profertur. Facile enim est percipere, ut unum tantum exemplum afferam, inter calorem naturalem, et summum frigus, plurimos esse gradus intermedios; quorum aliqui

qui ita fluida animalium afficiunt, non secus ac solida, ut ea densitatem acquirant, quæ naturalem plus minus superat.

*Effectus, seu morbi inde nascentes.*

216. Hic agendi modus aeris nimis frigidj plurimum facit ad peculiarium quorundam morborum evolutionem. Nam primum nimia solidorum densitas atque cohæsio eam tollit flexibilitatem, qua ipsa solida a fluidis distenta, ac deinceps restituta, humores atterunt ac propellunt, si de vasis præcipue sermo sit: hæc ipsa porro vasa, propter arctatam diametrum, resistunt nimis cordi sanguinem urgenti, unde liber hujus circuitus prohibetur, brevior fit, atque ita sanguis facile impedit in partes cordi proximiores, utpote quæ vim frigoris vix aut ne vix quidem experiuntur. Præterea reliqua solida fere rigescunt, et quasi motum amittunt; ex quo fit ut sensus hebescat in iis, quæ sensui præsunt; et infringatur vis insita in iis, quæ præsunt motui, ubi frigus modum excedat: et demum, actione muscularum languente, circulatio non promoveatur. Stagnationes igitur consequuntur, et proinde inflammatores, abscessus, gangrænæ, sphaceli; quibus morbis faciliter excitandis multum confert etiam imminuta et maxime repercussa perspiratio; siquidem acre noxium retinetur quod expelli deberet. Ibi vero præcipue stagnant humores, ubi minora vasa et pauca, jam a frigore ar-

ctata , frigoris ipsius actioni sunt magis obnoxia : quo proinde intelligitur ratio peculiarium earum inflammationum , quæ vel pedes , vel manus , vel nasum , vel aures occupant ; uno verbo partes illas , quæ vix aut ne vix quidem vestibus defenduntur , et quæ inflammations Medicis. vocantur *Perniones* .

*Effectus ejusdem aeris in corpore valide se movente.*

217. Effectus hi , aliquique hujusmodi , quos a nimia aeris frigiditate pendere diximus , majoribus aut minoribus viribus in corpus nostrum agunt , pro ut hoc vel nimia quiete torpescit , vel motu valido agitatur . Dum enim corpus per frigidam atmosphærā ea ratione movetur , ut frigus molestum sensum non excitet , debet tantus per motum attritus fieri , ut inde nascatur calor eam corpori atmosphærā circumponens , quæ exterioris frigoris vires eludat . Ponamus in exemplo , ut exterioris aeris constitutio sit graduum triginta thermometri Fahrenheitiani , in quo congelatio ponitur ad gradus 32. cum naturalis calor nostri corporis sit graduum 90. et ultra ejusdem thermometri , ea caloris quantitas , quæ in corpore animali quiescente ab aere frigido extingueretur , a motu totius corporis progigni debet , inimico naturalis augeri , ut frigus percipi non possit . Quæ non erit propterea humorum attenuatio , solidorum attritus , tenuiorum liquorum dispendium ? Quid au-

autem hæc possint ad morbos producendos quotidiana observatione docemur: nam ubi etiam inflammations non inferant, quemadmodum sæpe fit, ex-nimia partium jactura fames adeo sèvit, ut homines, superveniente animi deliquio, vel furore, fatis aliquando concedant.

*In corpore quiescentē.*

218. E contrario aer nimis frigidus in corporibus otio et quiete diffluentibus nativum calorem imminuit, facit membrorum rigiditatem, et inde natam immobilitatem; retinet fere penitus perspirabile, atque hinc aqueum congeritur ad solida laxanda efficacissimum; et si perspirationem ipsam ad naturæ leges fluentem repellat, morbis (n. 216.) indicatis occasionem præbere poterit. Interim vero humores ceteri lentius moti, neque satis defæctati ob imminutas ex eadem causa secretiones reliquas, facile et ipsi congeruntur, et mite ingenium, tum ob moram tum ob retentos sales, in pravum mutant; unde irritatis solidis fiunt dolores, rebellæ rheumaticæ affectiones, exulcerationes partium: atque ita nascitur *Scorbutus*, maxime ob id Septentrionalibus Regionibus familiaris. Ad hos autem morbos excitandos ea requiritur corporis constitutio, quæ frigoris actionem diutius ferre possit; id quod propter peculiarem individuorum temperaturam non omnibus evenit ac singulis. Atque

que hinc ratio peti potest ob quam , s̄evientē nimis frigore , repulso in aliquibus sanguine ab exterioribus ad interiora , is vel in caput impetat , vel in pectus , et graves moveat capitis affectiones , aut palpitationes cordis , aut aneurysmata , aut venarum dilatationes , aut pulmonum inflammations ; et has quidem frequentius , quod pulmo , ut notum est , extēnum aerem alternis hauriat atque emittat . Neque hoc duntaxat viscus s̄æpe læditur vi frigoris intensionis ; aer quippe hac qualitate præditus tenuissimam prius afficit membranam , oris , nariū , fancium , laryngis cavernas investientem ; quæ etiamsi muco plus minus denso sit passim obsita , attamen frigidioris aeris viā plerumque ferre nequit sine detriumento ; unde raucedines , anginæ , coryzæ , et alia hujusmodi mala ingruunt , quæ hiemali tempore in otiosos præsertim , et desidem vitam agentes , passim grassantur , quotiescumque ii insolentis atmosphæræ vim vel minimum pertulerunt . Hæc de aere aut nimis calido aut nimis frigido : nunc de aere humido et sicco .

*Qui agendi modus aeris humidi.*

219. Aer humidus magnam continet aquæ copiam ; proptereaque propriæ vis elasticæ ac ponderis non parum amittit . Ob copiam aquæ minus idoneus est ad aquosos halitus corporum recipiendos , quæ circumambit ; et ob decremen-

mentum elasticitatis ac ponderis minus comprimit animalium corpora. Ab utraque causa laxantur ipsa corpora, quæ proinde et minus perspirant, et intumescunt quaquaversum. Hi sunt potiores agendi modi aeris humidioris; unde postea effectus in corpore nascuntur, quos protinus commemoro.

*Effectus inde nascentes.*

220. Et primo quidem, dum solida ab aere circumambiente minus comprimuntur, minori vi agunt contra fluida percurrentia; quæ et ipsa minus compressa, indeque rarescentia, fortius agunt in solida continentia, in quibus proinde augetur laxitas. Non igitur atteruntur fluida ut par est, adeoque et frigiditas in corpore nascitur, et languet circuitus, humorumque concoctio et secretio mirifice perturban-  
tur. Quæ mala ex impedita aut repercussa perspiratione generatim proficiscantur diximus paullo ante: dum autem ab aere humido præcipue repellitur ad interiora, aut impeditur, ubi acutos febres morbos non pariat, auget saltem serosam colluviem, quæ solida magis magisque relaxat: sic retinentur cruda, sunt obstrunctiones, intumescentiæ aquosæ, frigidæ, non facile vincendæ. Hæc in oculos incurront eorum, qui loca terræ humilicra, et aquis obsita aut circumfusa, perambulant; quorum incolas memoratis modo affectionibus correptos videre est. Affectiones porro illæ in pertina-  
cis-

cissimas intermitentes febres cum subsequentे insigni abdominalium viscerum obstrukcione , et demum in scorbuticos affectus rebelles persæpe vertuntur , etiam propter putridas et salinas exhalationes , quæ humido illi aeri sere semper intermiscentur .

*Qui effectus ejusdem aeris in pulmone .*

221. Hæc præstat aer humidus in corpori bus eorum , qui diutius sub aere istiusmodi vitam ducunt : sed pejora etiam mala infert cum pulmonibus hauritur . Ex hoc viscere , ut omnes norunt , redditur aer humidus exspirationis tempore , etiamsi tempore inspirationis siccissimus foret . Educitur ergo ex pulmone peculiaris humor in statu secundum naturam . At cum humidus aer , aquejs nempe vaporibus saturatus , alias humiditates repellat ; hinc inspiratus , præterquamquod minori gravitate et vi elastica præditus pulmones non satis explicat evolvitque , propriam etiam horum viscerum perspirationem impedit . Quid mirum igitur si is vapor retentus in aqueum humorem densetur , qui stagnando pulmones inferciens , propriamque indolem mutans , et tusses , et peripneumonias nothas , et catarrhos , similesque alias affectiones interdum excitet ? Uno verbo , ubicunque serosa colluvies congregatur , morbidas affectiones creat , naturæ , fabricæ , actioni , usui partis aut visceris illius , intra quod congeritur et stagnat ; convenientes . inde

de seddi facile potest ratio, cur graves auditus, visus habetudines, aliorum sensuum languor, infirmitas vis insitæ, et proinde torpor in plurimarum functionum exercitio, hydrops vel particulares vel universales, diarrhœæ aquosæ, urinæ profluvia, et similia corporibus contingant, quæ vim aeris humidi præter consuetudinem et diutius perferunt; præsertim si corpora ea debilia sint, et sero naturaliter abundant.

*Effectus aeris humidæ et frigidæ: hu-  
midæ et calidæ.*

222. Verum humidus aer modo frigidus simul est, modo autem calidus: Si frigidus, effectus edit parum diversos ab iis, quos nunc memoravimus. In eo duntaxat differentia sita esse videtur, quod retento fere penitus perspirabili Sanctoriano, propter vim frigoris, promptiora et fortiora sunt mala paullo ante (n. 220. } enarrata; præsertim ubi in corpus agant naturâ sua infirmum atque iners. Idem de aere humido simul et calido dicendum est: videntur enim laxari corpus non tam ab aere calido, quam ab humido: sed illud etiam accedit, quod, si in calore perspiratio augetur, dum calori adjungitur humiditas, tanta fit laxitas, ut loco perspirationis sudor habeatur copiosus, quo propterea vires magnopere infringuntur. Promptiores igitur, et magis violenti sunt effectus si humido aeri etiam calor

accesserit; humores enim præter modum rarescunt, et solida distendunt; stagnant facilius; inde secedunt in partes, dissolvuntur, quo minima quæque loca, minimos quo:cunque subeunt poros; ita fiunt morbi ex errore ioci, ut dicitur, morbosæ effusiones, inflammations, febres mali moris, putridæ, contagiosæ, pestilentes: ad quas excitandas promovendasque quantum faciat humiditas calori copulata præter medicas observationes demonstrant carnes, et vegetabilia ad usum domesticum comparata; quæ stante Austro, seu potius Euronoto, nullo negotio putrescant, seu in pytridum tabum disfluunt. Id autem longa observatione fretus olim docuit Hippocrates, cum dixit aphor. 5. Sect. 3. *Australes venti* (qui humili sunt et calidi) *auditum hebetantes, caput gravantes, pigri, dissolventes.* Nam hæc et solidorum laxitatem indicant, et rarescentiam ac dissolutionem fluidorum; quæ porro omnia ad morbos tandem disponunt modo commemoratos.

*Qui agendi modus aeris sicti; ejusque effectus.*

223. Si vero de aere sicco sermo sit, raro aer ad tantam siccitatem perducitur, nostris saltem in Regionibus, ut fiat causa morbi. Nam, si generatim loquamur, salubris est siccus aer, præsertim ubi non sit calidus; quatenus et solida firmat; et perspirationem adju-

juvat, tum propter solidorum robur, tum quia aptissimus est ad humiditates recipiendas. Nihil tamen secius, ubi siccitas diutius perseveret, ex nimia perspiratione fiunt languores in toto corpore, quod propterea sensim contabescit. Et quamvis crassescant prius humores aquæ vehiculo desticuti, attamen in aquæ defectu, igneo elemento exsuperante, tanta fit hujus elementi *exaltatio*, quemadmodum dicunt, ut in ipsis fluidis diathesis phlogistica nascatur, aut dispositio ad acrimoniam alcalescentem (n. 178.) et mala suboriantur, quæ ab hac peculiari humorum indole (n. 179.) diximus proficisci.

*Num aer plus minus gravis nocere queat.*

224. Verum aer, ut omnes norunt, gravis est, et nocere etiam potest gravitate sua; cum nempe est aut plus æquo gravis, aut minus quam esse oportet, quo in casu impropre *levis* dici solet. Hoc majus vel minus aeris pondus indicatur quodammodo a barométre; et certè videtur aer gravior esse, atque una simul magis elasticus, suda tempestate quam humida. Itaque cum per aereum, quo circumfundimur, nos metipsos moveamus, ab eo plus minus, pro majori vel minori ejus gravitate, comprimimur: cumque compressio hæc ab elasticitate fortasse magnam partem procedens, variis morbis occasionem præbeat, idcirco de aeris

ris etiam gravitate ejusque effectis patera a nobis sunt afferenda.

*Agendi modus aeris gravis. Difficultas in assignanda gravitate quæ nimia sit. Quæ aeris gravitatem mutent.*

225. Aeris gravitas in genere solida roborat et fulcit; impedit vitiosam humorum rarescentiam: hinc attritum sovet inter solida ac fluida, et proinde calorem atque fluiditatem, liberam circulationem, secretiones excretionesque. Salutaris ergo dici potest aeris gravitas, modo tamen non sit nimia. Est autem admodum difficile excessus menstram statuere. Quamvis enim communiter dici soleat corpora ab aere premi ea vi qua comprimerentur, si iis mercurii columnna insideret ad undetriginta pollices erecta, nihilominus compressio hæc est admodum varia; propterea quod a plurimis causis aeris gravitas mutatur. Hanc mutationem faciunt venti, calor, frigus, exhalationes, locorum profunditates, atque altitudines. Nam ventorum alii gravitatem augent, si recta deorsum versum spirent, aut ingentem aeris massam alicubi congregent; imminuunt vero ii, qui sursum aguntur. Calor, aeris rarescentiam infert, quo minus est gravis, in aperto loco: frigus, contra, aerem condensans, gravitatem auget; est enim densitas, ceteris paribus, in ratione ponderum. Exhalationes autem, si in aere suspensæ, et in par-

partes exilissimas disjunctæ atque divisæ sint, atmosphæræ pondus adiungit; dum interim illæ, quæ junctæ sensim dilabuntur, propriæ aeris gravitati plus minus detrahunt. Locis tandem terræ humilioribus altior incumbit aeris columna, minor in locis elatioribus: in iis igitur gravitas per gradus major est, in his autem per gradus est minor.

*Effectus aeris nimis gravis.*

226. Si tamen in medium eos tantum effectus afferre volumus, qui ab aeris gravitate pendentes morbis occasionem præbere possunt, in iis consistere oportet, qui a nimia aeris gravitate proficiscuntur. Igitur si gravis aer in genere ea præstat, quæ (n. 224.) proposuimus; cum nimis erit gravis, quemadmodum est in locis terræ profundioribus, nempe in subterraneis cavernis aut fodinis, solida comprimet præter modum, fluida velocius promovabit, quo utraque, videlicet solida et fluida, validius atterentur; inde caloris incrementum, nimia perspiratio, et proinde debilitas, animi deliquia, diathesis, ut dicunt, inflammatoria. At vero pulmoni præsertim infensus est aer istiusmodi; nimis enim comprimit vascula circa cellulas et vesiculas ludentia: ita excurrenti sanguini mora injicitur, quo fit; ut, auctis resistentiis contra sanguinem a corde prorumpentem, impediatur liber ipsius sanguinis excursus, adeoque stases oriantur, congestiones.

insignes, et funestæ: quatenus aut polyposis concretionibus sanguineis, aut dilatationibus vasorum, aut dirissimis pulmonum inflammatio-nibus ansam præbent.

*Hi effectus confirmantur exemplo Uri-natorum.*

227. Confirmantur hæc omnia ex observatis Urinatorum phœnomenis. Hi enim, quoties campana conclusi merguntur in mare, quo profundius descendunt eo magis etiam anhelant, quod altius aqua intrâ campanam assurgat: ita aer inter aquæ superficiem et campanæ apicem consistens, in angustiorem locum recipitur, propterea densior graviorque fit, quo illi difficulter admodum respirant, et sanguinem interdum ex ore, naribus, atque auribus fundunt: disrumpitur iis quandoque tympani membrana insigni cum dolore, et brachia obstupescunt, quasi valido vinculo intercepta forent. Demonstrant certe hæc postrenia vim summam aeris nimis comprimentis; atque idem ostendunt ipsæ sanguinis effusiones; nisi forte aliqui eas repetere placeat ab imminuta elastica aeris facultate, propter vim vaporum e pulmonib[us] Urinatoris erumpentium: quod tamen observationibus refragatur, cum in aere compresso ejus vis elastica diutius maneat; immo, quo densior est factus, majori vi et momento polleat, sicque corruptioni magis resistat.

*Qui*

*Qui agendi modus aeris minus gravis.*

228. Hec generatim de effectis aeris nimis gravis: sed, iterum dico, difficile est aere in communi atmosphæra adeo gravem invenire, ut non salubritatem afferat, sed perniciem. Utinam vero neque perniciem afferret aer ille, qui, minori quam par est gravitate præditus, idcirco *levis* appellatur! Sed noxiū esse docent observationes. Levis enim aer minus comprimit corpora, quæ per ipsum mouentur: igitur infirmatur eorum robur: humorum motus atque attenuatio non promovetur: ita imminuuntur resistentiæ cordi, quod proinde violenter impetit in partes, intra quas sanguinem propellit; et in quas præterea contenta fluida suas vires exercent ob id etiam, quod aer in iis conclusus, seu gasticum fluidum, quemadmodum in præsens appellant, se se explicare incipit. Hinc intelligitur quā fiat, ut animalia in vacuo Boyleano toto corpore intumescant; et quare iis interdum sanguis erumpat ex nonnullis locis, præsertim vero ex pulmone: vel saltem intra hoc viscus sanguis congeratur, qui pròpterea congestu gravans circuitum prius retardat, tandem omnino interrupit, quo animalium vitam opprimi necesse est.

*Confirmatur exemplis.*

229. Similia patiuntur homines, qui altissim

mos montes primum adscendunt, et sanguinis sputo eorum nonnullos ex hac causa correptos fuisse Physiologorum plurimi testantur. *Similia pati* dixi, non eadem: magna siquidem differentia interest aerem inter naturaliter rarum, proindeque minus graveim, et ope artis rarefactum. Animalia enim, quæ in Boylei machina clauduntur, statim sub primis Antliae aerem subducentis tractionibus difficultate respirandi incipiunt laborare, intumescere, anhelitu torqueri, etiamsi mercurius parum admodum descenderit in tubo, qui intra recipiens cum ipsis animalibus conclusus fuit. At contra in altissimis montibus, in quibus propter minorem aeris gravitatem mercurius in tubo descendit aliquando ad sexdecim pollices, vivunt homines et commode respirant; si tamen fuerint adsueti; facile autem anhelant, et phænomenis paullo ante enarratis laborant ii, qui, non assueti, tantam aeris mutationem subito experiuntur. Ad hæc vero phænomena augenda accedit difficultas adscensus, et propterea vehemens corporis exercitium; tum fortassis aeris natura intra horum solida ac fluida latentis; est enim, ut videtur, rationi consonum existimare, assuetos homines et eorum montium incolas ab indicatis phænomenis immunes esse, quod ii rariorem aerem cum alimentis haustum in solidis gerant ac fluidis, qui propterea facile cum exterioris aeris raritate in æquilibrium adducitur.

*Effe-*

*Effectus aeris rarioris.*

230. Ceterum ea interioris aeris expansio, quam (n. 228.) commemoravi, cum satis ostendat exteriorem aerem esse debiliorem, simul etiam declarat quā fiat, ut aer istiusmodi exterior propter rarefactionem debilior, etsi non semper Hemoptysim inferat, certe pulmones nequeat dilatare; unde oritur spirandi difficultas, circulatio aliquantulum impeditur, stagnat sanguis intra caput, languent propterea, si forte interdum non pereant, vitales præcipue et animales functiones; adeoque fiunt stases, tumores, humorum secessiones, Peripneumoniæ, Apoplexiæ, et aliæ hujusmodi affectiones vix ope medica superandæ. Rarioris autem aeris impotentiæ in dilatandis pulmonibus enarratos præcipue effectus deberi ex eo etiam manifeste evincitur, quod animalia, quæ aut pulmonibus carent proprie dictis, cuiusmodi sunt pisces, aut iis non semper utuntur, quemadmodum amphibiis commune est, in aere ope machinæ rarefacto diutius reliquis animalibus supervivant.

*A quibus fontibus vapores atque exhalationes proficiscantur.*

231. Post indicata phænomena aeris magis aut minus gravis: ut propositum ordinem sequamur, de vaporibus atque exhalationibus per aera dispersis sermonem instituemus; quorum

varietas est adinodum ingens , quippe quæ a vario calo , anni tempestate , peculiari solo quod quisque inhabitat pendere solet . Tria hæc in genere et summatim considerabimus ; illud præmonentes , ad felices morborum curationes id maxime pertinere , ut cognitam naturam cœli habemus , soli , ventorum etiam et aquarum , tum et mutationum omnium , quæ in aere contingunt ; et in aere quidem ea loca replente , in quibus ars administratur . Si enim hujusmodi cognitione careamus vix ac ne vix quidem recte medicinam faciemus .

*Quid cœli nomine veniat ; et quæ ejus varietates . Qui morbi unde nascentes .*

232. Cœli porro nomine intelligimus spatiū illud supernum , quod ad perpendicularum dato cuidam loco imminet , et repletum est aere ac vaporibus diversi generis , et certis quibusdam cum latitudinis tum etiam longitudinis gradibus comprehenditur . Spatiū hoc in aeris temperatione variare omnibus competitum est ; notum est siquidem aliam esse atque aliam locorum humiditatem , siccitatem , calorem , frigus ; neque ubique eadem meteora contingere ; neque aerem iisdem halitibus abundare . Mutationes istiusmodi nostra hac in Regione , Italia videlicet , maximie sunt evidentes . Ita locis humilioribus aer humilius est ; siccus autem , aut certe minori humiditate per-

fusus, in editioribus locis. Quod pertinet ad vim frigoris aut caloris, Pisis, Neapoli, et in ejus viciniis, hiems est plerumque temperatissima, quemadmodum et toto ferè illo Brixiani agri tractu, qui Benaco alluitur, et a Salodio Oppido nomen accepit. E contrario Mediolani, Augustæ Taurinorum, et vicinis locis, hiems asperior est, quam apud nos esse soleat. Si de meteoris fermo sit, nos certe aestiva tempestate corruscationum, tonitruum, fulminum, grandinis, et similium vim experimur; quæ omnia Corcyraei et his affines incolæ ferunt hieme, quemadmodum cunctis febre anni temporibus, immo plures unius diei curriculo ii, qui loca inhabitant ad Zonam torridam posita, ut plures monent Historicæ. Igitur ab his agentibus omnibus et singulis corpora ad morbos varios disponi possunt, qui proportione respondebunt aeris mutationibus, nempe frigoris aut caloris; siccitatis aut humiditatis; quos porro morbos paullo ante indicavimus, cum de his aeris qualitatibus sermo fuit.

*Quæ mutationes aeris ex anni temporibus;  
et morbi inde profecti.*

233. Easdem prorsus aeris mutationes, et proinde morbos inde exorientes afferunt anni tempora: neque de his mutationibus dubium esse potest quin corpus nostrum maxime afficiant. Hæ autem mutationes faciunt, ut qui

morbi hieme grassari solent , sileant plerumque aestivo tempore , et vicissim . Hoc iam indicavit Hippocrates in plurimis aphorismis sectionis tertiae , tum et in libris Epidemicorum , et diurne confirmavit observatio . Cum autem magna mutationum pars , quæ in atmosphæra contingunt diversis anni temporibus , ad aeris frigus pertineant vel calorem ; densitatem vel raritatem ; humiditatem aut siccitatem ; idcirco corporeas easque inorbidas affectiones , quæ inde proficiscuntur , enumerare supervacaneum putamus .

*Unde alia vaporum in aere diversitas .*

234. His igitur omissis , quæ morborum varietas ex varietate soli , quod quisque inhabitat , consequi possit paullisper considereimus . Solum aut eminet , aut humili loco situm est ; adeoque vel in montibus , aut prope ipsos jacet , vel procul ab illis : præterea aut maris , aut vallium , aut fluminum , aut paludum aquis alluitur . Nemo inficias ibit ex his omnibus et singulis vapores elici , qui in aera attolluntur plus minus in ratione inversa specificæ eorum gravitatis . Sed non ab his tantum aer inquinatur : vegetabilia , animalia cum viventia tum mortua , fodinæ sulfureæ , salinæ , metallicæ , igneæ eruptiones , terræ motus , tum et alia , quæ in aere aut vivunt aut consistunt , et quæ sive in ipsa atmosphæra sive in tellure occurunt phænomena , non tam aeris temperie in  
quam

quam iudolem mutant principiis peculiaribus, quibus eam inficiunt. Abundat itaque atmosphæra vaporibus variis, pro ut diversa est telluris superficies, cui ipsa atmosphæra imminet, et propterea hæc ipsa superficies aut vaporibus aut halitibus, modo unius naturæ modo alterius, ex parte inquinata est; et eo quidem magis quo et dispersæ particulæ sunt graviores, et solum majori calore foveatur, et ventorum flatibus minus agitatur:

*Quid vaporum presentiam confirmet, et quos  
ii morbos producant.*

235. Plurimis autem cum experimentis tum observationibus vapores istiusmodi in aere inesse demonstratur. Nos pauca afferemus, ne id de nihilo dixisse videamur. Et primum quidem habemus in Actis Lipsiens. ( Supplem. Tom. I. ) apud Nigritas pluviam aliquando decidere, quæ, si in cutim nudam impetat, eam erodit; si in vestes, insecta producit ipsas depascentia: et cuius pluviae guttæ diame-trum habent unius pollicis. Ros præterea non ubique Terrarum est ejusdem ingenii, neque iisdem in locis. Æstivo enim tempore flores, plantæ, animalia, id exhalant, propter majorem phlogisti evolutionem, quod hieme, propter aeris frigus, adeoque contrariam rationem, nequeunt exhalare. Ita copiosior est vapor humidus, ubi plures insunt plantæ: cuius rei fidem faciunt lethales putridæ febres, atque

que malignæ , quibus , si fides Historicis est adhibenda , Europæi fuerunt obnoxii , qui pri-  
mum Americam incoluerunt ; atque ii præser-  
tim , qui loca virentibus plantis et arboribus  
obsita inhabitarunt . In chemicis autem pericu-  
lis ros quarundam Regionum , certis anni tem-  
poribus destillatus , vitra fregit præ volatilitate  
ac vi elastica principiorum , quibus turgentebat .  
In aliis Regionibus destillatus ros colores Iri-  
dis exhibuit . Legitur etiam in Trans. Philos.  
vol. 3. in quibusdam Terræ locis speciem quam-  
dam roris circumferri , qui fœtidus est , et bu-  
tyrum refert aut pinguedinem . Postremis ve-  
rò hisce temporibus demonstratum est ( vid.  
Com. Acad. Bonon. Tom. V. part. alter. pag.  
398. ) pedes rubore ac pruritu vexari actione  
roris ; qui præterea variis locis collectus , et  
fervidis Solis radiis expositus , septima die cor-  
ruptus , insectis inquinabatur . Quæso autem ,  
an non hæc omnia ostendunt vaporum et ex-  
halationum in aere præsentiam , atque diversi-  
tatem ?

*Num exhalationes metallicæ , tum et alie  
in aere insint . Qui morbi inde  
nascantur .*

236. Sed aer præterea metallicis exhalatio-  
nibus refertus creditur . Definiant Chemici num  
acidum minerale vitriolicum vel alterius gene-  
ris , quod universale dixerunt nonnulli ; per at-  
mosphærā moveatur , immo cum ipso aere  
sit

sit intime mixtum , et acidorum omnium basis sit ; ea videlicet ratione , ut cum terra , Chemicis dicta vitrificabili , acidum vegetabile ; cum terra colorante seu fortasse phlogisto , acidum nitrosum ; demum cum terra mercuriali , marinum acidum constituat . Quod enim ad metallicas attinet particulas per aerem dispersas , certe Boyleus aerem Marcassitæ halitibus scatere dixit , quæ in maxima Telluris parte occurrunt ; et metallicæ exhalationes fodinis nonnullis præcipue imminent aeri intermixtæ : inde colicæ quædam affectiones peculiares , phytyses , marasmus , aliæque hujus generis invaletudines , iis præsertim familiares , qui plumbo , stanno , mercurio , aliisque similibus terræ corporibus effodiendis operantur .

*Quid aliud faciat vaporum et exhalationum diversitatem . Morbi qui ex his oriuntur .*

237. Differentiam vaporum et exhalationum facit etiam locus vel urbanus , vel rusticus . Major enim vel minor cum hominum , tum animalium frequentia , majorem vel minorem animalium et putridoru[m] vaporum copiam in aerem impellit : inde , si cetera sint paria , frequentiores morbi et peculiares in civitatibus , quam in agris , facilius grassantur ; dum contra rusticanus aer , si lacunibus atque paludiis circumfundatur , neque ventis ut par est agi-

agitetur , ad morbos disponit ex humido præsertim aere ( n. 220. 221. ) pendentes . His adde , quod metalla intra urbes præparantur ; quod cadavera intra ipsas majori copia , non raro ad viventium perniciem , inhumantur ; quod ædium frequentia , et persæpe viarum angustia , cum necessariæ munditiei impedimento esse solent , tum simul etiam prohibent , æ per ventorum vim malefici halitus abigantur . Ab his fortasse causis enascuntur de repente epidemicæ quædam constitutiones ; et ex putridis vaporibus per aera diffusis ( peculiari bus , ut videtur , conditionibus aliis accedenti bus ) pestem quandoque ipsam subortam fuisse illustres Auctores memoriæ prodiderunt . Præterea inter vapores plurimi aculeis suis bronchiorum fibras contrahunt , alii aeris vim elasticam non parum iniminuunt : salini , putridi , et sulfurei id præstant inter alios : atque ita oriuntur respirationis difficultates , et morbi superius ( n. 230. ) indicati ; modo ventorum vi halitus illi non dispellantur .

*Num venti vapores afferant et exhalationes . Quæ natura morborum inde nascentium .*

238. Neque tamen a ventis hæc semper bona sunt expectanda ; nam et ipsi morbis aliquibus occasionem præbent : siquidem præter notissimas , atque admodum sensibiles mutationes , frigiditatis videlicet et caloris , humi-

ditat-

ditatis et siccitatis, gravitatis et levitatis, ut dicunt, pro ut venti deorsum irruunt, aut ex oppositis locis spirantes altiorem aeris columnam alicubi congregant, aut sursum feruntur; præter, inquam, has mutationes, quas in aere faciunt, halitus etiam secum rapiunt inter se longe diversos: cuius rei præcipua est ratio, quod venti non semper ab eadem plaga ad nos feruntur; aut quod loca, quæ percurrunt, non sunt omni tempore eadem ratione constituta. Si enim accidat ut Regiones, a quibus venti oriuntur, aut quas pervolant antequam ad nos perveniant, aqueis, putridis, salinis, alcalescentibus, sulfureis, metallicis halitibus scateant; dubium non est, quin aer, quicunque tandem ventus spiret, eos arripiat, secumque deferat; proptereaque putridis vel scorbuticis affectionibus, vel inflammationibus, vel pulmonum affectibus, vel aliquando etiam contagiosis et pestilentibus morbis ortum trubuat.

*Modus ad vaporum indolem cognoscendam.*

239. Scire igitur oportet quæ sit natura locorum quæ ventus percurrit, et proinde an mare, an montes, an longus terrarum tractus, vel siccus, vel palustris, vel peculiaribus exhalationibus refertus, ad Boream vel ad Austrum, ad Orientem vel ad Occidentem Urbis illius ponantur: ita siquidem halituum patebit in-

indoles , quos ventus secum rapiet , atque importabit . Differentiae istiusmodi a Magno Medicinæ Parente non ignoratae fuerunt , ut patet in libro præcipue , qui inscribitur : *De aere , aquis , et locis* . Cum vero superius indicaverimus quid aer humidus aut siccus , quid calidus aut frigidus in corporibus animalium , secundum variam eorum constitutionem , præstare queat ; ita cum venti faciunt , ut , ob alterutram ex his qualitatibus , aer nobis sit infensus , ad morbos illos disponet , quos recensuimus cum de similibus mutationibus , quæ in aere interdum contingunt , locuti sumus .

*Quæ actio ventorum in pulmones . Morbi inde profecti .*

240. Agunt itaque venti in corpora nostra qualitatibus paullo ante memoratis , tum et vaporibus , atque exhalationibus , quas secum vēhant : sed non parvi facienda est actio illa , quæ a violento motu ventorum quorundam proficiscitur ; et quæ non solum pulmonibus detrimentosa esse solet ; verum etiam reliquis corporis partibus . Et primum quidem ; si inspiretur aer vento concitatus , tanto magis pulmones comprimit quanto velocius mōvetur : dum , contra , aer quietus in pulmones agit in ratione ponderis ; si quidem ampliato thorace a propriis musculis , intra ipsos pulmones sola fere gravitate aer descendit . Hac ratione intel-

telligitur quare ii , qui adverso vento celeriter acto moventur , aliqua spirandi difficultate laborent : nam quamvis impetus , additus ponderi aeris pulmones subeuntis , videatur posse plenam inspirationem adjuvare ; attamen hic idem impetus , dum suas in pectus ejusque musculos vires exercet , facilem impedit sterni et costarum motum , unde respirationis difficultas suboritur . Faciunt hæc , ut pulmones comprimantur plusquam ratio postulat et consuetudo ; inde difficilis per ipsos circulatio , et propterea stases , inflammationes , suffocationes , vasorum majorum dilatationes , aliaque hujusmodi mala consequi possunt .

*Quæ actio ventorum in partes alias corporis ; eorumque effectus .*

241. Verum non in pulmones tantum ventus agit : sed etiam in ceteras partes corporis , in quas obnittitur . Eas enim comprimit præter modum ; vasa propterea ferme elidit , et contentos humores compellit in loca minus compressa . Turbatur ideo , vi ventorum , circulationis æquilibritas ; et præter stupiditatem , impotentiam ad motum , et stases peculiares in partibus compressis , alios atque alios potest ea vis gignere morbos , majorem vel minorem perniciem afferentes , pro ut in major minorve est nobilitas partis illius , in quam repulsi humores vim faciunt . Atque hoc quidem eo facilius contingit , quod maxima vehementer flan-

flantium ventorum pars , frigoris sensum in nobis excitat ; propterea quod ii naturalem eamque calidam atmosphäram , quæ corpora nostra circumstat , secum rapiant : et quod porro frigus qua ratione , et quantum ad invalestines varias disponat , superius ( n. 215. 216. 217. ) adnotavimus .

241. \* Quæ hactenus a nobis proposita sunt , ad eas pertinent aeris constitutiones , generatim consideratas , quæ ad morbos disponere possunt , tum quæ morbos reipsa exsuscitant in prædispositis , eosque inter se diversos pro diversa Individuorum prædispositione . Ita nervorum morbi , ut alias ægritudines omittam ; in aliis calidi aeris efficacitate ; in aliis frigidí , calidi et humidi , calidi et siccí , magnopere intenduntur : et hoc quidem sive aer hic epidemicum quendam morbum intulerit , sive non ; quemadmodum exemplis non paucis Illustris amicus noster Tissotus (1) accurate pro more suo , atque eleganter confirmavit . Nobis , si non plura , saltem præcipua delibasse sufficiat , ut quantum et quomodo aeris mutationes morbidis affectibus caussam præbere queant quandenus innotescat .

CA-

---

(1) Traité de nerfs &c. Tom. II. Part. I. Chap. VIII. Art. II.

## C A P U T . XV.

DE ALIMENTIS · TAMQUAM MORBO-  
RUM CAUSA .

*Quot modis alimenta peccare possint ?*

242. **A**limenta, cum solida tum fluida, dupli modo sic peccare possunt, ut morbis producendis ansam prebeant: nempe copia et qualitate: copia non excessum duntat comprehendit, verum etiam defectum. Primum de excessu dicimus, afferentes modum, quo excessus agit, ut inde Tyronibus pateat, quæ morborum species a nimia consequi possit alimentorum, præcipue solidorum, ingestione: quod enim pertinet ad fluida, ubi potus simplex aqua non fuerit, minus ad eorum copiam, quam ad qualitatem, morbosa phænomena sunt referenda.

*Num excessum assignari queat?*

243. Cum autem excessum dicimus, satis intelligimus nomen tantummodo a nobis proponi, quod peculiarem atque determinatam eorumdem alimentorum quantitatem nequaquam indicat. Hanc mensuræ inæqualitatem facit robur, vel debilitas individuorum; ætas; sexus; corporis exercitatio, aut inertia; Regio plus minus frigida; anni tempus; consuetudo. Quo-

tus enim quisque est, qui majorem alimenti copiam in corporis incremento, ejus robore atque exercitio, tempestate hiemali, frigida Regione requiri nesciat, tum et in valida succorum digerentium natura, quam in constitutionibus contrariis; atque ab hac eadem copia, aut nullo pacto, aut modice lœdi assuetos? Est igitur horum omnium habenda ratio, ut de alimentorum excessu rectum judicium ferre possimus: nam, his attentis, manifestum erit contingere aliquando, ut quod in nonnullis excessus est, in aliis fere iniopia dici possit. Hanc ob causam generalia quædam solummodo proponeamus; id tantum præmonentes, priorem excessus gradum in alimenti assumptione ad satietatem usque generatim constitui posse; si verum est, quod nemio inficias ibit, sanitatis conservationem ( docente Hip. in Epidemiis ) in eo sitam esse, ut ciborum satietas vivetur.

*Quid ventriculo prius accidat, a nimia ciborum copia distento.*

244. Ventriculus igitur; ubi cibis repleatur plusquam pars est, præter modum distenditur. Duo ex hac distensionie consequuntur: nempe spasmus tunice muscularis ab irritante distractione natus; et proinde angustia orificiorum ventriculi. Porro hi duo nimis distensionis esse tuis induunt naturam atque ingenium caesarum, si habeatur ratio phenomenonorum inde in-

ingruentium. Nam primo ventriculus spasmo affectus tensas et rigidas tunicas gerit, quo intercurrentia vasa comprimuntur, non tam inter tunicas et tunicas, quam inter has et contenta alimenta. Ita inhibetur secretio humorum eorum, qui aliâs in cavum ventriculi effuentes alimentorum coctionem plurimum juvant, et propemodum perficiunt; prohibetur motus peristalticus ventriculi ipsius, et propterea neque rite miscentur alimenta cum inter se, tum etiam cum gastricis humoribus, et ex quo diutius intra ventriculum manebunt. Ibi vero vel pravam adipiscuntur qualitatem, vel non ita concoquuntur ut fieri debet. Utrovis modo molestas affectiones afferre possunt.

*Quæ priora mala a ventriculo nimis  
repleto.*

245. Sunt autem affectiones istiusmodi, saltem ex quæ statim ingruunt, sunt, inquam, difficilis respiratio, nausea, vomitus, cardialgia, symptomata ad caput pertinentia, atque similia. Et difficilis respiratio ideo quidem ingruit, quia diaphragma a distento ventriculo compressum impedit facilem pectoris, et pulmonum explicationem. Nausea vero, vomitus, cardialgia, a contentis, nerveam et muscularē ventriculi tunicam irritantibus, ortum ducunt: quæ irritatio, si levis est, nauseam; si fortior, ut in motus ingentes, muscularē tu-

nicam adducat, vomitum præsertim facit; quia orificium superius facilis dilatatur quam inferius; si deum fortis irritatio spasimum inferrat, eaque præcipue in superius ventriculi orificium suas vires exserat, cardialgicum dolorem inovet. Capitis porro affectiones sub nimia ciborum repletione a distento ventriculo; et inde nata, ut dictum est, spirandi difficultate, profiscuntur. Siquidem retardato sanguine intra pulmonum vasa, anterior cordis ventriculus sanguinem ipsum libere in pulmones non impellit: non ideo prompte evacuantur respondens sinus et auricula, cava descendens, jugulares, sinus cerebri: ita a sanguine retardato, et cerebrum nimium replete, fiunt vertigines, idearum confusiones, aliæve mentis aberrationes.

*Unde in his circumstantiis mentis errores.*

246. An vero ad hæc postrema phænomena exsuscitanda aliquid etiam poterit molesta, eaque peculiaris, ventriculi impressio, cuius effectus per nervos ad commune sensorium traducatur? Cur non receptæ impressionis occasione mens, ignota prorsus lege, ita commovebitur, ut vel inter objecta rotantia, vel inter tenebras videatur consistere; quo statuendum sit, perceptionem, et judicium quod inde consequitur, non proprie ex mentis vicio proficiisci, sed cum recepta impressione ex Naturæ

turæ instituto conjungi? Cur si externa impres-  
sio mente in afficit hac vel illa ratione, et nè-  
xus inest aliquis inter receptam impressionem  
et respondentem mentis mutationem, non idem  
dicendum erit de impressionibus quæ intra nos  
funt; ut nempe pro varia impressionis ratione,  
ex determinato quodam nexu, hæc vel illa af-  
fectio in mente excitetur?

*Quid huic conjecturæ opponi queat: Et  
quid responderi:*

247. Objicit fortasse aliquis, non aliud tan-  
dem quam tangibilem quarundam qualitatum  
perceptionem ab iis impressionibus exsuscitari  
posse; contenta siquidem in ventriculo et in  
intestinis hoc unum pondere, stimulo; et motu  
præstare queunt. Ego vero, aut fallor magnó-  
pere, aut non video quanti hæc difficultas mo-  
menti sit, dum considero corporum sapidorum  
et odoratorum vim ejusmodi esse, ut ea non  
tam tangiblem quarundam qualitatuum pérce-  
ptionem, verum etiam saporis et odoris judi-  
cium de mente extorqueat: et cum video tuim  
plantas nonnullas, tuim aliarum seminā vix  
ventriculo excepta, in peculiares capitis affe-  
ctiones, et præsertim in mentis aberrationes  
adducere. Nonne ex peculiari ignota impres-  
sione judicium istiusmodi pendet; cum etiam  
hæc internoruim sensuum confusio ac perturbatio?  
Quid ergo vetat quo minus præternaturales,  
ut ajunt, viscerum quoruindam affectio-

nes mentem hac vel illa ratione commoveant ; quo proinde fiat , ut non solum in mutationibus quæ propter ingesta in tubo accident alimenterum , verum etiam in hypochondriacis affectibus , in melancholia , et morbis illis quorum sedes in visceribus inest præsertim abdominalibus , ideo mens interdum aberret , quod cum morbosa laborantium viscerum affectione , adeoque cum præsenti nervorum ad hæc visceræ spectantium impressione ; hæc vel illa idea necessario copuletur ?

247. \* Et si id etiam aliquis opponat , qui nempe fiat , ut alimenta excessu minime peccantia neutrani afferant ex affectionibus hic loci commemoratis ; queso is consideret , in agentibus sive exterioribus sive interioribus vim quandam determinatam requiri , ut mens eorum impressionibus commoveatur ; facilius esse insuetis percelli quam assuetis ; ac denique non eandem semper esse in visceribus ac partibus aliis sensitivitatis mensuram . Nil mirum igitur si nervea ventriculi tunica , sensilis interdum præter naturæ modum , occasione ciborum copia peccantium , impressionis effectum ad animæ sedem traducat . Præterea illud etiam queso , ut is in mutationes illas animum advertat , quas ipse perfert post consuetam alimenterum ingestionem ; ut intelligat alia atque alia a prioribus phantasmatu menti obserari ; neque ut plurimum ad recte cogitandum ac meditandum eadem pollere promptitudine ; non

non eundem accurate sequi ordinem in alia ab aliis deducendo ; quod idex , aliâs facile coniungendæ , nunc heterogeneis aliis ideis intermisceantur : ut exempla mittam graviissimorum hominum , qui , aquâ simplici pro potu utentes , cum ante prandium ius dicerent accuratissime , prandio exacto , eoque neutiquam opiparo , omnia præpostero . judicio decernebant .

*Quæ alia mala a repleto nimis ventriculo .*

248. Non solum autem mala hactenus memorata a nimia ciborum ingestione procedunt . Interdum enim spasmus , propter vehementiam , ventriculum ejusque fibras carneas sic resolvit , ut consequatur hujus visceris paralysis . Tunc vero alimenta , nimis quam par est intra ventriculum retardata , putrescent ; unde , præter vomitus et cardialgias , torinaga , colici dolores aut iliaci , diarrhoeæ , dysenteriae , aliæque similes ingruunt ægritudines , quarum difficilis est sanatio . Quod si forte accidat , ut irritatio a cibis illata nimia copia ingestis , et parum vel nihil mutatis , violenter , at sine spasio ventriculum contrahat , qui proinde contenta citissime propellat in intestina non minus irritata , tunc egeruntur cruda , et nascitur *Lienteria* , de qua alibi . Demum si fiat , ut nulla ex hactenus enarratis affectionibus ni-

miam sequatur alimentorum ingestionem, cum tamen rationi consonum videatur existimare, ipsa alimenta non satis subigi, neque proinde chylum elici ex iis satis elaboratum atque perfectum, sane intelligitur, sanguinis massam, tunc pravo chylo turgentem, plurimis alijs morbis occasionem praebere posse, iisque inter se diversis pro acrimoniae inde profecta, et naturae solidorum, in quæ vires suas exercet, diversitate.

248. \* Inutile prorsus censeo admonere mala repletionis a nobis summatim recensita, alimentis quidem nimia copia ingestis generaliter convenire, sed maxime iis, quæ *esculentæ* appellantur. *Potulenta* enim, quæcunque fuerint, si modum excedant, fluiditate ac pondere facile sibi viam pér pylorum aperiunt; ac propterea, primâ saltem fronte, non hujusmodi videntur, quæ mala repletionis paùllo ante memorata afferre queant. Dicimus autem *primâ fronte*, quod vīnum, in exemplo, cerevisia, aliique liquores fermentescentes aut ferinentati, non modica quantitate ingesta, si non mala nimiæ ventriculi repletionis, certe ea quæ a vasorum plenitudine, ac propterea a plethora cum vera tum apparente profiscuntur, sæpiissime producunt. Hinc apoplexiæ, lethargi, sopores, convulsiones, spasmi, fatuitates, aliæque affectiones, quæ vino abutentibus communis esse consueverunt: ut silentio præterea peculiares acrimonias in humoribus subnascentes,

tes, et ea quæ celeberr. Tissotus paullo ante (1) laudatus commemoravit; mucum scilicet ventriculi, vini aliorumque potuum, qui in deliciis habentur, efficacitate, deteri ac dissolvi; et hinc nudatis ventriculi nervis, hujus visceris sensilitate ac mobilitate augmentum suscipiente, dolorosas stomachi affectiones, ciborum horrorem, vitia digestionis, aliaque mala inde evolvenda in promptu esse.

*Ciborum defectus seu inopia quid faciat.*

249. Hactenus de affectionibus a ciborum excessu; nunc de iis, quæ sequuntur alimentorum inopiam: non quod inopia ipsa per se morbum faciat; sed quod quemadmodum ex alimentis debita copia assumptis animale corpus viget atque consistit, ita ex eorum aut defectu aut inopia languet, ac tandem dissolvitur. Ut igitur intelligamus quid possit alimentorum inopia, in memoriam revocemus oportet, in mutua solidorum ac fluidorum actione plurimas partes deteri, plurimas eliminari extra corpus, non tam sub visibilium quam invisibilium excretionum specie. Hic attritus, excretionum copia hæc, facit, ut quod intra corpus superest, jam natura sua in alcalescentem

---

(1) Loc. cit. Art. III.

tem degenerationem prouum, acre fiat: immunitâ quippe sanguinis parte, aqueâ magis et blandâ, quæ ceterorum elementorum vehiculum est, et salium præcipue vim retundit, crassiora per canales decurrunt; crassamenti, et propterea phlogisti, vires acuuntur propter attritum; quo proinde in partes obnittitur, per quas discurrit, et urentis caloris sensum quaquaversum diffundit.

*Quæ affectiones morbose inde nascentes.*

250. Acris hæc humorum indoles nova tantum liquidorum affusione mulceri potest; atque hac unâ duntaxat detrita solida, et amissa liquida reparantur. Sunt igitur ingerenda alimenta, aquosæ præsertim naturæ, ut blandum præcipue ac retundens liquidum suppeditetur; secus phænomena, quæ protinus commemoro, in promptu sunt. Nempe ingratus et male olidus vapor ex ventriculo assurgit, atque ore prorumpit; ferox sensus famis et ventriculi irritatio; urens in omnem partem calor; dolores cardialgici; vomitus inanes, aut bilis acerrimæ; convulsiones; diarrhœæ ac dysenteriæ dissolventes, quas Medici vocant *colliquativas*; animi deliquia; sitis inextinguibilis; ingratus undequaque asperitas ac siccitatis sensus; vehementes muscularum motus; modo omni moda virium dejectio: vacillant interdum dentes; non raro febris ingruit acutissima; sæpius autem rabies ac furor mentem occupant, quo

quo, amissa sensuum internorum integritate, nullum est scelus tam nefarium ac truculentum, quod ab hominibus fame vexatis patrari non possit.

*Num æqua vi ciborum inopia agat in singulos.*

251. Symptomata vero hæc, tum et alia ejusdem generis, quæ, posita humorum acre-dine ex defectu alimentorum, nullo negotio intelliguntur, potest unusquisque, servata proportione, ad eos casus traducere, in quibus humores pravam indolem acquirunt, non propter absolutum alimentorum defectum, sed propter eorundem inopiam: dum scilicet ea inge-runtur minori copia quam hominis natura exigit. Sunt autem phænomena morbosa, magis vel minus gravia, pro ut inopia alimentorum magis vel minus diurna est; pro ut individua debilia sunt vel robusta; exercitata vel inertia; multo vel paucō cibo assueta; majoribus vel minoribus excretionibus obnoxia; demum pro ut Regio, aut tempestas; frigida est vel calida. Verum non plura de alimentorum exsuperantia, atque defectu. Superesset modo de phænomenis ex prava eorum qualita-te pendentibus sermonem habere: sed quoniam prava alimenta, præter notissima vitia ad alimentorum tubum spectantia (n. 248. 248.\* ) ita in corpus agunt, ut ejus humores peculia-ri acrimonia inficiant, nos autem de his acri-

moniis nonnulla attulerimus; idcirco huic Capiti finem facimus, ut de motu et quiete pauca proponamus.

## C A P U T XVI.

### DE MOTU ET QUIETE. TAMQUAM MORBORUM CAUSA.

*Motus a Medicis quot modis consideretur.*

252. **H**umani corporis exercitatio, de qua in præsens acturi sumus, duplicitur a Medicis considerari solet: videlicet vel tamquam remedium, vel tamquam causa aptissima, quæ morbos interdum exsuscitat. Et remedium quidem tunc appellant; cum *motus* (1) est vehemens, voluntarius, cum anhelitu alterato, vel sanitatis tuendæ, vel habitus boni comparandi gratia factus: quo in casu inotum hunc proprie dicunt *exercitationem*. Est vero ejusmodi exercitatio morborum causa, quæ Medicorum considerationem similiter exposcit, cum ea aut deficit, aut modum excedit.

Quid

---

(1) Mercurialis de Arte Gymnastica Lib. II. Cap. I.

*Quid in motu muscularis accidat.*

253. Exercitatio hæc , a qua ( ut patet ) cum bona tum mala proficiuntur , a muscularis perficitur , qui , ut appensa<sup>s</sup> partes huc illuc trahant , alternis vicibus contrahi et relaxari debent : frequentius porro quam natura ferat in motu nimio ; rarius , aut nihil , in motu reciproce imminuto aut deleto . Quo violentius contrahuntur muscularum fibræ eo magis , una cum elementis ipsas componentibus , in contactus ruunt fortiores : laxatæ , seu sibi relictæ , minus , seu debilius cohærent . Primum demonstrat agentium muscularum duritia , et brevitas major quam intumescentia , quæ in eorum ventre conspicitur : alterum , molilitia , longitudo , tumoris decrementum .

*Quot bona motus afferat .*

254. Ut vero mala , quæ motus affert muscularis vel nimius , vel nullus , vel minor quam valetudinis ratio postulat , elucescant , bona prius brevissime indicabimus , quæ motui debentur ; quæque partim *privata* , partim *publica* dici possunt . Inter *privata* numerantur gressus , flexio , artuum extensio , tum variæ eorum ac trunci motiones , quarum ope tum incommodas positiones antevertimus aut eas jam præsentes tollimus , tum respirationis instrumenta ita roboramus , ut pulmones sanguini facile excipiendo emittendoque pares fiant ;

a voce

a voce autem, cantu, loquela, lectione, etiam paullo diutius continuatis, nullum detrimentum capere possimus. Sunt vero *publica bona*, promptior ac liberior circulatio; attenuatio humorum; hinc perspiratio facilis; congrua adipis resorptio; optima alimentorum digestio; accurata nutriti*ū* succi appositi*o*; denique secreti*ū* libertas ac purities in visceribus prae*cipue* abdominalibus.

*Qui effectus aucti motus.*

255. Quod si haec sunt bona potiora, quæ ab exercitatione profiscuntur, iam satis patent hujus exercitationis effectus, cum ea ita Naturæ modum exsuperat, ut nimia sit. Aucto igitur plurimum muscularum motu, respiratio maxime intenditur, et humorum velocitas atque attritus incrementum suscipiunt, inde molesta incalescentia, difficultas anhelitus, cordis palpitatio, pulsatio temporum satis sensibilis, et locorum eorum omnium per quæ majores arteriarum trunci decurrunt: aquosæ ac tenuia difflantur; crassamenti et phlogisti vires intenduntur, tum propter attritum, tum ob defectum aquosi liquidi, quod has ipsas vires retundebat; crescit proinde in fluidis cohaesio; et eo quidem magis quo motus est violentior, et majus propterea aquearum partium dispendium: hoc autem cohaesionis augmentum nimia excipit tenuitas, quatenus humores in-

al-

alcalescentem ac putridam indolem tandem degenerant.

*Quæ horum effectuum præsentiam confirmant.*

256. Hujusmodi esse nimii motus effectus plura confirmant: pauca vero sed magis communia enumerare sufficiet. In motu corporis violento, eoque paullo diuturniori, perspiratio ac sudor, qui tunc effluit copiosus, graviter olent: quinimmo sudor adeo crassus erumpit, ut sanguineo fere colore subuculam inferciat. Rubent plurimum urinæ, quæ simul ardentes sunt, ac fœtidum odorem exhalant. Sitis est intensa. Uno verbo phænomena ingruentia, præsertim in excretis, eorum fere similia sunt quæ in morbis acutissimis observantur. Atque hæc porro omnia defectum aquosi liquidi, phlogisti evolutionem, ac proinde alcalicam propemodum humorum indolem satis superque significant.

*Quæ ex his mala consequantur.*

257. Cum itaque hi sint communiores aucti motus muscularis effectus, videamus modo quæ potiora mala ex his consequantur. Et vehementi quidem corporis exercitio succedit lassitudo cum dolore; interdum vasorum majorum dilatatio aut ruptura, atque inde hæmorrhagia et earum ægritudinum caterva, quæ ex effuso aut retento alicubi sanguine promanant; de-

num

imum acuta febris et inflammatio quandoque excitatur. Ubi enim humoribus rarescentia inest et acredo, minima vascula rorido fluido aqueo ac blando non alluuntur; cor et solida reliqua violentius irritantur; convulsiones fiunt congestionesque, quæ inflammant, et in abscessus atque gangrenas citissime transeunt. Quod si exercitatio non sit adeo violenta, ut ejus effectus somno et quiete sedari non possint, corpus exsiccatur, et ad senium citius properat; præterquam enim quod minuitur fluidorum ratio, vasa etiam minora a valido motu compressa excruciantur, rigescunt fibræ omnes, humores crassescunt lentiusque propelluntur: quæ porro solidorum fluidorumque constitutio cum senectute plus minus conjuncta est.

*Qui effectus quietis, et mala inde nascentia.*

258. Potiora hæc violenti motus phænoīēna, eaque morbosa, non ideo significant esse potius quieti indulgendum: quod enim nimium est, semper animalium corpori noxium fuit. Nam, ut moderatus corporis motus utilitates affert paullo superius (n. 254.) commemoratas; ita quies nimia in abdomen præsertim vires suas primum exserit; siquidem digestioni obest, appetitum dejicit; cruda congerit ac viscida intra alimentorum tubum, atque intra vasa, naturalem calorem inminuit, secretiones excretionesque retardat, aut perturbat, aut pro-

prohibet; facit obstructions; impotentiam ad motum; insensitivitatem; pallorem cutis; œdemata; ac deum pravum illum corporis habitum, qui dicitur *Leucophlegmatia*, et qui ad graviores *Hydropsis* species fere semper disponit. Verbo dicam, si motus moderatus solida roborat ac fulcit, quæ propterea humores atterrunt, et necessarias secretiones excretionesque promovent; atque perficiant; nimia quies non poterit solida non infirmare, qua humores lentescant, visciditatem nimiam acquirant, secretiones excretionesque perturbent vel prohibeant; quæ porro omnia morborum eorum, qui *chronici* dicuntur, fons esse consueverunt, et origo præcipua.

*Quid ex his conficiendum.*

259. Quæ hactenus de motu et quiete tamquam morborum causis a nobis allata sunt, satis, ni fallor, ostendunt, certam quandam motus mensuram requiri, ut morbi ex motu et quiete exsuperante naſcitur antevertantur. Motum aliquem ad valetudinem necessarium esse declarat, inter cetera, comparatio inter exercitatos et desides homines instituta. Ut enim priores robore pollent, aeris injuriis resistunt, famein, sitim, labores, et incommodes alias vitæ vicissitudines ferunt plerumque sine detimento; ita posteriores his omnibus et singulis protinus lœduntur, et minimis de causis in ægritudines incurront. At quæ me-

lior exercitii species? An eadem omnibus convenit? Quodnam tempus exercitationi est magis opportunum? Ubi ea incepta fuerit est ne paullo diutius in ea insistendum, aut brevi necesse est quieti indulgere? In his versari eorum munus est, qui de *Hygiene*, seu de tuenda valetudine, præcipue disserunt, quemadmodum et *Clinicorum*, qui, pro varia ægrotantium suorum idiosyncrasia, victus ac vitæ genere, indole morborum, in quibus depellendis operam impendunt, *gymnasticam* diversis constitutionibus accommodatam, et hodiernis temporibus apud nostrates non sine detimento neglectam, indicare possunt, atque præcipere.

## C A P U T XVII.

DE VIGILIA ET SOMNO TAMQUAM  
MORBORUM CAUSA.

*Phænomena vigiliæ et somni cum quibus phænomenis convenient.*  
*Quid vigilia.*

260. **V**igiliarum excessus in agendi modo parum differt a nimia motus muscularis exercitatione; quemadmodum in propria actione somnus nimius et nimia quies inter se plurimum convenire videntur. Ergo et vigiliæ et somni, cum modum excedunt, similibus fere morbos phænomenis occasionem præ-

præbebunt. Et revera definitur vigilia ille status corporis sani ac viventis, in quo liberæ est motuum et sensuum cum internorum tum externorum exercitatio. Jam vero exercitium istiusmodi ponit motum in solidis ac fluidis: motus autem sine attritu et partium consumptione esse non potest: et eo quidem majori, quo vigilæ diutius protrahuntur. Manifestum igitur est vigilias nimias agere in corpus ea fere ratione, qua motus æquo major.

*Quæ mala ex vigiliis nimis consequantur.*

261. Quotiescumque igitur vigilias immodicis torquemur, majus est partium tenuiorum dispendium, quas somnus duntaxat reparare potest; solida nimis deteruntur, et præcipue molliora, quæ laxius inter se cohærent; nascitur quaquamversum molestæ siccitatis sensus; acrebunt humores ac tenaces; turbantur secretiones excretionesque; nutritio prohibetur; magna fit solidorum irritatio; unde convulsiones, dolores capitis urentes, febris, delirium, vertigo, spasticæ contractiones proficiuntur. Ad hæc commune sensorium, multigena idearum copia defatigatum, ( maxime si in vigilia validum fuerit mentis exercitium ) iis vel non amplius commovetur, aut, si commovetur paullisper, ex protinus vanescunt: tandem nascitur irrequieta quædam molestia, quæ interdum *Melancholicum Delirium* aut *Maniam* præ-

nunciat, non infrequentem diuturniorum vigiliarum finem.

*Quid somnus. Num in eo sensus et motus  
omnes quiescant. Unde nascatur somnus  
naturalis. In quem finem anima-  
libus tributus.*

262. Quod vero somni phænoīmena iis fere similia sint, quæ a deside vita et nimia quiete promanant, ex ipsius somni definitione perspicuum est. Definitur quippe somnus ille status corporis sani ac viventis, qui liberum tollit exercitium sensuum extēnorū, non infreueiter etiam internorum, nec non motuum quoque a voluntate pendentium, saltem maximam partem. Conditiones adjecimus, propterea quod notum est omnibus, plures inter dormiendum loqui; mentem sibi rerum quarundam species, et interdum accuratius quam in vigilia, repræsentare; comparationem instituere; judicium de rebus ferre aliquando satis rectum; plura in memoriam revocare, quæ frustra in vigilia revocare tentaverat; demum corpus huc illuc revolvi, et quidem, ut videatur, absque animæ conscientia. Nihilo tamen minus fatēri oportet, in placido somno et sensus et voluntarios motus ut plurimum omnino quiescere, contra quam in vigilia fit; et propterea videtur nihil aliud esse somnus, quam effectus dibilitatis solidorum, et fluidorum inopie, ex prægressa vigilia. Solidum quippe debile

bile, nec sufficienti humorum copia perfusum atque distentum, laxatur et concidit: unde manifestum est, somnum fuisse in eum finein a provida Natura animalibus tributum, ut partes vigilando, non secus ac plusquam par est corpus exerceendo, deperditas atque infirmatas instauret: fit enim in somno concoctio melior, æquabilior circulatio, secretio omnis magis elaborata et perfecta.

*Quæ mala nimii somni.*

263. Cavendum tamen est, ne bona istiusmodi certos quosdam limites excedant in variis individuis varios. Ubi enim nimio somno indulgeamus absumit et ipse humorum partes tenuiores, cum maneat etiam in somno perspiratio, stragulorum pondere et ambientis aeris calore interdum aucta; et quæ porro excretio cum propter alimentorum defectum nequeat reparari, idcirco somno paullo diutius protracto videtur imminui. Crassescit præterea id, quod in aliarum secretionum excretionumque materiam facescere debet; quietib[us] nimium musculis stagnant facile humores in minimis canaliculis, lenti fiunt, facile adhærent, et intra caput præcipue remorantur, ubi et vasa plurima et minima et molliissima ac pulposa insunt: cui sane retardationi non parum fortasse conducit situs corporis supinus, sive horizonti fere omnino parallelus. Ita compressâ cerebri pulpâ functiones omnes

animales remissius agunt (1); inepta fiunt organa ipsa ad agendum; hebetantur sensus omnes; nascitur universalis fere insensibilitas; quinimmo lethalis quandoque apoplexia, ut non semel observatum fuit.

*Num excessus mensura in somno et vigilia assignari queat. Quæ discrimen faciant.*

**264.** Ceterum excessus in somno et vigilia ( id quod, ceteris paribus, in motu etiam et quiete locum habet ) non ita certis ac determinatis finibus continetur, ut mensura quædam statui possit, quæ valetudinis integratitudinem generatim conveniat. Enimvero ætas, anni tempus, cœlum, temperamentum, vitæ genus, atque alia, discrimen faciunt non exiguum. Ita pueri, docente Hippocrate, somnos habent longissimos: ut enim multa perdunt tum per motum nimium quo exercentur; tum per organorum vitalium actionem, quæ in ipsis est citior; tum demum ob corporis incrementum; longus somnus requiritur, qui motus

(1) Hanc in somno functionum inertiam observatione peculiari confirmari scripsit laudatus Tissotus ( loc. cit. Art. IV. ) Homo, ait ille, qui in aperto aere dormiat, eoque frigido ad gradus octo infra zero, communiter occumbit; qui vigilans, ac se se exercens, gradus 30. infra idem zero perferre potest.

tus illos sedare valeat, solida instaurare, et, humores reparando, eos æquabiliter distribuere. Æstivo tempore, cum ex atmosphæræ calore maximum sit aquosarum partium dispensandum, et magna solidorum laxitas, plus dormitur ( nisi calor summus stimuli vices gerat ) quam hiemali ad partes resarcendas, quæ amissæ fuerunt, et ad solida nonnihil roboranda. Idem dicendum est de calida cœli constitutione; adeoque incolæ calidiorum Regionum magis somno indulgent, ratione habita ad eos, qui sub températo aut frigido cœlo vitam ducunt. Demum ob easdem rationes calidi temperamenti homines, et ii qui valido motu exercentur, quia plus consumunt, naturales somnos habent longiores, quam corpora frigida, et nimia quiete diffluentia. Quæ quidem omnia satis ostendunt, difficile esse excedentem vigiliarum et somni mensuram individuis statuere, ut ab excessu cavere possint. Attamen his attentis, una cum consuetudine, atque consideratione phænomenorum ingruentium, quoties homines in his a proprio instituto recedunt, poterit excessus somni et vigilæ aliqua ratione determinari, ut inde intelligamus quantum et quomodo excessus hic morborum causa esse queat. Semper tamen in vigilis excessus dicendus erit integras noctes per vigilare; in somno autem, nonnisi meridiano Sole expergisci.

## C A P U T XVIII.

DE ANIMI PATHEMATIBUS TAMQUAM  
MORBORUM CAUSIS.

*De reciproca mentis et corporis actione quid notum sit. Quid vero ignotum. Num quæ proposita fuerunt phænomenis satisfaciant.*

265. **M**ens agit in corpus ; corpus autem in mentem. Hoc adeo notum est, et quotidianis observationibus ita confirmatum, ut nullius peculiaris indigeat explanationis. Sed quo mechanico artificio absolvitur astio hæc reciproca inter duo substantiarum genera, quæ naturâ tantopere discrepant inter se ? Nos quidem non latet, musculos omnium fere motuum esse instrumenta; nervos autem cum motuum etiam sensuum ; quoniam dissectis, aut compressis nervis muscularum mentis imperio famulantur, motus omnis voluntarius extinguitur : verum non hinc statim patet quomodo voluntas agat in musculos, et qua ratione dum nostrorum sensuum organa ab externis objectis percelluntur, simul cum motione illa perceptiones quædam in mente excitentur, a quibus mens ipsa commoveatur. Plura in hanc rem excogitata fuerunt a Philosophis, que quidem omnia sunt inter hypotheses referenda,

ne?

neque ad cuncta explicanda phænomena satis sunt apta. Immo non raro evenit, ut duorum phænomenorum explicare causam aggressi, si alterum, posita una causa, explicemus, alterum eam causam hypotheticam prorsus evertat. Rejn' exemplo declaro.

*Non satisfacere confirmatur exemplo.*

266. Terrorem ita communiter explicant Medici, ut perturbata mente ab eo quod repente terrorem injecit, spiritus inordinato ac violento motu irruant in cor, et in musculos alios, unde nascatur palpitatio, spasimus invasis, quo minima inter hæc violenter contracta sanguinem repellant, et demum fiat concussio seu violenta contractio in musculis omnibus, præterquam in iis quos dicunt *sphincteres*, qui in terrore plerumque resolvuntur. At vero hac etiam hypothesi admissa, quo mechanico artificio, aut qua ratione, causa terroris mentem violenter commovet? Quî intelligi potest, ut una eademque causa partes alias contrahat violenter, alias autem resolvat? Et, quod magis est attendendum, resolvat musculos omnium robustissimos, qui in ipsis cadaveribus ita accurate claudunt cavitates, quas ambiunt, ut contenta effundi non sinant? Quærebam ex me ipso, an violenta contractio antagonistarum posset *sphincteres*, quibus innascuntur, superare: sed nodus in scyrpo erat. Cur enim, ajebam, causa contrahens æque non agit

agit in *sphincteres*, qui proinde dilatatorum vim inanem reddant? Neque felicius explicatur quid fiat, quod in terrore aliquando resolvantur ita subito musculi omnes, ut qui eo corripitur humi præceps concidat, dum interim cor palpitat vehementer.

*Quid inde conjici possit.*

267. Hæc atque alia plura, quæ in medium afferri possent, me eo adduxerunt, ut nulli ex multis hypothesibus in hanc rem excogitatis assentirer; quippe intelligebam problematis solutionem tunc solum haberi posse, cum plane fuerit demonstratum quomodo mens corpori inhæreat, et quibus legibus unio hæc regatur; quæ duo a Philosophis frustra hactenus investigata fuerunt. In tanta itaque rerum cum obscuritate tum incertitudine, satius esse duxi liberum Auditoribus meis relinquere in ea, quæ magis illis arrideat, sententia acquiescere; dum ego interim id mihi cum plerisque in animum induxi, videlicet, ut valde probabile esse putem, eam a Creatore legem in conjunctione mentis et corporis sancitam fuisse, qua pro variis corporis affectionibus variæ oriantur cogitationes in mente, et pro variis mentis cognitionibus, determinationibusque, variis motus in corpore consequantur. Malo enim fateri me plura ignorare, quam vano hypothesisum apparatu id tamquam demonstratum

tum assūmēre, quod adhuc in controversiam venit.

267. \* Et revera certum ne est, quemadmodum nonnulli affirmant, maximam fieri in quibusdam animi affectibus, puta in gaudio, et momento quidem temporis, animalium spirituum dissipationem? Optabam sane, et omnes una mecum idem optare arbitror, ut rationes proponerent aut observationes, quibus tandem permotus eam possem dissipationem inter Physiologicas atque Pathologicas veritates recipere: at vero me hujusmodi desiderium fefellit, et vereor magnopere ne unquam expleatur. Quo enim artificio mens, gaudio violenter perculta, spiritus magna disperdit quantitate? An quia cor palpitat, et valide pulsant arteriæ? Sed eadem occurrunt phænomena, aut eorum prorsus nulla, aliis in circumstantiis, immo in contrariis; neque tamen dicet quisquam phænomena istiusmodi a spirituum dissipatione pendere. Cordis palpitatione, et pulsus crebri ac fortes, quot vel morbis vel aliis animi affectibus adjunguntur sine virium dejectione? Sub dolore partis alicujus quot linquuntur animo, propterea que vires omnes amittunt, quin cordis atque arteriarum motus augeatur? Sed non opus est hypothesis illius infirmitatem, quæ ab animalibus spiritibus phænomena omnia, a mentis mutatione profecta, oriri contendit, iterum hic loci Tyronibus retegere: sufficit enim ut intelligant verba tantummodo proferri, et

gra-

gratis , ut dici solet , asserta quædam proponi , nulla unquam ratione aut observatione confirmanda . Siquidem mentis natura , et agendi modus hujusmodi sunt , quæ cum omnes Philosophorum imaginandi cogitandique conatus inanes reddant , eo prope dicerem nos adducunt ut affirmemus , explicationes quascunque , naturæ illi penitus ignotæ tamquam fundamento superstructas , ab homine qui veritati investigandæ operam impendit recipi omnino non posse .

*Quæ maxime pathemata sint nobis infensa .*

268. Missis igitur hypothesibus omnibus in hanc rem excogitatis , videamus a quibus præcipue animi passionibus humanum corpus præter naturam afficiatur . Hujusmodi autem sunt *gaudium , lætitia , mœror , cupidō venerea , ira , odium , terror , metus* . Harum passionum , quæ *animi pathemata* audiunt , harum , inquam , passionum *vi* , humani corporis œconomia ita perturbatur , ut vel in ægritudines incidat , vel ad eas maxime disponatur ; etiam si inter illas non nullæ numerentur , quæ ad mentem exhilarandam aptæ natæ videantur .

*Quibus signis corporis perturbatio sese præbeat .*

269. Harum autem passionum efficacitate adeo certum est animalem œconomiam perturbatum iri

iri, ut perturbatio ipsa signis quibusdam, cum in facie tum alibi, se se prodat; quæ difficile admodum est ita accurate oculere, ut circumstantium oculos non percellant. Et revera rubet facies aut pallit, aut resolvuntur sphincteres, aut corpus tremore concutitur, aut motu insolito agitatur, aut fractis repente viribus fere corruit, friget inopinanter aut incallescit, sudor aliquando supervenit, respiratio fit suspiriosa, scintillat nonnunquam oculi aut remittunt, vel lacrymas fundunt renuente etiam voluntate: riso interdum propemodum disruimur difficulter cohibendo; vel demum furore protinus ingruente corripimur. Sunt hæc phænomena, quæ sub variis animi passionibus se se dēdūnt in conspectum: sed alia his adjunguntur, de quibus ex ordine dicere aggredimur.

*Quid gaudium, et qui ejus effectus?*

270. Et primo quidein *gaudium*, quod Veteres jucundum animi sensum cum ratione conjunctum appellabant, natum ex idea boni præsentis quo tunc fruiimur, grati cuiusdam languoris sensum in nobis excitat, et ad cordis sedem præcipue; ita ut hujus visceris motus præ voluptate fere interrupi videatur. In hac animi affectione, si frontis et oculorum hilariatem quamdam excipias (oculi enim nimis arguti, ut dicebat Tullius, quemadmodum animo affecti simus, loquuntur) vix signa quædam

dām in facie occurruunt . Ejus igitur vires in partibus exserit præcipue interioribus , et quidem aliquando adeo vehementer , ut subito interimat . Genua et cor sub gaudio dissolvi non male dicebant . Veteres , quod nimia voluptas vires omnes potenter infringat ; atque ita affectum hunc a lētitia discriminabant .

*Quid lētitia , ejusque effectus .*

271. Hanc vero animi affectionem , quam lētitiam dicunt , ita solebant describere , ut sit effusa quædam animi exultatio , seu potius animi ipsius elatio sine ratione : quasi nempe opinio recentis boni , ex qua lētitia consequitur , boni opinio revera sit , non reapse boni præseptia . Peculiarum quorundam temperamento-rum propriam esse affectionem istiusmodi ex eo præsertim evinci posse videtur , quod exultatio hæc minimis de causis in aliquibus excitetur , alios autem eadem causæ neutquam commoveant . Quicquid sit , in lētitia certe risus ut plurimum ingruit , hilares oculi et lingua naturâ sua volubilis , in motus erumpunt frequentiores , facies sæpe rubet , pulsus fit frequens , nascitur in corpore et in motibus quibuscumque insolita quædam agilitas : inde circulatio liberet et citatior , incalcescentia , faciliior perspiratio ; adeoque generatim salutaris dici potest hic affectus , maxime ubi modum non excedat : secus , ad morbos disponit , qui ab

ab aucta humorum velocitate ( n. 153. ) consequuntur.

*Quid mæror, ejusque effectus.*

272. Contra, *mæror* seu *tristitia*, quæ dicitur ægritudo flebilis, orta plerumque ex recordatione rei, quam cum in deliciis habemus præter opinionem amisimus, mæror, inquam, corpus reddit insensile, solidorum robur infringit: hinc motus debilitat omnes, perspirationem imminuit, humores non promovet, qui inertes ac viscidi facile stagnant, partes obstruunt, et morbos diversos excitant pro diversitate partium, in quibus hærent; præterea tristis cogitatio menti diutius obversans vigilias parit, quibus sensim sensimque corpus tabescit, atque consumitur.

*Quid venerea cupidio, ejusque effectus.*

273. Neque multum diversa est eorum conditio, qui *venerea cupidine* incenduntur, quæque definiri posse videtur furiosa animi affectio, cuius vi obscenæas interdictæ ut plurimum venoris voluptates vehementer appetimus. Tamdiu enim illi ideis huic affectioni respondentibus commune sensorium divexant, ut aliquando in pertinaces vigilias incurvant, quæ tandem in maniam transeunt; sæpius vero cibos fastidire incipiunt, et ex depravata, quæ inde subsequitur, alimentorum coctione morbis tor-  
que-

queri, qui vel febres lentas, vel rebelles affectiones hypochondriacas movent, quæ remedium quorumcumque vim inanem reddere plerumque solent, atque ita præmature jugulare. Hæc cum utrique sexui sint communia, muliebris tamen id præterea habet proprium, ut ex mœrore, non secus quam ex libidine, in mensium suppressionem incidat, deinde in *Chlorosim*.

*Quid ira, ejusque effectus.*

274. Jam vero *ira*, quam dicebant Stoici libidinem puniendi ejus, qui injuriâ læsisse videatur, et solida et liquida in vehementes motus agit: hinc tantus fit attritus, et partium minimarum dispendium, ut sanguinis oleo exaltato, quemadmodum Nostri loquuntur, ardentis febres, inflammations, hæmorrhagiae consequantur. Nihil dico de diarrhœis biliosis, de coctione alimentorum depravaâ, de passione iliaca, de affectibus spasticis atque epilepticis, de stupore et perturbata imaginatione, aliisque morbidis affectionibus, quæ interdum ex ira proficiscuntur: et quæ porro omnia a motus augmento, vel irritanti humorum qualitate, vel nimio eorum dispendio nascuntur, tamquam causa potissimâ.

*Quid odium, ejusque effectus.*

275. Dissimilia prorsus phænomena *odium* edere solet, quamvis nihil aliud sit quam ira

inveterata, quæ ex habitu externo corporis non percipitur. Siquidem morbosæ affectiones lentius in odio ingruunt, secus ac fit in ira. Facit autem lentitudo hæc, ut odium ad eosdem morbos disponat, qui et tristitiæ et libidinis (n. 273.) sunt proprii. Enim vero, ut in his affectibus, ita in odio, animus una eademque forti et perpetua cogitatione vexatur: immo adeo menti cogitatio inhæret memoratis affectionibus respondens, ut eandem nōbis etiam insciis in somno foveamus; accidit enim aliquando ut quemadmodum dormiendo id, cuius amore incendimur, aut possidere aut amittere; vel id, quod cum dolore perdidimus, iis amittere momentis, aut præter spem recuperare; non dissimili ratione eum, quem odio persequimur, punire nobis videamur.

*Quid terror ac metus, et qui horum effectus.*

275. Denique *terror*, quo præsens periculum expavescimus, et *metus*, qui est futuri mali nimis sollicita præsensio, affectiones et ipsæ sunt non parum reformidandæ. In terrore enim cor vehementer palpitat, et vi adeo ingenti in vasa impetit, ut hæmorrhagias aliquando intulerit, easque lethales: sensus frigoris repente ingruit; pallit facies; totum corpus concutitur; musculi interdum resolvuntur, et sphincteres præcipue; fiunt mentis aberrationes, fatuitates, apoplexiæ: quæ porro sin-

gula , etsi mortem non semper inferant , corpus tamen disponunt ad spasticas affectiones ; naturales excretiones impediunt ; solidoruin robur multum debilitant ; ( atque hæc quidem morbosa phænomena ad metum maxime pertinent ) unde fiunt pertinaces vigiliæ , lentæ febres , cacockymia , corporis consumptio , et alia similia , quæ nullo artis præsidio dispelli queunt .

276. \* Has dixi ( n. 268. ) *præcipuas* animi passiones , quibus homo præter naturam afficitur , propterea nimirum quia non ignoro , animi pathemata in plures alias species ab aliis Pathologis tributa fuisse ; quæ tamen , mea quidem sententia , ad ea , de quibus hactenus sermonem habuimus , tamquam ad genus referri possunt : Quamobrem non incongruum videtur comminorata pathemata dicere *primaria* , reliqua autem *secundaria* appellare . *Discordia* enim et *inimicitia* , quid aliud sunt quam *ira* atque *odii* species reciproce ? Aut cur non altera ex his affectionibus ab altera ortum ducit , aut eæ insimul conjunguntur ? Quis ignorat quantum *formido* , *pavor* , *timor* , cum *metu* convenient , adeoque non aliud esse quam ipsius *metus* gradus varios ? Nemo prosector : veluti fugit prorsus neminem *animi dolorem* , *lamentationem* , *ærumnam* , et si quæ sunt hujus census alia , ad *merorem* pertinere . Verum species istiusmodi , quas ego *pathemata secundaria* dicere consuevi , numero augeri etiam possunt , quem-

quemadmodum Veterum Pathologorum nonnulli augere non dubitarunt ; adeoque in hunc cunctem ordinem animi *curas*, *sollicitudines*, *afflictiones*, *angores*, omnesque animi ipsius molestias referre, quas *avaritia*, *amor*, *ambitio*, aut aliud ferventius desiderium movere consuevit .

*Quomodo animi affectiones generatim agant.*

277. Si ea quæ hactenus attulimus paullisper expendamus, palam erit, animi pathemata generatim solidorum et fluidorum vim ac motum vel intendere, vel imminuere. Non arduum igitur erit iis, qui in Physiologia versati sunt, phænomenorum omnium, quæ ex diversis animi affectionibus proficisciuntur ( quas non omnes brevitatis causa persequuti sumus ) rationem reddere : nempe, posito virium et motus incremento vel decremento, effectus inde nascentes explicare. Id unum, si quid ego jūdico, quod ab initio proposueram, omnino cognitu est perdifficile, etsi studiosius et accuratius exploretur, videlicet, quo mechanico artificio mentis affectiones nascantur, et natæ qua ratione vim et motum augeant cum in solidis tum in fluidis, aut ratione agant prorsus contraria. Iterum dico, excogitatæ in hanc rem hypotheses problema neutquam solvunt : pendet enim ejusdem solutio a legibus conjunctionis animam inter et corpus; quas quidem leges penitus ignoramus .

## C A P U T XIX.

DE EXCRETIS ET RETENTIS. TAMQUAM  
MORBORUM CAUSA.

*Quid retenta et excreta in corpore præstent.*

278. **S**I quid in corpore retinetur quod ex cerni deberet, excernatur autem quod esset retinendum, morbi aut nascuntur, aut certe corpus aptum fit, ut minima causa superveniente ægrotet. De morbis itaque ex hac causa profectis nunc primum disseremus; id tamen præmonentes, non illud nobis in animalium induxisse, ut de omnibus et singulis sermonem habeamus: nimis quippe in longum abioret oratio, si singula persequi vellemus. Qui Physiologiæ studio strenue operam dederunt non ignorant quot sint humorum species, quæ eorum indoles, quibus inserviant usibus, adeoque quantum, iis aut retentis aut excretis præter naturæ ordinem, quantum, inquam, recta animalium corporum constitutio labefiat.

*Quæ mala ex nimia sanguinis evacuatione.*

279. Exordium autem a sanguine ducemus, a quo humores omnes separantur, et propterea si periodicæ et salutares hemorrhagiae; si accidentales, aut quæ ex consuetudine procurari

rari solent, sanguinis evacuationes valde naturæ modum excedant, excretiones omnes erunt imminutæ; adeoque bona, quæ ab humoribus pendent in hoc vel illo viscere secretis, et in cavum aliquod effusis ad vitæ ac valetudinis constantiam, ea, inquam, bona non erunt numeris omnibus absoluta. Verum sanguis et partium robur conservat, et calorem: et en quid fiat ut hæmorrhagiæ debilitatem afferant, et irtigiditatem, tum et quamdam insensitivitatis speciem. Est autem sanguis causa præcipua; quæ vim cordis insitam ad actionem impellit; et propterea copiâ ejus imminutâ languet robur contractionis in corde; fluida lentius promoventur; thinus distenduntur arteriæ, minusve atteruntur fluida, quæ proinde lentescunt, et stagnant. Nil mirum propterea si hæmorrhagias excipiant universalis quædam frigiditas (1), Cachexia, Ædema, Leucophlegmatia, Hydrops; ac simul functionum omnium languor.

R. 3

Quæ

(1) Frigiditas ab imminuta sanguinis copia, atque a debili humorum attenuatione procedens, nonne ostendit fatus luculenter, igneum clementum (sive phlogiston dicas, sive alio voces nomine) & fluidorum attritum in corpore viventi requiri; ut hoc ipsum corpus incalescat; atque ut in eo necessarius calor conservetur?

*Quæ vero a suppressis evacuationibus sanguineis.*

280. Quod si, contra, hæmorrhagia narium, menstrua purgatio, haemorrhoidum fluxus, aliæque periodicæ sanguinis evacuationes imminentæ fuerint aut suppressæ; tunc, sublata æquilibritate inter solida et fluida, valetudo periclitabitur. Erunt autem mala ingruentia eorum similia, quæ in Plæthora vera (n. 121.) occurunt; modo provida Natura, auctâ aliarum excretionum copiâ, effectus inde nascituros non impedit. Præ ceteris autem retentus hic sanguis aut in viscera impetit, quæ prius labem aliquam tulerunt, aut in partes nobiliores, et præcipue in pulmones, ac cerebrum. Inde hæmoptysis, vasorum principum dilatationes, vertigines, idearum confusiones, affectus soporosi, cordis palpitationes, respiracionis difficultas, præcordiorum anxietas, languor totius corporis cum sensu ponderis molesti, motus difficilis præsertim per loca acclivia, appetitus dejectio, tristitia, et alia hujusmodi. Quæ porro morbosa phænomena, etsi communia sint iis omnibus quibus sanguis alias periodice fluens retinetur, communissima tamen sexui sequiori, ob menstruorum suppressionem, esse consueverunt; accendentibus præterea convulsionibus, fluxu albo, pallido totius corporis habitu, chlorosi, et similibus.

*Quæ*

*Quæ mala ex saliva non secreta; aut screata præter naturam.*

281. Salivæ usus præcipiuus est alimentorum sales dissolvere, ut ii linguae papillas percalle queant et saporem excitare; maxime autem conducere ad alimentorum coctionem. Igitur salivâ aut non secretâ intra proprias glandulas, aut præter modum screatâ, quemadmodum nonnullis familiare est, hebetantur digestionis vires; depravatur ciborum coctio; chylus ex alimentis emulsus crudus est ac tenax; difficulter in sanguinem mutatur, et proinde in humores alios, qui a sanguine separantur. Priora igitur phænomena, quæ pendent a vitiis seu retentionis seu excretionis in saliva, ad primas vias præcipue pertinent: unde cruditates, ructus, cibi fastidium, sensus ponderis ac repletionis, nutritio imminuta, glandularum meseraicarum obstructio, et similia, sunt ii effectus morbosí, qui originem ducunt a saliva aut non separata in propriis organis, aut desputa præter consuetudinem. Verum screata saliva id etiam facit, ut corpora nequeant pinguescere; immo interdum nimia ejus excretio corporis maciem afferre solet.

*Quæ mala ex non secreta lympha Pancreatis, tum et nimia ejus separatione.*

282. Eadem prorsus phænomena accidunt;

ubi lympha Pancreatis , et peculiari aliquo visceris vitio , aut copiosius quam par est , aut nullo modo secernatur . Siquidem pancreaticus humor dotibus omnibus cum saliva convenit ; quemadmodum etiam in eo quod spectat ad ciborum coctionem . Sed præterea humor hic bilis acrimoniam retundit ; adeoque , nisi , ut æquum est , separetur , vel si omnino non excernatur , neque absoluta alimentorum coctio obtinebitur , neque bilis acrimonia hebetabitur . Bilis propterea violentius irritabit intestina ; unde dolores vel colici vel iliaci ; vomitiones ; diarrhoeæ vel dysenteriæ ingruent ; aut saltem ea mala , quæ ex depravata alimentorum coctione sequuntur . Quæxporro mala , seu cruditatis vitia , tunc etiam in promptu erunt , cum lympha Pancreatis copiosior fuerit quam ratio postulat . Cum enim bilis ad digestionem plurimum faciat , atque ejusdem præcipuum videatur esse instrumentum , si forte nimium a lympha Pancreatis retundatur , alimenta non concoquet , neque bonus chylus ex iis elicetur , languebit intestinalium motus : ac proinde ea bona deficient , quæ a natura bilis optime constitutæ proficiscuntur .

*Quæ mala ex bilis evacuatione : tum et ex ipsa bile retenta .*

283. Verum non solum prava bilis constitutio , propter defectum , aut excessum liquoris pancreatici , morbos affert : animale enim

cor

corpus tunc etiam patitur, cum bilis, quemadmodum fit aliquando, per vomitum rejicitur, aut cum retinetur intra proprios ductus, neque propterea in duodenum intestinum descendit. Igitur bilis defectus, seu Inopia, alimentorum digestionem maxime perturbat, cruditates congregat, alvum siccum facit, appetitum dejicit. Eadem mala etiam ex retenta bile promanant; præcipue autem nascitur Icterus, et ea humorum acrimonia (Cap. XI.) quæ propria est alimentorum in spontaneam degenerationem abeuntium: bile enim deficiente, alimenta, in chylum optimum neutquam mutata, propriam indolem maxime retinent.

*Quæ mala ex retentis fæcibus, et prius  
in corpore robusto.*

284. Retentæ quoque fæces morbos afferunt magis vel minus graves, pro ut corpus, intrinsecus retinentur, aut debile est, aut robustum; Alvis in robustis plerumque est sicca, eo quod fibrarum intestinalium vis humidum fere omne ex ingestis veluti emulgeat, et in lactea vasa propellat: exsiccatæ propterea fæces lentius per intestinalium tubum moventur: hinc magis magisque exsiccantur; adeoque si fiat, ut persiccatatem nimiam præter naturæ ordinem retineantur, tunc mole et duritate fibras et vasa comprimunt. Ita perturbatur circulatio; cumque ex inferioribus locis nequeat sanguis liberare per hemorrhoidalis venæ truncum adscendere

dere , hujus venæ rami ad rectum intestinum intumescunt , et hæmorrhoides inde nascuntur : quod si fibræ ac nervi intestinalium validius comprimantur , fibræ ipsæ resolutæ ad motum ineptæ fiunt . Hinc sensim venter , propter nimiam contentarum fæcum copiam , aliquando intumescit ; cibi fastidium ingruit ; repletionis sensus ; prava alimentorum coctio ; ex quo postea fit , ut siccitas alvi in diarrhoeam mutetur , ubi , quemadmodum interdum accidit , ipsa alvi siccitas aut colicum dolorem , aut iliacum moveat . Ceterum nimia fæcum congestio vasa comprimens intestinalium , cum abdomen nimis replete , ac proinde diaphragma urgeat et vasa majora intra abdomen contenta , prætereaque secretiones intestinales aut immiuat aut prohibeat , nullo negotio intelligimus quomodo ex his et vertigines , et capitis repletiones profiscantur , tum et affectiones aliæ , quæ ad caput pertinent , aut viscera quæ in cavea thoracis continentur .

*Quæ vero in debili .*

285. Sed in contraria etiam corporis constitutione , nempe in debilibus , fæces aliquando consistunt . Cum corpora hæc , parum ex alimentis eliciant , neque tamen , ob fibrarum debilitatem , contenta velociter et libere propellant , ita fieri videmus , ut tarda in debilibus plerumque sit alvus , neque tamen sicca , et maxima interdum fæcum copia in illis accumule-

letur. Atque hæc porro congestio facit, ut abdomen intumescat, respiratio turbetur, nascatur anxietas, appetitus dejiciatur, et proinde ex his causis debilia corpora ad varias ægrotationes disponantur; maxime autem ad illas, quæ ex humorum cruditate et depravata nutritione proficisci solent. Hæc summatim de retentis fæcibus, adeoque de alvi, ut dicunt; siccitate, seu tardiate. De alvo nimis humida, scilicet de nimia fæcum evacuatione, et præcipue de diarrhœa, lienteria, ac similibus, sermo erit in *Symptomatologia*.

### *Quæ mala ex retenta urina.*

286. Quicunque urinam retinet præter consuetudinem (nam de hac quoque dicendum est) adeoque cum molestia, ad morbos disponitur non facile vincendos: quos inter principem locum tenet vesicæ dilatatio, disruptio, aut saltum ea debilitas, quæ vesicæ ipsius herniam facit; ita, infirmato membranarum ipsam componentium robore, vesica urinæ expellendæ impar est, et fit *Ischuria*, seu lotii retentio, nulla remediorum vi superanda. Præterea retenta urina acrior redditur, et sensilem tunicam intimam adeo violenter irritat, ut dolor ingens, ex irritatione natus, nervorum originem vehementer commoveat, et proinde spasmifiant et convulsiones; dum interim irritata vesica inflammatur, et abscessu aut gangræna tandem corripitur. Fac autem ex retenta urina,

na , mala hactenus memorata paullo serius supervenire ; attamen impedita in renibus lotii secretionē , propter uretherum et vescicā plenitudinem , lotium ipsum intra sanguinis massam retentum , eam quaquamērsum inficit , et in partes varias impedit cum insigni vitiae discrimine . Facilius autem in cerebrum vires suas exserit ob id fortasse ; quod exigua et minutula vasā , quibus coagmētatur , sint omnium mollissima ; hinc si à congesto liquido comprimatur , nascitur apoplexia ; sin minus , p̄o summa qua viscus illud sensitivitate pollet , irritans fluidum convulsiones movet , spasmos , deliria , lethargicas affectiones , atque alia porro similia .

*Quæ mala ex nimia urinæ excretionē .*

287. Vitium , quod urinæ retentioni opponitur , in hujus nimiâ evacuatione situm est , et ea quidem evacuatione , in qua et vires corporis infirmētūr , et corpus ipsum macescere incipiat . Enimvero pér cutis poros inhalantes tanta interdum fluidorum circumambientium vis in sanguinem infertur , ut insolita urinæ copia interdum excernātur , absque ullo valetudinis detimento . Nimia urinæ evacuatio , primo loco prop̄posita , dicitur Græcis *Diabēthes* vera , ut ea discriminari queat à spuria secundo loco memorata . *Diabēthes* igitur vera ( quæ ponit aut in vasculosa renum structura peculiarem laxitatem , tamquam causam ejus proximam ; aut

aut imminutam humorum cohæsionem ( Cap. VI. ) quam alii vocant dissolutionem seu di- visibilitatem compositam , aut vitium utrumque ) *Diabetes* , inquam , vera vitium est , quod proprie pertinet ad excreta præter natu- ram . Non est autem simplex eaque nimia urinæ dejectio : laxitas enim tubulorum renaliūm facit , ut urinæ magna copia profluente\$ ingestorum naturam plurimum retineant : chy- loso sero sint intermixtæ ; corpus proinde len- ta interdum febre contabescens marcescat ; uni- versalis quidam ardoris sensus ægrum divexet ; sitis eum excruciet : cutis arida fiat : vires ma- gnopere infirmentur , coctio depravetur ; et langueant naturales præcipue atque animales functiones magis quam vitales , quæ , propter totius corporis languorem , in dies supervenien- tem , stimulis sanguinis non bene constituti vix paullo magis percelluntur , adeoque non multum a proprio munere abludere videntur .

*Quæ mala perspirationis nimia. Et quæ im- minutæ aut retentæ .*

288. Nunc de perspiratione dicemus . Per- spiratio aucta præter modum , quæ ponit ni- mium tenuium fluidorum dispendium , facit ut ceteri humores crassescant ; adeoque morbi oriantur auctæ ( n. 106. 107. ) cohæsionis : præterea corpus debilitat , atque interdum eo usque , ut lethalis *Syncope* nimia perspirationi succedat . Contra vero perspiratio imminuta

pro-

propter defectum opportūnæ attenuationis retinet id, quod excerni deberet: ac proinde aut plethoram facit veram, et damna quæ ex ipsa ( n. 121. ) proficiscuntur; ( eo quod perspiratio ceteras naturales excretiones omnes longe superat ) aut aquæ rationem in sanguine auget, et morbos exsuscitat ab imminuta humorum cohæsione ( n. 108. ) pendentes. Quod si materia perspirationis accurate elaborata intra corpus subsistat, ipsum corpus iners reddit, ac propterea minus aptum ad motum, nec non etiam ad sensum, tum ob nervorum compressionem a nimia vasorum distentione ortam, tum etiam quod cutis papillæ ex inopia perspirantis vaporis non ea teneritudine pollent, quæ ad accuratum sensum requiritur. Ceterum perspiratio hæc retenta, ubi vel ad renes traducta urinæ copiam non augeat, vel impetens in intestina alvum non solvat, quemadmodum accidit aliquando, et copiâ, et peculiari naturâ quasi urinosâ, inflammationes movet sive in externis partibus, sive in internis, acutas febres producit, partium intumescentias cum dolore, rheumaticas affectiones, et præcipue *Rheumatismum* proprie dictum, aliasque hujus generis morbos.

*Quæ mala sudoris nimii, et retenti.*

289. Eadem fere est ratio sudoris nimii, qui ab iisdem causis nascitur quæ augent perspirationem; nisi quod cum causæ istiusmodi

majori nisu agant, et brevi temporis intervallo magnam fluidi aquei copiam de corpore eliciant, ita promptiores effectus edunt; et eos quidem, qui austæ humorum cohæsionis (n. 106. 107.) sunt proprii: dummodo tamen sudor eam non habeat indolem, quam Medicis dicunt *colliquativam*; in qua neimpe humores propter sublatam necessariam cohesionem minima quæque loca subeunt, atque iis copiose effunduntur; tunc enim sudor corpus brevi dissolvit, et mortem infert. Si autem sudor, qui inter naturales excretiones nequit annumerari, superveniente frigore cohibeatur, tunc partes inflamat, ad quas repulsus traducitur, et ad eosdem morbos disponit, ad quos prohibita perspiratio disponere consuevit.

*Quæ mala ex nimia seminis effusione. Quæ vero ex retento ipso semine.*

290. Tandem nimia seminis effusio summa affert debilitatem, inde motus inertiam, insignes capitis dolores, visus hebetudines, fatus, lentes febres, tabes, eamque præcipue, quam Clinici *dorsalem* appellant. Excretio insueta liquoris maxime elaborati; partium generationi inservientium sensus exquisitus; convulsio, quæ excretionem præcedit et comitatur; vis ingens plerumque, et non raro diu permanens, imaginationis veneræ, qua commune sensorium torquetur; hæc, inquam, omnia morbidarum affectionum inde

nascentium rationem exhibent. Qui desiderant accuratam et numeris omnibus absolutam maiorum enumerationem, quæ ex nimia seminis effusione suboriuntur, consulint Celeberim . Tissoti opus, cui titulus *Onanisme* . Raro accidit ut ex eo humore retento valetudo infirmetur: non desunt tamen exempla de varicibus seu dilatationibus valde dolentibus in funiculo spermatico, et de testium tumore in nostro sexu; quemadmodum de mania uteri seu furore, ut dicunt, in sexu femineo, tum de tumoribus ipsius uteri immedicabilibus. At æque raro contingit, ut hic humor nimia copia aggestus, in iis præcipue qui *salaces* dicuntur, nocturnas pollutiones non moveat, quæ si frequentiores fuerint, multum debilitant, et lentas febres ac marasimum quandoque inferunt.

*Num retenta et excreta eosdem in omnibus morbos excitant. Corollarium.*

291. Quæ hactenus proposita sunt de vitiis retentorum atque excretorum, etsi paucis ac leviter attigimus, sufficere videntur ad intelligendum, quantum et quomodo retenta atque excreta animalem œconomiam turbare queant, ac proinde humanum corpus disponere ad varias morborum formas. Hæc autem dispositio neque semper locum habet, neque semper eadem est: in morbidis enim affectionibus, quæ ab

ab enarratiis vitiis ortum ducunt indoles inest diversa, et vis major vel minor pro diverso individuorum temperamento, robore, atque peculiari constitutione seu causa prædisponente interna, pro vario victus genere, natura causæ remotæ supervenientis, ac similibus. Et revera non raro accidit, ut nonnulli insuetas et copiosas evacuationes, aut naturalium quarrundam vel suppressionem vel imminutionem ferant absque damno; dum interim alii ab omni eo, quod in his evacuationibus præter consuetudinem est, non parum laeduntur. Idem prorsus de erroribus circa res alias nonnaturales dicendum est. Facit autem hoc discrimen, ut mensura excessus vel defectus in evacuationibus accurate statui non possit: atque adeo attenta tantum ac repetita observatio occurrentium phænomenorum, quoties naturales evacuationes a consuetudine recedunt, lucis aliquid potest affundere.

292. Interea tertię Pathologiæ parti finem imposuimus; illi nempe quæ circa morborum causas versatur. Non me præterit in harum causarum censu a præstantissimis Pathologis numerari etiam calculos, vermes, tum et id omne, quod corpori præter rationem aut naturæ ordinem exterius admovetur. Verum cum hæc, a Pathologis leviter indicata, fusius a Practicis pertractentur; utpote agentia, quæ morbos constituunt per se, sive peculiares, quemadmodum dici solet; non videtur ab re Tirone Caldani Pathol.

ad inonere, ut in his etiam illustrium Practicorum opera consulant. Ita absolute Tractatu de morborum causis cum in genere tum in specie, a quarta Pathologiæ parte protinus exordiemur, quæ nempe spectat ad *Symptomata morborum*.

# PATHOLOGIAE

## PARS QUARTA.

### C A P U T XX.

#### DE SYMPTOMATOLOGIA GENERATIM.

*Quid symptomata, et quæ ejus indoles.*

293. **S**ymptomatis nomen in morbis semper apud Medicos usuvenit. Definiri posse videtur affectus præter naturam, aut, si placet, phænomenon (nempe aliquid observatione dignum) quod morbis adjungitur, ab iisque proficiscitur. Horum affectuum seu symptomatum indoles in eo sita est, ut ipsa symptomata vel ad aberrationem aliquam functionum earum pertineant, quæ in statu secundum naturam exercentur; vel ad vitia excretorum ac retentorum; vel demum ad qualitatem sensibilium mutationes; nempe coloris, intumescentiæ, frigiditatis aut caloris, asperitatis aut levitatis, humiditatis aut siccitatis, demum odoris in partibus aut in excretis, attenta harum qualitatum natura, et similiūm.

*An symptoma et morbus sint unum  
et idem.*

294. Hæc symptomatum indoles, eorumque cum morbis constans ac perpetua conjunctio, dubium movere potest, num videlicet symptoma et morbus inter se differant, an vero sint unum et idem. Ad hanc dubitationem tollendam præstat animadvertere, fieri aliquando ut symptoma morbum constituat, etsi pars ipsius morbi frequentius sit. Ita hæmorrhagia, urinæ retentio, diarrhœa, vomitus, cephalalgia, aliisque affectiones, interdum sunt morbi per se; interdum vero morbis adjunguntur. Non sunt igitur confundenda symptomata, quæ sunt per se totidem morbi peculiares, cum iis quæ morbos comitantur: secus, ut plura symptomata in uno morbo sæpe conjunguntur, tot essent morbi in eadem ægrotatione seorsim considerati, quot symptomata: et præterea ubi præcipuum inter symptomata vanesceret, morbus ipse esse desineret; quæ porro duo cum rationi tum quotidiane observationi refragantur. Nam, ut ad rem confirmandam exemplo utamur, febris, dolor, pulsatio, rubor in parte aliqua exteriori, inflammationem simul constituant, eamque indicant; neque tamen hæc symptomata tamquam totidem morbi, aut inflammations peculiares habenda sunt. Quod autem pertinet ad symptomatum quorundam absentiam superstite morbo, res patet in plerisque

que ægritudinibus, et in inflammatione præcipue, in qua si dolor cessat sine causa manista, non ideo statim inflammatio tollitur; immo hæc doloris cessatio solet gangrænam significare.

*Quot symptomatum species a Medicis considerentur.*

295. Forte hæc symptomatum modo præsentia modo cessatio, morbo aut vigente aut sublato, ea fuit, quæ Medicos impulit ad symptomata ipsa in peculiares classes dispertienda; cum ii nempe docuerunt alia esse *symptomata morbi*; alia *symptomata causæ*, demum alia esse *symptomata symptomatum*: quæ porro omnia sunt inter se distinguenda, ut accidentia morbi ad suas proprie causas referantur; atque ita præcaveatur confusio, quæ in Medicæ artis ministerio solet esse maxime periculosa.

*Quid sit symptomata morbi. Exempla hujus symptomatis.*

296. Est autem morbi *symptoma* ea mutatio, sive in functionibus, sive in excretis, sive in qualitatibus sensibilibus, quæ proxime pendet a morbo, ejusque præsentiam significat. Habet igitur ad morbum eam rationem, quam morbus ipse habet ad catusam suam; quæ cum sæpius ex plurium conditionum concursu (n. 204.) componatur; ita fieri potest, ut

*syptoma* morbi plurimis et ipsum symptomatis bus ortum debeat ; quæ ab iis conditionibus pendeant , a quibus causa ipsa morbi profecta est . Hinc maxime proderit *morbi symptoma* a ceteris symptomatibus distinguere , illudque penitus cognoscere : dum etenim morbi præsentiam demonstrat , simul etiam nos monet , quæ sit ipsius morbi natura ; et revera non prius deficit hoc symptoma , quam morbus ipse deciat . Exemplum symptomatis istiusmodi summus perhibuit Boerhaavius in febre illa , quæ *ardens* dicitur , tum et in Pleuritide - In ea enim febre summus fervor est *symptoma morbi* ; in Pleuritide autem est difficilis respiratio .

*Quid sit symptoma causæ . Exempla hujus symptomatis . Quod sit discrimin inter symptoma morbi et causæ .*

297. *Sympota causæ* ea est mutatio , quæ non a morbo , sed ab ejus causa proxima producitur . Ita , ne recedeamus ab exemplis superius adductis , febris ardoris causa , si Boerhaavium audimus , est attritus nimius inter solidam et fluidam reciprocem , tum et inter particulas fluidorum . Hinc hoc attritu rarescit sanguis , vascula urgentur ac distenduntur , eaque præcipue , quæ vix aut ne vix quidem circumpositis partibus fulciuntur . Hinc vascula intranarium cavitates hiantia , in febris hujus impe-

petu vel disrupta , vel in suis extremitatibus diducta nimis , sanguinem sæpe fundunt ; atque hæc narium hæmorrhagia in ardente febre erit *symptoma causæ* . In Pleuritide vero , cuius causa est congestio sanguinis phlogistici ( n. 145. ) intra minima pulmonum vasa arteriosa ac rubra , aut intra cellulas , tussis , quæ Pleuritidem comitatur , erit *symptoma causæ* ; quicquid enim bronchia irritat , tussim movet . Ceterum *symptoma causæ* in hoc differt a *symptomate morbi* , quod interdum vanescit morbo etiam permanente , aut incrementum suscipiente : interdum vero superest , morbo aut penitus , aut maximam partem devicto : immo *symptoma istiusmodi aliquando est adeo vehemens , ut magis ægrum urgeat quam morbus ipse , ac proinde omnem Medici attentionem exposcat ; id quod in hæmorrhagia superius indicata , si ea modum excedat , est manifestum .*

*Quid sit symptoma symptomatis . Exempla  
hujus symptomatis .*

298. Demum *symptoma symptomatis* ea est mutatio , quæ proxime proficiscitur aut a *symptomate morbi* , aut a *symptomate causæ* . Ita sitis ingens in febre ardenti , aut capitis dolor , est *symptoma symptomatis* ; in Pleuritide autem esse potest Phrenitis , aut delirium simplex , cum ex difficulti respiratione sanguis intra cerebrum retardatur . Atque tertia hæc symptomatum species ejus est ingenii , ut sublato

symptomate , a quo , tamquam a causa ; pro-  
fluebat , symptomata symptomatis evanescat .

*Quæ symptomata dicantur epigenomera .*

*Qui horum symptomatum fontes .*

299. Hæc de triplici specie symptomatum ,  
quæ in morbis ( ex mente Pathologorum ) de-  
bent maxime a Medicis considerari , quatenus  
præcipuam morbi partem constituunt , quemad-  
modum satis notum est atque exploratum . Ve-  
rum alia etiam species adjungitur , eaque per-  
tinet ad phænomena quædam peculiaria , quæ  
aliquando in morbis occurunt , et a causa ali-  
qua nunc primum nata , sive externa sive in-  
terna , proficiscuntur . Vocantur symptomata  
hæc Grecis *epigenomera* , Latinis dici possunt  
*supervenientia* . Homo , bona vel mala valetu-  
dine utens , variis aeris vicissitudinibus , qua-  
litate et copia alimentorum , vi pathematum  
animi , tum et eorum omnium quæ extrinse-  
cus supervenire possunt , plus minus commo-  
vetur ; immo ægrotans turbatur etiam nonnihil  
medicamentorum efficacitate . Peculiaris præte-  
rea individuorum constitutio ; atque hinc  
vis insita muscularum paullo major , ac pro-  
inde minimis stimulis in motus ingentes ac  
diuturniores erumpens , vel torpor et lan-  
guor vis ejusdem : tenuis et laxa fibrarum  
compages , aut earum robur et firma cohesio:  
sensus in nervis exquisitus nimis , aut præter  
naturam obtusus : major aut minor imaginatio-  
nis

nis vis: epidemici cujusdam morbi indoles, si forte per ea tempora grassetur: interna disposicio ad morbos vel hereditarios, vel congenitos, vel olim acquisitos ( quorum reliquæ intra corpus supersunt ) hæc, inquam, omnia ac similia conditiones sunt hujusmodi, quæ valde possunt ægrotantium corpus mutare. Hinc fit, ut aliquando nonnullis individuis, vel ab externis agentibus, vel a principio aliquo occasione morbi intus evoluto, aut convulsiones superveniant, aut stupiditates, aut deliria, aut partium dolores, aut morbi, quibus olim fuerunt obnoxii, ac molestiæ aliæ, quæ idcirco cum indole morbi non satis convenire videntur, quod alii, iisdem morbis affecti, symptomatibus aut affectionibus paullo ante membranatis nequaquam vexentur.

*Quid symptomata indicent supervenientia.*

*Num Epigenomena cunctis morbis  
adjungantur, et quæ inde ora-  
ta sit distinctio.*

300. Hæc, atque alia ejusdem indolis symptomata, ea sunt, quæ supervenientia dicuntur, et quæ fere semper morbum exasperatum significant: aut erim vim augment prioris morbi, si forte affinitatem habeant cum hujus symptomatibus aut causis unde processit, vel novum morbum indicant priori additum, ubi hæc symptomata ab alia causa ortum ducant quam ab illa, quæ priorem morbum intulit. Ex quibus

bus patet epigenomena non ita esse cum morbis omnibus et singulis conjuncta , ut sine iis morbus esse non possit . Hinc fortasse distinctio orta est in *symptomata necessaria* , et *non necessaria* ; quæ porro quid significant ex ipso nomine perspicuum est . Atque hæc postrema *symptomatum distinctio* in *necessaria* et *non necessaria* , in aliis etiam *symptomatum speciebus* ( n. 297. 298. ) locum habet ; non semper enim in ardenti febre , ut uno utar exemplo , narium hæmorrhagia conjungitur ; quemadmodum non semper in aliis febribus aut sitis adest , aut capitis dolor , aut aliud simile .

*Qui communis Clinicorum mos in symptomatum consideratione . Quæ cautiones adhibende . Quæ symptomata critica , et quomodo a nonnullis appellata .*

301. Nihilominus inter hasce *symptomatum distinctiones* atque *descriptions* , quas fusius Pathologi persequi solent , fateri oportet , eas a plerisque Clinicis non tanti æstimari , ut in Medicina facienda , *symptomata seorsim considerent* , atque ea discriminent inter se . Recte ne , an non , aliorum sit judicium . Interim *receptus apud ipsos mos est* , *symptomata omnia simul considerare* , ex quorum congerie morbus componitur : inter ea vero , quæ sunt *graviora maxime attendunt* , eaque sibi , tamquam

quam principem morbum, averruncanda aut lenienda proponunt. Verum qui in arte nostra magis excellunt necessaria symptomata, quæ a morbo proxime pendent, a non necessariis distinguunt, et præterea attente præcavere solent, ne quædam phœnomena in morbis occurrentia, præcipue circa acutorum vigorem, sibi protinus sedanda assumant: per ea enim tempora, insolita quædam symptomata ingruere ut plurimum consueverunt, quæ a Boerhaavio (Instit. Rei Medic. n. 934.) dicuntur *critica*, quatenus imminentem criticam evacuationem præcedunt. Forte symptomata istiusmodi critica ea sunt, quæ nonnullis appellantur *vires naturæ medicatrices*, quasi netpe dicant, Naturam, seu animalem œconomiam, vi morbidæ materiæ violenter irritatam insurgere, et in vehementes motus erumpere, quibus irritantem materiam dispellat.

*Quæ utilitas considerationis symptomatum.*

*An symptomata sint etiam signa, et quantum inter se differant.*

302. Antequam huic capiti finem imponamus, monere præstat Adolescentes, ex accurate symptomatum consideratione, et philosophico eorum examine reclam medendi rationem maxime pendere. Ita enim morborum indoles ac natura cognoscitur, eorumque eventus prænunciari potest una cum mutationibus, quæ in morbi curriculo non raro solent super-

**venire.** Atque hinc patet ipsa symptomata interdum usurpari et haberi tamquam signa indicantia morbi naturam, eventum, et mutationes, quæ in morbis contingunt. Discrimen præcipuum inter symptomata et signa in eo situm et, quod priora considerantur simpliciter tamquam functionum læsiones; aut vicia excretorum, aut sensibilium qualitatum (n. 293.) mutationes; quæ omnia evadunt signa, sicque symptomata signa appellantur, quoties ex iis aut functionum læsionibus, aut vitiis excretorum, aut sensibilium qualitatum mutationibus, demonstratur, ut verbis utar Boerhaavii (loc. cit. n. 875.) *presentia, natura, status, eventus, tam sanitatis, quam morbi et mortis.*

**303.** Hæc de symptomatibus generatim; nunc de iisdem singillatim agemus: nempe primum de diversis functionum læsionibus; deinceps de mutatione qualitatum sensibilium. Nam quod pertinet ad vicia excretorum et retentorum, quæ et ipsa inter symptomata numerantur, cum hac de re Cap. XIX. verba fecerimus, ea nunc silentio præterimus: Id unum cum Fernelio, Pathologo sane præstantissimo, admonere non omissentes videlicet, ne quis *huc nisi gnarus anatomes ac peritissimus accedat: et quæcumque quis vel legat vel audiat (fit autem audiendo quam legendo mens in rem ipsam attentior)* fixa meditatione ea contempletur in humano corpore; ut summam rerum cognitionem firma memoria stabiliat.

## C A P U T   XXI.

## DE SYMPTOMATIBUS SPECIATIM ET PRIMUM DE DOLORE.

*Quid sit dolor.*

304. **M**ULTIS sane morbis adjungitur affectus ille præter naturam, seu symptomata illud, quod vocatur *dolor*; species nempe sensationis, ut dicunt, nervorum et partium earum propria, per quas nervi distribuuntur, et nervi quidem apti, qui possint effectum receptæ ab externis rebus impressionis animæ communicare. Definitur autem a nonnullis sensatio tristis nervearum et membranearum partium a soluta continuitate, ab aliquibus etiam distensio fibræ sentientis rupturæ proxima: rectius tamen ab aliis, tristis sensatio, quam ea ratione mens percipit, ut eam referat ad partem corporis, cui ex causa aliqua, sive externa sive interna, vis præter naturam infertur. *Rectius* autem diximus *dolorem* ita definiri, propterea quod soluta partium sentientium continuitas interdum sit doloris ipsius remedium: et distensio fibræ sentientis dolorem quidem exsuscitet, adeoque una sit ex doloris causis, quæcum hac ipsa tristi sensatione non est confundenda.

*Num*

*Num natura hujus sensationis innotescat?*

305. Quæ sit natura hujus sensationis penitus ignoramus. Neque enim quisquam potest aliquid mente concipere quod ad rei peculiaris ideam non pertineat, et dolor sane idea non est. Dum aliquis dolore torquetur, nunquam in eam cogitationem adducitur, ut existimet, aliquid extra ipsum esse posse, quod simile sit sensus doloris: sed neque sedato dolore, inter omnia quæ sensus commovere possunt, aliquid reperire fas est, quod ideam in mente excitet doloris similem. Instrumenta duntaxat licet invenire, quæ corpori violentius applicata dolorem movere possunt. Ut ut autem hac de re sentiendum sit, certum exploratumque est, tunc solum haberi dolorem, quandocunque partes sentientes, prius recte constitutæ, adeo violenter afficiuntur, ut earum vel nexus, vel tonus, ut dicunt, vel elementorum componentium *symmetria* ab externis vel internis agentibus mutentur, et validam in mente sensationem excitant.

*Qui dolor causam mechanicam notam habeat,  
qui vero non. Quid conjectandum in do-  
lore ex causa ignota. Quid conje-  
eturam confirmet.*

306. Si hæc fiant ab externis causis, quæ nempe sentientes partes distrahant, pugnant, discindant, contrahant violenter, comburant,

con-

contundant, distorqueant, aut alia ratione lex-dant, quibus in circumstantiis dolor dicitur *externus* non difficile est mechanicam doloris causam cognoscere; quatenus ea ad vim illatam, ad instrumentorum et agentium quorumcunque figuram, vel ad partium componen-tium indolem referri debet. At si dolor a cau-sa interna oriatur, quo in casu appellatur *internus* ponere oportet acre aliquod intra cor-pus natum vel evolutum, quod eam afferat partium sentientium constitutionem, quæ in dolore requiritur; aut, ubi dolor sine acri na-scatur intus evoluto, conjiciendum videtur a causa aliqua ignota commune sensorium ita fuisse mutatum, velut si potentia quædam, ad dolorem movendū idonea, reipsa præsens esset. Medicamenta acria, venena assūmpta, vel clam intra corpus infecta, cibi acrioris naturæ, interiores viscerum ac partium inflam-mationes, quæ omnia dolores varios pariunt, satis nos docent ab internis etiam agentibus doloris sensum excitari. Deliria autem et insomnia, inter quæ de præsenti dolore aliquando conquerimur, quamvis delirio sedato aut expetractis sensuum nostrorum fallacia nobis sit manifesta, id confirmare videntur, quod de communis sensorii mutatione ex causa aliqua ignota paullo ante proposuimus; ut nihil dicamus de doloris acerbitate, quam nonnulli la-mentantur in partibus, quæ multos ante annos fuerunt amputatæ.

*Qui*

*Qui effectus doloris.*

307. Quicunque autem sit modus, quo per nervos ad communem sensorium impressionum externarum effectus traducuntur, damnata quæ a dolore procedunt, tamquam a causa, hujusmodi sunt. Jactatio corporis major vel minor primum se se prodit, quasi, etiam sine presenti mentis consensione, corpus eum situm querat, in quo doloris violentia, si fieri potest, nonnihil leniatur: ex hac autem corporis agitatione sequitur labor, lassitudo in toto corpore, et deinde impotentia ad motum. Commune sensorium, vi doloris labefactatum, eum statim nequit adipisci, qui ad somnum requiritur et accuratam idearum comparationem; unde et per vigiliū, et delirium, atque interdum quicquid sensuum organa violenter commovet somnum, impedit ac mentem perturbat; multo magis, ubi commune sensorium praे dolore nimis valide afficiatur, haec sunt eventura. Præterea in parte quæ dolore angitur, præsertim si ea muscularis fuerit, aut eam musculi circumsepiant, tremor subrepit, vel violenta agitatio, vel spasmus: irritati namque musculi alterne contrahuntur violenter et relaxantur, vel diu permanent in contractione; augetur in eam partem humorum affluxus et fit congestio; calor ex attritu, et hinc ex ignei elementi evolutione, incrementum capit, unde febris sequitur et inflammatio, inde abscessus

sus, gangræna, stupor et resolutio, quæ a congestione et inflammatione oriuntur.

*Nam mala hæc omnibus convenient molestis sensationibus.*

308. Verum non ex dolore quounque dams na modo memorata proficiscuntur; neque enim hæc a molestis quibusdam sensationibus sunt metuenda, quæ ad classem dolorum referri debent, quamvis dolorem proprio dictum non constituent: cujusmodi sunt pruritus, impetigo, scabies, perniones, crustæ, aliaque cutis vitia: hæc enim tunc solum dolorem movent, proprio dictum, cum ipsam cutim inflammant. Ceterum mala graviora aut leviora, quæ ex dolore instant, respondent viribus agentium quæ dolorem excitant; naturæ, actioni, atque usui partis dolentis; vehementiæ symptomatum, quæ inde sequuntur; et demum peculiari individuorum constitutioni; cum molliores viri, et feminæ præsertiū, ex minimis stimulis acriter interdum doleant et convellantur. Atque hæ quidem peculiares individuorum aut partium constitutiones, quas Græci dixerunt *Idiosyncrasias*, etsi maximam partem sint congenitæ, nihilominus etiam ex morbo, aut ex causa alia interdum acquiruntur: accidit quippe aliquando, ut phlegmaticum temperamentum propriam, atque universalem, ut ita dicam, stupiditatem, in acerrimum partis alicuius sensum convertat.

308. \* Ceteruni symptoma istiusmodi vix dici potest quot morbis interdum adjungatur , et quot in species tribuatur a Clinicis , pro ut sedem habet seu potius causam , in loco in quo dolor se se præbet , aut in alio ; pro sensu diverso quem movet , tensionis videlicet , ponderis , puncturæ , ardoris , pulsationis ; pro ut quaquaversus diffusus est , aut peculiari alicui parti insidet ; pro ut denique , si caput præsertim invadat , vel medianam ejus partem , vel totum caput occupat , vel sensum excitat singularem . Nam in primo casu *hemicraniam* dicunt , in altero *cephalæam* , quæ in continuam et periodicam discriminatur , maxime si antiquus fuerit dolor ac vehemens ; aut *cephalalgiam* si recens ac mitis ; postremo demum in casu *ovum* appellant aut *clavum* pro ut hanc vel illam capitis partem affigit , sensum exsuscitans vel *ovi* , caput peculiari aliquo in loco prementis , aut *clavi* plus minus ruditer in caput ipsum infixi . Quæ porro species unde originem ducant , et quid indicent , a Clinicis est accipiendum ; veruni ab iis solummodo , qui in absurdis quibusdam Theoriis sibi comparandis , ac mordicus tuendis ; operam nequaquam impenderunt .

## C A P U T XXII.

## DE ANXIETATE.

*Quid sit anxietas.*

309. **A***nxietas*, quæ aliis etiam *Inquietatio* dicitur, vitium est quod ex quorundam sententia ad facultatem motricem, ut appellant, omnino pertinet; quatenus corpus sub hac affectione huic illuc imminodice jactatur. Rectius autem ad mentem spectare videtur, cum corporis agitatio sit ipsius anxietatis effectus, neque semper cum anxietate conjuncta sit. Definiri propterea potest premens seu sollicita animi ægritudo et quasi dejectio, ex metu præsentis morbi aut imminētis (dunat enim ut Medici ejusmodi affectionem consideramus) magis vel minus iis molesta quæ illa torquentur, cum pro majori vel minori eorum sensibilitate atque dispositione ad meum, tum pro vi causarum quæ anxietatem attulerunt.

*Num cum dolore tantum conjugatur.*

310. Porro sensatio hæc dolori plurimum affinis est, immo cum ipso dolore conjuncta; nam si in ea malum imminens expavescimus, multo magis id est reformidandum quod præsens est: hinc ægar, præcipue meticulosus,

T &amp;

ma-

magnopere perturbatur. Verum non ideo tunc solum anxietas adest, cum dolore angimur; quasi nempe anxietas sine dolore esse non possit: siquidem sensatio hæc locum etiam habet ubi ægri dolorem nullum patiuntur. Hoc quotidiana confirmat observatio, cum non omnibus morbis dolor adjungatur, et nihilominus in plerisque anxietas se se præbeat.

*Quid conjiciendum in' anxietate sine dolore.*

311. Cum itaque hujusmodi animi ægritudo in aliis morbis etiam occurrat præterquam in illis, qui cum dolore copulantur; idcirco, quoties ex corpore male affecto anxia mens redditur, quamvis tunc temporis dolor non instet, molestum tamen aliquid intra corpus hæreare conjiciendum est, quod mente ea ratione afficiat, ut ea præsentis vel imminentis morbi ideam sine maxima perturbatione sustinere non possit. *Maximâ* diximus, utpote quæ corporis jactationem aliquando infert, pervigilium, respirationem difficultem ac suspriosam: quasi nempe mali perceptio non sinat ut cerebrum in eam constitutionem adducatur, quæ ad somnum, adeoque ad musculorum et sensuum omnium quietem, quemadmodum ad pectoris motum facilem atque expeditum, requiritur:

*Quot anxietatis species.*

312. Si igitur propter variam individuorum con-

constitutionem contingit, ut in nonnullis vis  
anxietatis cum morbi viribus conveniat, in  
aliis vero non conveniat, quod aliqui inter  
egrotantes, naturâ timidiores, ex morbo nul-  
lius fere momenti angantur premanturque, non  
absonum erit symptomata istiusmodi in duas spe-  
cies tribuere; nempe in anxietatem veram seu  
*Idiopathicam*, et in spuriam seu *Sympathicam*:  
*Idiopathicam* eam dico, cujus causæ omnes vi-  
talium organorum, nempe cordis, vasorum,  
et pulmonum actioni; sive proxime sive re-  
mote, impedimenta objiciunt. Spuriām vero  
seu *Sympathicam* eam voco, cujus causæ, in  
aliis visceribus aut partibus sedēm habentes,  
vel admodum raro, vel forte etiam nunquam  
possent anxietatem movere, nisi ob validam  
imaginationis vim, aut metum, nimis forent  
egrotantium sollicitudines et curæ; dum scili-  
cet alii de recuperanda amissa valetudine om-  
nino desperant (præsertim si iis aliquid præ-  
ter expectationem eveniat) alii vero, ob pec-  
uliares quasdam mentis alienationes, pericula  
et calamitates sibi fingunt, quæ re ipsa neque  
adsunt, neque iis imminent.

*Quæ vitia thoracis ac pulmōnum faciāt an-  
xiétatem veram.*

313. Ad primam ergo speciem pertinent pri-  
mo quæcunque thoracis lœsio sive interna sive  
externa, qua vel thorax comprimatur, vel re-  
solvantur musculi intercostales, et diaphragma,

vel spasmo afficiantur: deinde pulmonum infarctus, ex quacunque tandem materia conflentur, quæ sive in abscessus, sive in tumores alterius naturæ, sive in ulceræ luxuriaretur: spastica contractio in carneis fibris bronchiorum, qua aer libere ingredi nequeat atque egredi: peculiaris aeris constitutio, videlicet aut nimis frigida adenoque aereos canales violentius contrahens, aut nimis calida, aut levis nimium et adeo parum elastica ut bronchiorum extremitates dilatare impos sit; aut humida nimis et pulmones inferciens; demum acribus principiis inquinata carneas bronchiorum fibras in contractionem adducentibus: hæc, inquam, omnia et similia primario in pulmones agunt, qui propterea, cum sanguinem libere nequeant recipere atque transmittere, resentiam cordi opponunt; retardatur hinc sanguis intra majora vasa cordi proxima, et proinde intra alia; quæ retardatio molestiam creat non facile ferendam ( quemadmodum unicuique experiri licet si respirationem pro arbitrio cohibeat) quamque molestiam cum æger averttere omni nisu velit, nec tamen possit, in eam tristem sensationem incidit, quæ anxietas vera appellatur.

*Quæ vero cordis et vasorum cum eo communicantium.*

314. Idem præstant vitia, quæ cor vel proxime vel remote ita afficiunt, ut circuitus sangu-

guinis retardetur, aut cor ipsum nequeat vitalē humoreni facile alternis recipere atque propellere. Huc igitur pertinent cordis, auricularum, sinuum, venarum, atque arteriarum principum dilatationes; ulcera harum partium; inflammations; concretiones osseæ; vel tartareæ; tumores varii generis; hydrops pericardii, et mala hujus census, quæ si forte naturâ suâ lethalia non forent, quemadmodum reipsa sunt, certe lethalia fierent ob id, quod cum ægri molestiam ab his causis natam nequeant ejicere, anguntur animo, pectus vehementer exagitant, atque hinc respirationem perturbant; unde anxietas ipsa in augmentum agitur, et propterea circulatio semper redditur difficultior.

*Quæ demum partium quæ in abdomen continentur.*

215. Pertinent hactenus dicta (313. 314.) ad anxietatem veram, quæ proxime vitalia organa male afficit; at simul etiam indicant qua ratione hæc eadem anxietas excitari possit ab iis etiam causis, quæ viscera in abdome contenta aut comprimunt, aut obstruunt, aut distendunt, replent, irritant, spasmo divexant; uno verbo remote organorum vitalium actioni impedimento sunt. Nam cum ab obstructione, distensione, irritatione, repletione, spasmo, motus humorum per abdominis viscera alicubi retardetur, augetur resistentia con-

tra cor non minus quam contra diaphragma , propter pravam abdominalium viscerum constitutionem ; atque ita perturbatur respiratio , et anxietas suboritur . Exempla horum phænomenorum , eaque sane plura et luculentissima , quæcunque fere perhibent ventriculi via , et affectiones cum hysterice tum hypochondriacæ , quæ plerumque sedem , si non primariam , saltem secundariam , in visceribus habent abdominalibus . Atque hæc de ea vera anxietate , quæ vitalia viscera remote afficit ; quæ quidem cum aliis visceribus , comparatis ad exercitium functionum reliquarum , tantum habent commercii ; ut horum perturbata functione , organa vitalia mechanico artificio nunc explicato in consensum trahantur . Modo de ea anxietate , quæ alteram speciem ( n. 312. ) constituit , nempe de *spuria seu sympathica* .

*Unde anxietas spuria .*

316. Anxietatem porro hanc , nempe *spuriam* , ex imaginatione præsertim meticulosa ortum habere diximus . Percurramus igitur phænomena , quæ in nonnullis ocurrunt ægrotantibus ; ut a causa modo memorata anxietatem , de qua quæstio est , præcipue oriri manifestum fiat . Quicunque ex morbo aliquo decumbit satis intelligit fieri non posse ut convalescat , nisi id quod morbum facit de corpore ejiciatur . Si fiat igitur , ut morbidi humoris excretio retardet , et æger præcipue meticulosus sit , anxie-

tas protinus ingruit ex frustrato desiderio valetudinis cito recuperandæ, atque ex metu interitus præmaturi. Eadem prorsus molestia eos quoque premit, qui affectibus torquentur hypochondriacis, et mulieres partu difficulte laborantes; tum eos etiam invadit, quibus calculus in vesica inest, aut urina non dejicitur; deinceps illos divexat, quibus aut cataractam deponere, aut os luxatum vel diffractum in pristinam sedem restituere tentant Chirurgi. Nam si accidat ut prioribus alvus nimis adstringatur (de cuius laxitate sunt semper valde solliciti) et fiat ad medicamenta rebellis; mulieribus, instanti partu, fætus plusquam par est retineatur; calculosis sub chirurgica operatione disrumpatur calculus intra vesicam, aut ille præ nimia mole, aut cum vesicæ parietibus cohæsione educi nequeat; urinæ suppressione laborantibus *catheter* seu fistula intra vesicam induci non possit; demum si contingat ut postremis lens crystallina aut depressioni aut eductioni paullo pertinacius resistat; et ossa vel luxata vel fracta nequeant in pristinum locum restitui, tanta animi agitatio, anxietas adeo violenta eos torquet, ut fere in animi desperationem adducantur. Similia delirantibus quibusdam fiunt ac melancholicis: illis quidem cum per mentis aberrationem de imaginario aut morbo, aut tristi aliquo infortunio falso conqueruntur; his vero, cum in tristem aliquam cogitationem pertinacius intenti, ejus effe-

*pectus præter rationem, et omni fere momento reformidant.*

*Num ad hanc anxietatis speciem alia referri queat.*

317. Ad hanc ipsam anxietatis speciem **ea** etiam referri posse videtur, quæ in morbis quibusdam se se prodit. In febribus ardentibus, et in aliarum febrium accessionibus, sæpe ægri anxietate laborant; anxii etiam sunt ex virium infirmitate; tum paullo ante criticas evacuationes: et hoc quidem postremum notissimo illo Hippocratis (1) effato confirmatur: *quibus judicatio fit, iis ante accessionem nox est gravior.* In febrium autem acutarum accessionibus propter nimiam sanguinis rarescientiam, et pulmonum atque vasorum cum corde communicantium repletionem: in virium languore, maxime post immodicas evacuationes, quia vix tantum virium superest, quæ valeant pectus aliquantis per dilatare, et tanta est sanguinis inopia ut cor ad plenam contractionem vix incitetur: deinceps paullo ante judicationes, propterea quod tunc temporis morbida materia oberrans, et huc illuc impetens totam animalem œconomiam vehementer commovet. *v.*

Quæ

(1) Aphor. lib. II. n. 13.

*Quæ inter has anxietates sit metuenda.*

318. Quæ vero inter has anxietatis species sint metuendæ, supervacaneum est admonere. Enimvero omnibus planum est atque perspectum eam anxietatem esse omnium gravissimam, quæ a causis provenit vitalia organa proxime et paullo diutius obsidentibus: sunt quippe causæ istiusmodi et permanentes, et illius naturæ, ut artis præsidiis raro admodum dispelli possint; dum contra causæ aliæ quæ in vitalia viscera remote agunt, et spuriam anxietatem constituunt, neque semper infestant, neque omnes illius sunt indolis, ut omnem omnino curationem respuant.

## C A P U T XXIII.

### DE SYMPTOMATIBUS PERTINENTIBUS AD ORGANUM TACTUS.

*Quando lœdatur sensus Tactus; et quod ejus organum.*

319. **T**actus sensus, omnium sensuum fortasse princeps, tum quod præ ceteris latius dominatur, tum etiam quod sensus omnes ad externa præsertim organa pertinentes sunt quædam tactus species; hic, inquam, sensus tunc lœditur cum vel proxime vel remote ejus organum præter naturam afficitur.

etur. At cum organum istiusmodi cutis sit, de cutis affectionibus nonnulla prænotare opera pretium erit.

*Quot morbis cutis sit obnoxia.*

320. Cutis vero affectiones morbosæ ad tria veluti genera revocari posse videntur: nempe 1. ad coloris, qui cuti naturalis est, mutationem: 2. ad immutatam ejus levitatem: 3. deum ad ipsius cutis intumescentiam, seu potius peculiares tumores, eosque parvos, in ea interdum subnascentes.

*Mutati coloris vitia præcipua. Quot modis  
vitia cutis tactum lœdant.*

321. Mutatur autem color in *Ephelide*; quam affectionem maculæ constituunt fuscæ ac lividæ, gravidis mulieribus familiares, post partum ut plurimum vanescentes; quæ interdum etiam a Solis ardore producuntur. Hujus affectionis species gravior est *Lentigo*, nempe congeries macularum faciem, collum, ac manus occupantium, quæ lentis magnitudinem referunt, fusci coloris, et quandoque etiam, ut priores, Solis efficacitate excitantur. Maculæ aliæ subasperæ, non continuæ, ac generatim albæ, cutim aliquando inficiunt: atque albus earum color fecit, ut *Alphos* Græcis dicentur, aut *Leuca* si albissimæ, Latinis autem *Vitiligo*. Si maculæ nigræ sint, tunc *Metas* audit affectio istiusmodi. Quod si ruber color

color plus minus intensus, atque a naturali recedens, faciem frēdat, hæc mutatio coloris appellatur *Gutta rosacea*. Denique nævi macule similiter sunt aut protuberantiae diversicolores, atque congenitæ; quæ nempe corpori inhærebant tunc etiam cum tenellum materno sinu coercebatur. Sed quoniam mutatus color ( si maxime inflammations excipias ) tactus sensum non lœdit, de quo tantummodo nobis dicere in animo est; et vitia organi tactus, quæ ad asperitatem atque ad parvos tumores in eo nascentes pertinent, ejusmodi viribus pollent, ut tactus sensum vel depravent, vel obtundant ac tollant, vel demum acuant; missis idcirco aliis coloris mutationibus, videamus primo quæ cutim asperam reddant, ac proinde sensum hujus communis velamenti proprium altero ex modis paullo ante indicatis corrumptant.

*Qui morbi ad asperitatem pertineant.*

322. Ad cutis igitur asperitatem spectant *Pruritus*, *Scabies*, seu *Græcis Psora*, *Impetigo*, et *Lepra*. Est autem *Pruritus* molesta sensatio, ut vocant, quæ scabendi cupiditatem excitat, et ab irritanti materia in cutim determinata progignitur. *Scabies* vero est pustulosa cutis affectio; modo sicca, modo humida, magis vel minus pruriens aut dolorem afferens, ab eadem materia sed magis actuosa, quippe quæ cutim erodit, interdum ab insectis cutim de-

depascentibus , profecta . *Impetigo* ( quæ vulgo *volatica* ) est cutis asperitas ob multas squamu-  
las parum assurgentes at plurimum pruriginos-  
as , quæ faciem præcipue et collum infestant ,  
ab humore ejusdem indolis derivata . *Lichen*  
*Græcis* dicitur , Latinis autem *Mentagra* , quod  
in ea sint sententia , ægritudinem hanc men-  
tum ut plurimum occupare , quemadmodum re-  
vera plerumque facit ; quasi neimpe dicerent  
*Scabiem menti* . Fortassis unum atque idem est  
cum ea affectione , cui nonnulli *Herpes fugax*  
nomen fecere . Demum *Lepra* est tumida hu-  
mani corii scabrities cum squamis amplis di-  
versicoloribus , at sæpius albidis , plus minus  
prominentibus , cum unguium corruptione fre-  
quenter conjuncta et prurigine molessissima .  
Parum differt ab *Elephantiasi* , seu *Lepra Ara-  
bum* , quæ nihil aliud videtur esse nisi affec-  
tio quædam ipsâ Leprâ gravior : ea ferme ra-  
tione qua *Herpes* proprie dictus qui cutim ali-  
cubi in erysipilaceum tumorem , eumque ali-  
quando ad ossa usque exulceratum , pervertit ,  
si quid ego video , *Impetiginis* gravioris species  
est . Herpetem hujus indolis , quatenus partes  
serpendo depascitur , *Serpiginem* nonnulli appella-  
runt . Ob id vero *Lepra Arabum* *Elephantia-  
sis* dicta fuit , quod cutis in hoc morbo ma-  
culis seu squamis atris , quemadmodum Ele-  
phantum corium , notetur . Pro causa igitur  
acrem pariter humorem agnoscit , sed maxime  
erodentem , ita ut stuporem et insensitivitatem  
pro-

progressu temporis afferat ; cutis substantia, quasi dicerem, pessundata.

*Quomodo hi morbi tactus sensum lœdant.*

323. Fateri tamen oportet, enarratas hactenus morbidas affectiones magis ad turpitudinem quam ad morborum tactus sensum lœdantium classem revocandas esse ; idque præsentim si de tactu proprie dicto explorantibus digitorum apicibus excitato sermo sit ; qui sane digitorum apices squamis, aut asperitatibus modo indicatis valde raro occupantur. Sed quoniam tactus lato modo sumptus in universa cute sedet ; idcirco satis manifestum est pruriginem, crustas, squamas, quæ vitiis commemoratis adjunguntur, eademque aliqua ratione constituunt, sensum hunc diversimode corrumpere : proptereaque non immerito ejusmodi vicia inter causas symptomatum ad tactus organum pertinentium recenserit.

*Quæ cutis vicia ad ejus intumescentiam referantur.*

324. Hæc de cutis asperitate : si vero de ejus tumoribus loquamur, referri ad horum classem possunt verrucarum genera omnia, quorum tria præcipue numerantur : videlicet *Acrochordones*, *Myrmecia*; et *Thymia*. Et *Acrochordones* quidem verrucæ sunt de cute erumpentes, ut plurimum rotundæ, callosæ et tamen sæpe dolentes, pendulæ, ac tenui pedunculo

culo sustentatæ, quæ manus infestant, et fabæ magnitudinem, quæ majores sunt, non excedunt: hoc vero nomine insignitæ fuerunt, quia ad basim, qua cutim spectant, ita sunt contractæ et exiles, ut penders videantur. *Myrmecia* ita describuntur, quod sint verrucæ non infreuenter nigricantes, lata basi et amplitudinis lupino fere æqualis, in manuum volvis ac pedum plantis interdum occurrentes: ideo autem *Myrmecia* dictæ, quod sensum illum in cute moveant, qui mordicantis formicæ proprius est. Deum *Thymia* dicuntur verrucæ ulcerosæ et scabré, quæ aliquando nonnihil sanguinis effundunt, fabam magnitudine æquantes, atque sic appellatæ, propterea quod colorem habent in superficie similem floris thymi, plantæ omnibus notissimæ. Nascuntur omnes a lento ac simul aliquando irritante humore; quod palam fit ex dolore, qui his cutis vitiis interdum adjungitur. Ceterum quæ rationes fecerunt (n. 321.) ut vitia asperitatis in humano corio inter symptomata organi tactus numerarentur, eadem suadere videtur, affectiones postremo loco recensitas inter eadem symptomata locum aptissimum obtinere; veluti *clavi* et *calli* jure obtinent, qui, cuticulam crassiorem reddentes, aut subjectam cutim rudi et inæquali compressione irritant, aut corporum tangibilium impressiones impe-diunt.

*Quæ alia sint vitia cutis, et quare non  
recenseantur.*

325. *Papulæ ac pustulæ modo ex cûte plus minus assurgentæ, modo autem ipsam dunataxat commaculantes, sensum tactus et ipsæ aliquando diversimode ac præter naturam afficiunt.* Idem quoque præstant vulnera, contusiones, tumores variæ generis humanum corium obsidentes, animalium nonnullorum ictus, et plantarum etiam quarundam vis venenifera. Sed quoniam non pauca inter vitia priore loco memorata acutiarum febrium symptomata esse dicuntur, quæ devictâ febre vanescunt; idcirco *aphtas*, *variolas*, *morbillos*, *miliares pustulas*; *purpuram* etc. non secus ac morbos Chirurgicos, ut appellant, cutim occupantes, et de quibus secundo loco mentio facta est, minime persequemur: quemadmodum neque *Varos*, *Epinystidas*, atque alia hujus census tuberculæ sive minora, sive majora, de quibus disserunt Chirurgi, quos audire, et consulere Tyronibus Medicis maxime necessarium esse ducimus. Ad alia igitur symptomata, quæ a causis orinntrantur, cutim pariter proxime infestantibus, sermonem convertemus.

*Quæ causæ alix exteriore tactum lœdant; et quomodo.*

326. Sunt vero causæ istiusmodi frigus, non secus ac contrectatio piscis illius, quem Caldani Pathol.

tini *Torpedinem* dicunt a torpore quem affert in sensu tactus : Itali vero *Tremola* vocant , fortasse ob phænomenon violenti tremoris , qui in ejus dorso subinde percipitur . Nam frigus tantam rigiditatem papillis nerveis inducit , ut ex , amissa teneritudine , quæ ad sensum excitandum in nervorum medulla requiritur , et repulso fluido quo alluuntur vasa ipsas papillas magnam partem componentia , insensiles fiant ; *Torpedo* vero vix tacta tantum aliquando dorsi musculos vibrat , ut ingentem concussionem explorantibus digitis et respondenti artui inferat ; ex qua stupor consequitur , quasi nervi nimia hujus concussionis vi contundentur : nisi velimus , cum Recentioribus non nullis phænomena Torpedinis , et Anguillæ trementis , ad electricitatem horum piscium pertinere ; quod sane postremum plurimis evictum fuisse non ignoramus .

*Quæ causæ interiores tactum obtundant , ac deleant .*

327. Spectant hactenus dicta ad causas quæ tactus organum , cutim videlicet , proxime afficiunt ; sunt vero causæ quædam aliæ interiores ; ut ita dicam , quæ sensum hunc plurimum labefactant , immo aliquando penitus delent . Ad has referri debent vitia cerebri et nervorum : observationes quippe medicæ de Apoplexia sensum tactus quandoque hebetante , sanguis autem adimente : experimenta in canibus

bus allis ne quadrupedibus instituta, quibus de  
inde erat tunc compressum fuit: acciden-  
tales atque arte factæ nervorum sectiones in  
vivis animalibus: vincula: gangrænæ: sphace-  
li: tumores comprimentes, et affinia satis ostend-  
dunt, cerebri, ac nervorum pressuras, aut vi-  
tia alia, sensum tactus plurimum hebetare, aut  
quandoque abolere.

*Quæ causæ tactus sensum generatim  
acuant.*

328. Quod pertinet ad incrementum hujus  
sensationis, hoc primum cuticulæ tenuitati, aut  
defectui debetur. Alterutro modo sensus ta-  
ctus aut nimis acutus est, aut vertitur in do-  
lorem. Et revera cuticulæ tenuitatem tactus  
sensum acuere, manifestum est in recentibus  
cutis cicatricibus, quæ longo temporis inter-  
vallo corporum contactum sine molestia ferre  
non possunt. Idem prorsus evenire solet iis,  
qui manus aut pedes calidæ immergunt, eas-  
que partes paullo fortius abluunt; præsertim  
si aquæ calidæ aut sapo aut cinis adjunctus  
fuerit: ab his enim agentibus attenuatur cuti-  
cula; et cutis oleum papillas et cuticulam ip-  
sam obungens avertitur, quo papillæ magis  
nudæ corporum in ipsas incurrentium vi paul-  
lo violentius commoventur. Quod autem ta-  
ctus sensus aliquando in dolorem vertatur; ni-  
mia cutis distensio, ejusque irritatio confir-  
mat: adeoque ad causas, quæ tactus sensum

augent, pertinent quoque inflammations, tumores cutim quasi repente distendentes, ulcera præcipue recentia, vulnera, contusiones, et similia. Neque inter has causas silentio prætereunda sunt vitia illa nimis sensitatis, quæ interdum in affectionibus hystericis, hypochondriacis, spasticis ingruere solent. Loquor de horum affectuum paroxysmis, sub quibus, et si raro, nonnunquam tamen accidit ut ægri, vel ex minimis cutis irritationibus, violenter commoveantur.

## C A P U T. XXIV.

DE SYMPTOMATIBUS PERTINENTIBUS AD  
ORGANUM VISUS.

*Quot modis visus sensus ledatur.*

329. **V**Idendi facultas, ea ratione leditur aliquando, ut vel infirmetur et pereat, vel incrementum suscipiat, vel demum depravetur. Quoniam vero hæc vitia partim a lœsione eorum, quæ oculum circumstant, proficiuntur, partim a vitio organorum, quæ oculi bulbum componunt, idcirco de his ordine et singillatim agemus.

*Quæ vitia orbitæ, et glandalæ lacrymalis.  
Quid ex his sequatur.*

330. Primum itaque ossa orbitam componen-tia

tia aut carie vexari possunt, aut in tophos atque exostoses nonnunquam excrescere. Lacrymalis glandula potest et ipsa intumescente, obstrui, inflammari, verti in scyrrhum et cancrum: quæ sane vitia aut nervos et musculos irritant, aut bulbum comprimunt. Si irritant, præter dolorem tunc ingruentem, et effectus, qui ex dolore (n. 307.) prodeunt, contracti musculi oculum ducunt ad partem ex qua producuntur, et fit *Strabismus*: si comprimunt, mutatur oculi figura, perturbatur humorum circuitus, axis visus et lucis radii in opportumnum focum non coeunt; adeoque primum videndi facultas elanguet, omnia confusa apparent, duplicata, neque in propria eorum distantia.

*Quæ vitia palpebrarum, et qui horum effectus.*

331. Palpebræ ipsæ interdum inflammantur, intumescent, suppuratione vexantur, concrescunt insimul, fiunt paralyticæ, spasio afficiuntur, granulis huc illuc erumpentibus aliquando disseminantur. Porro ex variis hisce vitiis turbatur visus: nam inflammatæ, suppuratæ, tumentes, et dolent, et libere moveri nequeunt super oculi bulbum: ideo oculum abluere, lacrimas ad internum angulum determinare, pelluciditatem in cornea servare non possunt, unde visus hebetudo. Si paralytica fiat superior palpebra, perit videndi fa-

cultas, quod depressa et resoluta bulbum contegat; idemque accidit, si palpebræ insimul concrescant. Quod si fuerint spasmœ affectæ, ex reiecto bulbo interiores oculi partes vi lucis diutius percelluntur quam par est; adeoque, præter mala inflammationis, et inflammationis ipsius effectus, illud etiam accedit, quod partes oculi interiores assidua luminis actione percitæ quasi occallescunt, et progressu temporis videndi facultas omnino tollitur. Granula autem ex palpebrarum corpore erumpentia vitium in sebaceis glandulis significant, quæ obstructæ linimentum non separant lacrymis admissendum, et lubricando oculo adeo necessarium: præterea sic tumentes inæqualiter propriam levitatem amittunt, adeoque oculum vitiosa aut intumescentia aut asperitate irritant.

*Quæ vitia lacrymarum, et quid præstent.*

332. Ipsæ etiam lacrymæ, cum nimis abundant, aut acres sunt, aut deficiunt, videndi facultatem obtundunt. Nam, ubi nimia quantitate peccant, cum intra lacrymalia puncta, ad interiorem extremitatem utriusque palpebræ locata, et annexos lacrymales tubulos copiosus humor omnis ferri non possit, neque totus per genas protinus descendere, retardatur inter palpebrarum aperturam, et visus ideo turbatur, quod lucis radii ab humore illo refringuntur antequam corneam subeant, contra natu-

ruræ leges: ubi humor acer sit, oculum irritat atque inflammat. Atque hæc quidem irritatio, et consequens inflammatio, in lacrymarum etiam defectu locum habet: neque enim abluitur oculus, et humor in minimis vasculis retardatus stimulantem indolem adipiscitur.

*Quæ vitia tarsi palpebrarum: Et carunculæ lacrymalis.*

333. Hæc eadem visus hebetatio, quæ a lacrymali humore nascitur inter palpebras retardato, contingere etiam potest ex vitio constructionis in limbo cartilagineo alterutrius palpebræ, tum et ex vitio carunculæ lacrymalis: vitio quidem illius limbi, si in palpebrarum conjunctione earum extremitates arcuatæ non apte congruant inter se, atque ita malignius conniveant; vitio autem lacrymalis carunculæ, si ea forte intumescat, et lacrymis viam impedit. Denique ea visus debilitas, quæ a lacrymis oritur inter palpebras retardatis, ibi est frequentior ubi memorata puncta, aut lacrymalis saccus, aut canalis nasalis obstruente humore repleantur; quæ dum fiunt, aut fistula lacrymalis præsens est, aut sensim sensimque subnascitur.

*Quæ vitia nervorum. Quæ vero muscularum.*

334. Ad hæc, vitia nervorum omnium qui oculo prospiciunt, et muscularum qui bulbum

movent , videndi facultatem aut debilem faciunt , aut prorsus extingunt . Si igitur nervi oculorum motibus famulantes , in eorum origine vel progressu , aut compressione , aut alia quacunque ratione propriam integritatem amittant , perit bulbi motus , qui a musculis perficitur eos nervos accipientibus ; proptereaque bulbus ipse haud amplius movetur . Idem fit si recti musculi simul omnes æqua vi spasmo afficiantur , et præterea bulbus ducitur introrsum : si obliqui , ducitur extrorsum , et deformiter protuberat . In utroque casu ea duntaxat externa corpora distincte conspici possunt , quæ e directo pupillæ posita sunt . Quod si enarrati musculi convellantur inæqualiter , aut eorum alter , trahitur bulbus ad eam partem , quæ convulso musculo respondet , et fit *Strabismus* , qui tunc etiam locum habet , ubi alter ex iis musculis resolvatur : tunc enim majori vi agit musculus antagonista .

*Quæ vitia adnatæ .*

335. Denique adnata seu conjunctiva , quæ certissime supra corneam ipsam decurrit , præter communia atque obvia inflammationis vitia , quibus est obnoxia , congestiones patitur , crassitiem nimiam , opacitatem , degeneracionem in vesiculas modo majores , modo minores , easque vel aqueo , vel glutinoso , vel demum putrido humore turgentes ; denique interduin ulceribus obsideretur ( id quod etiam

lamellis corneam componentibus familiare est ) atque ita visum miris modis perturbare potest : Tantum autem aliquando crassescit adnata, ubi præsertim seini lunarem membranam facit, ut hæc ipsa membrana super corneam protensa vitium illud afferat, quod dicitur *unguis*, *pterygium*, *sarcosis*; quod sane vitium, etiam carunculæ lacrymalis productioni aliquando debetur.

*Quæ vitia aquæ humoris. Quid fiat si deficit. Quid si redundet. Quibus aliis vitiis hic humor sit obnoxius.*

336. Hæc de vitiis, quæ ad partes pertinent oculo circumpositas, nec non etiam ad oculi bulbum: nunc de iis, quæ in contentis partibus sedem habent. Incipiems autem ab humore aqueo, qui aliquando deficit, aliquando redundat absque ulla prava qualitate. Si deficit ex vulnere in corneam inficto, cito renascitur; si vero deficiat quod vascula, a quibus ipse secernitur, obstructa sint, macescit oculus, et videndi facultas amittitur. Præterea cum ad visus integratem corneæ distensio requiratur, ut æque pellucida sit, et lucis radiis æqualem ac levem superficiem objiciat, idcirco si aqueus humor deficiat, crispatur ipsa cornea, et lucis radios inæquali modo et præter naturam refringit; unde visus magnopere perturbatur. At si aqueus humor redundet.

det, tunc oculus deformiter protuberat; quæ quidem deformis protuberantia dicitur *oculus elephantinus*; in quo mutata radiorum refractio, per nimiam aquæ copiam, videndi facultatem non parum lædit. Ceterum humor istiusmodi potest etiam densari, pelluciditatem amittere, putrescere, atque ita visus sensum aut hebetare, aut penitus tollere. Debet enim pellucidus esse, et aquæ fluiditate præditus, u. requisitam radiorum refractionem non mutet t.

*Quæ horum cause præcipue. Quid Hypopion, et Staphyloma. Quid Hemeralopia, et Nyctalopia.*

337. Ad fluidam autem, atque pellucidam aquei humoris naturam pervertendam multum faciunt inflammations, cum internæ tum externæ, et imprudens topicorum coagulantium applicatio. Plus autem possunt internæ inflammations, quæ plerumque oculum pessundant, et, si visum non cinnino destruunt, suppurationem subsequens aut facit *Hypopion*, nempe puris congestionem intra oculum, aut uveam dilacerat, quæ mox vitiœ excrescit, et oriatur morbus ille, qui dicitur *Staphyloma*; cui etiam occasionem præbet quicquid uveam ipsam debilitare aut laxare potest. Ubi suppuratione non fiat, solent internæ oculorum inflammations scepissime afferre immobilitatem pupillæ simul cum ejus constrictione, aut ejus dilatatione. Pupilla immobilis et constricta deficit,

ficit, ut videndi facultas noctu pereat; pereat autem interdiū, si pupilla immobilis fuerit cum dilatatione. Prius vitium dicitur *Hemeralopia*; alterum vero *Nyctalopia*: nonnulli tamen contrarium censem, et illud propterea *Nyctalopiam* dicunt, hoc vero *Hemeralopiam*: immo *Nyctalopia*, ab ipso etiam Hippocrate, non tam nocturna cæcitas dicta fuit, quam diurna (1).

Quæ.

(1) Si proprias licet cogitationes circa hanc Aucto-  
rum discripaniam afferre, non multum abest ut conjiciam, diversam *Nyctalopias* causam eam fuisse; quæ Au-  
tores ipsos eo adduxit, ut vitium hoc referrent modo  
ad cæcitatem nocturnam, modo vero ad diurnam. Ha-  
rum affectionum causæ, si quid ego judico, ad sensum  
vel nimirum vel obtusum ipsius retinae reduci possunt,  
non secus ac ad tensionem aut relaxationem uveæ. In  
retina valde sensili, quæcumque fuerit pupillæ diameter,  
habebitur cæcitas diurna; nocturna vero ubi retinae sen-  
sus fuerit obtusus. Si tensa fuerit uvea ac proinde pu-  
pilla dilatata, sensus autem retinae naturalis, nullus pa-  
riter erit visus diurnus: contra, si laxa fuerit uvea, &  
proinde pupilla constricta, nullus erit visus nocturnus.  
Rationem cæcitatis aut absolutæ aut relativæ, adeoque  
phænomenorum, de quibus sermo est, intelligunt ii, qui  
non ignorant nimirum lucem, sive intensione, sive copia,  
in retina vel admodum sensili, vel secundum naturam  
constituta, cæcitatem afferre: in retina autem parum  
sensili, lucem majorem, seu vividiorem, requiri, ut vi-  
dendi facultas exerceatur. Hinc fortasse id etiam factum  
est, ut Cl. Autores præcipuas horum vitiorum causas  
non tam inflammations oculorum interiores censerent,  
verum etiam hystericas affectiones atque spasticas, sive  
uni-

*Quæ vitia Lentis. Quid Cataracta. Quæ  
aliæ partes opacæ fiant. Quid  
Glaucoma.*

338. Lens vero crystallina, etsi forsassis admodum raro, aliquando tamen inflammatur, marcescit, exsiccatur, obstruitur, mole angitur, dissolvitur in lacteum seu putridum humorem, opaca fit. Opacitas, quæ ex vitiis hisce omnibus et singulis consequitur, morbum illum constituit, qui, proprie loquendo, dicitur *Cataracta*. Verum hæc opacitas afficit quandoque membranam tantum ipsius lenti, quandoque etiam corpus vitreum: quod tamen cum acu deponi nequeat, aut ex oculi cavitate educi, quemadmodum fit in vera *cataracta*; ideo cæcitatem affert nullo pacto curandam. Quod si vitrei opacitas glaucum colorem exhibeat; tunc vitium istiusmodi proprie appellatur *Glaucoma*, quod nonnulli ad lentis affectionem minus apposite retulerunt.

*Quid*

---

universales sive ad oculi partes pertinentes; ac demum diuturnam vividioris lucis actionem, & nimiam reflexæ sensitatem, aut naturalem, aut diurna tenebrarum vi comparatam. Ceterum inquirant Graecæ lingue petiti in nominis rationem; ac propterea quomodo nomen sit, ut idem *Nyctalopia* nomen, non tam nocturnæ quam diurnæ cæcitatæ fuerit tributum.

*Quid aliud lentis vitia differant? Quid  
propre sit visus depravatio?*

339. Inter hæc lentis vitia, ea præcipue, quæ ad opacitatem pertinent et cataractam veram constituunt, videndi facultatem non tam debilitant, aut tollunt, quam depravant. Opacitas enim non quaquaversum, sed hîc illic per lentis substantiam primum subnascens, quatenus cum mutata naturali lentis densitate conjugitur, lucis radios non penitus interrumpit, sed refringit sub diverso angulo, ut propterea cum ceteris radiis pellucida lentis loca pertransseuntibus in eundem locum non conveniant. Ex hac præternaturali radiorum refractione nascitur id quod proprie *visus depravatio* appellatur; et quod non aliud significat quam illum visionis errorem, ob quem ea videimus, quæ extra nos non sunt. Atque hinc phænomena quædam peculiaria ortum ducunt, quæ cataractam prænuntiant; quemadmodum sunt festuæ, aranæ, fila, muscæ, atque alia corpuscula, quæ per aera volitare nobis videntur. Quocirca intelligitur, quare hæc eadem phænomena, propria etiam sint vitiorum in aqueo humore, in corpore vitreo, in cornea subnascientium; dum scilicet humoribus illis quidpiam extraneum admixtum est ac per eos movetur; in cornea autem, dum opacitas alicubi incipit. Verum quam ob causam festuæ, muscæ, atque alia similia ante oculos observari

videantur; etiam sub initio *Amauroses*, videbimus paullo post.

*Quid Myopia ac Presbyopia; et unde oriantur.*

340. Sed etiam *Myopia*, et *Presbyopia* vitiæ sunt, in videndi potestate, quæ a peculiariis lenti constitutione pendent. In *Myopia* distinguuntur accurate ea duntaxat corpora, quæ proxima sunt; in *Presbyopia* autem, ea quæ sunt remota. Prior affectus in nimia, alter in minori lenti convexitate ponitur. Vis enim lenti magis convexæ radios cogit citissime, debilitas autem lenti planioris facit; ut radii tardius convergant. In primo igitur casu focus cadit cis retinam, in altero autem cadit ultra retinam. Hinc necesse est corpora adducere proxime ad oculum, aut hunc ad corpora in *Myopia*, atque uti lentibus vitreis, quæ concavæ sint: removere autem oportet corpora ipsa ab oculo, aut hunc a corporibus in *Presbyopia*, vel lentes adhibere vitreas, quæ sint convexæ. Utrumque autem vitium, ob easdem rationes, nascitur etiam ex cornea plus minus prominenti, adeoque oculi bulbo vel longiori vel breviori: nempe fit etiam *Myopia* a cornea nimis convexa, *Presbyopia* autem a cornea convexa minus quam ratio postulat.

Quæ

*Quæ vitia retinæ; et unde fiunt.*

341. Ad vitia retinæ propria quod spectat, ea ad nervorum vitia sunt referenda, propterea quod retina nervi optici expansio est. Ergo paralysi ex causis nervum opticum, aut ipsam retinam, aut cerebrum sive comprimentibus, sive alia ratione destruentibus, hujusmodi membrana obnoxia est. Ab his porro causis paullo validius agentibus tollitur sensus visus, et fit perfecta cæcitas, seu *Amaurosis*. Symptoma autem istiusmodi interdum etiam effectus est inflammatae retinæ, quæ propterea distenta vasa gerens, intumescit inæqualiter, macescit, corruimpitur; interdum nimiæ lucis repente illabentis in oculos, qui diutius tenebris fuerunt assueti; interdum febris vehementioris retinæ vascula nimium distendentis; interdum denique symptoma hoc a metastasi materiæ alicujus morbosæ ex aliqua corporis parte in retinam aut nervum opticum proficiscitur.

*Quæ Amaurosin antecedant; et quid de his conjectandum. Quoniam aliud vitium cum Amaurosi conjungatur.*

342. Quæcumque autem sint causæ, quæ in retinam, aut nervos opticos, aut horum thalamos agunt, ex fere semper *Amaurosin*, seu *Guttam serenam*, ut alii dicunt, si non protinus,

nus, at successu temporis inferunt. Atque hoc quidem vitium, plerumque immedicabile, antecedunt s̄epissime memorata phænomena ( n. 339. ) festucarum, filorum, muscarum ante oculos obversantium, præcipue autem scintillarum et fulgorum: cuius rei ratio esse videtur, quod vitium subnascens, mechanico artificio prorsus ignoto, retinæ superficiem eadem ratione mutat, qua mutaretur, si aut ea corpuscula, aut exæ scintillæ re ipsa extra oculos volitarent. Ceterum *Amaurosis* semper conjuncta est cum constanti pupillæ dilatatione, quæ dilatationis species Græcis dicitur *Mydriasis*. Est igitur signum *Amauroseos pathognomonicum* oculi status sano prorsus similis, cum pupilla constantissime dilatata, et omnimoda visus privatione. Neque enim, meo quidem judicio, audiendi sunt, qui docent in *Amaurosi* pupillæ motum aliquem superesse; ipsi enim non veram *Amaurosin*, sed levem ejus speciem tantum observaverunt; aut cæcitatem *spasticam*, ut ita loquar, nempe a nimia retinæ sensilitate profectam.

343. Hactenus de symptomatibus visus, saltem potioribus. Potuisse de *Egylope* pauca addere; tuberculo videlicet eo, qui plerumque in parvum abscessum mutatur, ubi cito non resolvitur, atque inter oculi angulum internum et nasi radicem crumpit: tum de *Epiphora*, *Rhyale*, *Encanthide*, *Grandine*, *Nubecula*, *Alou-*  
*gi-*

*gine, Rhexi, Phlyctenis, et ulcerulis inde na-*  
*scentibus; demum de aliis oculorum affectio-*  
*nibus: quarum prior non aliud est quam la-*  
*crymarum affluxus, quæ interdum tenuem ha-*  
*bent naturam et simul acrem: altera, quæ*  
*exulceratio est lacrymalis carunculæ et inter-*  
*dum destructio: tertia, quæ ejusdem caruncu-*  
*læ augmentum immodicum: quarta, quæ tu-*  
*berculum durum supremam palpebram plerum-*  
*que occupans: quinta quæ corneæ levis et al-*  
*bescens opacitas ex denso humore ejus substan-*  
*tiæ inhærente: sexta, quæ idem est vitium,*  
*sed magis conspicuum: septima, quæ est cor-*  
*neæ ipsius ruptura sive ex vulnera sive ex ul-*  
*cere profecta, octava, quæ pustulosa corneæ*  
*affectio plus minus gravis. Denique potuisse*  
*alia palpebrarum vitia recensere; cujusmodi*  
*sunt scabies, seu *psoroptalmia*; pruritus, seu*  
*lippitudo sicca, aliis *xerophtalmia*, *Ectropion**  
*seu palpebrarum inversio; verum de his aliis-*  
*que oculorum affectibus, chirurgiæ Magistros*  
*consulendos esse arbitror, qui ea fusius, et*  
*pathologico etiam more pertractarunt.*

## C A P U T XXV.

DE SYMPTOMATIBUS PERTINENTIBUS AD  
ORGANUM AUDITUS,

*Quot modis auditus lædi possit.*

344. **A**uditus organum, quemadmodum organum visus, de quo superiori capite, ita lædi potest, ut ejus functio, nempe auditus ipse, aucta sensilitate interdum polleat: interdum obtundatur et pereat: demum aliquando depravetur: videlicet ab internis agentibus ita commoveatur, velut si soni, quibus percussi videtur, seu quorum sensum tunc percipit, reipsa in aere circumposito excitati forent.

*Quid sit aucta auditus sensilitas.*

345. Aucta sensilitas auditus ea est organi constitutio, propter quam fit, ut levissimos etiam sonos vix ferre possimus, quin dolore, convulsione, aut molestia alia hujusmodi protinus afficiamur; vel id prestat, ut a minimo sono, alias sensationem vix aut ne vix quidem movente, promptissime percellamur.

*A quibus primum causis auditus acuatur.*

346. A causis autem organum proxime lædentibus symptomata istiusmodi originem ducere

enunt

Cum ex analogia, tum ex ratione innotescit. Partes enim omnes sentientes quoties, sive per inflammationem, sive per tractionem aut intumescentiam partium vicinarum; sive per aliam causam, irritantur aut distenduntur, eas vividius sentire, seu potius per eas mentem validius commoveri, quotidiane observationes evidenter demonstrant. Cutis distenta nimis, inflammata, irritata, tactus sensum mutat in dolorem; id quod aliis etiam partibus sensu praeditis commune est. Igitur quotiescumque in auditus organo, seu in sensitivis partibus quæ ipsum componunt, similia fiant, procul dubio auditus sensus ita acuetur, ut molestiam creet non facile perferendam; ac propterea inter causas, quæ propriam augent auditus sensitatem, merito recensentur morbi aurium inflammatorii, ut dicunt Medici, convulsivi, spastici, qui partes aurium sentientes quovis modo irritant; ex quo fit, ut vel organi tremores, qui ad auditum requiruntur, a partibus acute sentientibus absque incommodo ferri non possint; vel a minimis etiam tremoribus sensus excitetur.

*Quæ aliæ cause auditum acuant. Communis opinio circa harum causarum agendi modum.*

347. Neque solum ab enarratis causis auditus organum proxime obsidentibus symptoma istiusmodi provenit; sæpe enim aliis etiam mor-

bis adjungitur ; seu aucta auditus sensilitas est effectus aliorum morborum , quemadmodum in affectionibus cum hystericis tum hypochondriacis quandoque videre licet , nec non etiam in Phrenitide præsertim incipiente , in febribus quibusdam acutis , et similibus . Magna Clinorum pars auctam auditus sensitatem , quæ in affectionibus postremo loco memoratis se sç præbet , a distensione fibrarum cerebri , aut duræ meningis pendere putant , ita enim ( si recte eorum explicationes sum assecutus ) spiritus violenter minimis de causis in cerebrum irruunt , tanquam in commune sensationum omnium receptaculum .

*Opinio altera conjectando proponitur .*

348. Nos autem phænomenon auctæ sensitatis in auditus organo ita commode explicari posse conjicimus , ut a majore videlicet fibrarum carnearum irritabilitate primario proficiatur . Augmentum hujus facultatis , non secus ac sensus universalis , in affectionibus paullo ante memoratis , late dominari , patet in aliorum sensuum externorum quasi dicam molitie , qua minimis impressionibus commoven- tur , et in motibus inordinatis ac vehementibus muscularum omnium , qui motus in Phrenitide præsertim , in affectibus spasticis , hystericis , et in delirio febrium quarundam acutarum occurrunt . Quæ cum ita sint , non longe absurum ut credam , mallei musculum , qui

ad majorem ejus processum pertinet, et vocatur *tensor*, spastice contractum ex irritabilitatis augmento, tympani membranam paullo violentius tendere; quo ea a debilibus etiam sonoris radiis celeriter contremiscat: insolitus hic tremor, labyrinthi aquæ communicatus, cur non ex nerva pulpa investiente ac magis sensili, fortasse ob auctam cellulosæ nervos maximam partem componentis *contractilitatem*, molestiam extorquebit, quo proinde leves etiam commotiones a percussis corporibus sonoris in aere excitatae, indifferenter ferri omnino non possint? Ceterum cum hæ sint primæ veluti mentis cogitationes, per nos liceat unicuique phænomenon, de quo quæstio est, aliter explicare.

349. Frequentius tamen in praxi occurrit illud auditus symptoma, quod ipsam audiendi facultatem aut imminuit aut tollit. Multa possunt alterutrum efficere; nos aliqua duntaxat afferemus, tum ne compendii limites prætergrediamur; tum etiam quod res difficillima sit partem indicare, in qua eorum symptomatum plura sedem habeant, tum demum quod, ubi etiam sedes penitus internoscatur, nihilominus apta remedia inveniri, aut inventa afflictis locis, quemadmodum aliquando par esset, admoneri non possunt. Quæ igitur potiora symptomata ad triplicem spectent auris cavitatem; scilicet externam, medianam, atque intimam, brevissime exponemus.

*Quæ auriculæ vitia auditum lœdant :*

350. Si fiat itaque ut per dissectionem , aut suppurationem , aut gangrænam , auricula externa vel deficiat omnino , vel magnam partem : si ejus figura prava sit vel ab origine , vel ex morbo aliquo superveniente , puta tumor conchæ urgente ; tandem si eveniat , ut ea incongruum situm vel a primordiis obtinerit , vel pariter a tumore aliquo , cuius vi inferior conchæ cavitas meatui auditorio non ita respondeat , quemadmodum status secundum naturam exposcit , tunc auricula sonoros radios aut colligere , aut in meatum auditorium determinare , atque inducere nequaquam poterit , unde auditus hebetudo :

*Quæ vitia meatus auditorii idem præstent .*

351. Quod si meatus auditorius vel angustus nimis fuerit , vel justo amplior , auditus similiter obtusus erit . In primo casu quia pauci sonori radii ipsum subibunt ; in altero autem quia ex nimia copia radiorum sonantium eorumque vi , processu temporis partes occident et debili sono non concutientur ; vel quia radii iidem in meatum incidentes , et reflexi ab ipsius amplexu meatus parietibus , non poterunt in focum convenire ; neque proinde quantum decet tympani membranam concutere . Quod si meatus , de quo sermo est , extraneâ materia turget ; puta sordibus , cerni-

míne, lapillis; aliove corpore, vel intus nato vel intruso, obstructus fuerit, sonori radii tympani membranam non pertingent, atque ita sonorum quorundam maxime débiliorum auditus omnis tolletur.

*Quæ membranæ tympani vitia auditum obtundant aut tollant. Quæ vitia ossiculorum.*

352. Post vitia auriculæ, et meatus auditiorii, ea veniunt recensenda, quæ medianam auri cavitatem, seu tympanum obsident. Et primum quidem tympani membrana interdum sic laxatur, ut variis sonoris radiis excipiendis nequeat accommodari. Notum quippe est eam in sono sic disponi, ut plus minus introrsum feratur ac sursum (minus tamen quam plerique arbitrantur) a malleo per musculum processus majoris; atque hoc musculo laxato in pristinam sedem restitui. Laxatur autem membrana vel in propria fabrica ex causis diversis, præsertim vero a nitido humorum aqueorum affluxu, adeoque universali vel particulari eundem humorum prædominio; vel laxatur ex eo, quod musculus paullo ante indicatus a nervorum vitiis, sive universalibus sive particularibus, aliquando resolvitur. Laxata membrana non tenditur diversimode; adeoque cum ad sonos excipiendos impos fiat, auditus obtundetur. Eosdem effectus præstat membrana hæc aut callo indurata, aut ossefacta, aut sordida.

bus obducta , aut ex ulcere in luxuriantem carnem excrescens , erosa , disrupta , deficiens . Ubi enim occallescat , ossea fiat , in carnem ulcerosam intumescat , tendi apte non poterit ; et sonoros radios meatum auditorium intrantes suffocabit . Ubi vero vel omnino , vel magna ex parte deficiat , soluta ossiculorum cohæsione , hæc tremere non poterunt , neque propterea aquulam labyrinthi agitare , et investientem nerveam membranam commovere , ubi tamen tremens membrana fenestræ rotundæ aquam illam paullo validius non concutiat . Deinde apertâ tympani via , exsiccatis membranis et ligamentis ossiculorum ab aere externo tympani caveam subeunte , rigida ea fieri possunt atque immobilia . Tremorem autem ossiculorum tollit etiam eorum aut caries , aut ancylosis , seu articulationum immobilitas , aut luxatio , aut mutuæ eorum connexionis dissolutio .

*Quæ vitia cavitatis tympani et tubæ  
Eustachianæ .*

353. Præter ossicula memorata et aliquam muci portionem , intra tympani caveam nihil Natura posuit , nisi investientem membranam , quæ loco est periosteī ; at voluit illud aere repletum esse , qui per Eustachii tubam libere ire atque redire posset , atque ita pro opportunitate renovari , et simul supervacuas tympani humiditates educere . Ergo si membranæ

con-

convestientes ossicula et tympani cavitatem inflammat, suppuratione vexentur, crassescant: si, loco aeris et muci, serum, aqua, sanguinis, ichor, pus, aut alius humor eam cavitatem occupet: si Eustachii tuba tandem obstruatur, atque aeri via præcludatur, auditum simili ratione plus minus hebetari necesse est. Id autem efficitur, seu quod ex iis vel pravis humoribus vel aliis vitiis laxentur, exedantur, destruantur partes, quæ ad auditus organum exstruendum concurrunt; seu quod aer cum ex cavea tympani propter tubæ obstruktionem regredi nequeat, intra ipsam caveam rarescens, tympani membranam extrorsum sic urgeat, ut per nimiam laxitatem a sonoris radiis nulla ratione concuti agique in tremorem possit. Eadem prorsus affectio locum habebit, ubi retardatus aer, propter coercentis caveæ humiditatem, propriam vim elasticam amittat. Atque hi sane morbi omnes, etsi raro admodum medelam recipiant, tamen, quantum fieri potest, cognoscendi sunt; ne, dum frustra eorum sanationem molimur, partibus aliis noceamus, aut sanationem polliceamur ubi recuperandæ auditus facultatis spes nulla subsistit.

*Quæ vicia labyrinthi, et partium ipsum constituentium.*

354. Vitiis modo indicatis, certe magnam partem, torqueri potest intima etiam auris ca-

vitas. Hanc, ut docet Anatome, tribus canaliculis in semicirculum inflexis Natura instruxit, iisque cochleam in duis cavitates, quas *scalæ* dicunt, divisam, quasi comitem adjunxit; vestibulum, tanquam cavitatem cochleam inter et canales medium, adjecit; duobus ostiis, veluti fenestrīs, perviam fecit; periosteum et nerveis membranis intus sepivit; vasis omnis generis donavit, aqueo humore replevit. Cum autem tot ex partibus constet, iisdemque tenuissimis, facile fieri potest, ut canales, scalæ, vestibulum, et vasa obstruantur; in membranæ, quæ fenestras occludunt, aut cavitates interius succingunt, nimis rigidæ siant aut laxæ nimis, inflammatione et suppuratione laborent; ulcere aut callo obducantur; pittuita, ichore, pure, caveas illas obsidente, comprimantur, aut irritentur; demum nervi, qui per eas membranas disperguntur, sive ex peculiari vitio, sive ex cerebri labe, paralysi corripiantur. Quæ quidem vitia singula seorsim, aut plura simul juncta, impedimento sunt quominus soni illi excipientur, qui labyrinthi ossa concutere apti sunt, et ad commune sensorium receptæ impressionis effectus traduciqueant. Atque hæc porro vitia, si ab origine auditus organum labefecerint, non modo surditatem faciunt, sed etiam loquendi facultatem tollunt; at si progrediente ætate ingruant, aliquando contingit, ut surdus, maxime si puer fuerit, vocis, præsertim articulatæ, sonum non per-

percipiens, tandem aliquando loqui dediscat, et mutus fiat.

*Quid proprie sit auditus depravatio.*

355. Depravatus demum dicitur auditus sensus cum sonos percipimus, qui re ipsa extrahens non sunt. Huc igitur pertinent susurri, tinnitus, sibili, et soni similes, qui aliquando in nobis excitantur ex trementibus aurium canalis, ossiculis, aliisque partibus. Gignuntur autem saepe saepius tremores hi ex acutis morbis febrilibus, ex plethora, atque ex omnī causa, quæ maiorem sanguinis copiam intracaput determinat, vel fibras aurium motrices irritat atque convellit, vel denique aerem tympani cavo contentum diversimode agitare potest. Distenta enim paullo validius vascula per auditus organum repentina pulsant fortius, unde sonus quasi percussi corporis consequitur: concussis vero ossiculis per muscularum irritationem, tremor suboritur, unde susurrus vel tinnitus: demum aere intra tympanum per tubam vel subito erumpente, et bombus; vel sensim et per arctatam tubam, et sibilus in promptu est.

356. Mitto eas auditus affectiones recensere, quæ ex variis atmosphæræ qualitatibus, nempe humiditate, calore, siccitate, ac frigore pendunt: quarum nonnullæ, ut siccitas et frigus, ob augmentum vis elasticæ, auditus sensui acuendo favent; aliæ vero, quemadmodum

dum humiditas et calor, ob eandem vim elasticam imminutam, ipsi auditui obesse videntur; easque consulto prætereo cum morbos non sint, atque aeris mutatione tollantur. Quid vero, in morbis præcipue acutis, varie auditus perturbationes aut depravationes cum iisdem interduin conjunctæ præsagire soleant, hoc docere Clinicorum officium erit.

## C A P U T XXVI.

DE SYMPTOMATIBUS PERTINENTIBUS AD  
ORGANUM OLFACTUS.

*Quot modis olfactus sensus ledi possit.*

357. **O**lfactus organum in eum finem a Natura fabrefactum fuit, ut viam panderet odoribus atque aeri, tum etiam ut supervacuum mucum emitteret. Eo præterea spectant præcipua hujus organi vitia, ut odores naribus hausti ductique, magis quam natura ferat commune sensorium percellant; aut nulla ratione vel languidius quam par est; aut aliquando vel sine corporum odoratorum præsentia olfactus organum incitetur; vel in ipsis corporibus odoris non proprius odor sed alienus inesse videatur. In primo casu olfactus erit nimis exquisitus: in secundo deletus, aut imminutus: in postremo autem erit depravatus.

*Quæ*

*Quæ causæ olfactum acuant.*

358. Dum autem symptomata enarrare instituimus, quæ ad olfactus organum pertinent, exordiemur ab iis, quæ sensum ipsum nimis (1) acuant. Hujusmodi vero sunt omnia illa, quæ aut mucum verrunt olfactoriæ membranæ superinductum, aut membranam ipsam nervis acutissime sensientibus disseminatam quacunque ratione irritant. Quam ob rem defectus muci oblinientis, proptereaque nervorum olfacentium nuditas; inflamatio et abscessus ipsius membranæ, quæ aliquando etiam ulcusculis recens supervenientibus exeditur; caries ossium nasum ejusque caveas componentium; ossium ipsorum fracturæ atque intropressiones, ut appellant, causæ sunt ejusmodi quæ olfactus sensum augere possunt, seu ita acuere, ut vel molestus sit, vel languidissimis odoratorum corporum effluviis commoveatur. Nimirum etiam sensilitas vel naturalis, vel morbo-

(1) Hic loci nulla incidit mentio de olfactu acutiori in alterutra ex naribus vitio naturalis conformatio-  
nis. Sunt enim nonnulli qui in altera nare exquisitus olfa-  
ciunt, vel quia altera amplior est, propter septum quod  
nasi caveam principem in æquales partes non dirimit, vel  
quia respondentes sinus sunt capaciores. Utrumque vitium  
( si reipsa vitium dici potest ) cadaverum sectiones inter-  
dum patefaciunt.

bosa idem præstant. Ad naturalem quod pertinet exempla prostant non infrequentia; cum nonnulli ex debilioribus odoribus in fortes ac sœpe iteratas sternutationes, et aliquando in animi defectiones incurant. Morbosam vero sensilitatem luculenter ostendere videntur phænomena olfactus nimis exquisiti in hystericis nonnullis, puerperis, viris hypochondriacis, et in morbis quibusdam acutis; quemadmodum in Phrenitide, et in eo morbo sœvissimo, cui nomen *Hydrophobia*. Quibus in ægrotationibus sentiendi facultatem in universum auctam esse docemur etiam ex horrore, quem conspectus rerum pelluentium parit; ex molestia quam minimus sonus excitat; ex symptomatum ingressu vel augmentatione propter minimam circumfusi aeris agitationem; atque ex phænomenis aliis horum non valde dissimilibus.

*Quæ causæ olfactum retundant aut tollant,*

359. Spectant hactenus dicta ad eas causas, quæ olfactus sensum acuunt. Cæterum frequentiora sunt vitia illa, in quibus sensus aut hebescit sive obtunditur, aut omnino aboletur. Jam vero causæ, quæ alterutrum præstant, censentur prius illæ, quæ ab organo non rite constituto proficiscuntur. Igitur quemadmodum ossa et cartilagines nasum componunt, ad ejus autem cavernas constituendas sinus frontales concurrunt, *ethmoidei*, *maxillares*, *sphenoidei*, et

et ossa turbinata, quæ etiam spongiosa dicuntur; ita vitia construnctionis in his partibus olfactum vel immiruere possunt, vel delere. Si autem a me quæras cujusmodi sint hæc vitia, dicam esse primo tumores in cute pinnas convestiente sive interius sive exterius obortos, qui pinnas ipsas comprimendo, aut narium capacitatem minuendo, viam ad nares intetiores angustiorem reddunt: deinde sinuum quorundam et ossium spongiosiorum defectum, tum et illorum angustiam, horum vero molem valde minorem quam par est. Ita enim immunita superficie organi, odori halitus, minori copia intra nares inspirando traducti, remissius nervorum ope commune sensorium percellunt.

*Quæ aliæ causæ idem præstant.*

360. Sed etiam morbi quidam peculiares, quibus membrana narium cavitates investiens interdum afficitur, valde faciunt ad olfactus vitia procreanda. Ubi igitur ex morbis quibusdam pituitaria membrana exsiccatur, languidior fit olfactus, aut penitus tollitur; pereunte videlicet nervorum teneritudine ad sensum excitandum requisita. Eadem fiunt si mucosum fluidum redundet; laxatis quippe nervis, et nimio humore circumfusis, suffocatur in ipso humore vis effluviorum a corporibus odratis erumpentium, atque ita eorum vi nervorum superficies non mutatur. Hoc in gravidine

line manifestum est, quæ Græcis *Coryzæ* appellatur: et definiri potest affectio illa, in qua cum capitis gravitate, difficile per nares respiratione, voce minus sonora, pituitosus humor, initio tenuis, at sensim in dies crassescens, cum olfactus dispendio ex naribus ipsis destillat. Perit autem omnino olfactus propter morbos organum destruentes, cuius generis sunt abscessus, gangrenæ, ulcera, quæ aliquando internis naribus superveniunt. Quorum sane morborum vim atque perniciem ii præcipue experiuntur aliquando, qui lue venerea labrant; in qua caries et putredo omnia inficit atque corruptit, absque ulla spe reparationis, et cum magno olfactus detimento. His adde *Exostoses*, *Sarcomata*, et *Polypos*, qui intra narium cavernas interdum suboriuntur; quique pro ratione molis olfaciendi facultatem vel tollunt vel imminuunt.

*Quot polyporum species, et quomodo  
olfactum lædant.*

361. Quæcumque vero sit *polyporum* species, qui prius in *veros* et *spurios* discriminari possunt, effectus idem est. *Veri* ii dicuntur, qui carneam massam æmulantur, eandemque habent fibrosam et duriusculam compagem quaquaversus. *Spurii*, contra, membranâ fūnt exteriori plus minus crassa, quæ intra proprium sinus pituitosum humorem concludit. Fortasse

se veri sunt ii , quos Hippocrates (1) carnosos dixit , duros , et nasum impletos ; *spurii* autem quos pendulos , rotundos , molles appellavit . His duabus speciebus ipse medicinæ Parrens tres alias adjunxit ; pendulos primum , oblongos , molles : deinde callosos : postremo tandem illos , qui parvorum cancerorum similes sunt . *Polypi* autem cujuscunque sint vel structuræ vel formæ id habent ingenium , ut sensim mole aucti vias primum angustent aut præpediant corporum odoratorum effluviis ; deinceps nervos olfactarios urgeant contra parietes cavitatum ossearum , quæ schneideriana , seu pituitaria membrana circumvestiuntur : atque hinc fit ut primum obtundatur , deinde omnino pereat sensus olfactus ,

*Num alia intra nares olfactum lædere possint .*

362. Idem efficiunt *Sarcomata* , seu carnes , quæ ulcusculis plerumque ex crescunt ; calculosa , gypsea , atque tartarea concrementa ; vermes , et alia similia , quæ interdum nares internas inferciunt . Concretiones enim nunc memoratas intra narium caveas suboriri posse , illi quidem minime ignorant , quibus comprehendunt est , inter elementa solidorum fluidorumque

(1) De morbis . Lib. II.

que terram etiam numerari, quæ, si proportione reliqua elementa alicubi superet, ab his secedit vel præ copia excedente, vel propter admixtionem principii alicujus majorem cum aliis particulis affinitatem habentis, et in massulas figuratur. Si denique de vermibus sermo sit internas nares interdum obsidentibus, interdum corrodentibus, cum via pateat ab externis naribus ad interiores et ad sinus respondentes, tum et a ventriculo, œsophago, et pharynge ad internas narium caveas, possunt ii propterea ex prioribus locis in nares ipsas traduci, et in eorum caveis commorari.

*A quibus aliis causis olfactus tollatur.*

363. Quoniam vero non solum ea, quæ internas nares labefactant, olfactum tollunt, verum et illa, quæ nervis olfactoriis læsionem inferunt; ideo inter causas hujus affectionis merito recensenda veniunt quæcunque intra cranium, nervos, qui olfactui præsunt, aut comprimunt, aut alia ratione destruunt, sive tumores fuerint; sive humores propriis vasis effusi, stagnantes, corrupti; sive demum ulceræ processibus mammillarib[us] seu nervis olfactoriis, aut eorum origini, insidentia: aut quæcunque tandem ceteros etiam sensus depravant, communis sensorii mala; nempe apoplexia, morbi soporosi, epilepsie, paralyses; in quibus omnibus plures nervi s[er]pissime surdi sunt,

Sunt, neque externoru[m] agentium impressionibus commoventur.

*Olfactus depravatio quo[m] modis contingat.*

364. Ad olfactus tandem depravationem quod pertinet, ea duplici modo aliquando contingit. Vel enim in corporibus odorem alienum percipimus, vel in iis, quæ omni prorsus odore sunt destituta, odorem invenire videimur. Prius vitium ponit mentis errorem, si omnia intranarium cavernas secundum naturam sint constituta: qui error sane nihili faciendus videtur, si fugax sit; neque morbo alicui consociatus; metuendus vero si ex morbo sive acuto sive chronicō pendeat, qui nervorum originem aut proxime aut remote afficiat: neque facile tollendus, nisi primum inorbus ille, ex quo profectus est, dispellatur. Alterum vitium, in quo nempe odorem videmur sentire ubi reipsa non est, insidet ipsi organo olfactus, aut ejus viciniis. Si enim humores, qui ex naribus, faucibus, ore, lingua effunduntur, ita in suis qualitatibus mutati sint, ut odorem præ se ferant præter naturæ institutum, tunc omnia, quæ admoventur naribus, eo peculiari odore infecta esse videbuntur. Ulcus illud narum, quod ex pravo odore quem spirat Ozæna dicitur, hoc satis superque testatur. Eundem effectum edunt dentes, gingivæ, fauces, trachea, œsophagus, ventriculus; si nempe partes istiusmodi aut carie aut ulceræ

laborent ( ratione habita ad diversam partium naturam ) aut denum si intra propriam substantiam putrida foveant atque corrupta , quæ interdum a peculiari humorum intemperie suppeditantur : inde enim vaporess ascendentess narium cavernas inquinant , qui non tam laborantibus , quam vicinis tetri spiritus exhalatione sunt plurimum molesti . Recte in hanc rem Riverius cum dixit ; *cibos et potus atque medicamenta oblata , putria atque graveolentia videri malum esse ; eaque indicare vel ulcus narium , vel partium vicinarum , vel copiam humorum corruptorum in ventriculo , vel denique sanguinis interdum insignem corruptionem .*

## C A P U T XXVII.

### DE SYMPTOMATIBUS PERTINENTIBUS AD ORGANUM GUSTUS .

*Quot modis sensus gustus lœdi possit .*

365. **S**ymptomata , quibus olfactus organum interdum afficitur , magnam partem spectant etiam ad organum gustus ; nempe ad linguam , propter summam quæ intercedit affinitatem inter hæc duo organa ; adeoque et ipse gustatus aliquando acuitur ; interdum obtunditur aut deletur ; frequentius autem depravatur .

*Quid*

*Quid gustus auctus. Quid debilis ac sublatus. Quid depravatus.*

366. Auctus vero dicitur sensus gustus, quando sapida objecta, ut vocant, quæ alias vix gustum excutiebant, nunc sapidiora videntur; aut quando quæ gustus objecta certo quodam gradu linguam percellebant, nunc ipsam acrius irritant. Debilis, contra, dicitur hic sensus cum sapida corpora languidius quam antea afficiunt: quod si hæc ipsa corpora, etiam ea quæ sunt sapidissima, nullum sensum a lingua extorqueant, tunc gustum sublatum esse intelligimus. Denique sensus gustus depravatus est, quoties aut saporem aliquem in corpore insipido aut alienum in sapido percipimus.

*Quæ causæ gustum acuant.*

367. Ad causas incrementi gustus quod pertinet ( nam ab hoc gustus vitio exordiemur ) defectus muci naturalis, qui linguæ superinducitur; linguæ ipsius inflammatio; papillarum linguæ nuditas; tumores in lingua interdum nascentes; morbi denique spasticæ indolis plurimum faciunt ad gustus incrementum. Nam lingua naturali muco repurgata acrius sentit; quod papillæ a sapidis corporum particulis violentius commoveantur: lingua inflammatæ, aut vulnerata, aut propter tumorem distenta nimis, exquisitiori sensu prædicta est, adeoque ab omni eo, quod etiam lenissime ipsam ti-

tillat, protinus dolet: et sensus etiam gratissimus in dolorem vertitur quotiescumque velamenta, quæ ad papillas defendendas, et moderandum nimium earum attritum comparata sunt, delecta fuerint. Ita manifestum est quî fiat, ut lingua parvis illis tuberculis obsita, quæ aphtæ dicuntur, aut ulceribus cuiusvis indolis, aut ex calente potu vel alimento alio uspiam decoriata, sapidorum præcipue corporum contactum ferre non possit: ægre autem ferat ubi cuticula tenuissima linguam circumplexens majorem etiam tenuitatem adipiscatur; quemadmodum convalescentibus accidit ex morbis quibusdam acutis; decidente enim crusta linguae dorso innata, omnia quæ linguae admoventur acriorem sensum extorquent, et salsum maxime videtur id quod marino sale conditum nequaquam fuit. Demum in spasticis affectionibus augetur hic sensus, propter auctam universalem, ut ita dicam, sensilitatem.

*Quæ vero debilitent, tollant, depravent.*

368. Illa vero gustus symptomata, quorum proprium est hunc sensum hebetare, delere, aut depravare, raro a peculiari organi labore proxime pendent; neque enim facile occurrit, quod linguae papillæ in propria structura sic mutentur, ut aliquod ex enarratis vitiis consequatur. Morbi acuti, præcipue febriles, et morbosæ quedam ventriculi constitutiones id habent ingenium, ut gustus organum altero ex

is modis ledant. Aut enim per calorem, qui febrem comitatur, exsiccatur lingua, et crusta adeo obducitur, ut quod in cibis sapidum est minime solutum papillis nequeat applicari easque commovere: aut saliva ceterique humores, qui os alluunt, in exsiccatis vasis ac cellulis stagnantes, viscidi vel pravi fiunt, quo sordes varias ipsi linguæ superinducunt.

*Quæ aliæ cause idem præstent.*

369. Stomachus etiam male affectus, sive ex vitio aliquo in propria ejus fabrica suberto, sive ex alimentis corruptis, sive demum ex pravis humoribus intra ipsum effusis, plurimum facit ad gustus sensum aut obtundendum, aut depravandum. Nam ex ventriculo ita præter naturam constituto vaporess ascendent per œsophagum intra pharyngem atque os, qui, ad modum fermenti; liquida et partes quæ in ore continentur, propria imbuunt qualitate, sicque gustus aut hebes fit, aut depravatur. Nihil autem id magis efficit quam saliva extraneis principiis scatens. Ut enim saliva menstruum illud est, quod alimentorum sales dissolvit, eosque lingue papillis admovet; ita ubi illa principio aliquo, aut salino muriatico, aut alcalescente, aut putrido infecta fuerit, saporem excitabit principiis istiusmodi respondentem. Quæ autem causæ salivæ indolem pervertunt, partim in universa humorum massa sedem habent, partim vero in ore

et partibus circumpositis. Ad primam igitur classem pertinent diatheses scorbuticæ, venereæ, phtysicæ, biliosæ, aliæque similes; quæ ut secretiones omnes inferciunt, ita salivæ ipsi non parcunt. Ad secundam autem spectant ulcera, aut alterius generis læsiones, linguæ, faucibus, palato, œsophago, internis naribus, dentibus, gingivis, aliisque partibus illatæ; a quibus pravus humor in oris caveam descendit.

369.\* Et maxime quidem gustus depravationem dentes promovent nigricantes, cariosi, dolentes, tartarea putridaque crusta obducti, cuius vi propriis alveolis non infrequenter exturbantur: tum gingivæ erosæ, flaccidæ, sanguinem nullo negotio fundentes, aliquando etiam inflamatæ: quæ inflammatio, sive in abscessum transeat sive non, *Parulis* Græcis dicitur; *Epublis* autem si caro luxurians gingivis ipsis excreverit. Neque gustus integritati parum interdum obest tumor sub lingua erumpens, qui *Batrachus* seu *Ranula* appellatur, et phlogisticam aliquando indolem præfert, frequentius autem pituitosam. Denique uvulæ, palati mollis, et tonsillarum intumescentia ac vitia seu phlogistica, seu serosa, ut appellant, seu demum ulcerosa, quæ diversæ speciei anginas constituunt, ipsa quoque linguam sic afficere possunt, ut gustandi officium variis modis lœdatur.

*Quæ aliæ graviores gustum omnino  
deleant.*

370. Hactenus enarrata, sunt præcipua illa gustus symptomata, quæ, cognita eorum causa, facilius tolli possunt a Medicis, aut emendari: quæ enim vitia eam habent insolem, ut gustus organum reddant insensile, et pro causa agnoscunt apoplexiā, paralysim, aut quodcunque aliud vitium cerebri, aut nervorū, qui linguæ prospiciunt, ea inquam vitia admodum difficulter, et sæpe nulla ratione curari possunt.

## C A P U T XXVIII.

### DE SYMPTOMATIBUS PERTINENTIBUS AD INTERNOS SENSUS.

*An læsionum natura indicari possit, quæ  
faciunt internorum sensuum aber-  
rationem.*

371. **A**bsoluto sermone de symptomatibus ad organa externorum sensuum pertinentibus, postulat dicendi ordo, ut de internorum sensuum vitiis disseramus, quod interni sensus ab externis ortum ducere ( n. 14. ) videantur. Quæ autem præcipue natura læsionis, ubi ea evidens non fuerit, in communi sensorio internorum sensuum aberrationem faciat,

iat, et qua ratione multiplices causæ agant à quibus aberrationes pendent, nos ne conjectura quidem assequi posse fatemur: cum enim aberrationes ad mentem pertineant, impossibile est rationem afferre adequatam, ob quam, posita hac vel illa causa, sive in sensu incurrrente sive non, hæc vel illa aberratio statim signatur.

*Quid sit Delirium in genere.*

372. *A Delirio* exordium capiemus, quod est mentis alienatio, et appellatur etiam *Desipientia*. Tunc autem aliquem delirare dicimus, cum ille proprias ideas ab internis causis natas ad externas refert, adeoque præsentia judicat ea quæ re ipsa absunt; aut ideas impropriæ vel componit, vel disjungit, contra quam fit a ceteris omnibus, qui sani sunt; et simul sæpiissime memoriam amittit eorum, quæ per externos sensus recepit. Indoles istiusmodi phænomenorum, quæ in *delirio* occurruunt, ea fortasse in causa fuit, ut *delirium* in genere diceretur depravatum exercitium imaginacionis, et memoriæ; seu, secundum alios, mentis quædam quasi paralysis, propter quam ad ratiocinandum inepta fit.

*Quot sint Deliriū species. Quid Maria Melancholia. Fatuitas.*

*Phrenitis.*

373. *Delirium* porro aliud est sine febre, aliud

aliud cum febre conjunctum. *Delirium* sine febre in classes tribuitur, quarum gravior ea est, quæ appellatur *Mania*: hanc sequitur *Melancholia*, seu *delirium melancholicum*: mox *Fatuitas*. Hi sunt ex ordine totidem veluti debiliores *Manie* gradus: quæ *Mania* non aliud est quam *delirium* cum furore, et audacia. Distinguitur propterea a *Melancholia*, quæ definitur *delirium* circa objectum unum vel alterum; et discriminatur a *Fatuitate*, cuius communis definitio est, debilitas aut abolitio operationum intellectus et memoriarum; absque ullo furore et motu corporis inordinato: tandem in eo differt a *Phrenitide*, quod hic moribus sit *delirium* cum febre. Et febris quidem effectus sit ipsius *Phrenitidis*, seu *delirij*; minime vero causa delirii ipsius, quemadmodum est aliquando in acutis febribus aut morbis febrilibus, in quibus ægri interdum delirant.

#### *Quot sint Melancholiæ species.*

374. Rursus *Melancholia* dividi solet in *Melan-*  
*choliam* simpliciter, in *Lycanthropiam* et *Cy-*  
*nanthropiam*, aliaque genera, pro ut *Melan-*  
*cholici* in eo sunt errore, ut se vel *Lupos*  
*existiment*, vel *Canes*, vel aliud animal; cu-  
*jus* postea mores quosdam et vivendi modum  
*ipsi* nituntur aliqua ratione imitari. Ubi ab  
*his* erroribus sint immunes, tunc dicuntur sim-  
*pliciter* *Melancholici*, quod aut se *Deos* putent  
*aut Reges*, aut se partem aliquam proprii cor-

poris habere arbitrentur ex varia materia fabrē factam, præterquam ex ossibus et carnis; aut demum externam causam, quæ in ipsis morbum excitavit, quamvis absentem, præsentem censeant adeo pertinaciter, ut ratio nulla, nulla de proprio errore evidentissima demonstratio, eos ab insana cogitatione remove-re possit.

*Quæ causæ Maniæ.*

375. Interim quod pertinet ad *Maniæ* cau-sas eæ censemur esse animi patheimata, et præsertim graviores curæ; contentiones ipsius animi in studiis, in meditationibus; pervigilium; ira; tristitia; pavore; mœror paullo diu-turnior et gravis; insanus amor, et neglectus præcipue ex parte amasiæ; evacuationes quæ-dam suppressæ, ut sunt menses in mulieribus, vel in viris hæmorrhoides, aut aliæ periodicæ excretiones; ulcerum antiquorum intempestiva consolidatio; veneris abusus; febres acutæ; phrenitides; apoplexiæ; epilepsixæ præcedentes; immodicæ quædam evuacuationes; venena peculiara assumpta, uti solanum, stramonium, hyoscyamum, opium magna dosi; capitis per-cussiones, et similia. Inter has causas aliæ, ignoto prorsus artificio, cerebri œconomiam perturbant; aliæ vero ob id, quod aut hujus visceris vasa nimium distendunt, aut ipsum comprimunt, aut corpus universum magnopere debilitant, et quasi dicam exsiccant, aut ner-

vorum sistema vehementer commovent , aut aliquid pravum intra corpus retinent , quod in cerebrum impedit ,

*Quæ causæ Melancholiæ .*

576. Causæ istiusmodi ob peculiares individuorum Idiosyncrasias , et minorem agendi vim , omnibus levioris maniæ speciebus sunt communes , ac proinde etiam *Melancholiæ* , quæ interdum a subito terrore nascitur , sæpe ab *Hypochondriasi* , quæ debetur viæ otiosæ ac desidi , magnis evacuationibus , aut naturalibus suppressis ; frequentius rei familiaris angustiæ , curis gravioribus , peculiari demum infortunio alicui , et proinde animi mœrore . Ceterum inter *Melancholiæ* causas afferuntur etiam ab Auctoribus obstructions viscerum ; quorundam abdominalium , et præcipue Lienis ; propterea quod dissectis corporibus hominum *Melancholia* defunctorum , aut aliis morbis , quos melancholia anteiverit , ea viscera inventa fuerint aut pravis humoribus in propria substantia scatere , aut majori mole prædicta , aut tumoribus aliisque vitiis laborare : Verum non satis constat utrum vitia hæc sint effecta *Melancholiæ* potius quam causæ . Certe ubi nulla in antecessum adfuerint phænomena similiūm affectionum propria , magis rationi consonum videtur , has ipsas affectiones effectus potius quam *Melancholiæ* causas censere ; etsi vitia abdominis visceribus inherenteria earum affectionum , de qui-

quibus sermo est , causas interdum esse possit  
non diffiteamur ,

*Quæ causæ Fatuitatis . Agendi modus cau-  
sarum istiusmodi ,*

377. Porro si de Fatuitate sermo sit , ubi  
ea non fuerit hæreditaria , sibiles plerumque  
est epilepsie sœpius invadentis , aut paralysis ,  
aut morbi acuti prægressi , aut senilis ætatis :  
aliquando vero a praya capitis conformatio-  
nē ejusve laesione , aut vini et venœris abusu , aut  
demum a pituita redundantē originem dicit .  
Et hæ porro causæ omnes ( n. 375. 376. 377. )  
ita agere videntur , ut cerebrum , sive proxime  
sive remote , vel irritent , vel comprimant ;  
vel in propria structura ita pervertant , ( qui-  
cunque tandem sit modus ille quo pervertitur )  
ut functiones internorum sensuum plus minus  
labefactentur . Sive autem labes sit sublata  
harmonia inter cerebri fibras reciproce , ut non  
nullis placuit ; sive in laxitate aut nimia ea-  
rum cohæsione consistat , perinde est . Pertur-  
bata est videlicet ea in cerebri fibris constitu-  
tio , quæ est apta ad operationum mentis exer-  
citium recte absolvendum .

*Quæ causæ Phrenitidis .*

378. Causæ delirii cum febre , seu proprie  
Phrenitidis , sunt suppressæ narium , aut hæ-  
morrhoidum , aut mensium ; periodicæ evacua-  
tiones , tum et lochiorum in puerperis , impru-  
dens

dens calefacientium usus in morbis acutis, seu ut dicunt, regimen calidum; incompletæ narium hæmorrhagiæ in acutis ipsis; pervigilium; lucubrations immodecæ; caput nudum et callens frigido aeri intempestive expositum; ictus, contusiones, et vulnera capiti illata; uno verbo ea omnia, quæ vehementem humorum circuitum in caput determinant, et sanguinem peculiariter labi inflammatoria infectum intra ejus vasa congerunt: id quod medicæ observationes quotidie evincunt. Nam in acutis febribus, in quibus, ut omnes norunt, humorum motus velocior est, delirium sæpe ingruit: idemque in diaphragmatis inflammationibus evenit ( quo in casu delirium a plerisque appellatur *Paraphrenitis* ) quemadmodum et in aliis viscerum ac partium inflammationibus; cum scilicet vittiosus sanguis a venis resorptus in caput impicit, ejusque contenta propria labi inficit.

*Quæ sint accidentales delirii differentiæ.*

379. Quæcunque autem sit delirii species, facile est percipere quî fiat, ut delirium dicatur universale, ubi mens circa omnia delirat; ac propterea quodnam dicatur delirium particulare, quod fixum, vagum, perpetuum, interruptum: hæc enim ad juncta eas deliriorum differentias designant, quæ dici possunt accidentales.

## C A P U T XXIX.

DE SYMPTOMATIBUS PERTINENTIBUS AD  
FUNCTIONES ANIMALES.

*Quot sint in genere motus vitia.*

380. **E**numerationem symptomatum, quibus sensus cum externi tum interni afficiuntur, excipit ea quæ symptomata lœsi motus comprehendit, forte ob id quod nulla in animali corpore functio sit, quæ ad motum referri non possit. Sensus ipsi, qui tandem omnes ad tactus speciem revocari debent, sensus inquam externi non penitus absque motu excitari posse videntur: neque enim animum possent commovere nisi externorum agentium impressiones in organorum sentientium superficie mutationem aliquam, eamque physicam, afferrent; quæ sane mutatio absque motu aliquo, neque esse, neque concipi potest. De motus igitur vitiis disserere incipimus, initium ducentes ab iis affectionibus, in quibus motus vel imminutus est, vel sublatus; ut deinceps ad ea motus symptomata recensenda deveniamus, quæ hanc facultatem auctam fuisse significant.

*Quæ*

*Quæ sint vitia motus imminuti et sublati. Quæ vero motus aucti.*

381. Vitia autem motus voluntarii in quibus facultas ad motum aut sublata penitus est, aut plus minus debilitata, sive in toto corpore sive in parte aliqua, hæc, inquam, vitia sunt *Apoplexia*, *Paralysis*, *Hemiplegia*, *Vertigo*, *Coma*, *Carus*, *Lethargus*, *Catoœhe* seu *Catalepsis*. Quæ vero auctam motus facultatem significant, sunt *Epilepsia*, *Spasmus*, *Tetanos* ejusque species, nempe *Empræstotonos* et *Opi-stotonos*, aliæque convulsionum differentiæ. De his eo ordine dicimus, ut primum de natura horum symptomatum, et prius quidem de iis, quæ vel ad *Apoplexiæ* pertinent, vel sunt levioris *Apoplexiæ* species; deinceps de eorum causis sermonem habeamus.

*Quid propriæ sit Apoplexia. Cur in ea pulsus et respiratio interdum augeantur.*

382. *Apoplexiæ* ita definiunt, ut sit sensuum quorumcunque, et motuum voluntariorum febre omnijum abolitio, superstite pulsu atque respiratione; quæ duo interdum incrementum suscipiunt; cum non raro in *Apoplexia* et pulsus fortis sit, et respiratio valida; nempe, si quid ego video, magna et difficultis. Resolutis quippe inusculis retardatur circulatio per vasa minima; quo fit ut per laterales ramos latiores

*Caldani Pathol.*

Z

tunc

tunc magis repletos sanguis breviori via ad cor traducatur, quod majori sanguinis copia validius irritatum contrahitur fortius. Ita repellentur magis pulmones; unde ad sanguinem expediendum, proptereaque ad molestiam inde natam dispellendam, intercostales et diaphragma proprias vires intendunt, atque ita, aliis etiam muscularis in costas infertis opem ferentibus, respiratio magna fit, et simul difficultus.

*Quid sit Paralysis; et quot ejus differentiae;*

383. *Paralysis* est immobilitas muscularum, quae adjunctam habet carnium laxitatem. Ea dicitur *universalis* si musculos omnes afficiat: si motu musculari duntaxat aliqui destituantur, vocatur simpliciter *Paralysis particularis*. Atque haec quidem, si integrum corporis latus occurret, nempe sive dexterum sive sinistrum, *Hemiplegia* appellatur: si musculi omnes sint resoluti, qui sub capite sunt, mens autem constet, et musculi in capite positi se habeant secundum naturam, dici solet *Paraplegia*. Denique *Paralysis* dicitur *exquisita seu perfecta*, si motus omnis pereat, et praesertim una cum motu etiam sensus ipse; *imperfecta* vero si motus aliquis adhuc vigeat; et maxime si altera ex his facultatibus cessante (quod plerumque de motu accedit) altera supersit vel *integra*, vel a naturali statu parum recedens.

*Con-*

*Conjecturæ de motu interdum superstite ;  
interdum autem sensu .*

384. Hoc autem , si conjecturæ locus esse possit , ideo fortasse contingit , quod non omnia nervorum initia hujus vel illius facultatis exercitio inservientium affecta sunt . Conjecturam hanc confirmare videntur observationes de vulneribus cerebri , abscessibus , tumoribus , humorum effusionibus intra cranii cavitatem . Sub altera enim ex his læsionibus non raro functio quædam peculiaris tantummodo hæditur : sub altera , aut literarum , aut rerum quarundam peculiarium memoria deleta fuit : sub aliis demum , sensus periit partis alicujus superstite motu , aut vicißim . Est igitur valde probabile cutaneos nervos in eorum initiis aliquando illesos esse , alios vero non item , aut contra .

*Proximæ causæ Apoplexiæ et Paralysis;  
earumque sedes .*

485. Proxima Apoplexiæ causa , tum et differentiarum earum quas ( n. 383. ) memoravimus , est sublata integritas , seu naturalis constitutio cerebri et nervorum , propter causas quæ cerebrum ipsum compriment aut partes a cerebro productas : ex quibus fit , ut hæc sensuum ac motuum organa , propria munera exercere nequeant . Propterea quicquid cerebrum comprimit , Apoplexiæ facit , et varias ejus differentias , pro ut aut cerebrum universum ,

aut aliqua ejus pars peculiariter comprimitur. Nam *Paralysis particularis* (n. 383.) fit etiam sectione aut compressione nervorum, aut vitio musculosum vel arteriolarum per nervorum membranas et per musculos decurrentium: hęc enim omnia in instrumentis, quae ad motum et sensum sunt comparata, naturalem fabricam et constitutionem pervertunt. Si causa hujusmodi comprimens, hæreat ad initia spinalis medullæ, fit *Paraplegia*; si vero ad alterum cerebri hemisphærium, nascitur resolutio in latere corporis opposito, sēu fit *Hemiplegia*. Hoc demonstrarunt cadaverum sectiones: verum in his magnopere cavendum est, ne, quemadmodum aliquando contigit, quasdam seri effusiones enarratis locis occurrentes sumamus semper tanquam causas earum affectionum; cum nimirum interdum effectus sint. Videamus modo quæ causæ possint cerebrum ejusque partes comprimere, ac proinde affectiones hactenus expositas procreare.

*Quæ his affectionibus occasionem praebant.*

386. Causæ igitur, quæ cerebri compressioni aut occasionem præbere possunt, aut cerebrum re ipsa comprimunt, censentur esse plethora vera, sive ex peculiari corporis habitu nata, sive a suppressis q̄tibuscunque evacuationibus, nempe aut sanguineis periodicis, aut naturalibus consuetis, quemadmodum sunt perspiratio et urina. Ita etiam retentus humor aut

aut plethoram facit , aut in cerebrum impetit ,  
ejusque vasa nimium distendit aut disrumpit .  
Idem prorsus consequitur ex plethora apparen-  
te ; adeoque vini abusus , ira , motus corporis  
vehemens , usus nimius rerum calidarum , aer  
humidus et æstuans , quibus omnibus humores  
nimium rarescunt : aer frigidissimus ; qui , et  
perspirationem minuens et vasa contrahens ,  
plethoram gignit relativam ( n. 117. ) : tum  
et studia acriora , tristes animi curæ et con-  
tentiones , quæ commune sensorium diu ve-  
xant , et faciunt ut sanguinis motus intra ca-  
put lentescat , causæ sunt aptæ , quæ *Apople-  
xiæ* ejusque varias species inferre possunt .  
His adde crapulam , quæ et humorum massam  
auget , et ex distento ventriculo diaphragma  
rursum impellit , atque ita respirationem per-  
turbat , quo proinde sanguis intra caput retar-  
datur : adde tumores in collo , qui venas com-  
primunt sanguinem a cerebro revehentes . Et  
revera ab his agentibus aut distenta nimium  
vasa cerebri mollissimum hoc viscus valide pre-  
munt , aut disrupta humores effundunt intra  
cranii cavitatem ; unde intelligitur quare con-  
gestiones quæcunque intra caveam cranii ; os-  
sium cranium componentium fracturæ ; contu-  
siones , intropressiones , ut dicunt , tumores ,  
abscessus meningum aut cerebri , inter causas  
*Apoplexiæ* instrumentales , quas vocant Medici ,  
opportune recenseantur .

*Quæ causæ Comatis, Cari, Lethargi. Quot  
sint species Comatis. Quid Coma vigil.*

*Quid Coma somnolentum. Quid Ca-  
rus. Quid Lethargus.*

387. Causæ hactenus memoratæ, sed mino-  
ri vi agentes, adeoque cerebrum levius affi-  
cientes, producunt etiam *Coma*, *Carum*, et *Le-  
thargum*. *Comatis* duæ ab Auctoribus nume-  
rantur species; quarum altera dicitur *Coma vi-  
gil*, altera vero *Coma somnolentum* seu *Cata-  
phora*. Prius definitur insuperabilis dispositio  
ad somnum, a quo sæpe ægri excutiuntur mi-  
rum in modum perterfacti, non secus ac si  
ingens strepitus eos a profundo somno repente  
excitasset: hoc autem ideo fit, quod insomniis  
vexantur terrificis. Posterius, nempe *Coma  
somnolentum*, est somnus profundus, in quem  
expergefactus æger promptissime relabitur. *Ca-  
rus* est levis apoplexiæ species: nam non so-  
lum est profundissimus somnus cum stertente  
respiratione aliquando, sed rarissime, conju-  
ctus; verum in eo et sensus et motus omnis  
deletur. Hæ affectiones sunt plerumque sym-  
ptomata febrium quarundam acutaruim, potius  
quam morbi peculiares: et revera acutas febres  
interdum comitantur; aut certe semper acutam  
febrem conjunctam habent. Et quoniam sub  
affectionibus ægri sæpe delirant; hinc ab Au-  
toribus nonnullis recensentur hæc symptomata  
inter classem deliriorum cum febre. Deinde

Le-

*Lethargus*, Latinis *Veternus*, qui definiuntur obliviosa somnolentia, eaque tranquilla, cum sensuum ac motuum segnitie, febre et ipse adjunctam habet, sed lentam; quo factum est ut a frigidis humoribus intra caput congestis pendere censeant artis Magistri. Deest autem febris in *Catoche* seu *Catalepsi*, morbo sane rariissimo, quem semel vidimus in celebri Viro ex repulsa scabie profectum; et definitur affectio illa, qua æger prehensus riget, omni sensu motuque destitutus; et situm illum servat, quem, nisi impellatur, sub ipsa morbiprehensione obtinebat. Si enim illi vel caput, vel crûs, vel brachium, vel manum, aut digitum inflectat aliquis vel extendat, eodem permanet usque dum ad alium motum impellendo cogas, vel morbus ipse aut sponte, aut præsidiorum quorundam ope, remittat. Quæ vero causa cerebrum, ut videtur, ac nervos repente afficiat, et quomodo, me ignorare profiteor.

*Quæ causæ Vertiginis. Quid sit Vertigo, et quot ejus species. Quæ Vertiginis causa proxima. Quæ causæ Vertiginis exteriores.*

388. Similiter ex causæ, quæ *Apoplexiæ* inferre possunt (n. 386.) plurimum valent, si mitius agant, ad faciendam *Vertiginem*. Symptoma istiusmodi definitur ea imaginationis perturbatio, qua res externæ in gyrum rotari vi-

dentur: Græcis vocatur *Dinos*, Quod si tenebræ ante oculos obversentur, et membra vacillent, imo corpus concidat, vocatur *Scotomia*, seu vertigo caduca. Tunc autem *Vertigo* ingruit, ut conjicimus, quando sive ab externis agentibus, sive ab internis, retina percellitur inæqualiter, et celeriter. Ceterum cum hic affectus non solum a causis oriatur iisdem, a quibus nascitur *Apoplexia*, sed etiam a vera objectorum rotatione, cūjusmodi sunt celer rotarum circumactus; aquarum vortices; earum descensus præceps ex alto loco, aut cursus velox; proprii corporis motus in gyrum celere; vectio in curru aut navi; iter per edita loca, aut per angustos tramites profundis caveis conterminos, et similia; ita inter *vertiginis* causas hæ quoque sunt rēcensendæ.

*Conjecturæ circa modum agendi causarum istiusmodi.*

389. Qua vero ratione causæ istiusmodi agant, res est non facilis explicatu. Si tamen conjecturæ locus aliquis esse possit, non videtur a veritate alienum existimare, ex objectorum rotatione confusionem in videndi facultate subnasci. Confusio hæc metum infert, quasi nempe visus sensu, qui præ reliquis in deliciis est, ex improviso destituamur; et quasi confusio, hæc in eam tristem cogitationem nos adducat, ne forte prolabentes in ea corpora incurramus, quæ celerrime agitata nos secum

cum raperent cum certissimo vitæ periculo : Ex hac tristi cogitatione metus ingruit , qui cum sit futuri mali nimis sollicida præsensio , id habet peculiare , ut tremorem ac debilitatem membrorum afferat : ( quemadmodum experimur , si periculosam ingrediamur semitam ; aut per nocturn clausis oculis gradiamur ) sicque corpus vacillat , et corruit , nisi statim propinquis mitatur adminiculis .

### *Quid sit Epilepsia.*

390. Nunc de vitiis aucti motus primum dicimus , adeoque priori loco de *Epilepsia* ; quæ , si nonnullos audimus , ad vitia pertinere potest metus imminuti ; quamvis definiri soleat , et reipsa sit violenta et alterna contractio ac relaxatio muscularum imperio voluntatis famulantium , una cum sensuum omnium , ut videtur , abolitione . Ideo autem ad motum imminutum *Epilepsiam* referunt Auctores quidam , propterea quod motus illi alterni muscularum ac vehementes , a voluntate minime pendent . Cur vero æquo jure *Spasmodum* etiam , *Tetanon* , ejusque differentias ad imminutum motum non referunt ? Certe enim in his etiam affectionibus violentus muscularum status voluntarius non est .

### *Quæ causa proxima Epilepsie.*

491. Causa ejus proxima videtur principium irritans , quod cerebrum nervosque cum eo con-

connexos ad tempus lacescit. Si principium hoc intra capitis caveam evolutum fuerit tunc *Epilepsia* dicitur *Idiophatica*; *Sympathica* vero, si aliunde in cerebrum fuerit traductum. Irritamentum hoc, qualecunque tandem sit et quo-cunque modo vires suas exserat, cerebri et nervorum œconomiam ita pervertit, ut commune sensorium effectibus receptarum per exteros sensus impressionum neutquam commoveri videatur, et musculi voluntarii propter nervorum stimulationem in violentos motus adducantur.

*Quæ occasionem præbeant Epilepsiae.*

392. Plures autem sunt causæ illæ, quæ ad *Epilepsiam* disponunt, illique occasionem præbent. Et primum naturalis irritabilitas major quam ratio ferat, et hinc dispositio ad convulsiones ex minima causa; animi pathemata fortiora, cujusmodi sunt ira ac terror præcipue; labes epileptica hæreditaria; nimia venus; vini abusus, tum et fructuum, fungorum in putridam ac veneficam indolem degenarantium, et rerum acidarum; violentæ inentis exercitationes; halitus minerales fatidi, acres; uteri affectiones diræ in mulieribus, hypochondriorum autem in viris; atres humores et putridi intra cranium retardati aut effusi, et cerebrum irritantes; tum quicquid aut peculia-ri natura sensilissimas cerebri et nervorum fibras, quas dicunt, exstimulare valet, aut sangu-

guinis circuitum intra cerebri vasa perturbare ; hæc , inquam , omnia causæ sunt aptissimæ , quæ moveant Epilepsiam ; quatenus aut proxime aut remote naturalem cerebri , et nervorum constitutionem plus minus pervertunt .

*Quæ sint symptomata aucti motus . Quid sit Spasmus . Quid Tetanos . Quid Emprostatonos . Quid Opistotonos . Quid Spasmus Cynicus . Quid Ritus Sardonicus . Quid Crampus .*

393. Ad symptomata aucti motus referuntur etiam *Spasmus* , *Tetanos* , *Emprostotonos* , *Opistotonos* , *Spasmus Cynicus* , *Ritus Sardonicus* : *Strabismus* , *Crampus* , affectiones *Hystericae* , et *Hypochondriacæ* , tum et aliæ quæcunque convulsiones partium singularium . Et *Spasmus* quidem est violenta et invita contractio muscularum qui proinde appensas partes trahunt ad ipsorum muscularum initium , atque hunc statum paullo diutius conservant . *Tetanos* est violenta contractio muscularum partes distendentium potius quam flectentium ; quo proinde fit ut partes ipsæ rigidæ maneant , distentæ , et immobiles . Si membra aliqua tantum occupet , vocatur *Spasmus particularis* ; si corpus universum , quod propterea rigidum maneat atque distentum in rectam lineam , tunc proprie dicitur *Tetanos* . Si rigidi atque intenti sint musculi , qui in anteriore corporis parte locati sunt , *Spasmus* appellatur *Emptostotonos* ; in quo propte-

pterea corpus ad anteriores incurvatur : si intendantur et contrahantur violenter musculi , qui trunci partem postiorem tenent , vocatur *Opistotonos*; in quo truncus ipse ad posteriorem partem inflectitur . *Spasmus Cynicus* ad labra pertinet , quæ ad alteram faciei partem trahuntur : est igitur oris distorsio , quæ cum os canis ringentis alio modo emuletur , ita *Spasmus Cynicus* dicta fuit . Eadem est oris distorsio in *Risu Sardonicō* ; adeoque aut nihil differt hoc symptoma a *Spasmo Cynico* , aut , si quæ est differentia , in eo tantum , secundum Auctores , sita est , quod in *Risu Sardonicō* ægri etiam delirent . Nomen sumpsit ab effectu plantæ illius , quæ Botanicis dicitur *Sardonica* , vel *A-pium risus* , ex cuius ēsu delirium nascitur una cum ea peculiaris oris distorsione . Indicavimus alibi ( n. 334. ) quid sit *Strabismus* . *Crampus* est peculiaris et dolorifica contractio partis aliquujus , præcipue autem pedum aut manuum . Demum in affectionibus hypochondriacis aliqui interdum musculi , aut eorum plures , alterne contrahuntur violenter et relaxantur ; proptereaque ad convulsiones affectus istiusmodi merito referuntur .

*Quæ causa horum symptomatum proxima .*

394. Causa proxima horum symptomatum omnium est aucta vis insita muscularum aut omnium , aut quorundam ; pro ut *Spasmus* vel *universalis* est , vel *particularis* : et quoniam vis in-

insita excitatur per stimulus aut nervis, aut musculis illatos; hinc quicquid truncos aut ramos nervorum musculis prospicientium, aut musculos ipsos irritare valet præter naturæ ordinem, erit causa remota *Spasmi*, ejusque differentiarum.

*Quæ occasionem præbeant affectionibus spasticis.*

395. Spasticis igitur affectionibus, : quarum natura in augmento motus muscularum sita est, occasionem præbent ea, quæ *Epilepsiam* excitare possunt (n. 392.) Et revera ad *Spasmodum* ejusque differentias multum faciunt peculiariis fibrarum muscularium structura ab ipsa origine profecta, qua ex minimis causis in violentos motus irrumpant; ortus a Parentibus, qui spasticis affectionibus laboraverint; diatheses Arthriticæ, Rheumaticæ, Ulcerosæ; facilis in iram proclivitas; vini et veneris abusus; metastasis materiæ alicujus acris a quavis corporis parte in alias crassioribus nervis instrumentas, quorum rami per muscularares partes distribuantur; vulnera nervorum, cerebri, muscularum, aut harum partium irritationes quæcumque; intempestivus validiorum purgantium et emeticorum usus; partium inflammations et violenti earum dolores; perspirabile, aut sudore frigore repente superveniente repulsus; nimius ac frequens fructuum eorum usus, qui acidi sunt vel austeri; mensium aut hæmorrhoidum suppressio; ulcerum antiquorum inopportuna-

con-

consolidatio; bilis vitia, quæ ex hepatis, lie-nis, aut aliorum viscerum abdominalium labe procedunt; hæc inquam omnia ac similia, si in humano viventi corpore locum obtineant, violentam et invitam contractionem a musculis non infrequenter extorquent; et violentiorem quidem, ubi sensus in nervis naturâ sua fuerit acrior, et muscularis fibra mobilior. Quibus omnibus addendi sunt vehementiores animi affectus, qui ad modum doloris acrioris, commune sensorium magnopere perturbant, unde nervosum systema, et muscularum fibræ præter modum percelluntur.

### C A P U T XXX.

#### DE SYMPTOMATIBUS PERTINENTIBUS AD FUNCTIONES VITALES ET PRIMUM AD RESPIRATIONEM.

*Quot sint species læse respirationis.*

396. **R**espiratio, quæ inter vitales functiones merito enumeratur quia humana præsertim vita sine respiratione esse non potest, duobus modis lœditur; nempe vel cessat, vel difficultis evadit: cuius quidem difficultatis tres occurruunt species. Ad cessationem pertinet *Apnæa* et *Catarrhus suffocans*: ad difficultatem vero *Dyspnæa*, *Asthma*, *Orthopnæa*.

*Quid*

*Quid sit Apnæa. Quid catarthus suffocans.  
Quid Dyspnæa. Asthma. Orthopnæa.*

397. *Apnæa* est illud respirationis vitium, cuius vi respiratio ipsa fit adeo parva ut sublata videatur; immo reipsa brevi tempore cesset, et mortem afferat promptissime, nisi, postquam ægrum fere interpressit, ad naturalem statum reverti incipiat. Eadem propemodum sed tamen perniciosior *Catarrhi suffocantis* indoles est; qui definiri potest subita respirationis interceptio. Dicrimen, si quod est, inter hanc affectionem et *Apnæam* illud esse videtur, quod suffocationis seu sublatæ respirationis, causa, *catarthus* reipsa sit; nempe densus aliquis humor aeras pulmonum vias ex improviso invadens; cum contra, *Apnæa*, ut mox videbimus, etiam sine effuso humore suboriantur. *Dyspnæa* est inspiratio fatigans cum molestia et dolore. *Asthma* est frequens et molestia inspiratio cum sibilio. Demum *Orthopnæa* est inspiratio stertens, difficilis, anhelosa, quæ duntaxat erecta cervice absolvit potest.

*Cur dicantur vitia inspirationis non autem exspirationis.*

398. Dicimus *Dyspnæam*, *Asthma*, *Orthopnæam* esse vitia inspirationis non autem respirationis, quæ et inspiratione constat et exspiratione; propterea quod tota difficultas atque  
mo-

molestia in his affectionibus inspirationis tempore se se prodit : quandoquidem ad hanc perficiendam requiritur vis integra in muscularum costas elevantium , et vis diaphragmatis ; exspiratio autem , quae naturalis est Thoracis status , et vim muscularum vix postulat , non magnam patitur difficultatem .

*Quot sint Asthmatis species. Quid Asthma siccum, et quid humidum.*

399: Asthma dividitur a Clinicis in species duas ; nempe in Asthma humidum , et siccum ; Siccum , quod etiam convulsivum nonnullis dicitur ; ideo hoc nomine donatur , quod neque tussis humida eum comitetur , neque alia ad-sint inditia humoris aeras vias occupantis ; quemadmodum in Astmate humido evenit , quod prius non cessat quam humor pituitosus , crassus , interdum adeo tenax ut vitream aut gypsum referat materiam , repetitis tussis fibris dispellatur . Sæpe tamen siccum in humidum mutatur , quod bronchiorum , seu carneorum fibrarum ipsa bronchia coniungentium spasmis , mucum e peculiaribus sinibus emulgeat , et intra aereos canales effundat .

*Quæ proxima harum affectionum causa. Unica necessitas respirandi erecta cervice.*  
*aut hoc in Orthopnoea.*

400. Si de causis queramus ; proxima harum affectionum omnium causa est angustia viarum , quæ

quæ aerem intra pulmones alternis hauriunt, et emittunt. Ab ea fit sibilus in *Asthmate*, et stertor in *Orthopnœa*: nemo quippe ignorat aerem velociter per arctas vias irrumpentem aut sibilare, aut strepitum illum edere, qui stertor dicitur. Tantopere autem in *Orthopnœa* viæ illæ coarctatæ sunt, ut ad impedimenta removenda, adeoque ad costas elevandas, ( quasi ab intercostalium tantummodo musculorum inertia molestus procedat suffocationis sensus ) ægris de pectore explicando duntaxat sollicitis, necesse sit firmare superiorem trunci partem, ope muscularum caput et collum erigentium, tum etiam scapulas aliorum muscularum actione; quo proinde fiat, ut scaleni musculi et serrati majores minoresque, tum et alii qui in costas inseruntur, et in statu secundum naturam collum movent in latus alterutrum, aut scapulas ipsas antrorsum ducunt et deorsum ( pro ut de scalenis aut de serratis sermo est ) nunc moveant atque elevent costas ipsas, ut fiat inspiratio. En causam ob quam cervicem coguntur erigere qui *Orthopnœa* laborant.

*Quot cause difficilis aut sublatæ respirationis.*

401. Causæ autem propter quas aereæ viæ angustiores effici possunt, et reipsa interdum fiunt, plures quidem sunt; at in duas veluti classes tribui possunt: quarum altera eas comprehendat, quæ organa respirantia ceteroquin bene constituta repente afficiunt, sine sensibili

corum vitio : altera vero eas , quæ a vita aliquo iisdem organis insidente proficiscuntur . Ad priorem classem referendi sunt primo pestiferi quidam halitus atque vapores pulmonibus hausti . Hinc explicari facile potest cur homines , qui descendunt profundiores in cavaeas , quæ diu occulæ et obseratae fuerint , impedito respirationis usu , subito pereant . Simili modo necantur animalia , si intra vas , syltureis , metallicis , aliisque pravis vaporibus repletum , de industria concluantur . Deinde aer rarer non sufficiens ad pulmones dilatandos facit ipse etiam difficultatem respirationem ; et si justo rarer fiat , ut forte in fulmine evenit , lethalem apnæam statim infert . Hoc videntur confirmare observationes in fulmine cæsis habitæ . In his enim pulmonum cellulæ ac vesiculæ contractæ sunt , ob eam fortasse causam , quod exteriore aere , quo circumfusa animalia erant , longe rariore per flammarum caloremque facto , aut violenter ob admixtam fulminis materiam irritante , ex distendi atque inflari non amplius poterant . Idem tandem præstat exquisita paralysis muscularum qui respirationi inserviunt , tum et ingens eorum spasmus ; utraque enim affectio hæc pectoris dilatationem impedit , quemadmodum facit spasmus fibrarum carnearum , que bronchiorum cartilaginibus interiunctur ; unde ratio lœsæ respirationis in quibusdam hysterics aliisque spasticis affectibus nullo negotio intelligitur .

Quæ

*Quæ vero causæ a vitio organorum  
proficiscantur.*

402. Causæ hactenus expositæ respirationis organa non lœdunt sensibiliter : sunt autem causæ aliæ, quarum indeoles est, pulmones, aut pectoris caveam, aut circumpositas partes, sensibiliter afficere, atque ita respirationem turbare. Inter has causas recensentur abscessus tumores, concretiones polyposæ, tartareae, et similia, quæ thoracis caveam obsident : gravia abdominalium viscerum vitia, quæ per intervalla diaphragma urgent violenter in pectus : percussionses, ictus, et vulnera in thorace : costarum fracturæ : lœsiones diaphragmatiæ : laryngis ulcera : tumores ipsius laryngis, aut asperæ arteriæ compressiones : pulmonum vasa, vesiculæ, cellulæ, vel inflamatæ, vel erosæ, vel crassa viscidaque materia obstructæ aut repletæ, tum et purulenta, quæ interdum peculiari sacco, quem *vomicam* dicunt, conclusa, repente erumpit; et, vel aerea vasa inferiens, suffocat; vel in caveam pectoris protubens *Empyema* constituit : hydrops pectoris tum et pericardii, quo et pulmones et dia phragma comprimuntur : hæc inquam omnia, aliaque hujus generis agentia, respirationem lœdunt: ut nihil profecto dicam de iis difficilis respirationis causis, quæ a prava pectoris conformatione proficiscuntur.

403. Agentia hæc omnia, quemadmodum e-

videnter patet, hujusmodi sunt, ut alia respirationem penitus sistant, alia autem eam difficultem plus minus reddant. Et quoniam illæ causæ suos habent virium gradus majores minoresve; ita et respirationis lœsiones, ceteris paribus, illis gradibus proportione respondebunt. Quinimmo respirationis symptomata (n. 397.) ab una tantum vel altera causa sensim viribus increscente pendere possunt; ita ut eadem causa primum *Dyspnœam*, dein *Asthma*, mox *Orthopnœam*, denique *Apnœam* faciat. Mitto dicere de affectibus aliis respirationem perturbantibus, veluti sunt *Tussis* et varicæ ejus species; *Peripneumonia*, *Pleuritis*, pulmonum ulcus seu *Pthysis*, eorum abscessus et similia; propterea quod omnia hæc paucis verbis paullo ante (n. 402.) quodammodo indigavimus.

## C A P U T XXXI.

## DE SYMPTOMATIBUS PERTINENTIBUS AD ACTIONEM CORDIS ET ARTERIARUM.

*Quot vitiis præcipuis cor vexari queat.*

404. Consideratis respirationis symptomatis bus ea nunc persequemur, quæ spestant ad cor. Non omnia tamen hujus visceris vitia pathologico examine scrutari in animo est: quandoquidem cor omni fere morborum

genere affici potest: nempe inflammatione, abscessu, ulceribus, tumoribus, nimia dilatatione, mole immunita, prava collocatione vel figura, osseis vel tartareis concretionibus, aliisque morbis.. Nonnulla tantum symptomata recensebimus, eorumque causas præcipuas indicabimus; quæ tamen cum plures sint, ita non omnes, ne longiores simus quam par est, afferemus. Primum autem dicemus de palpitatione, mox de arteriarum pulsu intermittenti, interrupto seu deficiente; reliquæ enim pulsuum differentiationes ab iis, qui *Semejoticam* tradunt, fusius exponi debent.

*Quid sit palpatio, et quibus phænomenis se se præbeat.*

405. Palpitatio itaque cordis est adeo valida cordis contractio, ut naturalem longe superet, quasi resistentia insignis cum ipso cordis impetu decertans vincenda esset. Qui ea laborant molestum quandam systoles sensum experiuntur, quo omnia quæ in thorace consistunt tremere violenter videantur et concuti. Immo tanta vi aliquibus cor palpitasse novimus, ut ex violenta ejus contractione respondentes costas propria sede disjectas, nempe extrorsum propulsas, immo interdum confractas sensim fuisse, Auctores varii testatum faciant, et cadaverum dissectiones confirmaverint.

*Quæ natura palpitationis : ejusque cause ad quæ classes reduci possint .*

406. Habet igitur hæc affectio naturam spasmī : et cum ea sit communis cum ceteris musculis cordis proprietas , ut stimulis irritatum violenter contrahatur , liquet causas hujus symptomatis , nempe palpitationis , eas esse omnes , quæ vel proxime vel remote cordi ipsi stimulus addunt . Proxime cum dicimus , id omne intelligimus , quod in ipso corde aut partibus ad ipsum pertinentibus sedem habet , ipsumque lacessit , absque eo quod stimulus aliunde cordi ipsi accedat . Nam cum materia irritans ex aliis corporis locis ad cor traducitur , tunc palpatio cordis considerari potest tanquam ipsi cordi extranea , nempe nata a causis ipsum cor remote affidentibus .

*Quæ causæ palpitationem cordis proxime faciant .*

407. Causæ autem quæ cor proxime irritantes palpitationem faciunt , sunt cordis præcipue dilatationes , inflammations , ulcera , humorum congestiones , aneurysmata , calculi , concretiones osseæ , tartareæ , cartilagineæ , hydropes peculiares et similia , quæ aut in corde , aut ejus auriculis , aut majorum vasorum basi , aut circumposito pericardio aliquando insunt : in his enim omnibus et singulis irritans indoles est manifesta , sive in partium qua-

quarundam figura , sive in sanguine retardato intra cor , quemadmodum in hujus visceris dilationibus contingit , aut circa cor ipsum , si- ve demum in humoribus præter naturam constitutis . Hæc autem omnia tanto violentiorem palpitationem facient , eamque proinde magis molestam , quanto magis vis cordis insita , seu irritabilitas naturalis major erit : tunc enim ex minimis etiam stimulis cor palpitarit ; ac propterea inter causas palpitationis , a nuperis Auctoribus , cordis irritabilitas major quam natura ferat merito recensetur .

*Quæ vero faciant remote :*

408. Si vero a me querás quæ causæ pos-  
sent cor remote ac simul violenter irritare ;  
atque ita palpitationem ipsius cordis afferre ;  
eas , dico , plures esse . Indoles nimirum san-  
guinis phlogistica ; cruor nimis densus atque  
redundans ; humorum acredo , eaque aut totam  
massam inquinans , aut sensim et per interval-  
la a peculiari aliquo loco toti sanguini suppe-  
ditata ; adeoque diatheses scorbuticæ , venereæ ,  
arthriticæ , podagricæ , ulcerosæ , cancrosæ ,  
veneficæ , purulentæ , aliæve , si quæ sunt ,  
possunt cordis palpitationem movere . Nam in-  
doles sanguinis phlogistica , sua qualitate cor  
irritat ; idem facit sanguis spissus proprio ejus  
pondere ac vi majori , qua in cordis carnes  
impedit easque percellit ; deum copia ejus ni-  
mia aut cor nimis replet , quod proinde magis

irritatum violenter contrahitur ; aut receptum per venas copiosum sanguinem nequit uno ictu in communicantes arterias projicere . Atque ita cum cor non rite evacuetur ; manente parte stimuli quæ cor non penitus contrahit , et momento post superveniente eâdem sanguinis naturaliter irritantis quantitate , cordis contractio est violenta , et præterea sæpe inæqualis : ex quibus etiam intelligitur quare impedimenta nonnulla in arteriis , auriculis , venisque majoribus , cordis palpitationem adjunctam habent . Quod pertinet ad irritantes humores , qui ad cor traducuntur , omnibus manifestum esse arbitramur qua ratione ii palpitationem in corde excitare possint .

*Quæ aliæ causæ palpitationem remote excitant .*  
*Cur palpitatio interdum ingruat in accessione hysterica . In paroxysmo hypocondriaco . In obstruktione minimarum arteriarum . In ira ac terrore . In diuturnis animi contentionibus et venere immodica .*

409. Verum aliæ etiam affectiones , cordis palpitationem remote inferunt . Inter hæc , numerantur primum hysterica aut hypochondriaca accessiones vehementiores ; impedimenta in extremis arteriolis : ira ; terror ; exercitationes nimiaæ cum corporis tum mentis , et venus immodica . Ideo autem palpitatio aliquando ingruit in paroxysmo hysterico , aut quia ex muscularum concussione violenta sanguis citius pro-

promovet ad cor; aut quia ex concusso dia-  
phragmate et perturbata respiratione, ipsa quo-  
que circulatio in vasis cordi proximis pertur-  
batur; aut demum quia sub his affectibus car-  
nium irritabilitas, adeoque etiam cordis vis  
insita, incrementum suscipit. Eadem est ratio  
palpitationis in accessione hypocondriaca; in  
qua, si corporis musculi alternatim non con-  
vellantur, et nihilominus adsit palpatio, tunc  
ipsam oriri credendum est vel a sanguine inæ-  
qualiter irruente per cavam inferiorem in cor  
propter viscerum abdominalium obstructiones,  
aut propter abdominis concussionem; vel a  
natura sive densa sive irritanti sanguinis ipsius;  
quemadmodum innuere videtur scorbutica affe-  
ctio illa, quæ sæpe contumacis morbi hypo-  
chondriaci soboles est. Impedimenta porro in  
minoribus arteriolis liberum sanguinis circui-  
tum prohibent per vascula extrema; atque hinc  
aut retardatur sanguis in truncis, qui cordis  
nimis resistens facit ut hoc viscus non omne in  
sanguinem dispellat; aut sanguis ipse per late-  
ralia vasa majora magnâ copia et breviori tem-  
poris intervallo in cor revertitur: quod a ma-  
jori sanguinis copia validius irritatum palpitat.  
Neque secus fit in ira, ac terrore; in quibus  
aut ex perturbata respiratione oritur palpita-  
tio, aut ex sanguine citius et majori quanti-  
tate traducto in cor, sive ob validam muscu-  
lorum contractionem, ut in ira, sive a subita  
et vehementi muscularum et arteriarum con-

cussione ; quemadmodum accidit in terrore . Denique hinc patet quare ingruat palpitatio ex nimio corporis motu : quod enim pertinet ad animi contentiones diuturnas et venerem immodicam , cum causæ istiusmodi partim spirituosis partibus corpus exhaustant , partim solidum infirmit , facile est intelligere . quî fiat ut vel acritates cor irritantes in humoribus subnascantur , vel sanguis per laxa vasa lente motus cordi resistantias objiciat ; ac propterea satis patet quomodo agentia istiusmodi , aliaque ejusdem indolis , ad cordis palpitationem excitandam plurimum possint . Nunc ad arteriarum symptomata sermonem convertimus .

*Quæ conditiones ad pulsum naturalem requirantur.*

*Quid sit pulsus intermittens.*

410. Pulsant arteriæ cuncte urgentur a sanguine allidente ad earum parietes , atque adeo ampliorem sectionem nanciscuntur . Ad hoc requiritur primum , ut cor opportunis viribus polleat : secundo , ut sanguis propulsus , ea copia et densitate prædictus sit , quo in arterias obnitens , eas distendere possit : tertio demum , ut arteriarum parietes sint flexiles , adeoque viribus cedant impellantibus ; deinde se se restituant , et receptum fluidum antrorum urgant , ut excipiendo novo fluido , momento post supervenienti , sint paries . Si altera ex his conditionibus deficiat , tollitur in arteriis ea regularis motuum successio , quæ digitis explor-

plorantibus percipitur ; et quæ dum perstat , ~~et~~ <sup>et</sup> qualis est, aliasque habet dotes , quæ bonum pulsuum constituunt : vitalium functionum integratatem indicat . Sub defectu alterius ex memoratis conditionib<sup>s</sup> variæ pulsuum differentiae præsto sunt : nos , quemadmodum polliciti sumus , intermissionem , interruptionemque si- ve defectum considerabimus ; et primum de intermissione dicemus . Tunc autem pulsus dicitur intermittens , cum integrum saltem tempus ab arteriæ diastole emetiendum , sine diastole ipsa transigitur .

*Causæ pulsus intermittentis ad quot genera referri possint . Ad primum genus quæ causæ pertineant .*

311. Causæ igitur pulsus intermittentis ad duo veluti genera referri possunt ; nempe ad eas quæ faciunt , ut cor certis tempusculis alterne contrahi et relaxari nequeat ; et ad eas quæ impediunt quominus sanguis in cor influat , aut ex eo erumpat . Sunt igitur causæ prioris generis maximam partem ex , quæ faciunt ( n. 407. 408. 409. ) cordis palpitacionem . Nam certe primum id omne , quod cor paullo violentius irritat , ut veluti spasmo cor ripiatur , id potest etiam efficere , ut contractio tantum temporis permaneat , quantum cor , in statu secundum naturam , contractionem absolutivit atque dilatationem . Si cor protinus post contractionem non relaxatur , sanguinem non re-

recipit intra ventriculos , neque proinde impellit intra arterias ; quæ non distentæ non pulsant eo temporis momento , quo prius pulsare consueverunt ; atque hoc illud est , quod pulsum intermittente constituit ; quotiescumque tamen integrum saltem consuetæ dilatationis tempus sine dilatatione decurrat , quemadmodum paullo ante diximus : ubi enim integrum hoc tempus non decurrat , pulsus non intermittens , sed tantum inæqualis dicendus est.

*Quæ vero ad alterum genus.*

412. Causæ autem posterioris generis , quæ nempe impedimento esse possunt quominus sanguis in cor influat , aut e corde erumpat , sunt primum illæ omnes , quæ ad basim majorum venarum , cavæ scilicet et pulmonalis , vel etiam intra cor ipsum ejusque auriculas sedent habent . Igitur venarum prope cor , sinuum , auricularum , cordis ipsius dilatationes morbosæ ; concrementa varia intra harum partium substantiam sensim nata ; rigiditas nimia fibrarum carnearum , quæ has partes componunt , et alia hujus census quæ vim harum partium insitam , et proinde naturalem contractionem inde profectam infirmare possunt , impudent quominus sanguis cordis ventriculos debito tempore subeat , vel hoc præstet copia tam exigua , quæ dilatandis arteriis est impar . Simili ratione cordis aneurysma , quod languorem ponit in fibris componentibus , adeoque imbecillitatem propriæ actionis

actionis ; intermittentem pulsum facit ; quod cordis caro stimuli sanguinis prompte non obediatur. Ita arteriæ majores prope cor vel aneurysmaticæ , vel osseæ , vel nimio sanguine turgentes , vel fere vacuæ et concidentes , cum nequeant omni momento a cordis impulsione dilatari , causæ sunt pulsus intermittentis , adeoque defectus unius saltem diastoles : quæ porro diastoles paullo post , resistentiis illis a corde superatis aut sponte paullisper cedentibus , explorantibus digitis percipietur . Atque hæc summatim sunt ea , quæ pulsum faciunt intermittentem : supervacaneum enim est causas omnes speciatim recensere ; cum ex iis , quæ de respirationis vitiis et cordis palpitatione dictæ sunt , ceteræ quoque causæ facillime cognoscantur .

*Quibus in affectionibus pulsus interrumpatur , seu deficiat . Quid sit Leipothymia . Quid Leipopsychia . Quid Syncope . Quid Asphyxia ,*

413. Brevissime igitur de pulsu interrupto seu deficiente in præsens diceimus . Interrumpitur autem arteriarum pulsus , seu deletur , in animi defectu . Hujus porro defectus quatuor numerantur species , videlicet 1. *Leipothymia* : 2. *Leipopsychia* : 3. *Syncope* : 4. *Asphyxia* : in quibus pulsus ad maius vel minus intervalum temporis interrumpitur . Prior species , nempe *Leipothymia* , ea est in qua et sensus perturbantur , et vires adeo deficiunt , ut cor-

pus nequeat se ipsum sustinere: altera species quæ vocatur *Leipopsymia*; est illa in qua , cum majori virium debilitate , sensus cum internum externi evidentius turbantur ; idest magis quam in *Leipothymia*, quæ censemur levior gradus defectus animi : tertia species , ut diximus , appellatur *Syncope*, et quarta dicitur *Asphyxia*, In ea præter phænomena *Leipopsychie*, eaque paullo violentiora , corpus etiam friget , et gelido sudore perfunditur : in hac vero , nempe in *Asphyxia*, respiratio ipsa supprimitur et cordis motus , adeoque pulsus omnino cessat ; hic autem affectus statim interimit , nisi sponte et protinus remittat, Hi affectus ab iis causis proficiscuntur , quæ pulsum faciunt intermittentem ( n. 411, 412. ) sed majori vi agentibus : quibus vehementiores animi ægritudines ; dolores ingentes , et præsertim *cardialgici* ; diræ viscerum et partium aliarum inflammations ; ac demum graviores sanguinis jactus annumerari etiam debent .

## C A P U T XXXII.

DE SYMPTOMATIBUS PERTINENTIBUS AD  
FUNCTIONES NATURALES, ET PRIUS  
QUIDEM AD PRIMAS DIGESTIO-  
NIS VIAS.

*Quot modis appetitus lœdatur.*

414. **N**aturales functiones, quibus nostris corporis conservationem debemus, variis modis lœduntur; et hæc porro lœsiones sunt totidem symptomata, quæ nunc describere primum aggredimur, causas etiam præcipuas indicaturi, a quibus ea symptomata emanant. Exordiemur autem ab iis symptomatibus, quæ maxime videntur ventriculi propria, et ad eum præcipue ventriculi sensum pertinent, qui *Appetitus* vocatur: quique deletur aut imminuitur, vel augetur, vel depravatur. Hæc enim ad symptomata spectant quæ ventriculi propria sunt; minime vero ad morbos, quibus hoc viscus aliquando obnoxium est, aut quæ in aliis partibus exsuscitat, cum vitio aliquo laborat.

*Quæ sint symptomata appetitus imminutus  
aut deleti. Quæ appetitus aucti. Quæ  
vero depravati.*

415. Imminuitur aliquando appetitus sensus, et

et affectio hæc dicitur Græco nomine *Dysorexia* : si penitus deletur , vocatur *Anorexia* : quod si ipsa ciborum quorumcunque præsentia horrorem moveat et nauseam , hæc affectio *Apositia* appellatur . Interdum autem appetitus incrementum suscipit , et eam affectionem tunc constituit , quam Medici dicunt , *Bulimon* , seu famem bovinam ; et *Orexin cynodem* vel *Cynorexiam* , seu famem caninam . In *Bulimo* sæpe simul adest animi defectus : in fame canina , seu *Cyronexia* , vomitus ingestorum : quod si vomitus non ingruat , sed mutata ingesta cito per sedes dejiciantur , fame iterum sæviente , tunc affectio hujusmodi vocatur *Fames Lupina* . Denique si appetitus augmentum cum ea mentis aberratione conjunctum sit , ut iis veseci appetamus , quæ absurdæ sunt et nutrire non possunt , tunc symptoma istiusmodi , quod appetitus depravatio est , appellatur *Cissa* , aut *Citta* , aut *Malacia* , aut *Pica* ; quamvis , si proprie loquamur , in *Malacia* , res appetantur unius tantum indolis ; contra quam in *Cissa* , aut *Pica* evenit , in quibus appetitus est varius .

*Quæ cause appetitum imminuant vel tollant.*

416. Ad causas quod attinet imminuti appetitus , ex censentur congestiones humorum inertium , viscidorum , ac proinde lentescentium , intra ventriculum : diathesis cancrosa aut

aut ulcerosa humorum ventriculi propter tumores hujus ingenii vel in propria ejus substantia latentes, vel alia corporis loca occupantes: inertia motus peristaltici, et succorum digerentium: suppressæ evacuationes quædam naturales, aut periodicæ, quæ universam humorum massam depravant: animi pathemata et contentiones: vita sedentaria atque iners: mentis aberrationes, quæ molestas sensationes avertunt: demum chronicæ affectiones, quæ solidum infirmant, et vini fluidorum. Ab his causis omnibus et singulis retunduntur naturales eæ irritationes, quæ famis sensum movent; quemadmodum etiam imminui possunt ab aucto motu et sensu ipsius ventriculi, sive ob inflammationem, sive ob peculiarem spasmus, propter quæ irritatus ventriculus animal monet, ut sibi ab iis caveat, quæ ingesta, sub augmento motus vel sensus aut non retinerentur sine molestia, aut per vomitum dispellerentur.

*Quæ appetitum vitiœ augeant.*

417. Auctus appetitus e contrario causas habet in diuturna alimentorum abstinentia, quo humores omnes, ac præcipue ventriculi; acriorem naturam adepti stomachum ipsum irritant, qui præterea in paullo majorem motum incitatus proprios nerveos parietes ad invicem confricat. Adde insolitum eum corporis motum, qui perspirationem multum auget: si-

Caldani Pathol.

B b

mi-

militer quamcumque subitam evacuationem , quæ , deficiente nutritione et languentibus viribus , necessitatem afferat reparationis . Adde etiam vermes in primis viis hærentes , cum ingesti alimenti subtractione , tum blanda irritatione , famis sensum augentes . Idem præterea præstat austra sensilitas , tum et irritabilitas propria ventriculi : prima , quod ex levissimis stimulis ventriculi sensus incitetur ; altera , quod , contracto nimium ventriculo ipso , aut rugæ paullo violentius invicem attenantur , aut contenta intra ventriculum cito ejus cavitate elabantur . Hinc permirum non est si in epilepticis , in hypochondriacis , in hysterics et prægnantibus mulieribus , sensus famis aliquando magnopere increscat : in his enim constitutionibus morbosis altera vel ultraque ex memoratis facultatibus corporis animæ incrementum accepit .

*Quæ vero ipsum appetitum depravent .*

418. Causæ hactenus indicatæ ( n. 416. 417. ) interdum etiam appetitum , seu potius famis sensum , depravant . Hæc tamen depravatio non tam abusui fructuum eorum , qui dicuntur acidi et austeri , tum et mensium suppressioni præcipue in virginibus , quam peculiari bus quibusdam mentis aberrationibus persæpe debetur . Non facile est autem explicare quomodo ex mentis aberratione appetitus depravatio consequatur : cum enim de mentis in cor-

corpus actione sermo est ; circa actionem substantiæ penitus ignotæ versamur . Quicquid sit , mentis aberratio ex eo manifesta esse videtur , quod præter naturam , immo præter rationem omnino videatur , absurdâ quædam avide appetere , quæ esui apta non sunt : neque enim carbones , cera , calcis fragmenta , terreæ moleculæ , filæ , et alia etiam absurdiora , quæ a fœminis præsertim nonnullis in deliciis habentur , et delicatioribus cibis præponi solent , in materiam nutritioni idoneam ullo tempore mutari possunt . Dum hæc contingunt dicere consueverunt Clinici , acidum intra ventriculum et primas vias hærere ; hinc naturæ incitamento laborantes impelli ad alcalica ingerenda , quæ acidi , quasi corrodentis , vim redundant ; et revera non raro fit , ut usu alcalicorum hæc appetitus depravatio tollatur .

*Quæ sedes sitis ejusque cause .*

419. Inter symptomata , seu læsiones functionum naturalium , recensetur etiam sitis , appetitus videlicet potus aquosi ac frigidi , qui tunc homines torquet cum fauces , lingua , œsophagus , atque ventriculus , debita humorum copia non alliuntur , aut viscido ac tenaci perfunduntur humore , aut peculiari aliqua acrimonia irritantur . Quamobrem manifestum est immodicas evacuationes , præsertim aqueas ; humorum densitatem nimiam ; minimorum canarium , qui per tubum alimentorum disseminantur ,

tur, aut obstructionem aut exsiccationem; aquei humoris effusionem intra communes cavitates aut cellulas corporis, quemadmodum fit in variis hydropis speciebus; quasdam demum humorum acrimonias, de quibus peculia-ri capite diximus; haec, inquam, omnia et similia, causas esse molestæ illius sensationis, quæ sitis appellatur.

*Quæ causæ masticationem lœdant.*

420. Cum vero ad cibos sive solidos sive fluidos ingerendos necesse sit, ut partes illæ perfecte valeant, vigeantque, quarum ope eos mandimus et glutimus, instrumenta autem harum functionum interdum lœdantur; idcirco de symptomatibus ad masticationem et deglutitionem spectantibus pauca dicenda sunt. Pluribus itaque modis perturbari potest utraque functio, quia utraque a pluribus instrumentis exercetur. Vitia oris quæcunque, linguae, dentium, maxillarum, tum et cerebri, masticationem lœdunt: nam ulcera oris et linguae; defectus linguae ipsius et dentium; labiorum fissuræ; inaxillæ inferioris luxatio aut fractura; sectio aut destructio muscularum, qui motui linguae, labiorum, maxillarum, ossis hyoidei famulantur; obstructio glandularum, que salivam secernunt; haec omnia nocent masticationi. Idem quoque faciunt cerebri vitia, quæ apoplexiā aut paralysim sive universalem, sive particularem inferunt; spasmi particulares,

res, ut sunt risus sardonicus, et spasimus cynicus; et demum inflammationes, abscessus, et vulnera partium, quæ ad masticationem concurrunt.

*Quæ vero lœdant deglutitionem.*

421. Plurimæ porro harum causarum aut in palato pendulo hærentes, aut in uvula, aut pharynge, aut in larynge, aut in lingua, aut in osse hyoideo, aut in œsophago, aut in superiori stomachi orificio, lœdunt deglutitionem. Partium enim harum vulnera, inflammationes, tumores, ulcera, paralysis, convulsio, dolor, et similia, deglutitionis instrumenta ad proprii munieris exercitium inepta redundunt: his omnibus addere oportet ipsarum partium siccitatem, vertebrarum colli luxationem aut fracturam, proximæ aortæ aneurysmata, quibus pharynx comprimitur, et veluti distorquetur; ac demum cartilagineam naturam in superiori ventriculi orificio, quæ peristalticum œsophagi motum interrupit.

*Quot modis alimentorum coctio lœdatur.*

422. Alimenta vero in ventriculum recepta debent concoqui, ut omnibus notum est; et coctio, seu peculiaris ventriculi actio, quatuor præsertim modis vitiari potest. Aut enim ea omnino impeditur; aut est difficilis; aut est tarda plusquam ratio postulat; aut demum hujusmodi est, ut alimenta corrumpantur po-

tius , quam eam mutationem subeant , quæ *Coctio* dicitur . Prius lœsæ coctionis symptoma vocatur Græcis *Apepsia* ; alterum *Dyspepsia* ; tertium *Bradypepsia* ; quartum denique *Diphthora* .

*Quæ causæ lœdant alimentorum coctionem .*

423. Quod attinet ad causas horum symptomatum , ex nihil aliud sunt prosectorum quam perturbatio seu defectus causarum earum , quæ simul junctæ naturalem alimentorum coctionem perficiunt ; quæque , ut nemo non novit , censentur esse calor , motus , aer cum intra ventriculum tum intra cibos conclusus , demum , et quidem precipue , succi digerentes , qui dicuntur *gastrici* , quos inter saliva non infimum locum obtinet . Cum igitur in Physiologix elementis docuerimus , quantum et quomodo causæ istiusmodi ad coctionem faciant , et cuius debeant esse ingenii , seu quantarum virium , ut alimenta recte subigant , hinc recessus a statu secundum naturam in causis istiusmodi poterit alterum ex memoratis ( n. 422. ) vitiis afferre . In genere horum symptomatum causæ ex sunt , quas ( n. 416. ) indicavimus ; ex videlicet , quæ appetitum aut imminuunt , aut tollunt ; præsertim vero indoles vapida sacerorum digerentium ; vel eorum defectus ; natura viscida ac tenax eorum quæ ingeruntur ; ac demum quicquid putridum intra ventriculum effunditur .

*Quæ*

*Quæ alia symptomata ad lœsam ventriculi actionem pertineant. Quid sit Singultus.*

424. Alia etiam symptomata lœsam ventriculi actionem significant; enim vero *Singultus*, *Ructus*, *Nausea*, *Vomitus*, symptomata sunt, quæ ad lœsam ventriculi functionem spestant. Definitur autem *Singultus* momentaria convulsio, quæ stomachum, diaphragma, œsophagum, et glottidem uno eodemque tempore aggreditur, aut saltem successione adeo celeri, ut successio ipsa animadverti non possit. Ex hac porro convulsione fit, ut brevissima ac simul velocissima inspiratione peracta, aer aut ad glottidem aut ad fauces impetu allidat, sic, ut sonus pariter momentarius excutiatur.

*Quæ ejus cause.*

425. Partes quæ in Singultu convelluntur insimul junctas esse docet Anatome: notum est enim ventriculo continua esse intestina, quorum interior præsertim tunica partibus paullo ante indicatis communis est; et quorum vasa cum plurimis abdominis visceribus communicant: demum patet horum abdominalium viscerum plura humores præparare; qui secundum naturam intra intestinorum cavitatem effunduntur. Non mirabimur igitur quâ fiat, ut irritatio quæcunque, sive proxime sive re-

mote , ventriculo , diaphragmati , œsophago ; laryngi illata , singultum movere queat , et proinde affectio hæc plurimis interdum a gritudinibus sit adjuncta . Et revera grandiores ciborum boli , iique præsertim non bene subacti , proindeque asperi , vel austera indole prædicti ; grandiores pariter sorbitones , quæ pharyngeum et œsophagum nimis distrahan , quandoque Singultum movent . Idem præstant ventriculi distensio nimia ab ingestorum copia ; vis alimentorum acrum , et præcipue medicamentorum valide purgantium ; acris humorum natura per quamcunque viam intra ventriculum illabentium ; spasticæ affectiones ; inflammations viscerum abdominis , aut pulmonum , aut diaphragmatis ; risus immodicus , tum et frequens tussis ac molesta , quæ duo diaphragma concutunt vehementer ; costarum earum fractura , quibus diaphragma annexitur ; hujus visceris vulnera , aut lœsiones aliae ; evacuationes immodicæ , quæ nervorum sistema magnopere perturbant , atque hinc vehementes animi affectiones , et nervorum vitia . Hæc autem omnia , quæ Singultum movent , non eadem ratione movent ; modo enim Singultus facile vanescit ; modo magna cum difficultate ; immo quandoque ejus est naturæ , ut inter lethalia signa recenseatur .

*Quid sit Ructus , et quot ejus species .*

426. Post Singultum de Ructu dicemus , qui de-

definitur subita aeris e ventriculo per os erumpentis explosio cum sonitu. Ructuum alii *naturales* dici possunt, alii vero *præternaturales*. Priorēs post assumpta alimenta ut plurimum sine molestia exploduntur; neque propterea inter inorbosa symptomata recenseri possunt. Contra, posteriores molesti sunt; et vel difficulter erumpunt, unde intumescit ventriculus cum dolore; vel aciditatem, putredinem, nidorem orent; ac propterea aut vitiatam alimentorum coctionem, aut pravorum succorum congestionem significant.

*Quæ eorum causæ.*

427. Si igitur ructuum natura in aeris per os explosione sita est, ructus facient ea omnia, quæ ventriculum nimis distendunt, aut comprimunt, aut irritant; quo contentum aereum per superius orificium impetu dispellat. Huic autem ventriculi constitutioni, quæ ad ructus explodendos requiritur, occasione in præbent causæ illæ, quas protinus commemoro. Ingesta cruda et copioso aere turgentia, quemadmodum sunt cerealia omnia; fructus illi, qui dicuntur *Horxi*, cum austeri tum acidi; quicquid aliud facile fermentescit, aut ad putredinem prouum est; quorum porro agentium vis in ventriculum est satis manifesta. Ceterum tristia præsertim animi pathemata; spasticæ affectiones atque hypochondriacæ; morbi intestinorum ac partium, quæ infimo ventre

con-

continentur, in ventriculum suas aliquando vires ea ratione exercent, ut ructum pariant. Id autem efficitur vel quia istiusmodi ægritudines languorem partibus omnibus inferunt, adeoque etiam ventriculo, qui propterea ad cibos concoquendos fit ineptus; unde postea ructus vel a vitiata ciborum coctione ortum ducunt, vel a ventriculi debilitate, qui aerem et *gasticum* fluidum cum ingestis mixtum nequit inferius determinare; ( id quod etiam propter ventriculi immobilitatem in spasticis quibusdam affectibus evenire potest ) vel quia partes occupant cum ventriculo continuas; vel quia proprium humorum ventriculi circuitum propter vasorum communiones pervertunt; vel deinceps quia ventriculus in his morbis constitutionibus aut violenter comprimitur, aut irritatur. Ab his causis omnibus et singulis ructus oriri possunt: cum enim libera sit aeris aut subeuntis, aut fixi, ut dicunt, communicatio cum in ventriculo tum in intestinis contenti ita, ubi vis ejus elastica; augetur in istis, nec viam legit inferiorem, irrumpt aer ipse in ventriculum, et inde ope ructuum expellitur.

*Quid sit Vomitus, et quæ ejus cause.*

428. Inter symptomata lœsæ functionis ventriculi numeratur etiam *Vomitus*, qui dicitur molestæ ac violentæ rejectio per os eorum, quæ ventriculo continentur, aut intra ipsum ex-

**e**x vicinis visceribus confluunt . Oportet igitur, in vomitu , fibrarum ventriculi motum inverti , ut ea superius disspellat , quæ inferius dejicere solet . Fabrica autem muscularis ; glandulosa , cellularis , vasculosa , et nervea ipsius ventriculi ; ejus actio et vis , quæ a plurimarum partium integritate pendet ; connexio cum aliis visceribus ; exquisita ejus sensilitas ; hæc porro omnia faciunt , ut vix aut ne vix quidem dici possit quot de causis vomitus cieri queat . Ne igitur modum excedamus , has causas omnes eas esse dicimus , maximam partem , quæ appetitum imminuunt , augent , depravant ( n. 416. 417. 418. ) ; quæ coctionem alimentorum impediunt , perturbant , retardant ( n. 423. ) ; quæ organa urinaria ( præterquam vesicam ) tum et alia viscera in abdomine contenta divexant ; quæ demum Singultum faciunt , aut ructum ( 425. 426. ) præsertim si hæ violentius agant , quibus causis omnibus addere oportet irritationes faucium ; narium internarum , pharyngis , atqua cœsophagi : has enim irritationes vomitum facere omnibus perspicuum est .

*Quid sit Nausea ; et a quibus causis oriatur .*

429. Vomitioni affinis est *Nausea* ; quæ plerunque vomitum antecedit ; interdum autem sola etiam ingruit . Definitur inanis vomendi conatus , cum anxietate , et affluxu humoris tenuis ac pellucidi intra os . Videtur igitur esse levis

levis ventriculi spastica contractio, quæ motum fovet ipsius ventriculi inversum; ab iisdem causis nata quæ vomitum faciunt, sed minori vi agentibus; sive quod reipsa minus irritent, sive quod individua nonnulla ventriculum ita habeant constitutum, ut, vel nulla ratione, vel adinodum difficulter, proprium ac naturalem motum invertat. Cum autem sub nausea humores intra os redundant, atque affectio hæc sensum exhibeat globi fauces obsidentis; propterea causa nauseæ proxima in convulsione œsophagi aut pharyngis videtur statuenda; etiamsi quæ causæ huic convulsioni occasionem præbet intra ventriculum consistat. Ita quippe intelligitur cur ex violenta pharyngis aut œsophagi contractione tanta fiat ex muciferis fontibus, aliisque, humorum expulsio; et cur globus suffocans fauces obstruere videatur; et deinde cur nausea interdum inferatur a quibusdam si- ve medicamentis vix ore assumptis, adeoque prius quam stomacho excepta fuerint. Diximus hujus affectionis causas easdem esse cum iis, quæ vomitum faciunt: nihilominus ad eam plurimum etiam concurrunt præsentia aut memoria siue alimentorum quæ olim nauseam et vomitum excitarunt, sive rei alicujus foedæ ac putridæ; corporum circumstantium rotatio; velox motus in curru aut navi; quo objecta omnia motu agi celerrimo, et retro aut ante fugere videntur: hæc enim omnia primum in communi sensorio, deinde in œsophago et ven-

tri-

triculo eam afferunt mutationem , quocunque modo id præsent , que ad nauseam aut vomitum requiritur .

## C A P U T XXXIII.

## DE SYMPTOMATIBUS PERTINENTIBUS AD SECUNDAS PRÆCIPUE DIGESTIONIS VIAS .

*Quæ sint secundæ digestionis viæ , et quæ earum symptomata .*

430. **S**ecundas digestionis vias eas appellamus , quæ intestinorum nomine comprehenduntur . Præcipua autem symptomata , quæ intestinorum sunt propria , et quæ indicanda constituimus una cum eorum causis potioribus , sunt *Cholera* , *Lienteria* , *Affectio Cæliaca seu Fluxus Cæliacus* , ut alii dicunt , *Diarrhœa* , *Dysenteria* , *Colicus Dolor* , et *Passio Iliaca* . De his ordine dicemus .

*Quid sit Cholera , ejusque causa proxima .*

431. *Cholera* est affectio composita ex vomitu et alvi fluxu ; est enim ingens ventriculi et intestinorum agitatio , quæ facit , ut quicquid in iis continetur , aut intra eorum cavitatem influit , sursum simul atque deorsum violenter expellatur . Est igitur *Choleræ* causa proxima violentus et inordinatus horum viscerum

motus, qui propterea inter motus spasticos ab Auctoribus merito recensetur. *Inordinatus* dicitur, non solum propter viam atque celeritatem huic ipsi adjunctam, verum ob id maxime quod antiperistalticus præter consuetudinem peristalticum motum exsuperat.

*Quæ sint cholerae causæ occasioneſ.*

432. Cum vero auctus motus in partibus, quæ muscularibus tunicis sunt intertextæ, ponat irritationem, cui occasionem præbet non modo quidquid pungit, erodit, dilacerat; verum etiam omne id, quod ipsas fibras carneas et sentientes paullo violentius distrahit: hinc ad *Choleram* movendam facit quicquid acre, acidum, austерum, alcalicum, biliosum, putridum, præter naturam intra ventriculi et intestinorum cavitatem descendit; sive alimentum fuerit, sive medicamentum, sive humor pravae naturæ; isque vel a peculiari eorum viscerum labe suppeditatus, vel a peculiari eorum viscerum aut partium, quæ proxime aut remote, nempe per circulationis vias, cum ventriculo communicant aut intestinis. Hinc prava alimenta, aut etiam non prava sed immodecā copia assumpta; fructus *horæi* vel magna quantitate ingesti, vel vitio aliquo infecti, et præsertim sub fermentatione plus minus inchoata; uvæ; earum succus; cerevisia; spiritus aut liquores fermentescentes; cerealium abusus; alimenta parum coqua; farinosa; quæ omnia magnam continent

fixi aeris vini; aer nimis calidus bilem ferme corruptens, adeoque intestina valide irritans et stomachum; ob duodeni viciniam; denum purgantia quædam validiora, tum et venena nonnulla, causæ sunt aptissimæ quæ Choleram faciant.

*Quid Lienteria, ejusque causa proxima. Num causa hæc cum phenomenis conveniat.*

433. *Lienteria* est ea cum ventriculi tum intestinorum affectio, in qua alimenta solida neque cocta neque corrupta, adeoque parum vel nihil mutata, per sedes celerrime dejiciuntur. Ejus causa proxima communiter censemur laxitas pylori, et vapida succorum digerentium natura, quibus fiat, ut alimenta propriam formam servantia solis respirationis viribus propellantur. Nos vero, cum ad promptissimam alimentorum expulsionem animum advertimus, causam *Lienterie* proximam dicimus nimiam cum ventriculi tum intestinorum irritabilitatem, qua nequeunt ingesta quantum par est retardari, ut concoquantur. Posita enim sola pylori laxitate, fortasse hypothetica, et vapida succorum digerentium indole, non satis videtur explicari posse qua ratione fiat, ut ingesta cisisse eliminentur. Naturalis quippe respiratione, sub his etiam circumstantiis, ad celerrimam dejectionem promovendam non apta forasse est; cum neque respiratio anhelosa et valida id præstet, quemadmodum quotidiane

Osten-

ostendunt observationes ; neque laxitas ipsius ventriculi, quæ comitari deberet pylori laxitatem, phænomena satisfaciat celeritatis, qua ingesta alimenta in hoc morbo per sedes dejiciuntur. Laxus quippe ventriculus alimenta citato per pylorum propellere nequit . Et revera illa etiam phænomena , quæ interdum *Lienteriam* præcedunt , eam sententiam , quam modo proposuimus , confirmare videntur : nam sæpe *Cynorexia*, seu fames canina, solet ipsam *Lienteriam* anteire . Ceterum si *Lienteria* quandoque occurrat sine egestionis celeritate , tunc sane pylori laxitas , et vapidum succorum divergentium ingenium accusari posset .

*Quæ causæ occasioñales Lienterix.*

434. Huic affectioni occasionem præbent causæ illæ , quas nunc commemoro : nempe ex omnes , quæ ventriculi et intestinalium irritabilitatem augere possunt . Sunt autem morbi prægressi indolis spasticæ aut convulsivæ ; venena assumpta ; vis medicamentorum purgantium acriorum , tum et alimentorum ejusdem ingenii , fungorum puta et fructuum , qui facile putrescunt ; acris humorum natura , qui ex aliis visceribus aut partibus procedentes , intra ventriculi cavum effusi , ipsum ad violentam et promptissimam contractionem sollicitant ; accuratum nimis vivendi genus , unde insolita quecunq; ingesta aliquando ventriculum in motus impellunt , qui sunt præter naturam .

Hæc

Hæc omnia eo violentius agunt in ventriculum, et propterea *Lienteriam* producunt, si anni tempus æstivum fuerit, aut perversa quæcunque cœli constitutio, ætas junior, sexus fœmininus, naturalis mobilitas paullo major: enim vero in his omnibus circumstantiis solidum ad summam mobilitatem est maxime dispositum, quoniam magis est irritabile.

*Quid sit Affection Cœliaca, ejusque causa proxima.*

435. Parum differt a *Lienteria* symptomata illud, quod dicitur *Affection Cœliaca*, quæ a non nullis propterea vocatur *Semilienteria*. Discri men ex definitione patet: enimvero definitur *Fluxus Cœliacus* symptomata illud, in quo excre menta alvi, plerumque liquida, albo seu chy loso humoris sunt intermixta. In eo igitur si tum est discriminem; quod in *Affectione Cœliaca*, contra quam fit in *Lienteria*, ventriculi vires, tum et aliarum causarum digerentium, viden tur integræ: neque enim chylus dejici posset ubi ex vires essent infirmæ, propterea quod chylus ipse ex alimentis nequaquam eliceretur. Censetur igitur proxima *Fluxus Cœliaci* causa non alia, quam impedita chyli seu resorptio, seu impulsio in vasa lactea.

*Quæ causæ fluxus cœliaci occasio nales.*

436. Jam vero hujus affectionis causæ sunt illæ omnes, quæ chyli resorptio et progressus Caldani Pathol. C c per

per lactea vasa objiciuntur. Morbi propterem omnes, qui solidum valde infirmant, hic debent revocari: item obstrunctiones glandularum mesenterii, tum et villorum intestinalium, qui sunt lacteorum radices: imminuta lacteorum, tum et intestinorum, irritabilitas: qua languente, intestina, non satis contrafacta, chylum in lactea non impellunt, lactea autem ipsa receptum chylum non promovent; respirationis vires multum fractae: tumores ad lactea vasa majora, ad cisternam, ad thoracicum ductum accumbentes: demum morbi, et affectiones propriæ intestinorum, quæ et motus languorem afferunt, et vasorum absorbentium obstructio[n]em, aliaque his similia.

*Quid sit Diarrhœa ejusque causa proxima.  
Quot species Diarrhœe.*

437. Quæcunque alvi dejectio liquida, et frequentior, quam esse solet in statu secundum naturam, atque ex consuetudine, non sine aliquo dolore, appellatur generali quodam vocabulo *Diarrhœa*: cuius proinde proxima causa motus peristaltici incrementum est. Dicimus cum plerisque quamicunque liquidam dejectiōnem hoc nomine donatam esse, propterea quod aliis sincerorum humorum effluxus, aliis vero sive bilis, sive mucus, sive pinguedo, sive aqua, sive quid putridum copiose aut frequenter per alvum dejiciatur, *Diarrhœa* semper dicitur; quamvis nonnulli ad peculiarem humo-

ris excreti naturam indicandam, appellare soleant *Diarrhœam biliosam, mucosam, pinguedinosam, aqueam vel serosam, putridam* &c. Cum autem intestina ingens humorum copia naturaliter influat, et magna humorum pars, quæ intra intestinorum cavitatem effunditur, per vasa inhalantia sanguini reddatur; idcirco ad diarrhœam necessaria est aut major humoris cuiusque redundantia intra intestina, aut sive obstructio sive inertia vasorum inhalantium; quæ proinde proprio officio vel omnino vacent, vel quadantenus.

*Quæ cause occasioneles Diarrhœæ.*

438. Igitur potus copiosi, sive calidi sive frigidi, ubi ii non protinus ad renes traducti, vel ad cutis vascula, in similem urinæ vel sudoris copiam facessant: defectus aquearum excretionum, et præcipue insensibilis perspirationis: morbi chœnici, qui aut solidum valde infirmant, et proinde etiam robur intestinorum, quæ laxata copiosis humoribus excipiendis fiunt maxime idonea; aut multum imminuant naturalem humorum cohaesionem, qui propterea per exhalantia intestinorum vasa facile effluunt: acritates humorum quæcumque a partibus corporis per circulationis vias ad intestina traductæ: acria alimenta aut medicamenta: corruptio ciborum intra ventriculum: nimia horum ingestio: inflammationes, ulcera, ascessus, pustulæ seu *Aphætæ*, ut dicunt; intestinorum ver-

mes intra horum cavitatem degentes · morbi spastici : difficilis dentium eruptio : ira : nimia humorum exagitatio , et proinde calor nimius , atque hinc acutæ et ardentes febres : cibi duri , crassi , difficulter digerendi : abusus fructuum , rerum fermentantium , spirituum ardentium : obstructions mesenterii , aliaque hujus census ; hæc , inquam , omnia *Diarrhœam* mouere possunt .

*Quid sit Dysenteria ejusque causa proxima .*

*Quid Tenesmus . Num tenesmus semper cum dysenteria conjugatur .*

*Cause dysenterie ac tensesmi occasioneles .*

§39. A *Diarrhœa* non valde distat *Dysenteria* , quæ definitur *Diarrhœa* cum dolore : et habet propterea causam proximam cum diarrhœa ipsa communem . Est igitur *Dysenteria* liquida alvi dejectio , sed simul putrida ; in qua graveolentia , et corrupta , et mucus intestinorum ad nervorum tutamen datus , et carunculae , et sanguis interdum una cum his dejectionibus admixta sunt . Illius muci absentia facit , ut ex intestinorum quasi dicam nuditate , tanta fiat a contentis irritatio , eaque presertim in recto intestino , qua excitetur molesta illa affectio , quæ *Tenesmus* dicitur , et definitur irritum plerumque deiiciendi desiderium . Neque tamen existimandum est *Tenesmum* sine *Dysenteria* esse non posse : interdum quippe rectum in-

intestinum ab acri aliquo irritatum ( et præcipue ab omni eo , quod aut ejus mucum verit , aut hujus separationem impedit ) vel a corpore sive distendente sive comprimente, *Tenesmo* laborat . Nam ex irritatione valida contractum violenter , veluti in globum effingitur , qui fallacem sensum corporis exitum molientis mentitur : id quod pariter fit si extraneo aliquo corpore ipsum intestinum urgeatur . Hinc liquet quomodo causæ illæ , quæ *Diarrhœam* faciunt , paullo violentius agentes faciant etiam *Dysenteriam* ; et qua ratione vermes illi , qui dicuntur *Ascarides* , recto intestino inhærentes ; ejusdem intestini inflammatio ; vasa hæmorrhoidalia multum distenta ; calculus vesicæ ; fætus caput in parturiente muliere rectum intestinum comprimens ; esse possunt immo sint quandoque causæ , quæ valeant *Tenesmum* excitare .

*Quid sit Dolor colicus , ejusque causa proxima.*  
*Quæ colici doloris species .*

440. Quicunque intestinorum dolor communi quedam nomine *Colicus* dicitur a nonnullis : quamvis , proprie loquendo *Colicus dolor* dici debeat ille , cuius sedes est in intestino *Colo* . Ejus autem causa proxima distensio est aut irritatio ipsius intestini . Quid sit dolor alibi diximus ; ( n. 247. ) materialis autem , ut loquitur , doloris causa in genere , et proinde *Colici* etiam doloris , creditur id omne , quod

compungere , discindere , distendere , uno verbo irritare potest sentientes intestini *Coli* fibras. Inde *Colica* affectio a Medicis plerisque dicitur vel *flatulenta* , vel *convulsiva* , vel *humoralis* , vel *inflammatoria* , pro ut ea , vel a retentis flatibus , vel a spasmo , vel a putridis humoribus , vel a retardatis fæcibus , vel demum ab ipsius *Coli* inflammatione originem ducit : quæ porro nomina , certe magnam partem barbara , propter consuetudinem retinemus .

*Quæ colici doloris causæ occasioneſ .*

441. Hujus affectionis causæ plures sunt : nos recensebimus communiores . Esse autem solent abusus fructuum eorum , qui *hor. ei* dicuntur ; vel eorum alimentorum , quæ farinosæ sunt , non fermentata neque cocta ; in quibus omnibus magna inest fixi aeris vis . Abusus pariter earum rerum , quæ copioso glutine turgent ; vini et spirituum fermentantium aut fermentatorum potus nimius ; sedentaria vita atque iners , quæ pravos humores ac fæces congregat in intestinis ; vermes intestinalium ipsumrum ; bilis , aut ex ira , aut ex nimio calore , aut ex alia causa , acrior facta ; aliaque similia , quæ aut inertium et crudorum humorum congestionibus occasionem præbent ; aut peculiaribus suis qualitatibus intestina irritant ; aut demum , velut fit in morbis spasticis , intestinalium irritabilitatem et sensum adeo augent , ut ea ex naturalibus etiam stimulis convel-

lan-

lantur nimis , aut præter modum commoveantur .

*Quid sit Affectione Iliaca , ejusque causa proxima .*

442. Superest modo ut de *Iliaca passione* pauca subjungamus . Est autem hoc symptoma , quod Græcis dicitur *Ileus* , aliis , nomine neque Latino neque barbaro satis noto , *Volvulus* , vulgo demum *Miserere mei* , est , inquam , hoc symptoma affectio illa , in qua ea per os rejiciuntur , quæ per alvum excerni deberent : nam quicquid vel cibi , vel potus , vel medicamentis titulo assumptum fuit , evomitur cum impetu , non secus ac chylus , bilis , humores quicunque intestinorum , fæces , clysteros . Ex quibus omnibus satis constat affectionem hanc a voinitu differre solo intensionis gradu ; et causam ejus proximam esse auctum motum intestinorum inversum , seu , ut ajunt , retrogradum , quo scilicet fit , ut ea superius erumpant cum impetu , quæ alias inferius blande promoveri solent .

*Quæ causæ occasibnales iliaceæ passionis.*

443. Igitur quicquid intestina paullo violenter irritat , et simul efficit , ut motus peristalticus elangueat , antiperistalticus autem incrementum suscipiat , erit direcione hujus affectionis causa . Itaque , si de causis loquimur , ut ita dicam , interioribus , inflammations intestino-

rum præsertim tenuium; eorum compressiones; herniæ; tumores ipsorum intestinorum, aut partium intestinis accumbentium, possunt *Iliacam Affectionem* inferre; hæc enim omnia dum distensione, pressione, congestione, peristalticum motum interrumpunt, naturalibus stimulis permanentibus; aut novis supervenientibus, intestinum divexus, quod propterea in motus violentos atque retrogrados adducitur.

*Quæ aliæ iliacæ affectionis causæ occasio[n]ales.*

444. Verum inter causas *Iliacæ passionis*; quæ dici possent exteriores, aut evidentes, numerantur etiam emetica aut purgantia paullo violentiora; fungorum malignorum aut degenerantium esus: sudor aut perspirabile repente vanescens: fructuum abusus: ira: violentum nimis corporis exercitium: tum quicquid putridum aut irritans sive per os assumptum, sive ex aliquo corporis parte per circulationis vias intra intestinorum cavitatem influens, ipsa intestina exstimulare potest. Propterea ad harum causarum classem debent referri cetera ea, fere omnia, quæ Vomitum (n. 428.), Nauseam (num. 419.) et Choleram (num. 432.) interdum movent.

*An intussusceptio sit causa affectionis iliacæ.*

445. Ob hanc rationem, seu propter hunc agendi modum, etiam intestinorum intussuscep-

sceptio seu indigitatio , quenadmodum dicunt Medici , inter causas *Iliacæ Affectionis* a plerisque recensetur : dum enim intestini pars aliqua intra propriam cavitatem adjacentem recipitur , velut fit cum *chirotheca* , seu manica manibus inversa educitur , cuius digitus in propriam cavitatem non exigua parte retorti manent atque inversi : dum , inquam , hoc fit , certe nata inde compressio , aut congestio , aut inflammatio , et potest peristalticum motum interrumper , et intestinorum tubum eo loco irritare . Verum cum non raro occurrant in cadaveribus peculiares intestinorum indigitationes , neque tamen *Iliaca Passio* anteiverit ; et cum præterea in animalibus de industria dissectis accidentales quædam indigitationes proprio intestinorum motu vanescant ; idcirco non semper , ubi aliæ causæ *Ilei* evidenter deficiant , indigitationem accusare debemus . Nihilominus indigitatione paullo diutius permanens potest *Iliacam Passionem* afferre ; atque hanc ipsam indigitationem , causam esse præcipuam *Affectionis Iliacæ* endemicæ in Jamaicæ incolis , Bartholinus testatur .

*Num a sola intussusceptione partis inferioris  
hæc affectio nascatur.*

446. Cum vero nuper vulgatum fuerit tunc solum ab indigitatione iliacam passionem exoriri cum pars intestini inferior in superiorem re-

recipitur ; operæ pretium erit opinionem hanc, quam ex observationibus natam fuisse dicunt, ad examen brevissime revocare . Non contendimus igitur, ut ex hactenus propositis manifestum est , quin intussusceptio diræ hujus affectionis causa aliquando esse possit . At cum non raro viderimus, hunc intestinorum statum, **morbum**, cui *volvulo* nomen, non intulisse: et cum intestinorum tenuium tubus sensim diametro arctetur quo magis ad finem properat, hinc neque semper indigitatio etiam præsens *Ileum* **morbum** excitare valet, neque, si id præstat, hoc ideo semper fit quia pars intestini inferior intrat in superiorem : propterea nimirum quia major esse debet compressio et strangulatio cum pars intestini superior in inferiorem recipitur, quæ angustior est . Quod si pars intestini superior inferiorem intrat minima portione , atque ideo in exiguo strangulatu cibis descendentibus aliqua pateat via, *Ileum* **morbum** tunc minime locum habere existimaverim.

## C A P U T XXXIV.

DE SYMPTOMATIBUS PERTINENTIBUS AD  
VIAS URINÆ.

*Quot symptomata ad urinæ vias pertineant.*

*Quid sit Ischuria. Dysuria. Stranguria. Quot sint Ischurie species.*

447. **Q**Uatuor præcipue symptomata urinæ viis insidentia solent a Pathologis pertractari. Sunt autem *Ischuria*, *Dysuria*, *Stranguria*, et *Diabetes*. De hac postrema renum affectione alibi ( n. 287. ) a nobis dictum fuit, proptereaque nunc de reliquis ex ordine sermonem habebimus. *Ischuria* igitur definitur omnimoda urinæ retentio. *Dysuria* est affectio illa, in qua urina difficulter excernitur, plerumque etiam cum dolore; et aliquando imminenter *Ischuriam* prænuntiat, quatenus illi prægredi solet. Quod si urina cum ardore exeat et guttati, tunc affectio hæc vocatur *Stranguria*. Non absurde dici posset vesicæ *tenesmus*, ut enim *tenesmus*, qui proprie pertinet ad rectum intestinum, est irritum plerumque dejiciendi desiderium; ita in *Stranguria* conatus mingendi sæpe ægrum fallit,

*Quot*

*Quot sint Ischuriæ species.*

448. *Ischuria* dividi solet in veram ac spuriam. Ea conjuncta semper est cum dolore; hæc autem sine dolore est. Hoc ideo fit, quod vera, causam habet in vesica aut partibus cuius vesica proxime cohærentibus: spuria vero pendet a renum vitio: Igitur in *Ischuria* vera retinetur urina intra vesicam; in spuria, urina in renibus non separatur.

*Quæ faciant Ischuriam spuriam. Quæ his occasionem præbeant.*

449. Dicemus primum de causis, quæ faciunt *Ischuriam* spuriam, quæ cum a renum vitio proficiscatur, idcirco quicquid comprimit, obstruit, spasmo afficit renum vasa, erit causa *Ischuriæ* spuriæ. Huc propterea revocantur tartareæ concretiones; copiosæ arenulæ, calculi; muci congestio; inflammatio renum ipsorum; tumores vel renum proprii, vel partium vicinarum: demum sanguis ipse paullum grummosus renalibus vasculis impactus: hæc enim omnia liberum humorum iter per vasa renum intercipiunt. His autem agentibus ansam præbent spasticæ et convulsivæ affectiones; calculosa labes hæreditaria; abusus fructuum eorum, qui dicuntur acido-austeri; farinosa, præcipue non fermentata; potus nimius liquorum fermentatorum, aut reipsa fermentescentium; plethora universalis; et ea sanguinis diathesis, quæ di-

citur phlogistica ; hæc enim renum vasa aut stimulis constringunt nimis , aut obstruunt, aut debilia reddunt et inertia . Demum ad causas hujus affectionis pertinent etiam percussionses ad lumbos atque alia similia , quæ renūm structuram et robur ita infirmant, ut ruber sanguis in secretorios renūm tubulos urgeatur .

*Ad quot classes referri possint causæ ; quæ faciunt Ischuriam veram , Dysuriam et Stranguriam.*

450. Causæ Ischuriae veræ una cum iis recenseri debent , a quibus Dysuria et Stranguria ortum habent ; propterea quod harum affectionum omnium causæ sunt communes . Immo cum gradu tantum differre videantur affectiones istiusmodi , idcirco eædem causæ quæ violentius agentes Ischuriam veram movent , si minus valide agant Dysuriam faciunt aut Stranguriam . Harum vero trium affectionum causæ ad quatuor Glasses referri possunt . Prior est earum , quæ sedem habent in vesicæ substantia : secunda earum , quæ spectant ad retentia intra vesicam : tertia earum , quarum sedes est in partibus cum vesica coherentibus : quarta demum classis eas causas complectitur , quæ urinam retinent ex vitio urethræ .

*Causæ pertinentes ad primam classem :*

451. Ad primam classem pertinent inflamm-

ma-

mationes ipsius vesicæ; internæ exulcerationes; et præcipue ad ejus collum; nimia contractio, a stimulo quocunque nata, earum fibrarum carnearum, quæ pseudo-spinsterem musculum constituunt: et propterea affectiones etiam spasticæ et convulsivæ; distentio nimia ipsius vesicæ ex urina diutius quam par est retenta, quo paralytica fiat tunica ejus carnea, adeoque impos ad contractionem; denum ob eandem causam paralysis ipsius vesicæ a vitio cerebri aut nervorum orta, quemadmodum in apoplexia, in paralysi, in morbis soporosis, in fractura vertebrarum aut dorsi aut lumborum, aliquando contingit.

#### *Ad secundam.*

452. Retenta intra vesicam, quæ constituunt secundam causarum classem (n. 450.) sunt calculi, pus, sanguis, mucus supervacaneus, carposæ excrescentiæ, extranea quedam in vesicam indita, et denum acredo nimia retenti lotii. Priora omnia urethræ ostio apposita impediunt urinæ iter; et urinæ acredo facit, ut vesicæ collum violenter contrahatur;

#### *Ad tertiam.*

453. Vitia porro partium, quæ vesicæ sum proximæ, et *Ischuriam* veram faciunt, ac propterea referri debent ad tertiam causarum (n. 450.) classem, sunt graviditas; corpora extranea, aut siccæ duræ, quæ intra rectum in-

testinum aliquando consistunt ; uteri tumor ,  
inflammatio , et procidentia ; hæmorrhoides plus  
timum tumentes ; tumores ad vesicæ collum ,  
ad prostatam , ad seminales vesiculas , ad vi-  
cinia . Hæc quippe omnia , vesicam ejusque  
collum prementia , impedimento sunt ne urina  
reddatur .

Ad quartam .

454. Spectant demum ad quartam classem  
ulcera urethræ ; calculi in urethræ canalem im-  
pacti ; carnes intra hunc succrescentes ex ul-  
cusculis , quæ plerumque soboles sunt gonor-  
œœ virulentæ aut præsentis aut toleratæ ;  
et carunculae nonnullis dicuntur ; quæ rarius  
quam nonnulli putant occurruunt , et sæpius cum  
cicatricibus ulcerum confunduntur . Nam agen-  
tia istiusmodi urethræ cavitatem partim ob-  
struentia , aut adstringentia , partim spasmum  
excitantia , ob exquisitum urethræ sensum  
aptissima sunt ad urinæ suppressionem .

455. Ex hactenus constitutis ( n. 451. 452.  
453. 454. ) manifestum est horum symptomato-  
rum causas plerumque intra corpus consistere ;  
et præterea tum morbos diversos , tum plura  
ex iis agentibus , quæ ( n. 440. ) commemo-  
ravimus , iisdem symptomatibus occasionem præ-  
bere posse .

## C A P U T XXXV.

**DE SYMPTOMATIBUS PERTINENTIBUS AD  
LÆSIONEM SENSIBILUM QUA-  
LITATUM .**

*Quid sensibilium qualitatum nomine intel-  
ligendum sit .*

456. **C**um dicimus *qualitates sensibiles*, partium calorem intelligimus, odorem peculiarem, colorem, duritiam, magnitudinem, superficiem, et similia; quorum aliqua non tam solidis partibus convenient, quam fluidis, et præcipue excretis. Nemini ignotum est in morbis quibusdam calorem augeri vel imminui; fluida, et præsertim excreta, in suis qualitatibus ita mutari, ut vel colorem alium præferant, vel gravem odorem spirent; partes quasdam in proprio ac naturali colore perverti; aut diversæ indolis maculis pingi (num. 321.), alias obdurescere, aut in propria strutura laxari, alias grandescere, decrescere alias, demum alias propriam asperam superficiem in levem mutare, aut contra. De mutatione igitur harum qualitatum, quæ inter symptoma merito recensentur, nonnulla leviter attingemus.

*Unde*

*Unde caloris incrementum oriatur.*

457. Caloris augmentum agnoscit pro causis phlogisti copiam, violentum humorum motum per vasa, tum et validam ipsorum vasorum vim, quo, dilatata quantum par est, æquis viribus resiliant, et contentum fluidum promoveant atque atterant. Ad hoc autem opus est ut fluida, in propria crasi, opportuna prius densitate non careant, et copia non deficiant; secus vasorum latera, non satis compulsa, minori vi resilirent: hinc imminuta esset velocitas atque attritus, et proinde ab hac causa caloris incrementum non haberetur. Maltum autem ad id facit copia olei in sanguine, adeoque partis illius quæ rubra dicitur, quæque et ferrum habet admixtum, et ignei elementi sedes est præcipua: hac enim prædominante, quæ facile rarescit minimis de causis, naturalis calor incrementum suscipit. Quæ vero huic caloris augmento occasionem tribuant, præter violentum corporis motum et febres, ea nobis alibi (n. 178.) dictum fuit. Contrariæ conditiones et causæ naturalem calorem plus minus imminuunt.

*Unde pravus odor.*

458. Perspirabile, sudor, urina, anima, sputum, demum excreta quæcunque si male oleant, pravus odor ab humoribus stagnantibus et corruptis pendet, tamenquam a suis pe-

Caldani Pathol.

D d

cu-

culiaribus causis. Igitur quicquid olea acuere potest, siveque phlogiston et alcali volatile evolvere; quemadmodum sunt inedia, motus nimius, calor excedens, aut acris humor sive intra sanguinis massam, et primum in alimentorum tubum, invectus, sive in ipsa humorum massa ex causa aliqua evolutus, aptum erit ad naturam fluidorum sic mutandam, ut ea pravum spirent odorem.

*Unde coloris mutatio.*

459. Corporis etiam superficies, quæ in oculos incurrit, mutatur aliquando in cute, in labiis, in lingua, in faucibus, in oculis, ut naturali amissio colore, vel pallidum, vel flavum, vel viridem, vel lividum, vel rubrum, vel atrum adipiscatur. Hæc mutatio coloris aut pendet a singulari crassitie in minimis superficiebus humorum per harum partium vasa decurrentium, quæ porro superficies vel eos peculiares radios ab illabente luce separant reflectuntque, vel lucem ipsam incidentem vibrant diversimode; aut coloris mutatio ita determinatæ phlogisti quantitati debetur, ut cum ex quorundam sententia, nullus esse color videatur ubi nullum est phlogiston, ita color ipse intensor sit seu vividior in ratione quantitatis ipsius phlogisti. Quicquid sit, superficies illæ, quæ pallidum colorem exhibent, fiunt a serosa colluvie, a frigore, et ab iis omnibus, quæ aut seri copiam in sanguine augere

gere possunt , aut a minimis cutis vasculis sanguinem repellere : quæ porro flavum inferunt colorem , ab acrimonia biliosa promanant : quæ rubrum , a sanguinis copia et præsertim rubræ partis prædominio : quæ viridem , lividum , atrum , tum a pejori bilis qualitate , tum a sugillationibus , igne , gangrenis et similibus . Atque hæc porro omnia id non parum videntur confirmare ; videlicet colorem per gradus intensiorem , a majori phlogisti copia proficiunt .

460. Symptomata , quæ pertinent ad partium duritiam , laxitatem , augmentum , decrementum , et superficie mutationem , ad morbos nictæ cohæsionis in solidis , vel imminutæ Cap. IV. ) , tum et ad morbos organicos Cap. V. ) merito referuntur . Eorum propterea tractationem consulto prætermittimus , ne , quod in proverbio est , crambem recoquere (ideamur .

F I N I S :

I N D E X  
R E R U M .

A

- A**erratio humorum proprio loco , & morbi indo-orienti-  
di . pag. 102.  
**A**cidum quid dicitur , quid alcalinum , & neutrum. 151.  
**A**cquisiti morbi . 29.  
**A**crimonia an in humoribus observetur . 136. 164. quid  
sit , & quot ejus genera . 140. mechanicæ definitio ..  
141. Chemicæ . 142. Origo acrimoniæ præcipua . 144..  
**C**aufæ . 145. modus agendi illarum causarum . 147..  
Quare acrimonia non facile nascatur . 149. **E**ffectus  
acrimoniæ . *ibid.*  
**A**crimoniæ acescentis causæ . 154. Effectus . 155.  
\_\_\_\_ alcalescentis causæ . 157 Effectus . 159.  
an a putrescente differat . 160.  
\_\_\_\_ ammoniacalis causæ & effectus . 173.  
\_\_\_\_ austerae causæ . 157.  
\_\_\_\_ muriaticæ causæ . 166. Effectus . 169.  
\_\_\_\_ putrescentis causæ & effectus . 162. 163.  
**A**crochordones verrucarum genus . 303.  
**A**ctio quid sit , quomodo a facultate differat . 3.  
**A**cuti morbi . 32.  
**A**dnatæ vitia . 312.  
**A**er præcipua cum valetudinis turba morborum causa . 194.  
Aeris calidioris agendi modus . 195. Morbi inde na-  
scentes . 196. Aeris frigidioris agendi ratio . 197. Mor-  
bi inde nascentes . 199. Effectus varii in corpore vali-  
de sese movente . 200. in quiescente . 201. Aeris hu-  
midi agendi modus . 202. Effectus inde nascentes . 203.  
In pulmone . 204. Aeris humidi & frigidi ; humidi &  
calidi . 205. Sicci effectus . 206. Num aer plus minus  
gravis nocere queat . 207. Agendi modus aer gravis .  
208. Effectus inde provenientes . 209. Aeris minus gra-  
vis .

R E R U M.

421

vis. 211. Effectus aeris rarioris. 213. mutationes aeris  
ex anni temporibus. 215.

Aeris, ex suis, quibus in corpore continetur, locis in  
alia erumpentis, effectus. 106.

Albugo quid. 320.

Alcalicum quid dicatur. 151.

Alimenta frequentem morborum causam fistunt. 225. Num  
excessus in copia alimentorum assignari possit. *ibid.*  
Quæ mala a nimia copia alimentorum. 226. Quæ ab  
eorundem inopia. 235.

Alimentorum coctio quot modis lœdatur. 389.

Alphos quid. 300.

Amaurosis definitio. 319.

Amastomosis cavitatis auctæ species. 72.

Aneurismatis definitio. 72. Spurii. 103.

Animales facultates quæ sint. 7. Quid ad eas perti-  
neat. 8.

Animalium functionum symptomata. 352.

Animi affectiones multos morbos producunt. 248. quæ  
nobis maxime sint infensæ. 252. Quomodo generatim  
agent. 259.

Anorexiæ definitio. 383.

Anxietatis descriptio. 291. Species. 292. Causæ. *ibid.*  
& seq.

Apèpsia quid sit. 389.

Apnææ descriptio. 367.

Appoplexiæ definitio. 353. Ejus causæ & sedes. 355.

Apposita quid sit. 383.

Appetitus quot modis lœdatur. 383. Causæ appetitus im-  
minuti vel sublati. 384. Aucti. *ibid.* depravati. 386.

quæ in humoribus copia quibus causis minuantur. 83.

Artificum morbi an differentiam constituant. 47.

Asphyxia quid sit. 381.

Asthma quid sit. 367. Ejus species. 368. Causæ. 369.

uditus depravatio quid proprie sit. 331

Symptomata. 322. Aucta ejus sensilitas. *ibid.*  
Causæ quæ auditum acuunt. 323. Quæ ob-  
tundunt. 327.

## B

**B** Ilis evacuatio nimia, aut impedita, quæ mala adducat. 264.

— Aberrantis effectus. 107.

Boethaaviana sententia de inflammatione examinata. 111.

Bombus quid sit. 331.

Bradypepsia quid sit. 389.

Bulimos seu fames bovina. 384.

## C

**C**eli nomine quid veniat. Varietates ejus & morbi inde nascentes. 214. 215.

Caloris incrementum unde oriatur. 286.

Carunculæ lacrymalis virtus. 311.

Carus quid sit. 358.

Cataractæ definitio. 316.

Catarrhus suffocans. 235.

Causæ morborum generatim. 175. Quid pro causa sumatur. 176. Divisio causarum in externas & internas. 180. In antecedentes & coniunctas. 181. in necessarias & non necessarias. 182. In prædisponentes & occasio- nales. 183. In remotas & proximas. 184. Causa proxima raro simplex. 187. Quomodo ejus natura rite cognosci queat. 190.

Cavitatis auctæ species quintuplex. 72. imminutæ qua- tuor. 73.

Cæliaca affectio, ejus causæ. 401.

Cephalea & Cephalalgia quid. 290.

Choleræ definitio. 397. Ejus causæ occasionales. 398.

Chronici morbi. 32.

Chyli aberrantis effectus. 107.

Cibi, nimia copia ingesti, qualia mala ventriculo adserant. 226. Ciborum defectus quid faciat. 233.

Cissa, aut Citta, idest, appetitus depravatio. 381.

Clavus aut ovum quid. 290.

Cohærentiæ gradum in fibris determinare difficile. 59.

Cohæsio in humoribns quomodo & quot modis nute- tur.

# R E R U M.

423

- tur. 80. & seq. Effectus inde profluentes. 106. & seq.
- Colicus dolor quid sit. 405. Species ipsius, & causæ. *ibid.*
- Color in superficie corporis unde mutetur. 418.
- Comatis causæ, species. 358.
- Connati morbi. 29.
- Connexionis & situs partium vitia. 17. Causæ vitiorum istiusmodi. *ibid.*
- Contagiosi morbi. 42.
- Continentes morbi. 35.
- Continui morbi. 36.
- Cor, quot vitiis præcipuis vexari queat. 372.
- Corporis & mentis reciproca actio. 248.
- Crampus quid sit. 364.
- Crassamentum in humoribus quomodo & quibus augeatur. 84.
- Cutis vitia. 301. Quot modis tactum lœdant. 302.  
& seq.
- Cynorexia seu faines canina. 384.

## D

- D**Eglutitio quibus causis lœdatur. 389.
- Delirium quid sit. 346. Quot ejus species. *ibid.*
- Deuteropathici morbi. 27.
- Diæresis, cavitatis auctæ species. 72.
- Diabetes quid. 268.
- Diapedesis, cavitatis auctæ species. 72.
- Diaphtora quid. 390.
- Diarrhœæ definitio, & causæ. 402.
- Dispñæ. 367.
- Dolor quid sit, & unde oriatur. 285. Effectus ejus. 288.
- Dyspepsia quid sit. 390.
- Dysenteriæ descriptio. 404.
- Dysorexiæ definitio. 384.
- Dysuria. 411. Ejus causæ ad quot classes referri possint. 413.

## F

- E**Cchymosis. 103.

D d 4

Ectro-

- Ectropion quid . 321.  
 Egylops quid . 320.  
 Elephantiasis definitio . 302.  
 Emprostotonos quid sit . 363.  
 Enanthis quid sit . 320.  
 Endemici morbi . 43.  
 Ephelis quid sit . 300.  
 Epidemici morbi . 43.  
 Epilepsia . 361. Ejus causæ . *ibid.* & 362.  
 Epiphora quid . 320.  
 Epulis quid . 344.  
 Exanthematum ortus . 103.  
 Excreta & retenta quid in corpore præstent . 260.  
 Exhalationes , per aera dispersæ ex quibus fontibus profi-  
 ciscantur . 214. An exhalationes metallicæ in aere in-  
 fint . 218.  
 Eustachianæ tubæ vitia . 328.

## F

- Facultatis definitio . 3. Tria facultatum genera . 4.  
 Fæces retentæ , quæ mala producant in corpore robusto .  
 265. in debili . 266.  
 Fames bovina , canina , lupina . 384.  
 Fatuitas quid sit . 347. Ejus causæ . 350.  
 Fibra laxa quæ dicatur . 61. Causa proxima laxitatis .  
*ibid.* An fibra laxa sit etiam debilis . *ibid.* Causæ di-  
 sponentes . 63. Effectus 64.  
 —— nimis cohærens quæ dicatur . 65. Causa proxima  
 disponens . *ibid.* Effectus . 66.  
 Fissile & fragile in partibus duris. Quid de iis censem-  
 dum . 68. 69.  
 Fluida an lædi possint sine vitio solidorum . 54.  
 Fluiditas humorum quot modis mutetur . 80. imminua-  
 tur . 81. augeatur . 82.  
 Fluidum quid sit . 79. Classes fluidorum animalium , &  
 principia eorum . 80.  
 Fluxus cæliacus , ejusque causæ . 401.  
 Functionis definitio . 3. Quale esse debeat functionum ex-  
 ercitium in valetudine . 9. Function læsa quid apud non-  
 nul-

R E R U M.

425

- nullos . 10. Quot modis functiones lædi possint . 11.  
Quibus indiciis sese præbeant . 19.  
Functionum naturalium symptomata . 383. Vitalium .  
366. Animalium . 352.

G

- G**audii effectus . 253.  
Grando quid . 320.  
Gustus , quot modis lædi possit . 340. Quæ causæ eum  
acuant . 341. Quæ debilitent , tollant , depravent . 342.  
Gutta serena quale vitium sit . 319.  
Gutta rosacea quid . 301.

H

- H**æreditarii morbi . 29.  
Hemeralopia quale vitium sit . 315.  
Hemicrania quid . 290.  
Hemiplegiæ definitio . 354.  
Humorum morbi , ex cohæsione aucta vel imminuta . 79.  
ex illorum copia . 91. ex aberratione . 102. Ex motus  
vitiis . 127. ex prava humorum qualitate . 136. 150.  
Humorum morbidorum propriis locis aberrantium effe-  
ctus . 109.  
Hypopion quid sit . 314.

I

- I**Diopathici morbi . 26. 27.  
Iliaca affectio . 407. Causæ . 408.  
Impetigo quid sit . 301.  
Inflammatio flava unde oriatur . 125.  
Inflammationis theoria Boerhaaviana examinata . 138. &  
seq. Conjecturæ de ejus morbi sede . 119. de causa . 121.  
ntermittentes morbi . 35.  
ntussusceptio intestinalium quomodo fiat . 409. An semper  
affectionem Iliacam producat . ibid.  
ræ definitio , ejusq. effectus . 256.  
schuriæ definitio , species . 411. Causæ . 413.

La-

## L

- L**abyrinthi auris vitia . 329.  
 Lacrymalis glandulæ vitia . 308.  
 Læsiones omnes , quæ in morbis occurunt , ad quot clas-  
 ses referri possint . 11.  
 Lætitiae effectus . 254.  
 Leipothymiaæ , & Leipopsychiaæ definitio . 381.  
 Lentigo quid . 300.  
 Lentis crystallinæ vitia . 316.  
 Lepræ definitio . 301.  
 Lethargus quid sit . 358.  
 Leuca quid . 300.  
 Lienteriæ definitio . 399. ejusq. causæ . 400.  
 Lymphæ aberrantis effectus . 104.

## M

- M**agnitudo partium aucta vel imminuta proprie mor-  
 bos non constituit , sed deformitates . 76.  
 Malacia quid . 384.  
 Maligni morbi . 40.  
 Maniæ & Melancholiæ definitio . 347. Earum causæ . 348.  
 349.  
 Masticatio quibus causis lædatur . 388.  
 Medici officium , & quid ad illud requiratur . 17.  
 Medicina systematica qualis sit . 16.  
 Melas quid . 300.  
 Mens . An medicus debeat de statu mentis ægrotum quic-  
 quam cogitare . 14.  
 — A læso ventriculo sæpe male afficitur . 228.  
 Mentis & corporis reciprocæ actio . 248.  
 Mentagræ definitio . 302.  
 Metus definitio & effectus . 217.  
 Mœroris definitio & effectus . 255.  
 Morbi definitio . 2. Natura . 1. & seq. Differentiæ mor-  
 borum . 25. Accidentales . 26. ab ætate . 31. a  
 sexu . ibid. a tempore anni . 34. Essentiales . 50.  
 — Humorum . 79. & seq.

ex

- ex rubro sanguine aut sero in vasa minorum generum traducto. 111.  
 — Ex vitiis motus in humoribus. 123.  
 — Ex prava humorum qualitate. 136. & seq.  
 — Ex humorum copia. 91.  
 — Idiopathici, Sympathici, Deuteropathici, Proto-pathici. 26. Hæreditarii, Connati, Acquisiti. 29. Acuti, Chronicci. 32. Remittentes, Intermittentes, Continui. 35. Continentes. *ibid.* Periodici, Recidivi. 36.37. Magni, Parvi 38. Compositi, Simplices, Benigni, Maligni. 39.40. Pestilentes. 41. Contagiosi, Endemici, Epidemici. 42. 43. Sporadici, Legitimi, Spurii. 44. Retrogradi. 46.  
 — Organici, seu instrumentarii. 70. Causæ quæ hos morbos exsuscitant. 74. 77.  
 — Simplicissimi ad simplicissima solida pertinentes. 58. Morborum causæ generatim. 179. Speciatim. 194. & seq.  
 — Tempora varia. 32.  
 Motus humorum quot dentur species. 127. Quot modis perverti possit. 128. Causæ motus aucti. 129. Effectus. 132. Causæ motus imminuti. 133. Effectus. 135.  
 — Quot a Medicis modis consideretur. 236. Quot bona adserat. 237. Aucti motus effectus. 238.  
 — Vitia. 353.  
 Mucus in humoribus ex quibus causis accumuletur. 85.  
 Muriatica acrimonia quænam sit. 166. Ex prædominio salis nascitur. 167. Effectus hujus acrimoniæ. 169.  
 Musculis quid accidat in motu. 237.  
 Mydriasis quid sit. 320.  
 Myopia definitio. 318.  
 Myrmecia verrucarum genus. 303.

## N

- N<sub>E</sub>vi quid. 301.  
 Natura. Quid per naturam alicujus rei intelligatur. 2.  
 Naturales facultates quæ sint. 4. An sine vitalibus esse possint. 5.  
 Nausea a quibus causis oriatur. 395.  
 Neutrum quid dicatur. 151.

Non-

- Nonnaturales res quæ & quot dicantur. 194.  
 Nutritii humoris loco aberrantis effectus. 110.  
 Nubecula quid. 320.  
 Nyctalopia quid sit, & quæ ejus causæ. 315. Et not.(1).

## O

- O**cclus Elephantinus quando adesse dicatur. 314.  
 Odii definitio ejusque effectus. 256.  
 Odor pravus unde proveniat. 339.  
 Olfactus depravatio. *ibid.*  
 —— Symptomata. 332. Quæ eum acuant. *ibid.* Quæ obtundant. 334.  
 Opisthotonus quid sit. 365.  
 Orbital vitia. 308.  
 Orexis cynodes seu fames canina. 384.  
 Organicæ partes quæ dicantur. 52.  
 Orthopnea quid. 367. Ejus causa. 368.

## P

- P**Alpebrarum vitia. 309.  
 Palpitatio cordis quid sit, & quibus phænomenis sese præbeat. 373. Quæ ejus natura, causæ. 374. Cur in variis morbis sese manifestet. 376.  
 Pancreatis lympha non secreta, aut nimia, quæ mala adducat. 263.  
 Paralysis, & ejus differentiæ. 354. Causæ & sedes. *ibid.*  
 Paraphrenitidis definitio. 350.  
 Paraplegiæ definitio. 354.  
 Porulis quid. 344.  
 Passionis iliaca descriptio. 407. & seq.  
 Pathemata animi multos morbos producunt. 148. Quæ nobis maxime sint infensa. 252.  
 Pathologia quid, & quot ejus partes. 1.  
 Periodici morbi. 36.  
 Perspirationis nimia mala, ut & immunitæ aut retentæ. 269.  
 Pestilentes morbi. 41. An inter hos & Pestem discrimin intercedat. 42.

Phæ-

# R E R U M.

429

- Phænomena morborum in diversas species dividuntur. 19.  
Unde illorum diversitas & copia . 20. Quibus præsidiis  
diversitatis causæ cognoscantur . 21.  
Phlyctenæ quid. 321.  
Phrenitis quid sit. 347. Quæ ejus causæ . 350.  
Picæ definitio . 385.  
Pinguedinis aberrantis effectus . 105.  
Plethoraæ species variæ . 92. Causæ . 95. Effectus . 98.  
Polyporum variæ species . 336.  
Potulenta modum excedentia quæ mala producant . 232.  
Presbyopia quid sit . 318.  
Protophatici morbi . 27.  
Pruritus definitio . 303.  
Psorophtalmia . 321.  
Pterygium morbus corneæ . 313.  
Pulsus naturalis. Quæ conditions ad eum requirantur .  
27. Intermittens quis sit . ibid. causæ pulsus intermit-  
tentis ad quot genera referantur . 379. Pulsus defectio  
in quibus affectionibus accidat . 381.

# Q

- Quietis effectus & mala inde nascentia . 240.

# R

- Anula , seu Batrachus . 344.  
Recidivi morbi . 37.  
Remittentes morbi . 35.  
Res non naturales quæ & quot dicantur . 194.  
Respirationis symptomata . 366. Difficilis aut sublatæ cau-  
sa . 369.  
Retenta & excreta quid in corpore præstent . 260.  
Retinæ vitia . 319.  
Rnexit quid . 321.  
Risus sardonicus unde nomen habeat . 364.  
Ructus quid sit , quot ejus species . 392. Quæ causæ . 393.

Sal

## S

- S**Al nativus quomodo in humoribus nascatur. 171.  
 Sales in animali corpore a vitæ viribus non mutantur .  
 169. not. (1).  
 Salivæ usus. 263. Non secreta aut præter modum scre-  
 ta ; multa mala adfert. *ibid.*  
 Sanguinis partes . 80. Aberrationes , & vitia inde nata .  
 102. 103.  
 —— Evacuationes nimiaæ quæ mala producuntur . 260.  
 Quæ suppressæ ejus evacuationes . 262.  
 Sarcosis definitio . 313.  
 Scabies quid sit . 301. Ejus repercussio rarissime a Medi-  
 cis tentanda . 46. not. (1).  
 Scotomia quid sit . 360.  
 Seminis effusio nimia , aut ejus retentio , mala producunt  
 varia . 271.  
 Semina morborum quæ dicantur , & quando morbos fa-  
 ciant . 192.  
 Sensibiles qualitates quænam sint . 345.  
 Senitus interni sunt ad functiones animales referendi . 8.  
 Sensuum internorum symptomata . 345.  
 Simplicissimæ partes quænam sint . 51. Quot vitiis sint  
 obnoxiae . 58.  
 Singultus quid sit . 391. Ejus causæ . *ibid.*  
 Situs & connexionis partium vitia . 77. Vitiorum istius-  
 modi causæ . *ibid.*  
 Solidæ partes an lœdi possint absque ut fluida etiam lœ-  
 dantur . 53 & seq.  
 Somnus . Num in eo sensus & motus omnes quiescant .  
 344. Unde nascatur , & cujusnam sit utilitatis . *ibid.*  
 Quæ mala nimii somni . 245. an mensura excessus in  
 somno assignari queat . 246.  
 Spasmi definitio . 363. Causæ . 364.  
 Spasmus cynicus . *ibid.*  
 Sporadici morbi . 44.  
 Staphyloma quid sit . 314.  
 Stenochoria quid sit . 73.  
 Strabismus unde oriatur . 312.

- Stranguria quid sit. 411. Ejus causæ ad quot classes referri possint. 413.  
 Sudoris nimii, ut & retenti mala. 270.  
 Sympathici morbi. 27.  
 Symphisis definitio. 74.  
 Symptoma quid sit. 275. Ejus indoles. *ibid.* An symptoma & morbus sint unum & idem. 276. Species variæ. 277. Quid symptoma morbi. *ibid.* Causæ. 278. Symptomatis. 279. Quæ dicantur Epigenomena seu supervenientia. 280. An hæc cunctis morbis adjungantur. 281. Quæ symptomata critica. 283. An symptomata sint etiam signa. *ibid.*  
 Syncope quid sit. 381.  
 Synizesis definitio. 74.

## T

- Actus quando lædatur. 299.  
 Tenesmi definitio. 404.  
 Terroris definitio ejusque effectus. 257.  
 Tetanos quid sit. 363.  
 Theoria medica quales utilitates adferat. 21.  
 Thlipsis quid sit. 73.  
 Thymia verrucarum genus. 303.  
 Tympani vitia. 328.

## V

- V Apores per aera dispersi, ex quibus fontibus profici-scantur. 213. Diversitatis ipsorum aliæ. 216. Experimenta & observationes, quibus vapores in aere inesse demonstratur. 217. Morbi, quos producunt. 218. Indoles vaporum quomodo cognoscatur. 221.  
 Aricis definitio. 73.  
 Venereæ cupidinis effectus. 255:  
 Lentienti an vapores adferant & exhalationes. 220. Actio ventorum in pulmones. 222. Morbi inde provenientes. *ibid.* Actio ventorum in partes alias corporis. 223.  
 Ventriculo quid accidat a nimia ciborum copia. 226.  
 & seq.  
 Verrucarum varia genera. 303.  
 Vertiginis definitio, causæ, species. 359.

- Vigiliæ definitio. Phænomena . 242. Mala ex vigiliis  
nimis consequentia . *ibid.* & 243.  
Visus Symptomata . 308. Depravatio . 317.  
Vita qua in re ponatur . 4.  
Vitales facultates quæ sint . 4. Num sine aliarum admi-  
niculo esse queant . 5. Quid ad earum exercitium re-  
quiratur . *ibid.*  
Vitalium functionum Symptomata . 366. & seq.  
Vitiligo quid . 300.  
Volvuli definitio . 407.  
Vomitus definitio , & ejus causa . 394.  
Urinæ aberrantis effectus . 108.  
——— Retentæ mala . 267. Quæ nimis ipsius excretio-  
nis . 268.  
——— Viarum Symptomata . 411.  
Urinatorum phænomena . 210.

F I N I S.



